

民國叢書

第二編

· 81 ·

歷史·地理類

方志今議

黎錦熙著

方志考稿甲集

瞿宣穎著

上海書店

瞿宣穎著

方志考稿甲集

本書據商務印書館版影印

方志考稿序

烏乎，佇中區以玄覽，馳思乎千古之深，極望乎九域之邈，何吾民族之情態蕃變萬殊而不可端倪也。據一室而欲概所見聞，據所見聞而欲祛其病苦以蘄於進境，幾何其不錯愕而敗駭也。近代物質文明所集中之都市，類皆日競於新而不可遏，至於竭心力以赴之猶若不及。若一涉足一迴顧都市以外數里之郊，則其生活其智識乃墮都市居民之後，無慮數百年之迴絕。其道里相去彌遠則其程度相絕彌甚。豈惟都市之與鄉野爲然。卽一都市之中，其人民之思想或絕塵而馳，或猶膠附於高曾所詒而不少變。相去亦輒甚遼遠。其怪異不循理性之現象，則顯然可識矣。

吾中華民族能自認識了解其民族之特性邪。在此怪異不循理性現象之下，孰能認識之而了解之。不能認識了解而曰持一切之法可

以束縛馳驟之，決無是也。廣輪若此其大也。歷史若此其永也。吾民族中一言一動一衣服一飲食蓋莫不有其歷史與地理上之影響，而決非偶然成就。今欲於凌雜叅錯之中尋一綫之脈絡，以知吾民族之思想行動受害自於何方。則當上探時間之演化以明其層疊之迹，下循空間之播蕩以究其感受所由。然後相疾之所宜以疏藥餌，因水之所近以立隄防。衝抵扞格之患庶乎其可以稍殺也。嗟嗟，吾國人之不能認識了解吾民族性者蓋有由矣。無真史故也。史不能明全體社會活動之迹，而徒措意於一二人之殊功美行。亦猶乎吾曹今日但知環吾左右者之思想行動大抵從同。而不知距吾曹稍遠者，其思想行動乃膠附於數百千年之前而少所變也。夫史者非如幾何之直綫，但有長度而無寬度。乃譬之石之入淵，且下行且旁散爲波狀。往時之史僅得下行之狀而於其波動未嘗一顧焉，所以爲無真史也。

然而有差近焉者，則方志是矣。方志者地方之史。有通史以觀其會通，有斷代之史以析其時代，則縱貫與橫剖之象皆具焉。有地方之史以規其區域，然後於縱貫之中得橫剖之象焉。古昔國史不可得詳。然自常璩華陽國志以來，大至方州，小逮村鎮，禹域之廣，幾無無志者。雖其良穢不齊，然吾曹生於載籍荒闕之日，猶得勉執殘編以蘄吾向所云明其層累之迹究其感受所由者，端惟此林林數萬卷之方志是賴。讀方志然後知種族之分合，然後知文化之升降，然後知民力之消長，然後知吾曹所習見習聞者之外猶有若彼若此者存也。

雖然，方志之涵史義，固亦自近百餘年來而漸然。宋元方志存者寥寥。其義法雖不盡醇，猶不失記事纂言之意。至於有明，因修一統志而後徵各省志書，俗人不學，相沿以方志爲地理之記。甚且以爲題名頌德之書，攬勝抒情之冊。兔園謬解，場屋劣文，官

吏視爲具文，鄉紳資其升斗，談者相戒，擯勿寓目久矣。自顧炎武編讀各省志書而有郡國利病書之輯，承學之士始漸知斯學之要。會乾隆樸學盛興，畢阮諸公開府大邦，力振文業。有司承望風旨，大師如戴震洪亮吉孫星衍武億之倫，遂得傳食名都，經年載筆。勒成諸志，頗復斐然。然諸君勤於考古而忽於紀實。實未能真知方志之體也。惟章學誠以獨到之目光，萃畢生之精力，深明方志之當古國史，其纂述宗旨在乎刊除浮僞發揮實狀，使後人得以追覩前事，纖悉無遺。以今日之語譬之，真所謂能寫全體社會活動之迹者。雖其所撰不能盡如所期。然其發明義例，振起浮俗，使方志之用增其偉大。章氏之績，可謂邁越尋常者矣。

自章氏之學聞於世。操觚之家得其緒論，所撰之志，類有可觀。乾隆末葉以迄於今，卷帙頗復非少。然迄於晚近，學術彌光，章氏之說，猶有未盡厭時代所需者。故執章氏之說以馭吾國之方志

，在今日猶多未合也。

雖然，此非章氏之過也。章氏建州縣請立志科之議，蓋深有慨於平日地方政事之不存，臨事網羅散佚之難備。則雖有至美之義法不能得至良之信史。而孰料言之百餘年，不但保存文獻之法無人加以講求。且摧毀之湮滅之惟恐其不漸盡。一旦奉簿書之督責，則虛應功令相率爲僞，漫錄豪無根據之冊籍，不憚公欺天下後世之聽聞。此地方官吏所爲也。若夫鄉里人望，則又徒營營於聲氣之奔競，耳目之炫耀，於裝點門面之具出之惟恐不速，於考見史迹之質，匿之惟恐不深。舉世茫茫，所見如此。宜乎良志之不易有，而考史者輒爲索然氣盡也。

然而就現存之方志歷數其裨益治史者之途，猶有六焉。社會制度之委曲隱微不見於正史者，往往於方志中得其梗概。一也，前代人物不能登名於正史者，往往於方志中存其姓氏。二也。遺文佚

事散在集部者，賴方志然後能以地爲綱有所統攝。三也。方志多詳物產稅額物價等類事實可以窺見經濟狀態之變遷。四也。方志多詳建置興廢可以窺見文化升降之迹。五也。方志多詳族姓之分合，門地之隆衰，往往可與其他史事互證。六也。凡此六端，皆爲治近代史者所亟欲尋究，而方志皆往往足供焉。廣哉其所苞舉，富哉其所沾溉也。

吾曹而欲稍稍認識了解吾民族乎。則此浩如煙海之方志不可不一瞻望其涯淡也。夫使乾隆四庫開館之日，能廣收方志，一例編爲提要。抑或有如朱彝尊之倫，有如經義考之作，以收網舉目張之效。則讀書者循其所指以獲其所需。豈不甚便。然而前修皆未嘗措意也。此無他，往時無公共藏書之所。方志之度藏固已不易。試歷各省而求諸縣志，其能每縣得其一種葆存無缺者已尠矣。遑問其能集諸本而並存之，以權其美惡。一人精力有限，豈能盡如

顧炎武周歷以求。今日號爲藏志最富之區，斷推國立北平圖書館。蓋承前代志館徵集所遺，往往有珍貴之本爲其本縣修志時所未見者。然所收偏於乾隆以前，而乾隆以後之新志彌復可珍，不宜割棄。近時上海涵芬樓亦聚千數百種則新志亦漸備焉。北平圖書館所藏略見於古學叢刊所刊布之清學部圖書館方志目，而涵芬樓亦輯有目錄。外此私家藏志者尙不乏人，雖更無編目以問世者，然求書倍易於往時矣。藏書之便如此，而提要之作猶闕然有待。非一憾歟。

余之得略窺方志之學也，實初啓於髫齡。先君文慎公輶車屢出，所至必檢閱其舊志。試事報竣，捆載以行。歸田以後尙餘數巨篋，自余能識文字，常竊取而繙帙之。樂其易讀，他固無所知也。歲月侵尋，驅馳四方，田廬蕩然，藏書煨燼，惓惓故業，未嘗或忘。比年忝據燕京清華諸講席，漸得觀其圖書館之藏書，所見

益富。輒思每種撰一提要，以備遺忘。然銖積寸累，程功殊緩。今歲之春，謁宜興任振采先生於天津。任公世富藏書，近更竭十許年力，聚方志千五百種。分別部居，釐然不雜。且蓄志搜集，久而不懈。往往有瓌異之本，爲北平圖書館所未有者。且側重近著而不虛慕好古之稱，切於實用，尤非尋常藏書家所及。聞余欲撰提要之說而躍然聽之。遂盡出其所藏，恣余檢閱，相約成書，刻日爲程，然膏不輟。余每至天津則適館授餐，隨義商榷。家居則策書相就，郵問稠疊。雖糜金費日不惜，惟以促書之成。烏乎，懷此有年，得賢主人傾心相助而後克舉，文人相知之感，何可無也。雖然，任公亦豈姑欲余一書之就而已。又豈姑欲炫耀其所藏以爲名而已。蓋深知方志之有裨於史學，而可以蘄至於吾向所云明其曆象之迹究其感受所由，以漸爲改造吾國家之指導。是以樂與余從事而不怠也。

提要之作，古今無以逾四庫矣。其文字之流暢，評判之精充，足爲永式。余之始輯是書，蓋頗思步其繩尺而稍稍隨宜通變於其間。大抵每書必首嚴其名稱，次述其纂修之年月與纂修者之姓名，次述其舊志之沿革，次述其類目，次辨其體例，最後評其得失。尤注意於其所苞之特殊史料。將使讀者開卷而了然于其源流所自與其內容所涵。方志不可得盡觀，觀此一編則亦庶乎可以按圖索驥而無望洋向若之歎。然余之草此書，僅爲隨筆筆記之體，以視朱氏經義考，雖不敢望其宏博，形式固猶近之。若紀氏之提要，則實非淺率之所敢比倫。茲姑承用朱氏之名謂之方志考稿，庶幾旦夕不填溝壑留待他日寫定云耳。

初稿將成，欲就正於賢達，則非暫付模印，其道無由。爰先檢舊直隸奉天吉林黑龍江山東河南山西江蘇八省，署曰甲集。凡爲六編以貢諸當世。

方今藏志之家，所收豐衍，固不止是書之所最錄。以余隘聞蒼識，烏敢望悉取而見之。今茲所錄，但以任氏天春園所藏者爲限。是書既出，倘有聞而興起，假余以紬繹之會，俾得續有所成。則固所願而不敢請。其或別起新例，糾彈漏失，更有以勝余倍蓰者，則茲書道可覆瓿。余亦未嘗不馨香企望也。

民國十九年十一月瞿宣穎兌之父自叙於北平

方志考稿序二

古今載籍極博，一人之所得殆真如飲河滿腹之各有分限存焉。卽其所得而終身研求之有不能盡者，況過此哉。鳳苞少小粗解文字，卽好聚書。長隨宦轍，獲奉教於當世賢達，始稍闕學問之藩，而頻歲奔走，學業漸荒，將欲收視返聽稍尋墜緒，則歲月侵尋，已鄰炳燭之境。竊念方志一門，爲國史初基。典章制度之恢闔，風俗土宜之纖悉，於是焉備。乾嘉諸老，樹立宏達，突越前修。而敝習相沿，視等具文，白筆黃茅，蕪濫極目。若翦其榛楛，擷其英粹，有如亭林顧氏所爲。不賢識小，庶幾于史學有一得之獻。邇年謝事，杜門却掃，發篋中所藏諸志先爲編目。所未見者，百計訪求。友朋馳訊，必以相屬。北極窮邊，南屆海滙，郵裏絡繹，寢以日多。生平所見，已公布之志目，學部圖書館所藏倬乎

不可及矣。涵芬樓同此編纂，久而不懈，所得則頗相頡頏。四方交好，多慫恿以所藏志目問世者。顧私意編目有二難焉。各省修志，近者數年，遠者百餘年。其時代先後，若爲前茅，若爲後勁，必須排比嚴飭而後脉絡可尋優劣可論。則編目但稱紀元不足以盡其用。一也。操觚之士名有隱顯之殊，主修之官任有先後之別，編目但稱某人修，又不能得其實。二也。欲去二難，則語焉宜詳，非僅逐書舉目而已。至如體例之精疏，事實之疎密，日夕汎覽，遂多旁通。得失之林。胥可指數。並宜泐入一書，以便來者。然以人事卒卒，茲事體大，畜於心而未敢率然舉也。近晤瞿君兌之，知其亦從事於此。每閱一書竟，輒爲條記，略似直齋陳氏竹垞朱氏之體。雖不盡如余向所擬議，抑自有方志以來未有之盛舉矣。兌之講學諸校，借書而讀，多廢時日。余則發願盡出所藏，供其研討。郵遞紙墨寫官之費，亦余一力任之。兌之謙不敢名

其書曰提要，姑沿朱氏之稱曰方志考稿。凡余所藏諸志大抵已悉列其中。而綱舉目張幾于明備。兌之好學能文，根柢夙裕。復治歐西史學，能以精到之目光，繩舊志之違失。每植一義，犁然有當于人心。其補實齋所未及者，雖會稽復出，亦當爲之擊節。兌之自以爲讀書記之流，余則謂允爲書目中之上乘。雖不必以著述自鳴，要爲今後治方志學者之津梁，不可廢矣。求書三十餘年，聚此數萬卷一旦得兌之爲之整比。其爲愉幸，何可言耶。

中華民國十九年十月宜興任鳳苞序

方志考稿序二

方志之學治乎史裁通於政理，其說倡自章實齋先生，卓然無以易也。自實齋闡明斯義以來，晚出之志雖不能盡如所期，而既知舊說之非，已漸呈改進之象。實齋論志諸篇中尤以吳郡志姑蘇志灤志武功志朝邑志靈壽志及姑孰備考書後七篇最爲深切。是七志者，夙負盛名，而修志家輒奉爲矩矱者也。自經指斥，遂鮮稱誦之而則倣之者，則此七篇之效亦略可睹矣。假使實齋當日就其所見之志悉加評論勒成專編，其效又當奚若。乃自實齋以後迄今百數十年間，未聞有繼其所業而措意及茲者。推求其故，約有三焉。舊存志書大率蕪穢，繩以史法，殆無完膚。概加譏評，恐傷忠厚。存而不論，又非所安。近出之志，作者見存。措詞質直，又慮賈怨。此不敢爲之者也。自昔藏書之家於方志非所注重，縱有藏

度，爲數不多。欲窺其全，殆不可得。既鮮憑藉，無自擇摭。僅據叢殘，又嫌陋略。此不能爲之者也。即或憑其勢位，足以得窺多數之方志矣。而一省之中自通志以逮於縣志，一志之中自始修以迄於數修，紛然雜陳，難以悉數。欲事鉤稽，甚費時日。成書匪易，得名偏難。背於恆情，誰樂爲此。此不願爲之者也。余往在北都，因修龍游縣志曾就部院及諸圖書館所存志書勤加參證。偶有所見，亦曾爲之筭記。僅得二百數十條，未能成書也。戊辰南歸，並此失之，居恒竊自耿耿。今何幸而得兌之先生是編也。兌之以淹通之才卓越之識，博稽廣覽以成斯編。視余往昔所爲既精且備。余書固宜覆瓿，則亡失亦不足惜矣。是編次第仍依清一統志，每篇先叙其編撰年代及姓名，次述其舊志源流，次述其卷數目次，次評其體例優劣，次約其地方沿革，最後評其得失，尤注意其所含之特殊史料。體裁既佳，考論亦當。其爲不朽之作，

有識皆知，無煩更說。乃必欲余以一言爲之序，自慙龔陋，本不敢承。顧以爲是編關於史裁與政理者至大，有不能不爲天下後世告者，請具言之。修志之業功侔國史。鄉曲無知，恆藉此爲沽名牟利之方，甚或爲徇知修怨之具。又以爲事屬一方，無與異地，縱騰簧鼓，終免譏彈。有此一編，足以破其謬見。則凡議修聘任以及采訪編撰諸事，自不敢輕易將之。其一也。修志之人不盡才智，所聞所見每被囿於方隅，孰是孰非恆不得其正鵠。亦惟就其所見所知步之趨之而已。此雖通病，抑亦情勢使然。有此一編則優劣既分。自能擇善而從，知所矜式。且意存褒貶，成規具在，亦不敢率爾操觚。其二也。四庫提要於他類之書不厭精詳，獨於此門采輯殊略。通計著錄及存目所收不過百五十部。其所評隲亦仍舊見，無所發明。他家著錄，宋志而外亦鮮論列。蓋猶有輕蔑之見存也。是編出而方志之學始釐然獨立爲一科，不容鄙視。是

實齋僅啓其端，至兌之乃竟其業。其三也。承學之士欲於斯學窺其門徑，而卷帙繁重每覺茫然。陳陳相因，讀之生厭，欲知美惡，別擇尤難。得此一編彙焉具備，孰得孰失，展卷了然，興趣既生，研求自易。編中又多含史料，尤與治史學者以參互之機兼通之益。其四也。方志爲國史要刪，實齋論之詳矣。往時國史多偏重皇家政治，且有專館掌之，猶有藉於方志。今者國史之業既無專司，而著作體裁亦宜略變。必當參用通志之例，廣載各地方社會情形，而不能偏重於中央政治，乃事理之當然，亦時勢所必至。若是則有賴於方志者益多。是編既注重特殊史料，則他日修史者得以注意取材之源。其五也。自近世以來，政法凌夷，雖屢變而不能中理合度協於人情。國事輓輓職是之由。雖其種因甚多。而秉政者不能深察民俗之所由成，與其所遺傳所蘊蓄所薰習所演進之跡，任情措置，亦其一端。然方志之蕪雜紛亂，亦實無絲使

秉政者得取以爲考鏡探索之資。故今日急務首在整理舊志，記其存佚，辨其精粗，詳加考求，俾便采取。由局部以窺其全，因會通而察其變。以爲他日立法施政之基而求達乎好惡同民之治。其六也。綜是六端，其關於史裁與政理之效蓋可逆睹矣。昔實齋之議修史籍考也，凡屬史部之書，鉅細不遺，悉登於錄。獨於方志一端厭其繁蕪病其難聚，謂可取者稍爲敘述，無可取者僅著書名，不及見者無庸搜訪。此與其平日所述稍有不符。而於作考之旨亦覺未愜。竊謂惟其繁蕪故應整理，惟其難聚故應搜尋，不宜畏難不宜苟簡也。此實千慮之失不能爲賢者諱也。余固有志焉而未之逮矣。兌之乃能舉人所不敢爲不能爲不願爲且並實齋所未爲者而毅然爲之，不數年間成斯巨製。發願之宏，成就之偉，度越尋常殊堪驚歎。不圖今日乃有斯人。其沾溉於來世功豈在實齋下耶。讀者若僅以尋常目錄之學視之，則淺之乎視此編淺之乎視兌之

矣。余是以不容已於言也。

庚午孟冬之月龍游余紹宋序於杭州寓居之寒柯堂

凡例

- 一 本書以舊直隸爲第一編，舊東三省爲第二編，山東爲第三編，河南爲第四編，山西爲第五編，江蘇爲第六編，總曰甲集。
- 一 歷來修志者往往不題紀元之號，但云某某府志某某縣志，若數本並陳，遂難分別，茲概依乾道臨安景定建康之例，題其始修之年號，若同一紀元而有二本，則並題紀元某年，此雖與其原題之名不符，非得已也，若原題續志補志之類無損大旨，則悉依而不改。
- 一 同名之縣若不冠以省名，則援引時難辨別，亦依前例輒爲加題。
- 一 見存方志以有清一代爲多，凡其次第仍依清一統志，其名稱亦然，而注今名于下，如直隸注今河北之類，一省之中，首

省通志次府若直隸州志，次縣若州廳志，次鄉若鎮志，其昔有今無，名號迭更者，未遑一一注明，避煩瑣也。

一 凡稱某官某人修者指其主修之長吏，若確知其執筆爲某人者，則兼稱某人纂，若兩人同具名者，則稱某某同纂，其長吏自撰者則直稱某官某人撰，其主修之長吏不止一人，則或稱某人繼前任修成，或稱某人等修，其執筆之人不具名者，則稱用某人稿，或請某人纂，隨行文之便爲之，而其大別如是。

一 學部圖書館方志目（本書簡稱學部志目）於某種下必稱何年刊本及某人序，其實既著某年所修，則某年所刊殆可不贅，今惟舊志重刊或元本未見而僅見寫本者始注明於下，至於舊志序文每多膚濫，其有無元不足道，今亦推其有關係者始述及之，以避屢見。

一 前代紀元屢見文中如明萬歷清康熙之類實鄰繁瑣，今多去其

一 有天下之號而稱之，覽者尋文自知先後，無取頻舉也。

一 稱人以字以官爵以里居恒致後人迷惘，今悉舉姓名，惟偶有習見之人，因行文之便不宜數稱其名微變其例，非有所軒輊也。

一 每篇大抵先述其編撰年代及姓名，次述其舊志源流次述其卷數目次，次評其體例優劣，次約其地方沿革，然依次排列，近於簿冊，妨於文體，故僅能示大凡而已，不必每篇皆如是也，其一地方而有數篇者，則詳於前不必詳於後，詳於後亦不必詳於前，合而觀之，自得其全也。

一 本書範圍無時代之限，宋元諸志悉應列入，然以人所習見姑從闕焉，明志中若康海武功志之類，已有章氏定評，發揮無贖，亦不繙贅，至於四庫所著錄者，頗多遺義，且見者亦希，則仍一例編次。

一 有不標方志之名而居方志之實者，亦應一體列入，然追源溯流，應以華陽國志爲稱首，茲姑依四庫之例而取斷焉，近代

鄉土志文獻志之流，實爲方志別名，悉列不加疏剔，而名山志則暫未遑及焉。

學部圖書館志目於修志年代及姓名多有失實者，今皆糾正，惟其異同覽者自見，不能一一表而出之。

本書本記事纂言之宗旨，聊備遺忘，偶有珍聞，輒加彙錄，不盡關於體例之是非，稍出範圍，覽者諒焉。

官名地名不遵時制，爲章氏所詆，本書力避此病，然稱某府之人不能稱府人，不得不變其詞曰郡人，諸如此類，不能膠柱。

一 本書每篇繫論長短不齊，大抵詳於名都而略於僻邑，苛於近著而寬於前代，尤以明代諸志篇幅既短，紙墨又多漫漶，體例則蕪陋從同，文字亦庸劣一概，非之無舉，刺之無刺，實不勞一一評隲，彌加簡焉。

方志考稿甲集第一編

直隸（今河北）

雍正畿輔通志一百二十卷

雍正十三年總督李衛繼前任修成，其時方頒詔各省修通志也。前志修於康熙十年，四庫提要譏其以數月成書，本書凡例糾其選舉人物或以明之南直隸誤入，故今茲秉筆頗加矜慎。

凡一百二十卷，一至十詔諭宸章，十一京師，十二星野，十三至十五建置沿革，十五十六形勝疆域，十七至二十四山川，二十五城池，二十六七公署，二十八九學校，三十三十一戶口，三十二三田賦，三十四五倉廩，三十六七鹽政，三十八九兵制，四十至四十一關津，四十三四驛站，四十七，水利營田，四十八陵墓，四十九五十祠祀，五十一二寺觀，五十三四古蹟，

以束縛馳驟之，決無是也。廣輪若此其大也。歷史若此其永也。吾民族中一言一動一衣服一飲食蓋莫不有其歷史與地理上之影響，而決非偶然成就。今欲於凌雜叅錯之中尋一綫之脈絡，以知吾民族之思想行動受害自於何方。則當上探時間之演化以明其層疊之迹，下循空間之播蕩以究其感受所由。然後相疾之所宜以疏藥餌，因水之所近以立隄防。衝抵扞格之患庶乎其可以稍殺也。嗟嗟，吾國人之不能認識了解吾民族性者蓋有由矣。無真史故也。史不能明全體社會活動之迹，而徒措意於一二人之殊功美行。亦猶乎吾曹今日但知環吾左右者之思想行動大抵從同。而不知距吾曹稍遠者，其思想行動乃膠附於數百千年之前而少所變也。夫史者非如幾何之直綫，但有長度而無寬度。乃譬之石之入淵，且下行且旁散爲波狀。往時之史僅得下行之狀而於其波動未嘗一顧焉，所以爲無真史也。

附，今爲訂正，如人物首倉頡廉范爲漁湯太守之類。舊志引書不盡原文，義乖闕如，語多失實，今爲刊削，如名宦不紀實政，空加讚詞之類。舊志沿襲俗製，圖不開方，本末未詳，名實未副。今爲綜核，如州縣有圖，水道詳源流，藝文列書目之類。凡所引用，皆注書名，惟引專書乃不復注，懲子目之繁碎，並同類於專條，以綱統目，爲紀表略錄傳識餘凡三百卷。

本書目次一至十五爲帝制紀之屬，曰詔諭，曰宸章，曰京師，曰陵寢，曰行宮。十六至四十四爲表之屬，曰府廳州縣沿革，曰封建，曰職官，曰選舉。四十五至一百八十二爲略之屬，曰輿地，曰河渠，曰海防，曰經政，曰前事，曰藝文，曰金石，曰古蹟。一百八十三至一百九十二爲錄之屬，曰宦績。一百九十三至二百八十六爲列傳之屬。自二百四十五至二百八十六曰列女。二百八十七至二百九十七爲雜傳之屬。二百八十八二百

九十九爲識餘。二百爲叙傳。

光緒順天府志一百二十卷

光緒五年府尹周家楣等修，兩廣總督張之洞翰林院編修繆荃孫先後總纂。

據府尹沈秉成序曰，一燕京志析津志佚矣。明洪武北平圖經其書亦佚，僅見之永樂大典卷八千四百二十平字韻。文淵閣暑字號北平圖志或卽一書。又載舊志二冊，又往字號載順天府新志一冊，書皆不傳。傳者萬歷間謝杰沈應文志六卷，非略卽舛，殊難可徵。一蓋幾三百年而逢畿輔通志之纂輯，始開局從事於府志。其籌經費者直督李鴻章，訂凡例者張之洞也。開局八年而書成。

本書目次如下。首曰京師志。其目曰圖，曰城池，曰宮禁，曰苑囿，曰壇廟，曰祠祀，曰衙署，曰兵制，曰官學，曰倉庫，

曰關樞，曰廠局，曰坊巷，曰水道，曰寺觀，曰風俗。次日地理志。其目曰疆域，曰山川，曰城池，曰治所，曰祠祀，曰寺觀，曰冢墓，曰村鎮，曰邊關，曰風俗，曰方言，曰天文表，曰沿革表，三曰河渠志，其目曰水道，曰河工，曰津梁，曰水利。四曰食貨志。其目曰戶口，曰物產，曰田賦，曰旗租，五曰經政志。其目曰官吏，曰倉儲，曰漕運，曰礦廠，曰鹽法，曰錢法，曰典禮，曰學校，曰營制，曰驛傳。六曰故事志。其目曰時政，曰兵事，曰學派，曰祥異，曰雜事。七曰官師志。其目曰傳，曰前代守土官表，曰前代治境統部官表，曰前代州縣表，曰前代學官表，曰前代鹽鐵等官表，曰明督撫部院分司表，曰明司道同知通判表，曰前代武職表，曰國朝監尹府尹表，曰國朝州縣表，曰州同縣丞等表，曰總督分司表，曰道表，曰同知通判等表，曰國朝學官表，曰國朝都統提鎮表。八曰人

物志。其目曰先賢，曰雜人，曰鑒誠，曰方技，曰列女，曰釋道，曰流腐，曰選舉表，曰爵封表，曰昭忠表，曰鄉賢表。九曰藝文志。其目曰紀述順天事之書，曰順天人著述，十曰金石志。其目曰御碑，曰歷代。而以序錄志例終焉。

張氏所訂修書略例二十七條，雖隨手剞記之語，頗有足矯近代方志弊習者。錄其尤要者數條如左。

第一

宜典核。

或摘要或總錄或類記或分正附一列正文一爲夾注其必應依年編次者亦宜簡要不得徒事排比錄鈔類長編也

第四

以官文書爲據。

第七

圖表散歸各卷，圖先表後。

第九

引書用最初者。

第十

羣書互異者宜考訂。

第十一

一人一事兩地俱收者宜考證，不得沿誤濫收。

第十二

采用舊志及各書須覆檢所引元書。

第十三 引書注明第幾卷。

第十六 紀事須具首尾具年月。

第十七 各子目須紀實，不得但存一名。

第十八 典禮則例非專爲順天設者不錄。

是其立例之初，已有刊除俗體悉歸雅正之意。加以故事屬之洪良品，坊巷屬之朱一新，經政屬之傅雲龍，畧度屬之汪鳳藻，以暨其他載筆之士，皆一時豪俊，學有專長。而繆荃孫擅目錄之學，既自纂金石藝文二志，兼爲覆輯全書。故能卓然成不磨之業，爲近時諸志稱首也。

昔時京府之志有南宋乾咸二臨安志之前例在，然宋時行都草創，制度闕疏。非若燕京爲五朝首善之地，建置宏蹟，遺聞豐衍。且燕京掌故之書，層見迭出。秀水朱氏日下舊聞尤集大成。及乾隆中，更因朱氏遺規擴增爲日下舊聞考一書。網羅富備，

幾於難以燭火助大明之光。是本書京師一志尤爲不易著筆。乃今觀全書，惟京師志最爲精華所萃。不獨與日下舊聞考無重規疊矩之嫌。且體製彌爲今勝於昔。蓋日下舊聞考爲朱氏舊例所拘。朱書本爲割記之體，增益既廣，則頭緒頗棼。卽以坊巷一端而言，本書以現在街名爲綱，而後溯其沿革。地望遠近，瞭如指掌，不似日下舊聞考之多錄詩文，閱之終卷尙不知其今在何處也。坊巷志本爲朱一新精心之作。其別行之本，爲近代言燕京故實者最佳之書，有以也。惟是光緒以來，迭經天災人事之毀滅，時踰四紀，又將盡成陳迹。不知何日復續茲編矣。

然京師志雖以今狀爲主，而遼金元故城遺蹟，自有其相承之綫索。本書雖有遼金元明故宮考諸篇，惜未能如天咫偶聞之追摹諸故城圖而加精密也。

寺觀志依張氏定例，但錄宣武門之天主堂。然東直門之俄國正

教堂，其關繫亦不爲不重。以至其他增建之堂，不一其所，非無官牘可稽。削而不存，其義安在。回教清真寺亦多闕漏，則尤屬非是。自元代定都燕京，臨御八方。兼容幷包，無思不服。近自回部，遠自歐西，人文交輸，蔚成大業。餘風所被，久而不泯。故燕京爲萬國會同之地，非一日也。今於外國人移殖之事業，一不紀載，何以顯上都之雄富哉。若斤斤於敕建與否之區別，不免書生眉睫之見矣。

風俗方言兩志無一語出於自撰。其鈎纂之勤，可謂甚至。此則官書之體，不容不爾。然去事實終嫌太遠。惟物產志於所引諸書之外詳綴按語，則差爲得其實耳。

綜計其引用之書，併欽定各書計之，在千種左右。然明清名家文集尙多未引者。又志中所已引者，如北京歲華記之類，亦漏列。而第一百二十二卷所輯書目中有薊門紀亂一種，屢見於通

鑑考異。今但云日下舊聞引之，亦偶踈也。

據學部圖書館方志目前有康熙順天府志八卷，考爲康熙十二年修，寫本。蓋卽大興縣志所謂庚戌重修之本也。

康熙大興縣志六卷

寫本

康熙二十三年知縣張茂節修，順天舉人李開泰纂。

凡六卷，一輿地，其目曰分野沿革形勝山川風俗古蹟。二營建，其目曰城池壇壝學校公署里社郵舍寺觀津梁。三食貨，其目曰戶口徭役田賦經費物產。四政事，其目曰名宦職官武備。五人物，其目曰鄉賢人材節義科目隱逸僑寓仙釋。六藝文，其目曰文集詩集。據其凡例云，悉遵庚戌年重修府志所定體例，而目則稍爲增減也。

大興之置縣也，自金貞元二年。明以來爲順天府附郭縣。京師

首善之區，凡有事實，胥不得爲一縣所專。宜其難於著筆。本志取材限於京師之東北方，示與宛平有別。然刻舟畫地，往往有不可通者。例如風俗一門，卽多濶雜。白雲觀燕九，宣武門浴象，又何曾屬本縣境哉。人物一門濫載羊角哀之屬，亦殊失檢。然志撰於康熙初年，其時流行者不過帝京景物略萬歷野獲編諸書，都城佚事往往賴此而存。如南海螞蟻墳事卽順天府志日下舊聞所未援引。故攷古者所不得而廢也。

康熙宛平縣志六卷

寫本

康熙二十三年知縣王養濂修，順天舉人李開泰等纂。

凡六卷，一地理，其曰分野沿革疆域形勝風俗山川古蹟墳墓。二營建，其目曰城池壇壝學校公署里社郵舍寺觀津梁。三食貨，其目曰戶口徭役田賦經費物產。五人物，其目曰進士舉人貢

生鄉賢人才地封孝子節婦隱逸流寓仙釋。六藝文，其目曰繪音奏議古文今文詩章。與大興志小有同異，而瑣細益甚矣。風俗物產諸門及人物之前段，皆與大興志雷同，出自一手，已屬無謂。若宛平之置縣，始自遼開泰二年，卽唐建中所析薊縣而置之幽都縣。史文明白，而沿革門初未一述。則可謂拾其細而忘其大矣。

民國良鄉縣志八卷

民國十三年知事周志中修。

按所錄舊序志始于嘉靖三十九年知縣安守魯，繼修于康熙十二年知縣李慶祖，四十年知縣楊嗣奇，光緒七年知縣陳峴，十五年知縣范履福。李陳二本蓋未付梓也。

本書凡八卷，一曰輿地志，二曰建置志，三曰賦役志，四曰官

師志，五曰人物志，六曰紀幽志，七曰物產志，八曰藝文志。其曰紀幽者包括壇壝祠廟招提邱壠也。

書成於民國十三年而地圖無比例輿地有分野，未免泥古而不知通變。其中文字訛謬，不暇一一摘舉矣。

縣爲漢置屬廣陽國，本書沿革門稱東漢爲廣陽縣亦非是。

咸豐豆固安縣志八卷

咸豐五年知縣陳崇砥主修，己未知縣李應選續成。

按舊序，嘉靖乙丑知縣何永慶創修，崇禎二年知縣秦士奇再修，五年知縣黃奇遇刊成，康熙壬子知縣陳祝升奉檄再修，康熙甲午知縣鄭善述（同治畿通志作鄭述者誤也）又得明秦志增補之。據凡例云他本俱佚，惟鄭本具存全書，今本實采鄭本而成也。書八卷，一輿地，二建置，三賦役，四學校，五官師，六選舉。

，七人物，八藝文。

固安爲漢方城縣，晉有故安縣，隋改今名，元以後自涿州來屬畿甸。自嘉靖以來，正值渾河遷徙之道，爲縣巨患，故輿地篇獨詳之。賦役篇頗致詳於旗租，凡例云，遵靈壽陸志稍加變通，而學校一門則仿王子潔平山縣志廟志祭器禮文樂章悉行載入，其蕪甚矣。近代諸志相習轉載祭器禮文樂章，牢不可破。斯固本諸宋人先例，當時或自有其不得已之苦衷。然千卷雷同，識者決所不取也。

順天府志藝文志據御覽六十四引固安圖經易水又名安國河亦名北易水，漢之固安在今易州，隋開皇三年移治今地，改故爲固，知圖經亦起於隋。而隋志未著錄也。

固安文獻志二十卷

民國十六年固安賈廷琳撰。書分事彙碑誌兩編，凡邑人之傳誌

及本人所撰詩文，無不搜采。用力甚勤，然義例太汎。若在他邑，將使卷軸連楹而不能盡矣。但其書本以文獻志爲名。又體從長編，元非定稿，不必遽以爲病。要之時人從事鄉邦文獻，所得若此，亦自可貴也。

乾隆永清縣志三十五卷

乾隆四十四年知縣周震榮主修，章學誠纂。

按本書前志列傳，康熙十二年知縣萬一堯與訓導喬窩著志十一篇，蓋永清有志之始。

章氏此志號爲名著，其卓識遠到凌躐古今之處，允宜梳剔表章以明志乘之進化。而其一偏之見不宜曲從者亦當明著其失。故不嫌詞費次于左焉。

蓋縣志本書依章氏創定之例，分爲紀表圖書政略列傳六目，皆

略與舊史相應。紀之屬曰皇言曰恩澤。推章氏之意蓋欲以皇言當尙書，以恩澤當春秋，以皇言紀言，以恩澤紀事。然核其所集，皇言止於誥勅，恩澤止於蠲緩錢糧，斯固可已而不已矣。得非欲強應舊史而方志又不能上及帝紀，故姑以此相塗附耶。其次曰書之屬。章氏之言曰，「文章本乎制作，制作存乎官守。州縣修志，古者侯封一國之書也，吏戶兵刑之事具體而微焉。今無其官而有吏，是亦職守之所在，掌故莫備於是，治法莫備於是。」斯言也，庸俗駭之。然有至理存焉。一縣之政事執掌之，科房掌之，科房固向日地方政府之本體也。自唐宋以來掾吏不用士人，而後世地方無政事。無政事而地方無史矣。從來撰方志者，惟賦役與節孝名冊或尙取材於科房檔冊。自餘刑獄之煩疏，營繕之良窳，戶口之分配，職業之種類，以逮其他，或雖存其名而無其實，或並其名而不存。蓋科房胥吏利於把

持矜秘，雖有問者固不肯舉實以告，况無人過問哉。章氏翹舉六官，制爲六書，曰吏書戶書禮書兵書刑書工書，意誠至善。然如吏刑工三篇，因亦虛張篇目而實質甚疏。此緣胥吏之不肯竭其隱也。惟戶書中載乾隆四十三年銀錢糧價之定數以至綿布肉蔬諸日用品之通值，兼及縣人之職業，誠極有用之史料，州縣志書浩如煙海，章氏而外竟無一人焉注意及此。吁可慨矣。書之後繼以政略，則他志之名宦傳也。章氏以爲名宦不當收于人物，職官不當備書政績，故立此門以求核實。雖采取舊志之語，而真僞疑似，辨之殊嚴。

殿之者則十傳也。以人爲類者六篇，其七則義門列傳，以志同居之大族，與士族表相爲羽翼。其八則列女列傳，以存節孝之冊。其九則闕訪列傳，以存舊志之疑。其十則前志列傳，以存前志之源委。

文徵則別爲一書，附於志後。凡爲五目，奏議第一，以著制度之變，徵實第二，以考文獻之原，論說第三，詩賦第四，金石第五。論說叙錄云存二首，檢之僅得一首，未詳其故。要之其分類尙有可議者。

表之屬曰職官，曰選舉，曰士族，職官選舉兩表皆本年經事緯之法，秩序井然。士族表托於周官小史奠系世辨昭穆之義，意至深遠。然其言曰，一州縣之志盡勒譜牒矣，官人取士之祖貫可稽檢也，爭爲人後之獄訟可平反也，私門不經之記載可勘正也，官府譜牒之訛誤可借讎也，清濁流品可分也，姍穆孝友可勸也，凡所以助化理而惠士民者，於此可得其要略焉。一觀此則知章氏亦徒得其一端而已。夫豈知家族里居之係於地方文化之升降，經濟能力之隆替，種族血統之分合，政治情勢之安危，正不止於宦斯土者得之可以助化理而惠士民也。章氏而誠知

此義，則於北街賈氏當詳其婚配族姓以著女真部族漢化之由矣。於龐各莊鄭氏當詳其受田之數以著漢軍入關之漸矣。僅勒其名字，抑其末也。順天府志藝文志乃反謂士族備述牒譜名都鉅族載不勝載，是於章氏探本立言之微旨，更茫乎未有所知。俗見亘胸，雌黃妄下。章氏有知，地下應爲不平矣。

府志又稱一他若職官宜分品級教職應列佐雜之先，輿地既有總圖，合境須載全圖之內，士族固以城中爲首，而城內古蹟反後於四鄉，列女非以閭閻相高，而柴氏三人別見於士族，兵書既載兵額，而武弁不表職名，工書勤記樹株，而河防不詳夫額，亦屬千慮一失。一此則吹垢索瘢小疵不免。固無損於著述之宏旨也。

光緒永清縣續志十四卷

光緒元年，知縣吳欽繼前任李秉鈞修成，浙江舉人魏邦翰纂。

據順天府志藝文志云，門類一準周志，惟去士族一表增封廕襲廕二表，流寓一傳，風土志雜志數目。惟流寓載王士禎究屬牽強，風土志雜志是尋常志所應有，而非實齋志之體例。其卷末續志賸言專論周志或褒或貶均無空論，亦周志之諍友也。宋元舊志如張溥之續會稽梅應發劉錫同之續四明拾遺補缺各自爲篇，至明以來修志者類取前志散入己作，增益刪補無跡可尋。是以新志行而舊志遂廢。是編名曰續志，列於前志之後，體例最善。秉筆者之虛衷亦可見矣。

民國安次縣志十一卷

民國三年縣人馬鍾琇纂修。

安次漢縣，元改東安，民國以與湖南東安同名改從舊名。

書凡十二卷，一地理，二三賦役，職官，四選舉，五名宦，六

人物，七列女，八至十一藝文，十二雜記。

據卷十二舊志姓氏錄，創于萬歷年間邑人張文舉阮宗道，天啓間重修者爲邑令鄭之城，康熙十六年續修者邑令王士美侯應封李大章，乾隆十四年重修者邑令李光昭。但據順天府志文舉爲嘉靖辛卯舉人，書成而未刊行，遼史拾遺曾引之也。本書體裁類皆擷取舊志精華，誠可謂榛楛必翦者。然於現代狀況殊少述及。以云保存舊志則或有之，信今傳後則未逮也。

光緒通州志十卷

光緒五年知州高建勳主修。

據舊志序，通州志始於嘉靖乙巳，因弘治間州人周通所創舊稿而成，康熙丁丑知州吳存禮再修，（據順天府志尙有康熙十年知州閻興邦一本）其附入潮縣事跡則采萬歷間縣人聶啓元等所

修灤縣志共編，乾隆辛丑知州高天鳳三修，道光戊戌知州李宣範補訂重刊。

書凡十卷，一封域，二建置，三漕運，四賦役，五學校，六官師，七選舉，八人物，九風土，十藝文。

按本志，通州實在徵糧地不過數百頃，蓋多旗地故也。其要政乃在漕運。通之立州，始自金源，京師倉庾仰給南漕，通爲縮穀之區。其所以爲畿甸名州，至今繁庶，凡以此也。本志別立漕運一篇以紀之，固其宜矣。

汎觀全書，步趨舊志，典型未失，猶爲善本。惟藝文一卷甄采殊嫌挂漏。此則方志通弊，固難以獨責是書矣。

按灤縣於順治十六年裁併通州。其縣志可知者，據順天府志有張祥徐玠兩本。又萬歷二十一年知縣魏之幹一本三十五年知縣艾友芝一本均佚也。

乾隆三河縣志十六卷

乾隆二十五年知縣陳昶修。

據其序稱縣志始於明季邑令王自謹，修於國初任塾，而皆未錄木，則猶無志也。自謹萬歷十二年任，塾康熙十年任也。其後康熙三十九年有知縣鄭富民一志，僅存其序。

書凡十六卷，一職方，二形勝，三建置，四典禮，五賦役，六鄉閭，七風物，八職官，九選舉，十兵防，十一水利，十二十三人物，十四雜識，十五十六藝文。

三河漢潞縣地，唐置今名，明清爲順天轄縣。源流不爲不長，而故實殊渺，志亦敷衍成文而已。其於風物篇力稱其風俗勤樸，且贅以駢儷之套語，他亦可想矣。而順天府志乃稱其體例謹嚴，採取簡淨，且注出處，順天舊志中最善之書。未免譽之過當。

乾隆武清縣志十二卷

乾隆七年知縣吳翀修。

據所錄舊序，志始于萬歷十一年陶允光，修于康熙十年知縣鄧欽楨，再修于康熙三十六年知縣章曾印。

凡十二卷，一星土等，二田賦等，三河渠等，四古蹟等，五職官，六選舉，七名宦等，八人物，九列女，十至十二藝文。藝文一項幾占全書之半。所錄邑人章奏關於近畿賦役者甚多。然以入藝文則其意義已稍失矣。

順天府志譏其人物一門子目頗病駁雜，藝術一人第稱其精岐黃並無事實佐證，觀其遺行亦不僅以藝見，列女亦人物也，何以別爲一門。誠爲可議。然斯亦非獨本志獨有之紕弊也。

康熙寶坻縣志八卷

康熙十二年知縣牛一象主修，前有縣人保和殿大學士杜立德序

，蓋承其意而作也。據弘治間知縣莊禪舊序，禪於弘治辛酉就前教諭高惠草稿纂成，至嘉靖丙寅知縣唐鍊再修。但據光緒順天府志引唐志序則唐志之前尚有武德智胡與之二志也。

凡八卷，一輿圖，二建置，三賦役，四秩官，五人物，六叢紀，七八藝文。

寶坻立縣自金大定，其地原爲香河之新倉鎮，故取如坻如京之句以立名。而本書輿圖志云地產魚鹽蘆葦故曰寶，又水中高地曰坻，其附會已可哂。至風俗門漫取杜牧韓愈文泛濫無歸之語七八句聊充品彙。又賦役中剝船條下稱大學士論曰云云，古今無此書法。而八卷之中藝文佔篇幅之半，古今亦無此著作體。畿縣之陋乃至是哉。

乾隆寶坻縣志十八卷

民國六年知事查美成石印

乾隆十年知縣洪肇懋延江陰蔡寅斗纂。其前有沈德潛汪由敦錢

陳羣等序。

洪氏自序稱數年來廣搜前代之藏書，博購名流之別集，又過遺墟而訪，召故老而咨，積日既久，剞記漸多。是其畜志成書非操觚率爾者比。其附錄與邑紳書，侈陳所采正史以外之書，翻縷不休，似乎殫見洽聞。然如孫盛春秋王隱地記不言其存佚，則抑非真得著書之體者也。蓋其所注重尤在議論。故其言曰，一志中惟人物最重，比于史家之列傳，今合一邑數千年之氏族而得與者無幾，則衆將瞰然而環睨之，吾惟參之博覈之真以義理爲權衡而已不與，隻字單詞皆有所出云云，一則其所斬向者，亦不過如是而已。

然觀其凡例中所標舉訂訛一條云，一志以傳信也，非可信而傳會之，或失則誣，或失則鑿，浮談不根，徒爲識者笑，且以似亂真以虛混實，而千古不白之案從此滋矣。舊志雖簡而訛者實

多，有古蹟訛者，有姓名訛者，有職官訛者，有事實訛者，有水道訛者，有年代訛者，皆一一釐正，無俾仍誤。『折衷一條云，『有得一說而衆說可廢者，則專主焉，有合衆說者而一說始明者，則旁通焉，有兩說可並行不悖者，則兼存焉，有因一說而歷考其所以然者，則追溯焉，有止一事而再三見而各系以說者，則分引焉，要必標其所自出，』蓋猶聞康乾樸學家之緒論者歟。寶坻爲故香河縣之新倉鎮，以此得名。金大定中始置，至明清遂爲順天屬地。據志原額六千餘頃，圈去四千餘頃，而補折僅一千餘頃。洪氏按語云，『既以民地圈撥，乃卽官地以補之，就地還地甚便，而前志乃以不若他州縣所償於鄰境之高阜致憾於偏枯，其亦未之思矣。』然縣自五代以來已興鹽利，竈丁之田有在縣地者，合民地竈地及增收之地亦將及四千餘頃焉。雍正間且分設寧河縣。蓋近畿之腴壤非他邑所及矣。

書十八卷，一職方，二形勝，三建置，四祀典，五賦役，六鄉閭，七風物，八職官，九選舉，十封表，十一人物，十三列女，十四拾遺，包古蹟禳祥兩項，十五別錄，包寺觀仙釋賸語義冢四項，十六集說，包河隄營田蠶桑剝船里役圈給六項，十七十八藝文，中以集說爲創體，於民生利病不能列入他類者，皆入此門。略如章實齋之創掌故一編，頗爲可取。然如蠶桑之錄齊民要術，殊爲汎無所歸。蓋仍未酌衷至當。不止如順天府志取譏名目繁瑣也。

光緒寧河縣志十六卷

光緒六年知縣丁符九主修。

寧河自雍正間始設縣，故本無志。乾隆四十四年知縣關廷牧始發起采訪纂成。據關氏凡例實多本諸寶坻洪志。自云纂修志乘

大約增損前書，使其事加於前，文省於後，故謹嚴是尙。而丁氏亦步亦趨，未嘗立異。其例云一星野疆域山川及風俗方音等志今不異於古，無庸改置，其餘所當增入者備載於各條之後，不敢別立規模，自矜創見。一是則重規疊矩後先如一矣。

凡十六卷，一采訪告示等，二職方志，三四建置祀典志，五賦役志，六職官志，七選舉志，八九十人物志，十一至十四藝文志，十五風俗志，十六雜識志。

雍正九年就寶坻之梁城鎮分設縣治，竟未及修城，其陋可想。然縣之蘆台寶京東巨鎮，亦史乘名蹟。（後唐趙德鈞鎮蘆台軍置鹽場）建置志云，一其地多回民，咸豐年間創建禮拜寺，有礙風水，士紳稟官立碑永禁再建，一亦異聞也。又雜識志云，魚骨廟在神塘縣治正南六十里，地近海，當年有巨魚浮岸上，其骨大且多，土人因取之修一廟，其楹檁枋椽俱用魚骨爲之。

是否實有此廟無緣確知矣。

光緒昌平州志十八卷

光緒己卯知州吳履福主修，州人御史劉治平任其事，而編修繆荃孫創例也。

按所載歷修姓氏，隆慶中尙寶卿崔學履主修，康熙癸丑知州吳都梁再修。吳志號昌平新志見日下舊聞引也。李因篤有芹城小志日下舊聞多引之，亦昌平之故典也。

昌平爲漢昌平軍都二縣地，明正德中升州，領順義懷柔密雲三縣，清仍爲散州焉。

書十八卷，一皇德記，二輿圖記，三四土地記，五山川記，六大事表，七職官表，八選舉表，九道里風土祠廟伽藍四記，十冢墓記，十一會計簿，十二學校志，十三衙署營衛物產三志，

十四列女傳，十五列女傳，十六藝文錄，十七麗藻錄，十八叙錄，觀其名例，近於洪孫之撰。然所變者名，所因者實。實無以大異於舊志也。劃四至於土地，別名以道里，易賦役爲會計簿，皆有未安。若風土記之類則彌爲徒有空名。惟藝文一錄搜采州之掌故頗多精蘊。蓋目錄之學，固繆氏之專長也。

繆氏撰順天府志引王萱齡昌平志稿之軍都考一篇云，「軍都卽薰鬻一音之轉，史記絳侯周勃世家正義云，昌平本漢渾都縣，易艮九三厲闔心，王本闔作薰，是渾薰軍古音同也。夏小正雞孚粥粥通作粥，說文粥呼雞聲，鬻說文孚也，从鬻者聲，都字亦从邑者聲，州人呼粥爲州，滿洲爲滿朱，亦爲滿都，尙書教胄子說文引作教育子，是鬻都古同音也。故漢書燕刺王旦策曰薰鬻氏虐老獸心，姦巧邊阨，薰鬻徙域，北州以安。薰鬻本居於此州，及徙域而軍都之名不去。一頗有資於考證。」

昌平外志六卷

光緒十八年訓導麻兆慶撰。劉治平續修州志，曾邀兆慶充采訪，以沿革攷證互異，別作此書。

凡六卷，曰沿革，曰紕繆，曰河渠，曰金石，曰校勘，曰拾遺。蓋專以攷光緒新志之闕略者也。其宗旨大抵以今昌平本漢晉後魏軍都安樂縣，而漢晉後魏昌平縣則非今昌平州。今州之名昌平蓋自隋始。其論頗能提綱挈領，前志實遜其精到。然所持諸證，間有誤引陋書，且論證方法亦多未合。其細已甚，不復贅詞。若夫河渠本諸親驗，金石廣搜逸遺，以及拾遺補叙朱滔劉總事跡，皆信足爲前志評臣。其苦心孤詣不可沒矣。

據順天府志藝文志宋文昌平州志八卷鈔本，光緒辛巳知州宋文邑人劉御史治平續修成十二卷，自康熙十二年，後至今未修，

缺失頗甚，而關隘詳載里數藝文止列目錄，皆體例之善者。此書今未見，故附錄於此。

康熙順義縣志

民國四年知縣湯銘重印本

康熙五十八年知縣黃成章主修，前有康熙十三年知縣韓淑文一序，蓋淑文爲創修者，而成章擴充之。

書八卷，一疆域建置，二形勝田賦，三秩宦，人物，四藝文。隋始置順州，明初改爲順義縣，故無多可舉之事實。疆域篇能致詳于旗莊之制度，是其足稱者。然其建置篇斤斤於官廳之風水，自詡其改正之功。更於藝文中自載其記文。滿紙荒唐，古今怪事。至名宦鄉賢之濫引史籍，更屬舊志通病，抑可無譏矣。據順天府志隆慶修間縣人吏科給事中楊霖修順義志，遼史拾遺曾引之。

雍正密雲縣志六卷

雍正初知縣薛天培主修。其任縣事則自康熙五十七年始也。

據順天府志藝文志云，張世則密雲志萬歷六年修，取邑人刑部主事祝文冕稿爲之。遼史拾遺引作劉效祖密雲志，卽此書。及其後而康熙六年知縣趙宏化續修。

凡六卷，一紀恩沿革等，二城池學校等，三兵制官師等，四五六藝文等。

密雲爲漢白檀地，魏始置郡。大抵邊邑文獻尠徵者，鄉賢遂無可紀。本書雖援他志之例漫以竄禹鈞等摭拾充數，仍不過寥寥數人，輾轉雷同，實堪嗤點。亦無暇一一攻其短矣。

光緒密雲縣志六卷

光緒七年知縣丁符九主修，符九曾修寧河縣志已著錄。蓋同治中前知縣黃宗敬延番禺張鼎華續修，後任趙文粹又延會稽孫德

祖安岳周林續成之，丁氏復取而刊行之也。

周序列今之方志四弊云，一取法於元明一統志，濫觴於太平寰宇記嘉熙方輿勝覽，以人物諸目與山川故蹟相次，是地理專書，略具類纂之意。其流連景物附會名勝者又不足言。其失也陋。人類不同，奚翅倍蓰。今乃必欲強爲分析，官曰慈祥豈弟，士曰孝友端方。學皆鴻儒，縱有班輸技略，斥爲小道而不書。女皆貞婦，雖有威姑德邁，以其借老則不書。千篇一律，求其去取之故輒不可得。其失也拘。經生家動陳大義，墨守義法，作爲文章其事不合便自夷芟。或者義取簡潔，至欲仿武功縣志而稱謂直書古人官名地名，致使古今莫別。其失也妄。藝文之名，所以臚列書目。近代分列篇章狀誌碑銘，錄其原文，複增子注。其失也濫。一於是本實齋之學，準其體例，摭其論說，凡爲六卷。卷一二紀之屬曰巡幸皇恩宸翰。卷二圖之屬曰天文

輿地。卷三表之屬曰沿革官師人物。卷四考之屬曰學校田賦兵制。卷五六略之屬曰政略事略。事略之中復分忠義人物列女氏族闕訪，亦略如章氏永清之例。然所附詩文各占一冊，其中吟弄風月之篇仍居泰半，而如嘉靖修石匣城等宜入輿地者反未表出。則猶未能純然擺落俗例者也。

密雲當邊境，古北口所在也。據輿地圖說云，長城圍環密雲東北西三面邊城以關爲界，關外以分水嶺爲界，牆子路依東陵右山距青椿三十里，林木蒼蔚，迄鮮居民卽如南坎北坎等村樵墾無常，率多遷徙。北趨承德，中隔禁山，窺遠曲盤，幾四百里，田戶之治重改隸焉。卷宗多蕪，時蹟莫考，舊圖從佚，良有以也。又賦役考全縣民地才七百餘頃，斯皆足見邊邑文獻之不足徵矣。

民國密雲縣志八卷

民國三年縣議事會議長寧權主修，縣人宗慶煦總纂。

密雲在漢爲白檀，後魏始置密雲郡，明初置縣而省州，固朔邊重地也。據宗序舊志重修於同治季年，告成於光緒七年，而於前此之志一字未及。

書之類例頗異前規，其凡例自云分地理政事人物藝文四大綱。觀其目次，則卷一二爲天文輿地，卷三沿革職官表人才表，卷四學校田賦兵制，卷五縣議事會警務商會，卷六政略事略，卷七藝文，卷八詩歌。其實則取光緒志之例而變通之也。然如貢舉表易爲人才殊爲未愜。舊志於本邑名賢別立人物一門而尋常科甲則但記姓名於表，自屬酌衷立制。今既未立人物一門，而但臚列舉貢號爲人才表，何其誣也。

惟田賦一考，叙其種類別爲六項。曰皇糧，莊頭掌之，曰旗租

，即官租，由縣署經徵，曰王府各租，亦莊頭掌之，曰屯衛地，曰民田，曰開墾地。以前明原額考之，自節次圈丈投充冲壓之後所餘民田不過六分之一。於近畿田制可謂得立言鉤元之法。事略中氏族一門，原爲方志要目。然觀其所列，僅得數家，且自秉筆者寧宗二氏之外，並未考其受田卜居本支百世之由，則氏族亦徒托空言而已。以視章氏永清志士族表之規模相去固遠，卽光緒志之氏族一門亦猶視此爲勝也。又軼事一門舊志泛以史冊漁陽范陽事疏入，亦當刪而未刪者。

至藝文一門，以有關政事者列於上卷，而私家紀述退入下卷，自是分別部居之一法。惟元王思誠重修文廟碑記至元二十八年迄今五十載寢以傾圮至至元六年云云，注云當是至正。此不知元代兩用至元紀元也。前至元二十六年至後至元六年恰將五十載。若至正則不止此數矣。古人文字不宜妄下雌黃，有如是也。

綜觀全書，於輿圖之改正，勝於舊本不啻倍蓰。行文質實不蕪亦殊難得。其凡例中有云禮俗習尚采風所重，惟順屬各縣俗尚大略相同，勉爲紀錄，必多夸飾，故略而不書。即此可見其無不知而作之弊也。固猶足當佳志之目矣。

康熙懷柔縣志八卷

康熙辛丑知縣吳景果吳江潘其燦同纂。

據吳氏序萬歷中蜀人周仲士始創縣志，類多浮辭，而實事反略，迄無重修者。然顧貞觀梁汾曾撰溫陽紀略，日下舊聞曾引之。其書雖非志體，要必可觀也。

洪武十三年分密雲昌平二縣地立懷柔，其後以隸昌平州。清代每年巡幸熱河，爲蹕路所經。於是雖小邑而日見衝要。其地紅螺山琴髻山等皆有名藍，俗所謂廟會。他志所不詳而本書頗有紀述。亦異乎俗手之爲矣。

凡八卷，一建置等，二行宮等，三官師等，四賦役等，五六七文，八詩。

其所錄詩雜存景果與其燦倡和之作。順天府志謂流連風景無關考證究不合法，誠然。

乾隆涿州志二十一卷

附同治續志

乾隆三十年知州吳山鳳修。

據凡例，涿志昉于成化乙巳知州張遜，正德間知州劉坦增輯之，康熙丁巳知州劉德弘再修。但據光緒順天府志則嘉靖丁未尙有史直臣一志而遼史拾遺引唐舜卿涿州志不詳時代。

本書分八志二十二卷。采舊志者十之二三，續增者一二。其舉舊志之舛誤，如誤讀史記獨鹿鳴澤之文而曰鹿鳴澤在獨鹿山下，誤讀三國志孫資字應龍而曰劉放之孫，則本書糾正之功爲不

一ノ二ノ三ノ
少。然人物志錄漢昭烈宋太祖事蹟皆僅述其瑣事，而風俗於舊志各條外但錄北京歲華記以補之，且不著明北京歲華記爲何人所撰，皆不可解。

末附同治十二年知州周治達續修十八卷，卽吳志規模而以近事加入也。

民國房山縣志八卷

民國十六年知事廖飛鵬主修，邑人高書官編纂。據凡例，縣之有志始于萬歷庚辰，繼修於康熙三年知縣修有年，三修於康熙三十年知縣羅營田，復修於同治十一年。今本存佟羅兩序及同治李恩鏞序，差可攷見沿革。惟萬歷志修於知縣馬永亨遼史拾遺日下舊聞均引之，本書失載姓名也。

本書卷一二三皆地理，卷四政治職官，卷五禮俗實業，卷六選

舉人物，卷七八藝文。門類較簡。

按金大定二十九年始置萬寧縣，以奉山陵。明昌二年改爲奉先縣，元至元三十七年改爲房山縣，屬涿州，而本志竟不詳著。惟山脉河流疏證詳明，地圖準望確切，爲舊志所不及耳。

其政治一篇，以現行規例列首，而以舊志所載附臚於後，先河後海，眉目秩然，足爲良法。然禮俗一篇則云先就前清舊禮志其儀節器數，何其前後矛盾進退失據耶。不知民國禮文原無官冊，不勞牽強比附。且卽令有之，亦不應全據此以當禮俗之目。又其所錄辯論孔廟祀典之五項，殊不知所由來，僅文廟一端乃占禮俗全篇篇幅之半，其他一半又泛引相見等禮以充數，皆蕪濫不殊於舊志。

至實業一篇，皆似奉行故事之表冊。除礦業外，了無徵實之意。古蹟一篇，於縣之隋石經略無攷證，反濫引熹平石經等事以

充篇幅。金石不錄原文而入之藝文，皆爲未當。

民國霸縣志五卷

民國八年知事唐肯主修，長洲章鈺纂。

其緒論云，「古今經世之文有三，曰史書，曰志書，曰政書。史書所以記已往，志書所以記現在，政書則由已往以成就將來使人遵而守之。是書既定名霸縣志，則非霸縣史可知，非霸縣行政書可知，其所記者專屬霸縣現在所有之事之人之物。」斯數語也實從來所未聞。顯然與實齋之旨不侔矣。

由其執志書非史之說，故分全書爲土地人民政事三項。然三者終難分明畛域也。政事爲人民活動之一種，尤以自治慈善二者爲最顯著，不得謂不屬於人民。土地中之屬於人爲之建置者，若河渠建築及城鎮鄉之區分等，又烏在非政事也。卽以人物一

端而言，既立名人一篇以統舊志所謂人物。又復別設鄉賢一類。鄉賢之下又復分爲本籍外籍二目。又列進士以下諸目謂之功名。皆多窒碍也。

如右所言因已稍變舊志面目矣。其中可稱之處，若度量衡比較表，貨幣價表，交易習慣，斯皆至可珍之史料，而戶口數以城鎮鄉分列用意亦佳。卷末附文獻徵存亦善用實齋之法。斯其善胥不可沒也。

凡五卷，其土地志之屬曰位置面積氣候性質源流物產河渠建築城鎮鄉古蹟，其人民志之屬曰戶口職業財產宗教風俗習慣名人，其政事志之屬曰官吏學校武備警察司法監獄自治財賦郵電差徭，繼以雜志及文獻徵存焉。

霸州爲周世宗就益津關置，明以後屬順天府，民國改縣。其歷來修志姓氏存本書雜志篇中者，康熙甲寅知州朱廷梅同治

甲戌知州朱乃大也。

康熙文安縣志八卷

康熙四十二年知縣楊朝麟修。

據凡例，邑志初刊於崇禎己巳，任知縣者唐紹堯。繼成于康熙癸丑任知縣者崔啓元。本書乃參訂前志而成者。凡八卷，一皇恩，二方輿等，三賦役等，四名宦等，五甲科等，六七八藝文事異。

文安漢縣，周置霸州，以縣隸焉，清爲順天府屬縣。受渾河水患最深，故第三卷詳紀關於隄防疏濬之文字，而藝文事異中亦此類爲多焉。順天府志摘其古蹟廣陵城云，五代史劉海蟾燕地廣陵人，今五代史無此語，因漢燕王旦詩列空城，因魏地形志有平曲城列平曲縣，展轉牽引，不出地志之習。蓋考據之疎不能爲之恕矣。

光緒大城縣志十二卷

光緒丁酉知縣趙炳文徐國楨修，縣人劉鍾英纂。

據序，縣志創于萬歷癸未，續于康熙癸丑，而未及撰人。據順天府志隆慶五年知縣忽鳴撰志略，是爲大城志之始，萬歷十年知縣狄同燧續修。

又據順天府志，康熙三年知縣劉漢儒王秉乘同修，康熙八年知縣張象燦又修。

大城爲漢勃海郡之東平舒縣，五代改今名，屬霸州。

凡十二卷，一輿地，二建置，三食貨，四禮樂，五武備，六封建，七官師，八選舉，九人物，十五行，十一金石十二藝文。食貨志中起運本折各款非清制，自係轉錄舊志然未標明殊漏。

康熙保定縣志

康熙十二年知縣成其範主修，縣廩生柴經國纂。按其所稱，縣

志始於嘉靖己亥王奉修於萬歷辛卯梁太和也。

宋置平戎軍繼改保定，宣和中降爲保定縣屬莫州，元初省入益津縣，尋復置，屬霸州。

按志載康熙十年戶僅一百八十六口僅八百七十四，卽嘉靖最盛時卽止七千餘口，而原額民地卽止五百餘頃。其儉陋實不成爲縣。且清苑旣爲保定府治，則縣不當襲保定之名，實舊制之疏者。（今已改稱新鎮縣）

書不分卷，錄其目次如下，象緯方輿建置學校典禮食貨官師選舉人物藝文。存縣志之形式而已。順天府志謂其名宦鄉賢兩傳純以四六空言，非銘非贊，而事實遂毫無可攷，非無故也。

道光薊州志十卷

道光十一年知州沈銳主修。

蘄名雖古，而置州領縣則自唐以來，至於有清，未之或改。據所載原序，則清代縣志一修於康熙十七年知州董廷恩，再修於康熙四十三年知州張朝琮。嘉靖十六年知州趙錫蒲曾續修而未成書。而明志則有成化十四年嘉靖二年崇禎元年三本。成化志撰者汪浦，嘉靖志撰者熊桐，崇禎志撰者趙三極，據光緒順天府志稱並已佚。蓋名州重鎮，故紀述獨勤詳焉。

凡十卷，一序例詔諭，二方輿志，三建置志，四祀典志，五賦役志，六官秩志，七名宦志，八仕紳志，九人物志，十藝文志。本州爲有清陵寢所在，供應餉糈，自康熙以來最爲民困。自康熙三十四年挑挖河道至乾隆三十年改爲陸運。關係民生，利病互見。又盤山爲州名勝，行宮梵宇，締構相望，皆宜立專篇以紀之。今則或附見建置篇中，或附見山川篇中。至方輿紀要

所稱東起山海西訖居庸幾二千里皆屬薊鎮之邊牆，志皆未之及，殊爲可議。順天府志譏其藝文所收大抵不專爲薊州而作，抑其末也。賦役志戶丁一門述順治元年原額人丁一萬一千九百一十丁半，內節年編審開除逃亡故絕投充優免人丁一萬四百四十一丁半，實存人丁僅一千四百七十丁，而編志時則總計男婦大小二十萬五千二百七十一口。雖康熙中新增人丁永不加賦及雍正初丁糧攤入地糧兩制足以稍除隱匿之弊，然清初兵燹之烈及投充丁戶之多可以概見。又順治間圈投去原額民地四千餘頃，實存原額民地僅七十頃有奇，嗣後加以受補清查開荒入籍等地，始復四千餘頃之額。休養生息綜覈名實之效可以深長思矣。蓋近畿諸縣賦役最爲明清間史迹所由見。尙論者所宜審觀而明辨也。聊發其意於此，識者詳之。

乾隆平谷縣志三卷

乾隆四十二年知縣朱克閱主修。

據所載舊序，志創於隆慶六年，重修於萬歷二十年，康熙六年知縣任在陞續修，順天府志云朱志以爲金在陞誤也。雍正六年知縣項景倩再修。

平谷亦漢縣，元以後屬薊州，而人物稀簡，故實寂寥。志僅分三卷，地理國賦秩官選舉人物藝文六志而已。

康熙保定府志二十八卷

康熙十九年，知府紀宏謨修，郡人郭棻纂，繼萬歷志而作也。凡二十八卷，一圖說，二沿革，三建置，四疆域，五山川，六古蹟，七祠祀，八經政，九兵制，十風俗，十一十二職官，十三選舉，十四名宦，十五人物，十六仕蹟，十七以下忠烈等，二十五列女，二十六祥異，二十七紀事，二十八藝文。其門類蕪雜，至不可究詰。惟圖說差可取。

光緒保定府志八十卷

光緒十二年知府李培祐主修，七年成書。其時方修畿輔通志大府通檄采訪，故各府縣紛紛以此時修志也。保之立州始於宋。據志云，明景泰年郡人張才考訂纂稿，成化年大寧衛都指揮使

于琳校刊，此後有隆慶五年通判馮惟敏萬歷三十五年知府王國楨康熙十九年知府紀宏謨三次修。

本書卷帙繁重，體例詳覈。紀之屬曰恩澤。表之屬曰沿革，晷度，田賦，戶口，封爵，職官，選舉，薦辟，例仕，武弁，封蔭，恩榮。略之屬曰輿地，吏政，戶政，禮政，兵政，刑政，工政。錄之屬曰前事，古蹟，藝文。繼之以列傳雜記，共八十卷。蓋亦用畿輔通志之例也。

其藝文錄之方志一門，爲一府諸志提綱振領，推源溯流，誠爲善法。然但錄無關輕重之序文一二篇，殊不及順天府志之評隲精當。又強分明清爲兩段，中多標題舛誤之處。例如順治安肅縣志有兩本。其前一本實係崇禎志之刊於順治者。今分爲兩書，不將使人疑眩哉。學部志目所載，本書亦未全搜。蓋中秘所藏，秉筆者不能悉見也。

列傳俱採集傳體，如李塏顏元諸傳博取碑志文集而成，深費裝積。遠勝諸縣志之草率。實全書精華所在也。

乾隆定制領州二縣十五，曰清苑滿城安肅定興新城唐博野望都容城完蠡雄祁州東鹿安州高陽新安。

康熙清苑縣志十二卷

康熙十六年知縣時來敏撰。

據所錄舊序，嘉靖戊戌知縣李廷寶創修，萬曆己丑知縣王政續修。

凡十二卷，一輿地，二建置，三學校，四秩官，五禮制，六食貨，七選舉，八名宦，九人物，十風俗，十一藝文，十二紀事及寺觀。觀其標題已徵其濇雜無叙。其中風俗僅二葉，紀事僅一葉。清苑爲宋以來要塞，豈絕無可紀之史事，是其專注意於

纂錄人名而絕未一稽史乘也。

同治清苑縣志十八卷

同治十二年知縣李逢源修。

按舊序清苑志創于嘉靖戊戌知縣李廷寶，續修于萬歷乙酉知縣王政，再修于康熙丁巳知縣時來敏，越二百年始有今志也。

凡十八卷，一地輿，二建置，三學校，四職官，五選舉，六田賦，七忠烈，八名宦，九至十一人物，十二風俗封贈等，十三兵制，十四以下文徵。

清苑縣始置於隋，宋升保州，明立保定府，遂以縣附郭。而雍正以後爲直隸總督治所焉。

本書田賦一篇有現在戶口數，分鄉析載，爲他志所罕見。所述地糧亦羅羅清疏，忠烈一篇附錄郭棻甲申紀事，兵制一篇附錄

咸豐三年團練始末，皆極有關係之文。惟風俗與封贈等同列一卷，不解其何以凌雜至此耳。

乾隆安肅縣志十六卷

乾隆四十三年知縣張純主修，嘉慶十三年知縣石梁補修。按石序，志創刻於前明，已四續修，考之舊志各序，則嘉靖壬子一也。崇禎癸未二也。崇禎癸未本未刊行，順治丙戌刊行之，三也。順治辛丑重訂其闕誤，四也。康熙甲寅，五也。康熙丁巳續，六也。殊不止四次矣。光緒保定府志著錄者崇禎志知縣衛一統所修。順治志知縣盧一魁康熙志知縣梁舟王連瑛所修也。安肅自北宋始立軍，金改遂州，明降爲縣，建置甚晚，載籍尠徵。撰志者侈談沿革，動成笑柄。如山川門內於象山條牽入陸

九淵之象山。黑山條下注云，漢明帝太和元年公孫瓚城雄州以自固，與安肅黑山賊爲亂，不知其所作爲何等語矣。即以黑山而論，乃黎陽之黑山，此特名相類耳。（見讀史方輿紀要）烏可混爲一談也。然古蹟風俗建置等門於縣之習俗信仰頗能致詳，欲考北方之民間祠祀，此書良有所資也。

賦役一門，濫叙古制，方產一門，博徵物類，一則似馬氏通考，一似李時珍之本草綱目。蕪濫可嗤。至藝文中之唐册遂州都督彭王元則文，誤以劍南之遂州當金源所立之遂州，正如江西通志以劉秉忠爲筠州人同堪噴飯矣。

書凡十六卷，一序例圖說星野封域山川古蹟風俗封蹟，二建置，三賦役，四方產，五學校，六選舉，七職官，八宦績，九十人物，十一寓賢高隱等，十二至十六藝文板已漫漶頗難校讀。

乾隆定興縣志十二卷

乾隆四十四年縣令王錫璉修。定興自金大定中立縣，至康熙十一年縣令張其珍始創志書。（其珍學部志目作奇珍誤也）錫璉就原書增損而成。據其自序，事增于舊十之二，文省于舊十之一。觀其叙次蕪雜，漫無裁判，蓋亦不過虛應故事之志書而已。了無足觀也。

定興秦置范陽縣，漢屬涿郡，隋開皇初改迺縣，唐初廢，金大定六年改置今縣，自明以來屬保定府。

道光新城縣志十八卷

附光緒續志十卷

道光十七年知縣李廷燊修。

據所列姓氏，萬歷乙酉知縣王好義創修，四十五年知縣張棟繼修，及康熙乙卯知縣高基重周家柱輯而未梓。

新城縣唐太和六年置，本固安地，古督亢澤也。明以來屬保定府。建置差晚，故實無多，而本書於河渠古蹟土產諸門鈎稽殊密，體裁精雅。固近志中之佳構也。

凡十八卷，一疆域，二星野。三河渠，四古蹟，五建置，六賦役，七風俗，八土產，九典禮，十職官，十一選舉，十二人物，十三列女，十四武備，十五祥異，十六紀事，十七藝文，十八綴言。

附續修志十卷，光緒二十一年知縣張丙嘉修。前有張之萬序，計十卷，曰河渠建置賦役職官選舉人物列女藝文古蹟祥異。與前志詳略互見，故不能別行也。

光緒唐縣志十二卷

光緒三年陳詠主修，樂城拔貢張惇德纂。惇德即與修保定府志

者也。據序云一縣志創于嘉靖十七年知縣孫廷臣，修於康熙十一年知縣王政。又幾二百年而後有今志。實則中有萬歷三十五年知縣楊一桂及雍正三年知縣王恪二次修本也。據學部志目尙有康熙唐縣志八卷，知縣郭鼎修，康熙三十五年刊本。

書十二卷，一二輿地，三田賦，四學校，五經政廟祀禮儀，六職官，七選舉，八九人物，十藝文，十一雜稽，十二識餘等。縣自漢屬中山，明以後屬保定府。縣西北有葛洪山，不知何以能附會葛洪仙迹。此亦古傳說之不可理解者。

田賦篇記前明之礦害，經政篇志已廢之社倉，可謂無蘊不披。然凡例云今城西大洋村有耿額駙勤儉公墓多羅縣主渥格嵩氏墓，此係滿洲事蹟，例不具載。不知所謂例者何也。此而不書，烏得謂之詳矣。

乾隆博野縣志八卷

乾隆三十一年著知縣吳整修。

按吳氏詳學政文稱舊志刻於康熙十五年，知縣王國泰修。蓋將百年而後有續修之舉也。

博野爲漢蠡吾地，桓帝以後設博陵縣，後改博野。

書凡八卷，一建置等，二政事等，三職官，四選舉，五名宦等，六儒林等，七藝文，八詩賦。

其自述凡例，曰正名目，曰尙體要，曰斥淫祀，曰遠鄙佞，曰崇典禮，曰揚善類，曰徵文獻，曰留餘地。然鄉賢與儒林分目，藝文與詩賦歧名，亦不知其例何居矣。

按博野名人以顏習齋爲傑出，志於儒林列二程謂其世居博野，藝文亦濫載程子行狀等，實未免依附。曷若搜求習齋之遺裔里

居與其遺文而表章之，乃真足爲博野之光哉。夫所貴乎志古蹟者，爲如司馬子長過大梁而叩夷門入聖宅而觀禮器，足以接武名賢發抒觀感。習齋之在博野，豈無流傳之故實可以興懷者。其子孫今復何如，其里居今果何在，其著述手蹟猶有傳者耶。果一縣有此一人，雖特立一篇以誌之可也。乃今觀吳氏之言以及當時大府諸公之序，於尹會一則道之津津，於習齋則一字不及。意者官閱高而耳目近則人震其名。篤行瑋儒反不爲俗流所重矣。斯則讀舊時方志動有感焉，不必獨爲習齋致慨也。

咸豐吳谷城縣志八卷

咸豐七年知縣詹作周裴福德相繼主修。蓋取乾隆二十六年知縣王克淳修本而增訂之也。至光緒二十二年知縣曹鵬再取修之。按所錄有隆慶三年知縣李夔春創始一序，萬歷甲辰知縣蔣如萍

重修一序，康熙癸丑知縣趙士麟及孫奇逢一序。

目錄前有咸豐三年團練紀事一篇，餘輿地宮室學校食貨秩官人物藝文災異共八卷。

容城爲漢縣，五代以來屬雄州，洪武改屬保定府，疆域篇中稱魏文帝更名范陽郡，隋開皇元年改范陽爲道縣，語皆不可解。縣之偉績以楊繼盛孫奇逢兩賢爲最。是宜詳其家世源流，闢爲專篇，以著名德之有自。而今以姓名廁入人物，了無發揮，徒泛取遺文載入藝文，甚非志法。

雍正完縣志八卷

雍正十年知縣呂守曾主修，縣人生員田瑗纂。

據舊序萬歷四十四年知縣張保民始修，康熙癸丑知縣劉國安重修。學部志自作安國誤也。

完縣爲漢曲逆地，後漢改蒲陰，魏晉改北平，金爲完州，明改縣，隸保定府。

其古蹟篇有木蘭祠而不言其所自始，又十六社村莊有村名釋義，皆鄉曲一孔之談也。

書凡八卷，一輿地，二建置，三兵政，四食貨，五職官，六名宦，七選舉，八人物，九藝文，十雜志。

崇禎蠡縣志十卷

附康熙續志一冊

崇禎十四年整飭保定兵備副使錢天錫修，順治辛卯知縣祖建明增補。

據本書爵秩志，崇禎十二年吏部覆議保河真順廣大六府新添三道整飭兵馬稽覈錢糧，保定應增設兵道一員，分管南十州縣。又勅山西按察司副使錢天錫，今准該部題覆增設事理，特命爾

整飭保定兵備，在蠡縣駐劄。是駐蠡之整飭兵備道爲添差之員，天錫首膺此命，故特著其原始。學部圖書館志目以爲知縣誤也。又祖建明之建字作廷亦誤也。

漢有蠡吾，金元置蠡州，明省州置縣，以隸保定，畿南一大邑也。崇禎時流寇氛逼近畿，亟於防務。於是特出憲臣以督城守。天錫之爲此志蓋有旌伐之意。凡十卷，一方輿，二建置，三畝籍，四祀戎，五爵秩，六選舉，七人物，八祥異荒政，九藝文，十寺觀仙釋陵墓，凌雜無叙，非所語于志體也。

末附康熙十九年知縣耿文岱續增一冊，則又仰承功令之作，舛陋益甚。光緒續志譏其以日行之案牘登志是也。

光緒蠡縣志十卷

光緒二年知縣韓志超修，繼康熙耿文岱續志而修也。

凡十卷，一二方輿志，三建置志學校志祀典志畝籍志，四爵秩志，五選舉志，六七人物志，八災祥志荒政志，九藝文志，十寺觀志仙釋志。所錄仍以舊志爲多。惟卷八荒政一篇紀述視他志爲特詳，亦可珍之史料也。

康熙雄縣志二卷

康熙九年知縣姚文燮撰，據其申上憲文則自嘉靖以來未經續修板籍蕩廢也。據學部志目有萬歷雄乘二卷知縣康功修。

書三卷即訂三冊。一輿圖，二疆域，三風土，四賦役，五建置，六禮制，七戎務，八官師，九選舉，十士籍，十一人物，十二祥異，十三藝文。

雄縣爲五代瓦橋關地，周世宗始置雄州，明初降爲縣，蓋地小民瘠，無復爲重鎮矣。

文變以地方官而當史官之役，親秉霜豪，其言較之粉飾成書者實多深切。卽以賦役一門論，圈佔帶投兩事爲滿洲入關後最可痛心之虐政。雖康熙中已明諭停止，各縣志從無追論其失者。文變獨於頌禱之中仍溯從前隱痛，不少曲諱，而未經准免之狐皮本色歲辦亦昌言其害，略無顧忌。斯豈古之遺直猶有存者與。卽此一端，其書固有足重者。所惜篇簡錯舛紙墨漫漶不易尋繹耳。

乾隆祁州志八卷

乾隆二十年知州羅以桂修。

據所錄舊序有嘉靖四年潘恩一序，稱舊志之修三十有九年。其詳則不可考矣。繼嘉靖志則有崇禎元年知縣郭應響康熙十九年知縣梅朗中各一修。

書凡八卷，一輿地，二建置，三賦役，四官師，五六選舉，七藝文，八記事。

其記事門云，一關漢卿元時祁之伍仁村人，伍仁寺旁有高基一所相傳爲漢卿故宅，而北西廂中方言多其鄉土語，至今豎夫庸子猶能道其遺事。一不知今復何如矣。

州爲漢安國縣，隋義豐縣。通考云，本唐定州地，分建祁州，宋景德初移治於定州蒲陰。本書沿革門失引此語。

嘉慶東鹿縣志十卷

嘉慶三年知縣李符清與編修沈樂善戶部主事裴顯相同修。

東鹿在漢時爲安定侯國，其後爲縣，唐至德中改今名。清雍正中以屬保定府。蓋保定最南轄縣，處深冀趙定之交者也。至縣之得名，蓋以縣治北之東鹿巖。（見讀史方輿紀要）本志云，鹿

者陸也，古鹿陸通，杜佑李吉甫以爲邢趙深三州爲大陸，殆其義乎。此嚮壁之說耳。

篇末迨錄舊序，次第凌雜，頗難循繹。大抵天順以前志無可考。天順初有縣學訓導翁君所修。越三十餘年而一續，又越三十年而再續，正德九年知縣閻濟刊板印行。康熙十年知縣劉崑重修，乾隆二十七年知縣李文耀再修。本編則繼乾隆志而起者也。卷一地理志，星野沿革以至古蹟屬焉。卷二河道，縣之地勢平衍，素爲滹沱下游。乾隆二十四年，河始南徙入冀州，故歷來河患爲縣要務。以專篇紀之，宜也。卷三建置，城池以至橋梁屬焉。而於壇廟一項攷其沿革略無附義，未免指大於股之誚。卷四田賦，卷五學校，卷六職官，卷七選舉，卷八人物，卷九風土，風俗以至祥異屬焉。卷十藝文，中載陸隴其黍稷辯一篇，不知何所取義。至鄭烈婦詩序一篇，則入之列女較爲得宜。

此其得失之大凡也。

雍正高陽縣志六卷

雍正八年知縣嚴宗嘉屬縣人兵部員外郎李其旋纂。其旋李霽之子。按舊序天啓志修於孫承宗，康熙志修於李霽，蓋以望族秉筆，爲例久矣。

書凡六卷，一輿地，二建置兵政食貨，三名宦選舉，四人物侯籍，五六藝文雜志。

高陽爲漢縣，後魏爲高陽郡治，隋置蒲州，唐廢州屬瀛州。周宋以來爲高陽關。與遼相爭置重兵處。其曰高陽者，司馬貞曰高陽氏所興，應劭曰在高河之陽也。若酈食其自稱高陽酒徒則陳留雍丘之高陽，今杞縣地矣。

高陽士族之多，河朔推最。唐有許氏敬宗齊氏映明有田氏景暘

孫氏承宗李氏國楷及爵，使能仿新唐宰相世系表之例著其隆替
豈不甚善。乃其義例反云外史之義在於據實直書，不必立表以
擬國史。謬悠若此，無足觀矣。

乾隆正定府志五十卷

乾隆二十七年知府鄭大進撰，大進揭陽進士也。

本書稱正定府志創於嘉靖戊申知府唐臣，蓋二百年而後始有此作。其自叙云，「博采羣書，網羅散失，正訛十之二三，補亡十之四五，擴充十之六七。」用心亦可謂勤矣。

凡五十卷，一恩紀，二至四地理，五六事紀，七災祥，八九建置，十賦役，十一十二風物，十三十四惠政，十五至十七典禮，十八至二十武備，二十一二十二選舉，二十三至二十六職官，二十七二十八世系，二十九三十名宦，三十一至四十三人物，四十四至四十九藝文，五十雜記。

詳其編撰之法。體裁雖無發明，而采擷悉有所據。事紀一篇尤見良工心苦。惟世系一篇首列帝王，于是趙佗後唐廢帝及韓林

兒皆入選。使章實齋見之必不以爲然。然此種偶開之例亦未爲全不可也。

正定自漢初爲正定國，北朝以後爲恒州，五代時卽爲府。清制領州一縣十三，曰正定獲鹿井陘阜平欒城行唐靈壽平山元氏贊皇晉州無極藁城新樂也。

崇禎正定縣志十四卷

知縣陳謙修輯，不著年月。茲據學部志目題崇禎志。按其首葉修志姓氏有內翰林國史院庶吉士等官，則入清以後所加也。其標題結銜係挖去原修姓氏而改刻浚儀陳謙，明非原本之舊也。凡十四卷，一圖，二地理志，三建置志，四政事志，五賦役志，六祀典志，七兵防志，八刑法志，九封爵志，十職官志，十一選舉志，十二人物志，十三藝文志。篇簡錯亂模糊不堪卒讀。

，置之可也。

縣爲府附郭治，漢以來無變革焉。

光緒正定縣志四十六卷

光緒元年知縣賈孝彰主修。據前令慶之金序時以同治辛未續修畿輔通志通飭府縣纂修志書也。正定舊志萬歷四年始修於知縣周應中，天啓七年續修於知縣李挺，皆已佚。順治三年知縣陳謙復修之，以迄是時。慶氏又撰蔚州志，別見著錄也。

志闕修者二百年，故漏略不完者多。僅就府志及碑刻補成而已。凡四十六卷，一至六沿革星野等，七八事紀災祥，九至十五城池等，十六至二十戶口等，二十一至二十四秩祀等，二十五至三十四封贈陰恤等，三十五至四十四名宦等，四十五六金石藝文。

卷帙雖繁，門類殊爲猥雜，至以古蹟古迹析爲兩類，他可概見。惟藝文專載縣人著述而詩文則分載各卷不失矩矱。惜所載詩文多猥濫耳。卷末雜記所采頗博，惟書名多未聞者爲可異。

乾隆獲鹿縣志十一卷

乾隆元年知縣韓國瓚修。

按舊序，嘉靖癸丑知縣趙惟勤修。本書凡例中有舊志毀於戊寅城陷之語。蓋崇禎末流寇之亂，而事紀中竟無一語說明之。其疏可想。自云今謹依舊本而加損之不故爲沿襲亦不意爲更新，但求當可而已。又其序力稱陸氏靈壽志以爲不可及。其識度宗旨不過如是也。

凡十二卷，一圖考等，二地理，三建置，四祀典，五籍賦，六學校，七兵防，八官師，九事紀，十選舉，十一人物，十二藝

文。

漢常山石邑縣地，隋開皇中置鹿泉縣於此，唐至德初改今名。

光緒獲鹿縣志十四卷

光緒七年知縣魏摺儒修成，海寧舉人曹鏞纂。

據志縣東三十五里有石家莊。自鐵路修闢以來，其地益著，而獲鹿之名反晦矣。

書凡十四卷，一二地理，三建置，四籍賦，五世紀，六祀典，七保息，八學校，九兵防，十官師，十一選舉，十二人物，十三金石，十四藝文。藝文專紀著作。而舊志中之詩文分入各篇，采擷甚濫，亦非良法。

雍正井陘縣志八卷

附光緒續志三十六卷

雍正八年知縣鍾文英修，蓋取前任周文煊志稿而訂之也。

凡八卷，一地理，二建置，三祀典，祥異，物產，四政事，五官師，六人物，七選舉，八藝文。

井陘之關於史事尙矣。本書事紀門寥寥四紙，大抵不過掇拾村塾之書，非所語於攷古也。

井陘漢常山縣，金天會中曾置威州，元廢。

末附光緒續志三十六卷光緒元年知縣常善修。

同治阜平縣志四卷

同治十三年知縣勞輔芝修

據所錄舊序，乾隆三十年知縣鄒尙易取舊志稿編訂而成。據凡例引李延賞城隍廟碑記稱舊志云云，是明已有志，鄒氏修志時已佚也。

阜平本行唐地，金章宗時置今縣，隸正定府。

書僅四卷，一天文，二地理，三人物，四政典，其凡例詆舊志門類煩碎，故以此矯之。然藝文附於政典，仍載詩文，抑不知何說也。

道光欒城縣志十卷

道光丙午知縣李鈞繼前任桂超萬修成。

凡十卷，曰輿地志食貨志職官志武備志選舉志人物志人物外志藝文志。

其人物不屏宦官，藝文不錄詩文，皆卓出勝凡。卷末志餘卷首辨訛皆有搜輯訂正之功。其凡例自稱以武億安陽志爲法，宜其有此矣。

同治欒城縣志十四卷

同治十一年知縣陳詠主修。縣人拔貢張惇德纂。按惇德曾撰唐

縣延慶州兩志，蓋畿人之能治掌故者。據所載歷修姓氏則萬歷二年知縣耿繼武創修，康熙十一年知縣趙炳重修，二十二年知縣王玘再修，道光二十六年知縣桂超萬三修，其舊序則失載矣。凡十四卷，一二輿地，三世紀，（事略祥異）四賦役，五保息，（倉廩等）六學校，七武備，八九職官，十選舉，十一至十三人物，十四藝文。

樂爲古邑，後漢始立樂城縣，宋以後屬正定府，沿革久矣。志於沿革一篇雖復寥寥短簡，而事略一篇頗見甄采之勤。於近事尤詳。藝文專載碑碣及著述不取詩文，皆他志所罕及者。獨縣人韓林兒不爲立傳，蘇味道雖立傳而入之宦蹟，皆未允協爲可惜耳。

乾隆行唐縣志十六卷

乾隆癸未知縣吳高增修，前有壬辰知縣文有斌一序。

據所錄修志姓氏，志初修於康熙十一年，重刊於十九年，再修於乾隆九年，任知縣者何琛王鶴張振義也。

凡十六卷，一恩紀，二圖經，三地理，四官師，五惠政，六食貨，七建置，八典禮，九名宦，十一人物，十三風俗，十四十五藝文，十六事紀。

行唐爲漢南行唐縣，唐曾置泚州，旋廢。本書地理志所采皆荒僻之詞。如謂箕山爲許由所隱，方輿紀要已闢其妄。其圖經內有所謂禮翼四教圖，有所謂思性懷形圖，益爲怪誕。蓋誤以州縣志書爲令長紀功之簿，致此謬悠。惟風俗好尚二門尙不盡粉飾，爲異於他志耳。

咸豐平山縣志八卷

附光緒續志

咸豐三年知縣王滌心修。

據所錄前志歷修姓氏，一修於嘉靖庚戌知縣李從今，再修於康熙壬子知縣湯聘。凡例譏前志云有地理而無建置，有人物而無選舉，未免缺略。而混學校於地理尤爲失體。據學部圖書館方志目尙有順治平山志五卷。

平山置縣始自唐中葉，明以後屬正定府。

書分八卷，一輿地志。二建置志，三賦役志，四學校志，五職官志，六選舉志，七人物志，八藝文志。中如學校一篇，繪圖貼說，龐然佔一巨冊。而人物僅費紙二十餘番。其以虛文濫佔篇幅可知。末附光緒二年知縣唐蔭桐續刊一冊。

光緒元氏縣志十四卷

光緒元年知縣胡岳主修，正定府學教授趙文濂纂。

據序，元志創修于嘉靖間知縣周居魯，續修于順治六年知縣祖

永杰，再修于乾隆二十三年知縣王人雄，又據祖序稱「閒覽舊誌：微惜其太略，而中多魚魯。繙閱典籍，得前令鹽臺張公重修縣志，稿雖脫而工未竣。余瞿然曰，修廢舉墜有司之事，何忍其湮沒。乃延博古諸儒分局校讐，：亟繕張公前志，仍竟其局後緒。明季告終，清朝啓運，其鼎革損益官師姓名災祥政治有古蹟前未詳者，無妨檢入。另書後冊以成一朝信史，備異日翰軒採擇云云」。是周志簡略而今亦并無存矣。惜乎祖氏所修僅取張公舊稿從而增益之，又閱百年始有王志之續，據其序錄較爲精詳，而胡氏始得以依據而成今志也。但據學部志目尙有崇禎元氏志六卷，知縣張慎學修。

書凡四十卷，一地理志，二三建置志，四世紀志，五賦役志，六保息志，七學校志，八官師志，九武備志，十選舉志，十一二人物志，十三四藝文志，以歸餘等終焉。

按元氏本鮮虞故封，中山邊邑，自趙封公子元於此，因而得名。爲正定府屬縣，素號僻陋，聲名文物，甚尠可傳也。

乾隆贊皇縣志十卷

乾隆十六年縣令黃岡竹修。

贊皇自隋立縣，至明萬曆間始有志。然已久佚。此書亦粗具規模，聊勝於無而已。大抵舊志積習相沿，其舛陋處固不勝枚舉，而最難索解者，厥惟人物風俗二門。夫人物之當志固也。然其采摭之源，必然明著，使讀者一望而可徵信。乃舊志於前史人物，則濫收名人以爲光寵，而不問其是否確隸本縣。於近代人物，則膚濫語調，累牘連篇，並不示人以從何采訪。此其一。風俗志則照例以冠婚喪祭分述。而不悟冠禮之廢已久，何勞踵此虛文。冠婚喪祭以外，豈遂絕無他種禮俗可述。乃於可以無

述之風俗必不肯缺一門，而於不可無着之風俗反不肯着一字。甚矣流俗之難悟也。

紀人物最善之法，莫如按族姓以定世系。例如贊皇李氏之在唐，定與鹿氏之在明清，代有聞人。正宜詳爲編列，以昭其淵源之有自，且考見家族盛衰之由。如曰徵文考獻，此真是矣。何必東塗西抹，一鱗半爪，復強立孝友忠義諸品目以塗附之乎。此志中最可笑者藝文一門。唐代李氏，文采彪炳。若每人所作詩文皆予列入，則僅會昌一品集已不勝其載矣。如此絃一漏萬，毫無意義，何如其已。

又事紀中載李衛公問休咎一節。衛公一生事蹟昭然區宇。若謂鄉里所關，不錄其大而錄其細，何歟。卽以瑣事而論，唐宋人所紀衛公佚聞亦不知凡幾。豈修志者概未之見耶。

據學部圖書館志目有康熙贊皇志九卷，知縣李同清修，康熙十

一年刊本。

光緒贊皇縣志二十四卷

光緒二年知縣周晉堃修。號爲二十四卷，中有一卷止二葉者，誠如實齋所譏矣。

康熙晉州志十卷

咸豐十年知州朱寶林取舊志補刊

康熙十四年知州郭建章撰，有魏裔介序文。二十九年知州姚祖法增修，三十九年知州康如璉三修。據序志創於萬歷，其詳不可得聞矣。

晉州爲古鼓子國，元始置州，明以後隸正定府。

本書卷一曰區別地理，卷二曰紀錄建置，卷三曰締覈貢稅，卷四曰宏宣典禮，卷五曰評騭秩官，卷六曰歷稽選舉，卷七曰表章先獻，卷八曰採掇藝文，卷九曰闡揚風化，卷十曰通紀事蹟

。卽其目類可覘其纖詭之習猶沿明舊。所排纂史材亦浚雜無序。不知何以歷年無重訂之者。

乾隆無極縣志十卷

乾隆十三年知縣黃可潤修。

據凡例云，一舊志明纂於邑人安嘉士，順治年間修於知縣高必大。安志已無存，高志亦殘缺，不特紀事多訛略，而藝文亦多壽贈諛詞，於古人提要撫實之意全失之。一則前志之陋亦可概見。

無極爲漢中山屬縣，明屬正定府，雍正二年改屬定州，十二年復屬正定。按通鑑唐紀，貞元九年王武俊掠安喜無極萬餘口徙之德棣。胡注云，一按無極山碑云，無極山與天地俱生，從上至體可三里所，立石爲體，三丈五尺，所石上青下黃白，所前

正平可鋪兩大席，在無極西南三十里。景福二年以無極縣爲祁州。一此事本志未引，乃云無極山距縣一百六十餘里何也。書十卷，一地理，二建置，三祀典災祥物產，四田賦，五秩官，六宦蹟，七八人物，九十藝文。卷末附公牘數篇，有涉及物價工價者，皆有裨史實之文字也。

光緒無極縣續志十卷

光緒十九年癸巳知縣曹鳳來修。前志自乾隆十四年知縣黃可潤續修後百三十餘年間而後有此輯也。

書凡十卷，一地理志，二建置志，三祀典災祥物產志，五田賦志，六宦蹟志，七八人物志，九十藝文志。卷首列紳民鋪張曹氏本人政績之公稟，誕陋可想。

惟地理志有云，一前志所稱鑿井之妙，今多束鹿人爲之，邑人

不及也。南侯坊村楊姓鐵工世傳製造鐵水車，技勇大刀最爲得法，他邑鐵工皆自謂遠遜。一此則猶爲實錄可資考證者。

康熙藁城縣志十一卷

康熙三十七年知縣賴于宣修，教諭張丙宿參訂，至五十九年知縣閻堯熙復用舊板增訂。

據閻序，縣志創始于嘉靖甲午，撰者縣人李正儒，而重修於康熙戊寅，中間百六十年無志。據學部方志目有嘉靖藁城縣志十卷，知縣尹耕修，卽李志也。

本書十二卷，一封域志，二營建志，三賦役志，四禮儀志，五事異志，六秩官志，七選舉志，八錫命志，九循良傳，十人物志，十一列女傳，十二文集志。

藁城自漢以來爲縣，且屬鉅鹿，屬恒州，屬正定府，亦數千年

未改，溇沱貫邑境而絕無山脉，此縣之所異也。

賦役志稱「前明勦賊佃地九役十四廠原地一千三百餘頃，順治年間盡行撥補安肅縣。邑人馬祖發等公議云，按撥補安肅租地皆藁民耕種祖業，廬墓聚族，衣食于斯者也。每歲完租而外，佃民更無他慮，或遇水旱，惟憑年之荒歉以爲租之盈縮。一自奉撥安肅，業主惟按地索租，每畝額銀數倍糧則，卽遇災年報蠲，多免業主，而佃戶邀免無幾。且地之腴者間被業主強奪圖利轉鬻，縱有墳墓，亦皆罔恤，卒至爭訟靡寧。至地之瘠者又欲交還業主而留難不收，以故坐墊償租，佃民受困思逃云云。」又賦役志云，「縣經歷代兵燹之後，人物彫耗，土地荒曠，戶口存者僅三之一。明永樂十四年徙山西諸戶以實藁城，歷宣德正統生息漸繁。一以上兩事皆縣之史實，宜標而出之也。」

文集志載明高帝徵趙民望司節序敕諭亦可與明史相證。

光緒續補藁城志十一卷

光緒七年署知縣汪度取同治十一年知縣朱紹毅舉人張毓溫補輯之本刊之。據秩官志云，自康熙六十一年至乾隆二十六年職官見正定府志與續志相接，自此後至咸豐二年八十餘年，以咸豐三年之亂縣署案籍燬失無存，朱本蓋亂後掇拾者也。

光緒新樂縣志六卷

光緒十一年知縣雷鶴鳴主修。正定府教授趙文濂纂。

據舊序萬歷庚寅知縣張正蒙創修，順治間知縣林華皖再修，乾隆二十二年知縣麻廷璣續修。但據學部志目有康熙新樂縣志二十卷，知縣林華皖修，康熙元年刊本。

新樂漢新市縣地，隋置今縣，明以來爲正定府屬縣。

書僅六卷，一星野等，二學校等，三戶口等，四職官等，五藝文，六金石，具體而已。

咸豐大名府志二十二卷

咸豐三年知府毛永柏取前知府武蔚文修本刊行。

按舊序，洪武景泰之間志凡再修。弘治甲子東明知縣唐錦續修，嘉靖己酉，茅坤來倅廣平，受檄重葺。已而遷去，不果，而潘仲驂繼成之。入清而康熙十一年知府周邦彬，乾隆二十五年知府朱煥兩修。而朱志蓋迄未殺青，武氏取朱氏之稿稍加訂正，而職官表以下則別爲續志以附于後焉。故名曰咸豐志實即乾隆志也。

大名爲古魏郡地，唐以來迭爲重鎮，明爲大名府，領縣十州一，乾隆以後定轄大名元城南樂清豐長垣東明及開州七州縣而地望益輕矣。

凡二十二卷，一星野等，二疆域等，三四年紀，五山川等，六

城池等，七里甲等，八學校等，九軍政等，十一職官，十二選舉，十三名宦，十四十五人物，十六流寓等，十七至二十二藝文。

其中年紀一篇尙爲詳略適中。惟未注出處爲可惜耳。至古蹟陵墓等，雜湊成篇，殊爲可哂。如謂莊周墓在東明縣，而引東明縣志云，一知縣楊日升訪周墓至城東北十里許，見古邱高數丈，指之曰，此周墓也，詢居民果皆莊姓，復命工塑像于牆壕內，得莊子瓦像一。誕妄一至如此。

乾隆大名縣志四十卷

乾隆五十年知縣張維祺修，未及刊而携以去官，後任李棠於五十四年取其殘稿刊行之也。

其自序云，一往在肥鄉官舍，同年友章君學誠與余論修志事，

章君之言，余未之能盡也。然于志事實不敢掉以輕心焉。二圖包括地理，不敢流連名勝侈景物也。七志分別綱目，不敢附麗失倫致散渙也。二表辨析經緯，不敢以花名卯簿致蕪穢也。五傳詳具事實，不敢節略文飾，失徵信也。庶幾一方之掌故不致如章君之所謂悞於地理之偏焉。一是其承章氏之緒論，卓然具深識也。

大名本即魏縣，五代時分設，乾隆二十三年裁魏縣併入，移治府城，與元城同爲附郭，而大名爲首縣。斯志爲併縣以後作也。大名志創於嘉靖，及萬歷間縣人張若恂起而修之，此見於卷末成誼跋者。

然按藝文志，大名縣舊志隆慶四年知縣李本貢創修，萬歷四十年知縣李一鰲重修，康熙十五年知縣顧咸泰三修，魏縣舊志則萬歷三年知縣李幼淑重修，天啓四年知縣陳序繼修，康熙十

九年知縣李尙斌繼之。殊與成跋不合。

凡四十卷，一至十爲圖說，則他志之疆域篇也。十一十二官師表，十三至十五選舉表，十六十七建置志，十八祀典志，十九賦役志，二十風土志，二十一二十二古蹟志，二十三至二十六藝文志，二十七禮祥志，二十八名宦傳，二十九至三十六鄉賢傳，三十七三十八列女傳，三十九流寓傳，四十雜記。

同治元城縣志六卷

同治十一年知縣吳大鏞修，候選直隸州知州王仲牲同纂。

據凡例，元志創始於康熙十四年知縣陳偉，其時正奉修一統志之詔也。幾二百年無續修者。元城爲大名附郭縣而簡陋如是，亦足怪也。

凡六卷，一輿地志，二建置志，三田賦志，四宦業志，五人物

志，六藝文志。據其凡例則大綱仍乎前志，條目遵奉章程。自云一仍舊志原文者十之四，節取府志者十之三，博徵羣書及采輯民獻者亦十之三，一其亦虛應故事之作而已。

康熙南樂縣志十五卷

康熙辛卯知縣王培宗修，舉人諸城邱性善纂，先是康熙辛亥知縣方元啓嘗有輯本也。

據舊序南樂志肇于嘉靖丁酉知縣葉龍皋，繼修于丙寅楊守誠而錢博學繼之，順治癸巳蔡瓊枝繼之。

凡十五卷，一天文圖志，二地理圖志，三帝本紀，四建置圖志，五沿革表，六賦役志，七風俗志，八方物志，九秩祀志，十紀年，十一職官年表，十二選舉年表，十三宦業列傳，十四人物列傳，十五藝文志。

南樂爲漢東郡樂昌縣，後唐避李國昌諱改今名。

康熙十一年以直督衛周祚議修通志通飭遵行，此書即是時奉功令而作，沿襲舊制而已。

同治清豐縣志十卷

同治十年知縣高俊修。

清豐卽衛國之頓丘，在淇水南，漢置縣，唐始易名清豐，歷代隸屬屢有變更。明以來定屬大名府。

書凡十卷，一沿革，二古蹟等，三田賦等，四祀典等，五科貢等，六宦業等，七經述等，八忠節等，九十藝文外志。觀其分類立名已多詭誕，更無論於史法矣。

民國清豐縣志十卷

民國三年知事劉朝陸主修，邑人胡魁鳳等纂。

據其所述，清志創修于明嘉靖三十七年知縣李汝寬，續修於天啓四年知縣潘士聞，三修于清順治二年知縣李櫛生，四修于康熙十五年知縣楊璟，五修於雍正八年知縣段世奕，六修於同治十年知縣高俊。
類列大抵皆襲前志之舊，非能與時偕行者也。

乾隆東明縣志八卷

乾隆二十一年知縣儲元升修，有道光中續增數頁。

據舊序嘉靖十五年知縣高祿始修，萬歷四年知縣常澄續修而末竟，四十四年知縣李遇知又修，天啓三年知縣張福臻又修，順治三年知縣張學知又修，康熙十一年知縣楊日升又修。

書凡八卷，一輿地，二建置，三田賦，四職官，五選舉，六人物，七雜志，八藝文。

據其凡例，舊志所載悉存之不稍刪改，事有異聞，則數說并存。蓋其慎也。又於標識行款分別義例頗爲森嚴。其用心殊爲精到。此自箸述之金針，不得以其瑣屑而少之也。即其所增訂之案語觀之，其於舊志切磋之功爲不少矣。

縣有靈巖寺，在縣東南之方山，水經注所謂玉符山。李吉甫十道圖以潤之棲霞台之國清荆之玉泉與此爲四絕。金史稱靈巖寺有屋三百餘間，且連接泰安之天聖寨，介於東平益都之間，駐兵於此足相應援。故本書別附靈巖志略以紀之。仿欽縣志黃山高要志端溪之例也。然所錄多據李興祖靈巖舊志，於史事徵引未備。

乾隆濟陽縣志十四卷

乾隆二十九年知縣胡德琳修，德琳于三十九年又修東昌府志。

書凡八卷，一地理志，二建置志，三田賦志，四職官志，五選舉志，六人物志，七列女志，八藝文志。似爲簡要。據其凡例頗注意於搜采遺佚實事求是。就中徵引之書必注出處固自有識。特仍斤斤於取法武功志，不免於陋耳。

光緒開州志八卷

光緒九年知州陳兆麟主修，進士前江蘇丹徒知縣祁德昌纂。大致仍前志體例，所更定不過一二名稱而已。

凡八卷，一地理志，二建置志，三田賦志，四職官志，五選舉志，六人物志，七列女志，八藝文志。

嘉慶長垣縣志十六卷

附道光續志二卷

嘉慶十四年知縣李于垣屬陽湖貢生楊元錫纂。

據敍錄長垣志明宏治以前無可考，可考者自明正德十一年知縣張治道始。嘉靖二十年知縣杜緯重修。隆慶五年縣人趙莘因舊志更博采見聞纂輯成志。及萬歷三十一年知縣張文炫又屬莘子舉人浩重纂。康熙十九年知縣宗琮又因舊志續纂。又據凡例，雍正庚戌知縣胡承璘撰續志稿四卷，爲未成之書。

長垣漢縣，明以來屬大名府，建置雖古而沿革則殊簡也。書爲十六卷，一圖考，二沿革表封爵表，三職官表，四選舉表，五地理書，六建置書，七田賦書，八典禮書，九事紀書，十循政記，十一人物記，十二列女記，十三十四藝文錄，十五金石錄，十六敍錄。冠以叙例二十八條，大抵皆章氏之緒論也。叙例中有云，「近代方志每列寺觀，夫寺觀何足云建置耶。今以寺觀載於里甲某里某村下以存其名，所以抑二氏也。」此則迂陋之見，章氏所不出也。

事紀書引隋書經籍志云，古者朝廷之政，發號施令，百司奉之，守而不忘。又云，呂伯恭撰大事記，朱子稱其精密。此二語已屬不倫矣。爲掌故之書則不可爲大事記，爲大事記則不可爲掌故之書。詳志家所以須有年紀之篇，爲其年經事緯足以明古今之變納繁于簡也。可以爲記，可以爲表，而不可以爲書。曰事紀書，其名先自不合。更檢其內容，則雜記恩澤祥異及佚聞三則而已。信其如此，則全志不皆可謂之事紀書哉。綜觀其體例議論，多似是而實非。蓋襲章氏之皮毛而未得其元珠者也。未附續志，道光二十九年知縣陳右昌修，據其序略謂先請常熟蔣庸主修，蔣意李志太繁，乃刪削而合併之，又覺其過當乃與郭餘裕詳校增輯之，縣人以李志爲可惜，因別爲續志二卷。然創其事者蓋前任葛之鏞，助成之者舉人主講寡過書院聶泰，皆湘人也。其體則一反李氏之所爲，凡例首條云，一志卽記也，

既曰志矣，何必曰書曰表曰錄，故爲別異其名。茲刻門類悉仿舊志而概名爲志以歸畫一。一其不滿於李志可想。然既不循其體例，則宜別行而不當曰續志附于其後也。

光緒邢臺縣志八卷

光緒三十一年知縣戚朝卿請貴筑舉人候選知縣周祐纂修。

據序云邢志凡四修，萬歷康熙乾隆三志不復可得，今得見者惟嘉慶志，迄今將及百年云云，但學部志目有乾隆邢臺志知縣劉蒸燮修也。

觀其凡例於舊志之疏罅改訂已多。凡分八卷，一輿地，二建置，三經政，四職官，五選舉，六人物，七古蹟，八藝文，大致猶爲簡要。然如災祥改爲前事而隸於經政，選舉篇科目之前忽列歷代試格，皆難索解。

邢臺爲順德府附郭縣，漢以來之信都襄國也。史事最長而志殊未之及，其他抑可知矣。

乾隆沙河縣志十卷

乾隆二十二年知縣杜顥修，前有顧棟高序。顥棟高門人也。

據序，志創於萬歷十六年縣令姬自修，（其名據秩官志補）康熙二十六年知縣談九乾續修。杜氏力詆其援據之疏，采摭之雜，叙次之紊，體例之乖。今就沿革一篇觀之，本志能據各史地志爲說，固自非前志所及。至於圖繪之精，劖劂之工，亦足見有作不苟，不媿承顧氏之緒餘者矣。其凡例十數條，皆灼然有見，其論古蹟曰，「古蹟必實有故事可稽堪資後人憑弔者方爲足據，或本無與輕重而復已頽廢，或不在封域而謬爲掇拾，或雖有踪跡而系以荒誕不經之詞，未免收之過濫。茲固未敢概從刪削，而每存其說必加以論辯，或亦不失傳信傳疑之意。」此義殊爲往時修志者所忽，其說良可存也。

凡例又云，一是編之輯，搜採悉係躬親，凡履涉所至，自邑之紳士以逮山僧野老輿隸販夫之屬，靡不周咨博訪。一觀其薈紀一篇，巨細兼收，頗多常人所忽之故實，信乎非躬歷而勤索者不能。修志者若能通采此例而擴充之，當能補偏救弊不少也。後附道光二十五年知縣魯傑續增之本，其自序云，一慨志乘之修已久，亟欲修之而不敢妄爲重修。因思杜志本屬詳明，原板亦極完善，第爲續增可也。一其卑以自牧之意亦殊足多。固勝不知而作者矣。

沙河隋開皇中置，唐武德中曾立溫州，旋廢。明以後屬順德府，宋璟墓在焉。

書十卷，一輿地，二建置，三風土，四田賦，五秩官，六選舉，七八人物，九十藝文。

同治平鄉縣志十二卷

同治七年知縣蘇性撰。

按舊志序，萬歷十二年知縣王應創修，繼卽毀佚，康熙八年知縣趙弼重修，十九年知縣卞三畏增補，乾隆十六年知縣楊喬三修，（學部志目喬作香誤也）此其大較也。其中趙弼一序明云康熙八年予不佞承乏茲邑，而竟誤刊爲乾隆八年。舛謬一至於此，秉者之草率可以想見。

據其凡例，乾隆十五年以前事蹟多依舊志原文，凡十二卷，一星野，二地理，四典禮等，五田賦等，六職官等，七八選舉等，九人物，十至十二藝文。

平鄉爲漢鉅鹿縣，後魏改今名，自明以來屬順德府。

同治廣宗縣志十二卷

同治十三年知縣羅觀駿修。

按舊序隆慶六年知縣張民範始修，萬歷二十六年知縣馬協續修，康熙三十二年知縣吳存禮，嘉慶七年知縣李師舒各一修。

凡十二卷，一封域，二建置，三祠祀，四田賦，五典禮，六封爵，七官師，八選舉，九宦蹟，十人物，十一寢祥，十二藝文。大致記以舊志之文而附以近事而已。

縣自元憲宗時始分平鄉置，明初廢，旋復，屬順德府。

光緒鉅鹿縣志十二卷

光緒丙戌知縣凌燮修。

據歷修姓氏，萬歷二十一年知縣何文極順治十八年知縣王鼎康

熙二十年知縣陳可宗五十一年知縣郎鑑各修一次，而存者僅王
志而已。學部志目郎鑑作邱鑑誤也。

鉅鹿在秦漢向爲郡，永樂間始爲縣，屬順德府，志於史事沿革
略焉未及。

凡十二卷，一地輿，二建置，三學校，四典禮，五賦役，六風
土，七事異，八官師，九選舉，十人物，十一列女，十二藝文
。所取法者陸氏靈壽志也。

光緒唐山縣志十二卷

光緒七年知縣蘇玉修。

據教諭杜霽序，唐志創於萬歷間，（知縣鄭宗周縣人趙鶴年修）
順治初年因災散佚，今所傳者迺康熙十二年知縣孫纘重修，內
有康熙十九年知縣朱君魁紮續補數則。又據凡例，續修志稿係

同治十三年知縣續魁等彙輯。

書十二卷，一輿地志，二建置志，三世紀志，四田賦志，五保息志，六典禮志，七學校志，八官師志，九武備志，十選舉志，十一人物志，十二藝文志。

縣在漢爲柏人，金改唐山，自元以來屬順德府，其曰唐山者據皇甫謐柏人城堯所都也。其沿革門云，秦滅六國置鉅郡。不謂之鉅鹿而謂之鉅郡，大乖書法矣。

道光內邱縣志

道光十二年知縣施彥士修。

前有康熙七年訓導牟瑞徵一序，蓋曾修于是年也。舊志規模分以八紀，曰天紀人紀之類。纖詭可笑。今本亦仍之，蓋增補而非重修也。

內丘故漢鉅鹿郡之中丘縣，隋以楊忠諱改，明以後隸順德府。
本書錄史記扁鵲傳，亦殊不審其命意所在。

宣統任縣志八卷

宣統己酉知事謝昺麟創修，委訓導陳智編纂。至民國四年知事王億年始增補付印。據謝昺麟序，邑志始輯於隆慶元年，再輯於康熙十二年，二十五年三十年兩次續補。復修於道光初年。又據王億年序，則志書板片於咸豐三年悉付劫灰。據學部志目則隆慶志知縣林九裔修，康熙志知縣季芷修。

任邱始建於漢，屬廣平國。明清爲順德府屬縣。其縣疆土東西五十里，南北四十里，真彈丸之地矣。

據王序，任邑九河下流失其故道，大陸之墟，陷爲巨澤，尙無術以疏濬而拯救之。是水患爲縣之大事。故卷一河流一篇，援

引疏證頗爲詳明且於現行狀況記注無失。

其疎濬一篇載順治中知縣吳懷忠之十七河疏濬記，以行水丈尺編爲歌訣，實佳史料。

卷三田賦一篇敘述畝額亦極明顯。茲彙括其言曰，「所謂原額者即萬歷時條鞭刊定之額，其時江陵當國，普丈天下田畝，事核而數覈，故清初賦役沿其法而不革，所謂額外者則明代之馬場與皇莊各居其半，至清而場升科皇莊改爲更名地。」按清代近畿仍有圈地其後雖別予受補，然明之稅政亦未盡除，特任縣在畿南故不及耳。

又按光緒三十三年以後有帶徵之學警經費本縣額徵計二萬一千貫有奇，其數亦不可謂不鉅。此又光緒以前舊志所無也。

軍屯差徭之沿革詳見邑人徐連之記。茲亦彙括其言曰，「軍屯始隸正定衛管束，田畝贍足，戶各安業，康熙二十八年裁衛歸

縣，被任邱易州撥去十分之七，一糧四派，代糧納租，以補任
易二處，且有漕運差徭屯丁獨辦，數十年來，訖無寧歲，其後
奉文將行差丁匠銀糧並加入地糧額內，仍當徭差，地少糧多，
屯民之困極矣，乾隆十一年縣令批諭每逢雜差毋得混派，惟兵
差一體充當。」

乾隆廣平府志二十四卷

乾隆乙丑知府吳毅修。

按所錄舊序，嘉靖二十七年知府翁相修，給事中陳斐謫丞長垣時所撰也。康熙十五年知府沈奕琛重修，但據序錄則實成化間知府秦民悅創修也。

凡二十四卷，一二星野建置，三疆域山川，四五學校武備，六賦役等，七水利，八壇祠，九寺觀，十陵墓，十一古蹟等，十二封爵等，十三十四職官，十五十六選舉等，十七十八名宦等，十九至二十三人物列女等，二十四雜事。

廣平始見漢地理志，北朝以來爲洺州，明復廣年爲府。雍正四年以河南彰德府之磁州來屬，遂領一州九縣，則永年曲周肥鄉雞澤廣平邯鄲成安威縣清河及磁州也。本書於沿革一不登載。

至如人物傳以張揖爲魏太和中博士，明明舛誤，宜爲光緒志所糾彈矣。

光緒永年縣志四十卷

光緒三年知縣夏詒鈺撰，蓋據前任王鏞之稿刪定而成者也。

其凡例云，永年有志創自前明縣令宋祖乙，現行本爲乾隆中孔廣棣重修。據職官表，宋蓋崇禎中任也。據學部志目有乾隆永年志十八卷，知縣王珍修，乾隆十年刊本。

永年爲漢廣平地，唐爲洛州，金置永年縣，爲廣平府治。

凡例能引永清棗強之例，是頗知所取法矣。然藝文仍錄詩文，並不依省局新編通志及廣平舊志之體，一失也。舊志錄春秋經傳誥勅奏疏皆以爲非，殊不知苟足資佐證之文不得避習見，苟確有關係之文亦不得避複見也。二失也。

其目次卷一至二十爲星野山川疆域沿革建置水利田賦戶口學校
秩祀營制驛傳古蹟碑碣寺觀冢墓風俗土產祥異雜稽諸志，二十
一至二十三爲封爵職官選舉三表，二十四至二十五爲兵事官蹟
二錄，二十六至三十六爲人物諸傳，三十七至四十爲藝文。
觀疆域錄邑人風俗之說，古蹟篇采冉伯牛墓而又附以誕妄無稽
之談，意識之卑，無足論矣。

同治曲周縣志二十卷

同治八年知縣存祿修，縣人進士劉自立纂。

按序嘉靖辛卯知縣黃驊創志，萬歷癸卯知縣高出增修，順治十
二年知縣李時茂再修，乾隆丁卯知縣勞宗發三修，本書凡例云
，仍修舊典非誇新獻，其宗旨已可概見。寥寥六冊，分至二十
卷。（細目未錄）疊矩重規，無當大雅也。

曲周漢廣平國縣，鄴商封邑也。

雍正肥鄉縣志六卷

雍正十年知縣王建中修。

據序嘉靖十七年戊戌知縣鄒理始修，四十年辛酉知縣商誥再修，萬歷十八年庚寅知縣廉靖三修，康熙二年癸卯知縣焦服祖四修，四十九年庚寅知縣許國棻五修。但以屢遭漳水板沒書亡，鮮復存者。

肥鄉始立於魏，屬廣平，迄無改易。

書凡六卷，一圖考等，二物產等，三名宦等，四五藝文，六典籍及志餘。詩文謂之藝文而著述謂之典籍，亦可謂顛倒矣。

同治肥鄉縣志三十六卷

同治六年丁卯知縣李鵬展請教諭趙文濂纂輯。其序文署名作鵬

屏，殆誤刊也。

書凡三十六卷，一輿圖，二星野，三沿革，四建置，五疆域，六山川，七學校，八事紀，九兵紀，十武備，十一賦役，十二壇祠，十三寺觀，十四塚墓，十五古蹟，十六風俗，十七典祀，十八物產，十九封爵，二十職官，二十一保舉，二十二選舉，二十三封廕，二十四名宦，二十五人物，二十六忠義，二十七孝友，二十八隱逸，二十九列女，三十寓賢，三十一仙釋，三十二災祥，三十三著述，三十四五藝文，三十六雜記。其中兵紀一篇有成同間征剿戰守紀略，皆記教匪事迹，良爲可珍之史料。武備篇載陣法圖，雖嫌蕪濫，亦他志所未及也。

乾隆雞澤縣志二十卷

乾隆三十一年知縣王錦林取十九年前知縣王光燮稿訂正而刊之

也。

按所錄舊序則有順治四年知縣吳應文康熙十二年知縣姜炤兩次所修。據凡例則云創於前明貢生康守愚邑令曹孔榮。據學部志目有崇禎雞澤志九卷。殆即此也。

雞澤之名始見春秋，隋唐以來遂以名縣，明清屬廣平府，然非要地也。

凡二十卷，一星野，二疆域，三建置，四山川，五學校，六壇祠，七古蹟，八風俗，九典禮，十田賦，十一武備，十二職官，十三選舉，十四宦蹟，十五封贈，十六人物，十七列女，十八災祥，十九雜事，二十藝文。

是書續於王志之後歷時未久，而自云不數月即告竣，前志所有刺謬一一釐正，是亦有意吹求，非真具見地者也。

康熙廣平縣志五卷

康熙十五年知縣夏顯煜修。

據舊序萬歷十七年知縣陳鑿創修，萬歷戊申知縣王一龍續之。今悉仍前體，未嘗更張也。凡五卷，以土地人民政事文獻分統之。強事離析，纖詭不經，猶乎明人陋習而已。

本大名魏縣地，金大定中置今縣。

乾隆邯鄲縣志十二卷

乾隆乙亥縣訓導王炯撰。

據所錄舊序知志始於成化，其撰志者已不可攷矣。一修於萬歷元年知縣張第，再修于順治三年知縣韓思敬，而集事於康熙十二年知縣張慎發。（據凡例作二十二年，顯誤衍二字。）至雍正八年知縣鄭方坤復增補之。

書凡十二卷，一編年，二輿地，三建置，四食貨，五禮儀，六秩官，七宦蹟，八選舉，九人物，十一藝文，十二附餘。其所謂附餘則佚事廟宇寺觀，則仍陸氏靈壽志之見也。

邯鄲之名著自春秋，迄於今未改。其在史冊，所關者大矣。本書既無沿革，又無大事記。僅摭拾空言瑣事以爲編年。而確鑿可據之史實反以入之佚事。其顛倒陋略，蓋未聞史法者矣。

康熙成安縣志十一卷

康熙十二年知縣王公楷屬舉人南和張樞纂。

據王序，志創於萬歷二十七年知縣劉永脉，後十年訓導王孫昌增飾之。據學部志目有順治成安志五卷，知縣賈三口修。

成安立縣甚久，而地處冀魯豫之交。於古或隸司州，或相州，或冀州兗州，明以來始定隸廣平府。本書方域志曰三方錯處之

區，而河南尤近，地多寄莊，考試有冒籍，獄訟不直者恒規避不赴質。紀實也。

書凡十二卷，一輿圖，二沿革，三方域，四總紀，五建置，六賦役，七秩官，（按目次作秩官而書實作職官）八宦蹟，九貢舉，十人物，十一十二藝文，附古蹟。往往卷祇數棄。其中總紀漫取史事排年雜載，毫無義法。列傳皆未列出處。流寓一項列魯昭公，則以縣有乾侯驛也。

康熙威縣志十六卷

康熙癸丑知縣李之棟修。

據凡例，威志自明縣令錢朮（嘉靖二年任）創于前，胡容田可井張蒙正嗣修于後，順治丙戌袁天秩（學部志目作黨天秩）又益續志一冊，今奉文纂修，特取二志加以近事彙成也。

書十六卷，一星野，二疆域，三沿革，四古蹟，五建置，六學校，七壇祠，八田賦，九風土，十秩官，十一宦蹟，十二選舉，十三人物，十四藝文，十五災祥，十六雜志。

威州金置，明初始降爲縣，屬廣平府。其故實簡略固宜。然本書僅逐錄舊文，勉分部居而已。每卷至有僅一二紙者，加又訛奪漫漶，至不堪寓目也。

同治清河縣志

同治壬申知縣王鏞修。

前有黃彭年一序，其時黃任修畿輔通志也。有云一文淵閣書目舊志中載清河圖志二冊，新志僅書名，皆無卷數，康熙中邑令盧士傑修志稱初編五卷後益爲十二卷，士傑又益爲十八卷。考明正統中楊士奇題本言文淵閣書皆永樂十九年取自南京，當時

已有新舊兩志，而盧志稱志創自嘉靖十三年邑令孟仲遴，更定於萬歷八年邑令向日紅。殆數典而忘矣。然就書目及盧志所記，清河志在明已四修，乃我朝自康熙十九年重修之後迄今百九年，竟無續而紀之者。一然歷來志乘所述源流多就現存者而言，已佚之書勢難遍致，不能獨責之盧氏也。據學部志目有康熙清河志十八卷知縣錢啓文修，康熙五十七年刊本。

本書凡例稱仍依原式以次增補，是其體例並無別識心裁，固勝不知而作。然其云田賦舊志凡裁革各款概行載錄，茲仿府志僅載現行事例，餘悉裁去。則大悖乎撰志之義也。凡新修之志當預爲舊志散佚計。故文求其省，事求其詳。若現行事例之外刊而不載，則舊志苟佚，來者將何攷焉。况紀制度之書貴於窮源竟委，不應存今而略古乎。

清河爲漢郡，北朝立貝州，以爲屬縣，明以後復爲廣平府屬縣

，其在東漢有黨人之論，其在北宋有王則之亂，此皆縣之要事。志無一語及之何也。

康熙磁州志十八卷

附同治續志六卷

康熙三十九年知州蔣擢取康熙二十年前任知州任塾所修本而增訂之也。

據任序，自嘉靖癸丑至萬歷庚辰三十年間有周文龍孫鑑栗永爵羅湖趙範相繼重修。順治戊戌知縣張瑞午復承巡撫賈漢復之命重草上之。然率略不足當賈意也。任志成後又有康熙三十三年知州康善述增修，而蔣氏概以爲未可。十餘年後，遽又取而重訂之。蓋以後競前，人情不免。然其凡例云里甲村市當附於疆域之末，古蹟當另爲一卷，而以陵墓寺觀附之，風土物產宜另爲一卷，祥異有關鑒戒亦宜另爲一卷，前志俱收入雜志內，而

坊表寺觀盡刪，恐非志乘之體。則其抨擊前志，亦非無故也。磁州以地產慈石得名，在隋唐間屢置屢廢，明以後屬河南彰德府，雍正四年怡賢親王辦理畿輔水利，以滏河由直隸統轄爲便，奏請改屬直隸廣平府。

書凡十八卷，一星野，二疆域，三沿革，四山川，五營建，六學校，七祠祀，八賦役，九水利，十風土，十一古蹟，十二秩官，十三宦蹟，十四兵制，十五選舉，十六人物，十七藝文，十八祥異。

末附同治十三年知州程光澄續本，除星野疆域山川古蹟不再見外，餘皆就原有之門類補入近事，故不能單行也。

乾隆天津府志四十卷

乾隆四年知府程鳳文修，前任李梅賓創始，其秉筆者則內閣三禮纂修官吳廷華薦舉博學鴻詞汪沅也。

天津爲漢泉州章武參戶縣地。元通海運，遂爲重地。雍正三年改明天津衛爲州，九年復升府。領六縣一州，則天津靜海青縣滄州南皮鹽山慶雲也。

此書大抵合采畿輔通志長蘆鹽法志河間府志及諸縣志而成，前無依據，彌見其創始之艱。其中糾正舊縣志之誤者，如地輿篇縣志謂春秋時爲清國晉爲清州，此必誤引宋史地理志之清州也。山川篇青縣志云中山在縣南二里唐陽城隱此，此誤引唐書陽城隱中條山而奪去條字也。類此者尙多，皆非漫無剪裁者可比。天津要政惟鹽河兩項，故於鹽法河渠志之獨詳。然元以來海

逆之沿革未之及，僅略載於雜記中，抑其疏也。

凡四十卷，一天章，二地輿，三星土，四形勝疆域，五風俗物產，六山川，七城池公署，八鄉都戶口，九學校，十壇壝，十一古蹟，十二田賦，十三鹽法，十四驛遞，十五兵志，十六十七河渠，十八祥異，十九封建，二十名宦，二十一至二十四職官，二十五六選舉，二十七至二十九人物，三十至三十二列女，三十三至三十九藝文，四十雜記。

光緒天津府志五十四卷

光緒二十一年知府沈家本等監修，候選主事桐城徐宗亮纂，同知諸暨蔡啓盛覈正。

按徐氏凡例，知其體製略依章實齋氏之說，而蔡氏跋語則稱覆觀一過始見諸多脫誤，不能重纂，遂去其太甚者。

今觀其分類，紀之屬曰皇言曰恩澤曰郵政，表之屬曰沿革曰封建，考之屬曰輿地曰經政曰藝文曰金石，傳之屬曰宦績曰人物曰列女曰殉難士女，大體未差。然第八卷歷朝沿革自云「以史志爲定，以光緒通志及前志並州縣諸志爲輔，其天津青靜海滄四州縣分叙各別，互參始明。輿地一事，古今名實紛然百變，必一一求其至確，雖通材未易任此。」於是廣羅諸書，重疊比較，正文與按語雜糅不分，覽者數行俱下，仍不得其要領。自來無此撰志之法。蓋徐氏原稿或尙未爲定本，而蔡氏不能詳爲去取之也。

天津開商埠始於咸豐中，本志自應詳爲紀載，乃僅錄條約數款及英法兩領事每年所交地畝錢文附載公廨之後。且並法租界畝數亦缺而未載。何陋略一至是哉。同治天津教案幾釀國際戰爭，爲近代一大史案，志亦一字未及。可謂計錙銖而遺泰岱。至

全書文字牽強難索解處頗多，抑其末節矣。

乾隆天津縣志二十四卷

乾隆四年知縣朱奎揚修。前有陳宏謀序，宏謀時任天津河巡道也。

據凡例一縣本無志，縣志即衛志耳。衛志向有胡文璧本最佳，今本只存其修志一書，議論頗核。一今按其書載藝文內，略謂「官府市廩營伍廬舍率自本朝創設，前此未之有焉，則其志之無攷也固宜。一因歷述沿革，而請倫彥式秉筆爲之志。

據學部志目有康熙天津衛志康熙十三年副使薛光斗修也。

凡二十四卷，一紀恩，二星土，三地輿，四形勝疆域，五山川，六古蹟，七城池公署，八學校，九鹽法，十海防，十一河渠，十二田賦，十三風俗物產，十四五職官，十六名宦，十七選

舉，十八人物，十九列女，二十至二十三藝文，二十四雜記。天津既無掌故可言，故撰志甚艱。本書於鹽法海防漕運屯田諸政加意紀述，可謂得體。

同治天津縣志二十卷

同治九年前雲南鹽法道編修吳惠元撰，采嘉慶間諸生蔣玉虹之志稿殘篇而成，以續乾隆志者也。

據依凡例，一體例悉依舊志篇目，間有更訂，應增者附之。海口通商各政則將前後諭旨並一切章程纂入。其時參閱諸官正天津教案中人也。

嘉慶青縣志八卷

嘉慶八年知縣沈聯芳修，前廣東西寧縣知縣倪鏞纂。

據藝文志所錄舊序，創修于萬歷丁未知縣應震，重修于康熙癸丑知縣楊霞。

河間府縣舊志以爲春秋時之清國，義無所據，其在漢則泉州參戶縣地也。宋始置清州，蓋以河清名。明改青縣，順治省興濟縣併入，雍正九年以後隸天津府焉，漕運所經要道也。

書八卷，一天章等，二山川等，三賦役等，四職官等，五人物等，六蠲卹等，七八藝文。

同治靜海縣志八卷

同治十二年癸酉知縣鄭士蕙撰，舉人蘄水郭光庭校正。

據載縣志創修于明天啓某年知縣王用士，續修于康熙十一年知縣閻甲允。又據序稱，取閱舊志，體裁乖謬，文辭蕪雜，且字多漫漶不可識。爲芟蕪補輯擇其可存者存之云云。是舊志甚無

可取，而今恐亦並無存矣。

靜邑始置於金，初名靖海縣，明改靜海縣，屬河間府，清初因之。雍正三年屬天津州，九年設府，以縣屬焉。

書凡八卷，一地理志，二建置志，三災祥物產志，四田賦志，五官師志，六人物志，七選舉志，八藝文志。

靜海爲勵杜訥故里，屢代以文學顯，志宜有專紀，而闕焉不詳。抑不能舉史職矣。

乾隆滄州志十六卷

乾隆八年知州徐時作修，舉人武進胡淦纂。

據序，前志作于康熙庚申而未詳撰人。按學部志目知爲知州祖澤潛也。

據凡例，「康熙間開館修明史，特命督撫各修省志，其成式一

以賈中丞秦豫二志爲準。雍正間一統志歷久未成，復詔各省纂修通志，仍如前式，恪遵功令，昭法守也。然則此志爲當時通行之志體也。

凡十六卷，一星野疆域沿革，二建置，三學校，四祠祀禮制物產，五賦役，六鹽政兵防，七職官，八選舉，九十十一人物，十二紀事，十三古蹟遺聞，十四十五十六藝文。

滄州故漢勃海郡地，北朝始設滄州浮陽郡，明隸河間府，雍正設天津府，遂以州改隸。志有古無勃海國等十考。於舊志沿譌之處能引史籍以正之，功殊不細。

光緒南皮縣志十五卷

光緒戊子知縣殷樹森修，前有張之萬序云「南皮志創修於明萬曆時知縣李正華，康熙十二年知縣馬士瓊十九年知縣劉址相繼

續修。」

凡十五卷，一輿地志，二建置志，三典禮志，四學校志，五風土志，六賦役志，七職官志，八九選舉志，十一人物志，十二列女志，十三十四十五藝文志。

據其凡例云，一邑人潘孝廉震乙采訪訂正，物就匡略，未卒業而歿，今藉孝廉遺稿爲藍本而以新采各條隨類編入。所用體例悉遵府志，稍加變通。一南皮張氏爲六百年巨族。而無專紀以推本其著籍所由，亦闕典矣。

同治鹽山縣志十六卷

同治六年知縣王福謙主修，南皮舉人潘震乙纂。

據舊序志創於嘉靖癸巳知縣時尙儒，隆慶壬申知縣李萼續修，康熙辛亥知縣朱鸞鸞三修，癸丑知縣黃貞麟刪正之，庚申知縣

熊士晉再補，乾隆初年有修而未刊者，謂之鈔志。

鹽山隋縣，歷隸滄州，雍正設天津府，遂以改隸焉。

書十六卷，一輿地，二建置，三典禮，四學校，五風土，六賦役，七職官，八官政，九十選舉，十一十二人物，十三列女，十四金石，十五十六藝文。

典禮風土等篇膚濫累牘，而金石中之正德重修廟學碑乃云文未典雅不載，存其虛而去其實斯豈足言志體耶。惟其考訂疆域沿革較之舊志爲核耳。

鹽山新誌三十卷

近人縣人賈恩紱撰。不著刊行年月，亦一失也。其叙列云，所志篇著十六，而綱總以四，不襲正史，不避創格。曰疆域，曰法制，曰文獻，曰故實。規模稍異於舊矣。又云鹽務有志昉於

明之嘉靖，再修於隆慶。其書久佚。今可見者，僅康熙十九年之本。乾隆中修而未刊。名曰鈔志。亦復不可得見。茲編以同治志爲據依，間亦采及康熙志。故其書創多於因。綜其所長，蓋有二焉。叙疆域沿革無附會之詞，一也。能多製表，事豐而文省，二也。然其所短亦有三焉。其建置篇叙學款有涉恩怨之語。按傳世之作，宜嚴公私之辨。范氏吳郡志涉及家世，已非著書正體。況於標榜一已乎，一也。又於教育制度多所評隲，微論其非是非之公，卽專以著書體裁而論，此種評隲豈可盡邪，二也。至人物分目，爲歷來陋習。錢泰吉海昌志例已略道之。此書高掌遠蹠而獨不能脫此窠臼，三也。然方志得此，固爲上乘矣。

民國慶雲縣志十二卷

民國三年東邊鎮守使縣人馬龍潭倡修，知縣孟繁蔭爲之序。

據所錄舊序，萬歷中知縣柯一泉取縣人楊羽墀所修刊行，康熙十二年知縣李居一續修，十九年後任李興祖踵成之，嘉慶十四年知縣潘國詔屬邑人崔旭再修。

今志大抵規仿前志，曰地理建置賦役典禮職官選舉人物列女風土藝文新政雜志，凡十二卷。

慶雲卽古無棣縣，明初改今名，志於沿革門謂「永樂中析樂安州北地置慶雲縣，隸河間府滄州，其省會爲直隸。」數語已難索解，其他訛率鄙倍不一而足。人物一門侈陳馬氏事實，並及其他里人。自古少有以見存之人入志者，更未聞修志之人自爲生傳者。其爲鄉曲之私何以自解。至於賦役秩祀等門於民國新制並不一及，而久爲詬病之八景亦仍照例摹績。是直與重刊舊志無別。蓋修志之意原不在此故也。

乾隆河間府志二十卷

乾隆二十五年知府杜甲屬舉人上海黃文蓮編纂，蓋即承前任王檢請胡天游所修舊稿也。

河間府志創修于嘉靖庚子知府郟相，再修于萬歷己卯知府杜應芳，三修于康熙丁巳知府王奐。

書爲二十卷，以四部括之，曰輿地，曰官政，曰人物，曰典文。其星野篇有星野分類占法，謂出於王奐，奐自言常習天文禁本及太乙諸占，書其說於郡志，亦可怪矣。

其自述之語曰事增於前，文減於舊。然全書大抵多庸泛之語，不似胡氏手筆，蓋偶用其名以震俗耳而已。其瑣錄一篇所采河間故實頗多。然河間自明以來多產奄豎，何以無一語及之。若謂其不足污筆墨，又何以備載魏闔諸媠語耶。

河間府跨古數州之地，其界域非片言可詳。清制領州一，曰景。縣十二，曰河間獻縣阜城肅寧任邱交河寧津吳橋東光故城。

乾隆河間縣志六卷

乾隆二十四年知縣吳山鳳屬舉人上海黃文蓮纂。文蓮纂河間府志已著錄。

縣志創于萬歷辛卯知縣趙完璧，重修于康熙癸丑知縣袁元。據凡例云，趙志仿史記名乘史，已無從購得，舊志謂其文勝于質，略而未備。袁志亦以奉檄纂輯限于日時，錯漏彌復不少。

本書凡六卷，爲十目，曰地輿建置賦役典禮風土官職官績選舉人物藝文。其中如古蹟專載故書所記，或今存或今廢，條疏分明。故爲可法者矣。

河間漢武垣縣，隋改今名，元明以來爲河間府附郭縣。

乾隆獻縣志二十卷

乾隆二十六年知縣萬廷蘭與縣人御史戈濤同修。

按所錄舊序，萬歷十三年知縣章汝蘊創修，康熙十二年知縣劉徵廉續修，乾隆十二年知縣吳龍見三修。然輿地篇引元獻州記，未之及也。

據凡例則其更張舊志合於史法者數事，增圖創表一也。戶口夫役劉志芟削明制，今詳析疏列不厭其繁，二也。合循良於名宦，析選舉於人物，三也。於是除圖表不列卷外，一輿地，二建置，三食貨，四禮樂，五武備，六封建，七官師，八選舉，九至十一人物，十二至十七典文，十八祥異，十九至二十雜志，凡二十卷。

縣爲漢樂成縣，金置獻州，明省州爲縣，其形勝以滹沱爲著。

從前潯沱環抱邑西南北三境，而兼走於東，康熙五十年南遷漸廢，志於潯沱河隄變遷沿草頗存匡略。

食貨篇云，一國初定興等處所佔旗圈以縣地撥補之。其後各州縣民嫌荒歉不願受補，自康熙二十八年至乾隆三年漸次退回本縣。考其數涿州保定全退無餘，定興軍地未退者二百八十二頃有奇，更名地未退者八十五頃八十餘畝，至文安縣所退之數反溢所撥之數百六十餘頃，則未審其由。一此亦縣之故實可注意者也。

食貨篇全錄明萬歷年條鞭賦役額欸，蓋據明志張汝蘊所輯本錄之。時爲萬歷十三年，去九年初定條鞭時未遠，猶足見其本末，且正供雜辦綱目分合之故，皆留心國計民生者所必詳。（原按語）如所謂馬草銀農桑絲折絹銀鹽鈔錢地畝綿花絨銀宮勳子粒銀牧馬子粒銀他志固多從刊落，卽清代各種地畝稅欸亦無如

此詳悉者。中如退出石之亭遺造行差地二頃四十三畝賦役全書且誤作六畝，不有詳明之縣志曷由參稽而互証之。戈濤跋稱嘗讀陸清獻靈壽志，至於田賦一門幾當全書四分之一，自洪嘉舊制以及萬歷初定條鞭之法順治康熙間之所斟酌損益無不纖悉備具，夫乃得其綱目分合之著，明史之所不詳。夫一代之史，於政治之大未嘗不各爲一志，然率皆提其大綱，其隨時隨地設施之詳，不可得而概見。能詳舉而備列之，宜莫如諸縣之志。而作者不皆審知體要，往往詳所可詳而略其宜詳云云。『實切中舊志之弊。』

綜觀全書，得於詳者多，失於濫者尙少。每篇提要數語，皆言之有物，確能攬挈大綱，非如他志之具文塞責。徵引舊籍，殫見洽聞，體例精宏，裒然巨籍。意者其時紀昀已通籍，得其參訂，又當乾隆中葉物力富贍之時，故克如此。惟縣人戈濤源兄

弟並列編訂，而所采典文凡涉其私人往還者亦一例列入，甚至物產門中自稱予舊有蘋果詩亦全行刊載，並不知所謂予者何指。此則大非著書之體矣。

咸豐續志序云，「明建文間南北兵爭，邑人無復存，志莫考已，永樂二年遷近省人實畿輔，而獻始有民，至萬歷初乃有志。」不知何所據，當是故老傳聞之說，此亦足補正史之遺也。

咸豐初續獻縣志四卷

咸豐七年知縣李昌祺修，其曰初續者，據其凡例以乾隆志爲主而續纂者自爲一書，名曰初續，以繼修待後人也。所續者惟選舉人物兩門，而古蹟建置亦間及焉。

民國獻縣志二十卷

民國十四年知事薛鳳鳴修，縣人張鼎彝撰。

其凡例云，以近人賈恩紱鹽山志爲法，其力矯積習立言有體，實近志中罕見者。例如用熱河志例以晷度代星野，一善也。古蹟如河間獻王陳簡肅公墓以照片列首，二善也。析縣境之土性爲表，三善也。於鄉區之判辨里屯地方警區之沿革而不偏廢，四善也。於文獻志之仕進篇附民國職員表，存縣人之資歷以徇俗見而仍不碍著書之體，五善也。藝文篇之著述並著提要，六善也。（惟未著存佚爲遺憾）別立宗教一篇詳著教堂教民數目，七善也。方言之後兼采歌謠，八善也。

綜凡二十卷，統以四志，曰輿地，曰經制，曰文獻，曰故實，而詩文附錄殿焉。則章氏之家法也。文字雅馴，語皆徵實，非博貫古今能見其大者不能爲也。薛序云以六月之光陰二萬四千緡之款項修成四十餘萬言之縣志，則尤足多矣。

錄其子目如左以資鑒証。

卷一至卷四 輿地志一

疆域篇一之一 尋度 幅員 山川

沿革篇一之二 河道 土墳 附表

建置篇一之三上 城池 署廨 里屯地方警區 鄉鎮集會 鐵路土基

建置篇一之三下 坊廟附寺觀義地 堤防橋梁 倉局 救生總 坊表 書院義學

古蹟篇一之四 古城 山水 陵墓 宮闕 園亭 隄臺堡廠

卷五至卷七 經制志一

設官篇二之一 歷代國制官制

賦役篇二之二上 田制 丁戶 科則

賦役篇二之二下 制用 耗羨 折征附徵 雜稅

新政篇二之三上 公署改組 警政 學政

新政篇二之三下 實業 自治 選舉 司法 商會

卷八 至 卷十二 文獻志三

封爵篇三之一 漢魏晉諸侯主表 列傳

職官篇三之二 漢以下可考者表 明清兩代行政官表 明清以來教職表 民國行政官表 民國司法官表 官續列傳

仕進篇三之三 漢後徵辟可考者表 前代科舉 明清科名表一二三 明清薦紳表 一二 命夫命婦表一二 難附 候補候選諸官畢業生 民國職官表

人物篇三之四上 名宦列傳

人物篇三之四中上 高介 忠義 孝友 任卹

人物篇三之四中下 文學 寓賢 別傳 耆民 附民國喪特

人物篇三之四下上 烈女傳

人物篇三之四上下 節孝略

藝文篇三之五

卷十三 至 卷二十 故實志

祀事篇四之一

兵事篇四之二

道教 佛教 清真教 天主教 耶穌教

宗教篇四之三

物產篇四之四

植物 動物 貨物

謠俗篇四之五

方言 歌謠 風俗

金石篇四之六上

金石篇四之六下

軼聞篇四之七

附詳異表

敘跋篇四之八

雍正阜城縣志二十二卷

光緒戊申重印本

雍正甲寅知縣陸福宜修，前志修於康熙壬子，此奉檄而重修者也。據學部志目有順治阜城縣志二卷知縣曹口修不全。

書二十二卷，一星野，二沿革，三疆域，四城池，五公署，六

學校，七典禮，八古蹟，九壇祠，十物產，十一貢賦，十二風俗，十三郵傳，十四武備，十五封建，十六仕籍，十七選舉，十八地封，十九人物，二十列女，二十一祥異，二十二藝文。中如農官入之風俗，劉齊之入封建，封典則號爲地封，卹典則附於祥異，皆非是也。

縣爲漢置，後漢廢，晉復置，自明以來屬河間府。

乾隆肅寧縣志十六卷

乾隆十六年知縣尹侃主修。

據所錄舊序，萬歷二十六年知縣水成性創修，康熙十一年知縣王宏翼續修。其目曰方輿建置賦役典禮學校職官人物選舉列女藝文。

金升河間之平魯寨爲縣，元廢而尋復置，明以來遂隸河間府。

尹序云，一按舊志邑令成序以田賦弗清弊且旁出爲丈畝釐額撮其梗概授之鋟梓，厥後王令續志竟逸其文，謹勾核諸曹史積冊，斷自有明萬歷年始，洎國朝以來編丁攤戶墾地改額諸額特爲一卷云云。一是其掇拾之功爲不可沒。然其義例亦猶乎按部就班之尋常方志而已。

肅寧爲魏閹故里，其所遺穢跡必甚多。而志於魏閹一字未及。雖曰隱惡揚善，然於董狐之誼則乖。此固歷來志乘牢不可破之積習，不能徒以責之肅寧。後之當史職者，宜以大公爲心。若乾隆武清志之附內臣於鄉賢之後固屬不可，然事無美惡有則必書，不必爲鄉里諱，則庶幾古之道也。

乾隆任邱縣志十二卷

乾隆二十七年，知縣劉統修。

據所錄姓氏，嘉靖甲午初修者知縣王齊，萬歷丁丑繼修者知縣顧問，康熙壬寅重修者知縣吳琮胥琬，壬子續修者知縣劉日光姚原鴻也。劉姚以後厥惟此作。

任邱古鄭地，漢有任邱城，隋始爲縣。明清隸河間府。其所屬趙北口池淀縱橫，舟楫所萃，康熙以來歲時巡幸，南北行旅常所經焉。

書十二卷，一地輿志，二建置志，三食貨志，四禮樂志，五武備志，六封建志，七官師志，八選舉志，九人物志，十五行志，十一藝文志，十二緒言志。所謂緒言則雜錄也。然多記夢幻而不及實事，無以爲也。

康熙交河縣志七卷

康熙十二年知縣墻鼎修。

據藝文志，萬歷十三年知縣馬中良始創縣志。有余繼登所撰序。繼登即撰典故紀聞者，其序自云稍爲刪繁就簡，則繼登曾任筆削也。

凡七卷，一地理，二建置，三賦役，四官師，五人物，六藝文，七雜志。

交河爲漢中水地，立縣自金大定，沿革短淺，故無甚可書，聊存梗概而已。

民國交河縣志十卷

民國五年知事高步青等修。

凡十卷，一輿地，二田賦，三學校，四經政，五職官，六選舉，七八人物，九藝文，十雜稽。

志雖修于民國，而規模悉仍舊貫，於今制殊少紀載。然於建置

能注明今狀，又以光緒間出土之唐陽氣寺鐘證景城之爲交河地，亦有功於考古也。

光緒寧津縣志十二卷

光緒二十六年知縣祝嘉庸主修，縣人舉人吳潯源編纂。

按所錄舊序，萬歷間縣人王良貴創修，康熙十三年知縣程裕昌續修，二百餘年，闕然無述。

凡十二卷，一二輿地，三田賦，四學校，五經政，六職官，七選舉，八九人物，十藝文，十一二雜稽。

據沿革表，唐天寶中置縣，金天會中改今名，自明以來屬河間府。不知唐天寶置何縣，且明代爲寧津衛非縣也。又據凡例，縣境三經廢絕，皆外屬。自建武丁酉至建安乙酉其中廢絕者一百六十七年。自天保癸酉至開皇丙辰又廢絕四十五年。自熙寧

癸丑至建炎丁未又廢絕五十六年。及明靖難兵起縣境更爲墟矣。其臨津縣辨云，歷朝建置號爲臨津者六，劉宋時南徐義興郡一，隋時梁州普安郡一，唐時隴右道彭州一，劍南道洛州一，金時咸平路韓州一，而唐河北道景州之縣始爲今縣。舊志往往混爲一談。是則然矣。然其古蹟篇以相衙爲明代寧津四王之相衙，不知明之王府固不設相，何得據漢有諸侯王相遂以爲明亦有此官稱耶。其他辨正豈當者固多，而附會影響亦殊不免。然綜觀全書猶爲志中之整瞻有法者也。

乾隆景州志六卷

乾隆十年知縣屈成霖修。

據舊序，隆慶壬申知州羅許創修，康熙十一年知州張一魁續修，十九年知縣張鳴珂繼之。

景州爲漢菑縣，元初移東光之景州來治，以菑爲附郭，明屬河間府，領縣三，清爲散州。

凡六卷，一建置沿革等，二鄉屯等，三田賦等，四封爵等，五選舉等，六封贈等。不分綱目，彌爲凌碎，非佳撰也。

卷尾有鈐識云，一是書選材鐫刻頗費心力，較對字畫一無舛譌。用粉連紙刷印，細藍布做套，每部實需工料銀五錢五分，用太史連減銀五分，但刷印裝訂本地並無良工，鄰境德州尙有能手，嗣後刷印此書照數發價，責成禮房萬勿剋減，委之拙匠，致書不堪寓目也。一

光緒吳橋縣志十二卷

光緒元年知縣倪昌燮閩縣舉人馮慶楊同修。

據所錄舊序，萬歷三年西寧道兵備副使縣人李懿始修，康熙十

二年知縣任先覺續修，而乾隆中進士季洞蒼有吳橋文獻考。隋開皇中於平原置將陵縣，金又分將陵置吳橋，遂爲河間府屬縣。觀其序例皆老生常談，凡十二卷，一輿地志，二三四建置志，五田賦志，六官政志，七八九人物志，十雜記十二一藝文錄。

光緒故城縣志十二卷

光緒十一年知縣張煥修。

據舊序，景泰六年縣人馬偉始修，嘉靖乙酉知縣趙榮顯繼修，萬歷二十二年邑人夏維藩再修，四十二年知縣李元忠三修，入清以後，康熙十九年知縣宋爾祁修，三十三年知縣沈嘉珍再修，雍正五年知縣蔡維義三修。紀錄不爲不勤，而凡例云所存惟雍正蔡志也。

本志仍奉通志局功令而作，依樣葫蘆而已。其凡例中所述增損

各節，皆無關宏旨。

唐貞元中始置故城，屬貝州，明清隸河間府。本書引黃文蓮河間府志以故城爲秦漢厝地，明馬氏甘陵志言之蓋詳云。

書凡十二卷，一建置沿革等，二疆域等，三學校等，四鄉村等，五壇廟等，六宦蹟等，七選舉等，八列女等，九十文翰，十一二續文翰。

光緒東光縣志十二卷

光緒十二年知縣周植瀛主修，舉人寧津吳潯源纂。潯源撰寧津縣志已著錄。

據所錄舊序，正德十六年縣人鄺廷佩創修，萬歷三十二年知縣余良弼重修，崇禎十八年知縣邵建偉三修，邵序云，余志近略，又得鄭公舊本於郭氏，曰繁簡之間折衷斯二者而已。康熙十

二年奉檄修志，於是知縣王九鼎三修，三十二年知縣白爲璣取而續之，道光二十九年以後屢有重修之議，迄茲而始告成。

東光爲漢勃海屬縣，唐屬景州，明以後屬河間府，本書沿革表以爲秦屬上谷郡而指舊志屬鉅鹿者爲非，不知何所據而云然。全書十二卷，一二輿地，三田賦，四學校，五經政，六職官，七選舉，八九人物，十藝文，十一十二雜稽，別經政於田賦學校，此命名之未當也。雜稽中含事略祥異陵墓寺觀識餘五篇，獨佔二冊，此謀篇之未當也。然異聞零識，賴此以多存。猶勝他志之空疏敷衍者矣。

乾隆宣化府志四十二卷

乾隆癸亥知府王畹主修。

按敘，嘉靖中蔚人尹耕始有兩鎮三關志，其後郡人孫世芳乃有專志，康熙間進士胡以溫復補修之。據同治畿輔通志云宏治中撫軍馬中錫創修府志嘉靖庚申翰林孫士芳踵修，與此稍異。

宣化明爲宣府鎮，領宣府前衛及萬全左右等十衛，延慶保安二州。康熙三十二年改府。雍正六年以山西蔚州來屬。領州三，蔚延慶保安。縣八，宣化赤城萬全龍門西寧懷安懷來蔚。

書四十二卷，一紀恩，二地理，三星土，四形勢疆域，五六山川，七古蹟，八城堡，九公署，十鄉都戶口，十一田賦，十二學校，十三典祀，十四塞垣，十五十六兵志，十七驛站，十八封建，十九至二十二職官，二十三四宦蹟，二十五六選舉，二

十七至二十九人物，三十三十一列女，三十二風俗物產，三十三四世紀，三十五至四十藝文，四十一雜誌，四十二訂誤。

觀其凡例宗旨頗多誕誤，如遼金之事必統於宋，祠祀去取必準祭法，人物則妄爲功過之衡，仙釋則斥爲風化之累。且曰，一郡志之輯悉本之史，舊志之合於正史者存之，其不合者刪，一信如此則有正史即可概方志矣。

然其中亦有可取者，則所采錄咸具出處是也。尤以世紀一篇爲敘次翔洽得法。

宣化爲朔邊重地，長城之沿革自昔紛紜。塞垣一篇於日知錄之說未盡援引。然於明制延袤里數頗存其概。以與今制相較，有足見今昔之變遷者。

康熙宣化縣志三十卷

康熙五十年知縣陳坦主修。

據凡例一宣自葉中興馬天祿孫克承諸先生肇修鎮志外，近惟胡東甌留心文獻著有續志，其成卷帙者郡人閭中丞持去欲登梨棗未就而失云云。一

書三十卷，一建革，二疆域山川，三四詔命，五巡幸象緯災祥，六恩恤，七城堡，八營建，九賦役，十俸廩，十一儲備，十二學校，十三祠祀，十四物產，十五風俗，十六法令，十七武略，十八十九秩官，二十二十一選舉，二十二名宦，二十三鄉賢，二十四以下藝文。

宣化爲舊宣府前衛，康熙三十二年置附郭縣。雖爲邊邑，然疆理戎索此實奧區。其故實有足道者。建革志稱一縣城內故宣府左衛地方，其內街巷房屋多有脊獸，半屬故明左衛指揮千百戶所居。（按至今猶然）在啓禎時尚有門樓或一進房屋，迨至己巳辛巳饑荒，世祿闕給，世官遂有行乞，其屋多毀。後漸更爲圍

駐。又云考昔鎮城人煙輻輳，雖僻街小巷亦似通衢，蓋駐防官軍不下二萬，而附郭前左右三衛興和一所之指揮千百戶鎮撫又八百餘員，合計官軍戶口殆三萬有奇。于是官有第宅軍有房屋。又紳矜商民與四方工役雜處其中，氣象鬱蔥，真名區也。迨明啓禎而後饑饉師旅前後頻仍，其後官軍裁減而里宅寥落尤多，一卽此一端足徵縣之源遠流長矣。

賦役志載歷來屯田情形及豁免門稅原委詔命志載明清詔勅亦多有關係之史料。卽法令志等篇所錄，或有過濫，而綜其大體固猶是舊志之詳覈可珍者也。

民國宣化縣志十八卷

民國十一年縣人郭維城纂。

據凡例，縣志之作成于康熙五十一年縣人陳坦，前乎此者有蔚

人尹耕兩鎮三關志，邑人孫世芳宣鎮志，進士胡以溫續鎮志，大都就鎮言鎮，陳志以此爲藍本，宜乎文繁事簡無可諱言，自後曾無拾遺補缺者。又云，「一時殊勢異，公署案牘大半失落無存，存者亦多剝蝕於蟲，人事變遷，老成凋謝，乾嘉道咸間事鮮有知之者。於是事則審缺勿溢，文則寧簡勿繁，但求確實而考古次之。」又有云分門別類非出一人手筆，蕪雜在所不免。然則掇輯之難與其保存之苦有足多者，不能過事吹求也。

書凡十八卷，一地理志，二建置志，三古蹟志，四物產志，五實業志，六財賦志，七學制志，八禮俗志，九兵備志，十警察志，十一官績志職官志，十三十四人物志，十五選舉志，十六十七藝文志，十八大事記。

其新增之實業志頗能注意社會經濟狀況，而禮俗志則僅彙錄照例文書，此瑕瑜之互見者也。他篇多注明所采之書，而藝文所

錄皆無從蹤跡，此詳略之不均者也。至大事記稱孝欽后爲崇熙皇太后，古今無此書法，其不能舉史職也宜矣。

道光萬全縣志十卷

道光十四年知縣施彥士就乾隆初年知縣左承業本增訂。

據所錄乾隆七年口北道按察使司僉事金志章序，置縣以來迄今五十載，知縣左承業始成縣志。又據凡例稱萬全自改衛設縣後未修志乘。在前明時有西路志，上西路志，久已湮沒不存。其事蹟可見者，皆由畿輔通志蔚州尹氏兩鎮三關志宣府孫氏宣鎮志中采錄云云。

書十卷，一方輿志，二建置志，三食貨志，四武備志，五秩官志，六選舉志，七人物志，八藝文志，九事紀，十志餘。

縣在唐末爲武州文德縣地，明爲宣府西路萬全右衛地，康熙三

十二年置縣，即今張家口地。朔塞雄關，商旅輻輳，自清代以來久已然矣。而志僅存舊習，於茫渺無憑之星野觀縷連篇，而商稅馬牧等爲張家口之重要事實，反僅附見志餘中，殊爲輕重倒置也。

康熙龍門縣志十六卷

康熙五十一年知縣章焯撰。

據凡例云，孫太史鎮志四十二卷，龍門僅其附及，又止於嘉靖四十年。後監司李公仙鳳修有三路志，餉府王公志國楊公國士襲爲下北路志。然僅就中采錄，挂一漏萬。蓋龍門爲唐新州屬縣，明置龍山衛，至康熙三十二年始復爲縣。故志無沿革之可言也。

書十六卷，一沿革疆域山川，二象緯災祥，三城堡邊垣形勢，

四營構，五賦役，六俸廩，七學校祠祀，八武略，九秩官，十名宦，十一選舉，十二十三人物，十四五六藝文。章氏自序云，一後之君子覽斯志者其亦知宣府爲直隸之苦地而龍門又爲宣府十屬之苦地，庶幾其有裨益於斯人。一蓋章氏以行取去官，以循吏之用心爲此志也。

康熙懷來縣志十八卷

康熙五十一年知縣許隆遠纂修。

懷來故唐媯州，遼改今縣，明置懷來衛，至康熙三十二年合懷來保安二衛土木榆林礮山三堡而爲懷來一縣。故舊志無多。據序，前代惟嘉靖至萬歷數十年間有志，其後闕如。

今志藝文篇中尙錄存萬歷懷延二衛志白炳跋及康熙癸酉志邑人徐元佐跋，此二本者蓋皆不可復見矣。

按其目次，卷一建置疆域，卷二分野災異祥瑞，卷三臨幸封建學校，卷四文官武弁賦稅土貢關梁惠政墳墓土產，卷五風俗市集寺觀公署壇壝倉場，卷六扁額山川水利古蹟景致，卷七名宦職官，卷八忠孝節義，卷九戰功，卷十仕籍武科，卷十一鄉賢庶公謫遷文學仙釋異術凶德，卷十二至十八藝文，分析瑣碎，殊乖體要。然歷年已久，藉以考見前明邊疆文獻，固亦難得之書矣。

光緒懷來縣志十八卷

光緒八年知縣朱乃恭屬縣人舉人席之瓚纂。

據舊志序康熙五十一年始修，雖云嘉靖至萬歷間有志蓋亦無存矣，康熙三十二年始合懷來保安二衛土木榆林礮山三堡而爲懷來縣隸宣化府，所云明志，亦必衛志也。

書凡十八卷，一紀恩，二世紀，三地輿等，四物產等，五建置等，六倉庫等，七戶口等，八學校，九祀典，十軍政，十一職官等，十二人物，十三科第等，十四節孝，十五雜記，十六十七十八藝文。

懷來故實之最要者莫如土木之變，此書分紀於世紀雜記兩篇中，且挂漏亦多，其餘益不足觀矣。

土貢門稱楊木長柴產寶鳳山，爲京師壇廟祭祀之用，柴煙直上，產他處者皆不堪用。舊志明萬歷間歲貢九百斤，康熙初貢三千二百斤，道光十二年以後加至一萬一千斤。懷來糧額僅三千餘兩，而土貢乃如是之重乎。

乾隆蔚縣志三十一卷

乾隆三年知縣王育楨撰。蔚在明爲衛所屬宣化，康熙三十二年

改縣屬宣化府。故前此無志。育源求得明宣鎮志一部兩鎮三關志半部，即其所載參以州志之僅存者，本其事蹟別爲義例。爲卷三十一，一圖考，二建置，三星野，四疆域，五山川，六形勝，七關隘，八城池，九公署，十學校，十一壇壝，十二武備，十三戶口，十四田賦，十五方產，十六職官，十七師儒，十八貢舉，十九封廕，二十人物，二十一列女，二十二故家，二十三遊寓，二十四鄉耆，二十五祠廟，二十六風俗，二十七古蹟，二十八墳墓，二十九祥異，三十藝文，三十一雜記。

據縣教諭柴柏齡跋云「纂志難矣，而纂蔚縣志尤難，何也。縣與州畫地而治，不分而析之不可也。然人民土田互相管轄，卽士大夫之聚族處者仁讓相接，亦無彼疆此界之見，則欲過爲析之而又不得。余受而讀之，見其宜分者分，若戶口田賦職官貢舉人物列女之屬是也。宜合者合，若災祥方產風俗武備之屬是

也。分之中有合，合之中有分，若建置沿革山川形勝關隘以及城池學校之屬是也。一今觀其所載多注明出處，可徵其屬詞比事之不苟矣。

乾隆蔚州志補十二卷

乾隆十年知州楊世昌修。

據凡例前志修于順治十六年知州李英，不曰續而曰補者，取拾遺補闕之義也。以前蔚縣與州合，康熙三十年以後則縣與州分，今又專屬蔚州之志也。

書凡十二卷，大致仍前規。一地輿，二建置，三秩官，四政令，五武備，六祀典，七賦役，八學校，九選舉，十人物，十一外志，十二藝文。

光緒蔚州志二十卷

光緒丁丑知州慶之金修，州人楊篤編纂。按本書藝文志箸錄萬歷志爲知州劉生和著，崇禎志爲知州來臨著。皆注云佚。而國朝志知州李英著者則云存。今李志亦罕見矣。

蔚州始建於周，在唐屬河東道，至明猶屬大同府，及清而改隸直隸宣化。又康熙中曾改故蔚州衛爲蔚縣，及乾隆而裁併入州。故其分合離併之迹殊爲特異。慶序云，一在前明以州衛分隸兩鎮，在本朝以州縣共治一城。今雖併省爲一，而語其地則民田屯田之爲賦異。語其民則州學鄉學之占籍異。語其俗則屬宣屬雲之錯居亦異。將徵于今而繁劇又若是，余知其難而不敢志。一是也。蓋蔚志之存志三，州志作於順治之末，縣志作於乾隆之初，志補補州志，其成稍後於縣志。（據慶序）志補援據較

博，縣志取材州志而加詳云。（凡例）

按其義例，以表志傳記四部總攝大綱。表三，曰輿地封爵職官。志九，曰地理建置祠祀賦役學校選舉兵金石藝文。傳四，以采之正史及賢良祠傳滿漢名臣傳者爲史傳，錄其全文。采之名人文集及家傳墓誌行狀者爲集傳，節其大要。次以列傳，則各志及今采訪事實也。又次以列女，則古名媛及今節孝貞烈也。記五，曰大事風土名宦流寓雜記。此其大較也。

其尤可記者，地理志之山川門用吳郡志例兼采詩文，使流連風景之文得登高能賦之用。古蹟門將志補之已詳者類次每條之末，其未備者訂誤析疑期於一是。（原案語）賦役志向爲繁重之篇，而本書挈領提綱，不過五紙，已覺瞭然。金石志備載原文，得資攷核。藝文志惟載州人著述，並附以攷證，至有涉志乘之詩文，則已分附地理建置祠祀等篇中，不枝不漏，因事制宜，

剪裁位置，愜心貴當。近年方志中實罕遇此佳構。

同治西寧新志十卷

同治癸酉知縣寅康主修，宏州書院山長舉人楊篤撰。

據光緒元年知縣王蘭芬跋稱邑先爲衛，本無志，康熙三十二年改置縣，閱十餘年知縣何芬張充國始纂成之。然四庫存目有順治十二年西寧道蘇銳所修志也。

據寅序云「其書第詳時事，於攷古爲疎，於地理尤疏，如自漢迄晉僅舉一陽原，而以屬之上谷廣寧，自北魏迄隋唐僅舉一安塞而以屬之涿郡武州，以金襄陰與宏州異治，以元宏州與順聖同屬，鑿空謬妄，大都類是。」又據其藝文志云，「何志成於康熙四十六年，紀志成於五十一年，其稿出於黃州林盛，盛又本之宣鎮志。今輯新志，援據既與之別，故所采寥寥。」

今按西寧爲明順聖川城，屬宣府本衛，康熙三十二年始置今縣，在遼金則宏州襄陰順聖兩縣也。今爲陽原縣。立縣既晚，攷證沿革彌難，志於地理山川古蹟三篇詳乎言之，文亦近雅。其跋云，一義法門目多本之通志府志，間有離合乃徵他書，非所自創，故卷首不標舉凡例。事增於舊者十九，體亦大異，兩書并行，各從所據，非與爭名，故篇中不條加辯駁，卒恨學殖淺陋，無能鎔鑄古今，成一家言，上追作者，然以徵舊邦之文獻備縣官之掌故，亦庶乎其可。一是其識度有非近世修志者所及矣。

書凡十卷，一紀恩地理星度，二建置疆域，三山川古蹟，四賦役學校兵防，五職官選舉，六七人物，八列女，九風土武事，十藝文雜志。

光緒懷安縣志八卷

光緒二年知縣李葆貞屬孝感程燮奎纂。

懷安唐代舊縣，明廢爲衛。康熙三十二年復爲縣。康熙四十五年有殷武二志未刊，至乾隆六年知縣楊大崑始編定付刊。

書凡八卷，一方輿志，二建置志，三食貨志，四武備志，五秩官表，六選舉表，七人物志，八藝文志。大抵敷衍蹈襲之文。如沿革門所載金元事實亦必繫以宋之紀年，使人不知所述爲何國之事。人物志絕未注明所據何書。皆違乎著作之體。

卷三有書院條規一篇，他志多棄去不錄。此書能注意及此則尙可稱。

然懷安爲歷代邊關用兵之地。因事制宜，自應別立邊牆或塞堡一門以紀李信屯柴溝等堡之興廢。家有隨珠而不知寶，反從人

而羨燕石焉。此秉筆者不明史地之過也。

乾隆延慶州志十卷

乾隆七年知州李鍾俾修。

據舊序，州志始於成化十一年蒲州謝夢桂，時任州事者李齋也。嘉靖戊申州人蘇乾續修，萬歷四十六年知州宋雲霄屬州人賈希顏三修，順治十年知州遲日豫四修。

書凡十卷，一建置等，二城池等，三戶口等，四封建等，五名宦等，六忠節等，七隱逸等，八邊防等，九十藝文。

延慶亦金元用兵之地，乃援圖書集成之例以雜記體爲紀事一篇，而無大事記，他無論矣。

光緒延慶州志十一卷

光緒五年知州何道增修，欒城拔貢張惇德纂。其序力詆前任屠

秉懿所輯爲猥瑣鄙俚殊失體裁，故有改屬張氏別纂之舉。

延慶故唐媯州地，唐末置儒州，元以後由龍慶而改隆慶，由隆慶而改延慶，初轄永寧縣，乾隆二十六年併省。志於疆域篇附張氏自撰之延慶州沿革考，於舊志之以漢潘縣廣寧縣晉寧郡附會本州辨之甚力。又山川篇媯川河考以媯川河爲水經注之清夷水，亦有功考古之文字也。

凡十二卷，一二輿地志，三賦役志，四學校志，五經政志，六職官志，七選舉志，八人物志，九列女志，十藝文志，十一古蹟志，十二雜稽志。其雜稽志暨卷末之志餘故實頗豐，非他志之漫錄齊東野語可比。

道光保安州志十卷

道光乙未知州楊桂森修。

據凡例，保安州名始於元順帝後至元四年。舊志創於康熙八年知州壽完福，重修於康熙五十年知州梁永祚。

書分天地人物四部，天部一卷，地部三卷，人部三卷，物部三卷，縷晰牽強。如舊志序入于物部之類，實爲無謂。

保安州爲唐新州地，遼改奉聖州，元改今名，清隸宣化府。第七卷附錄楊氏勸紡織示，有當時棉花棉線市價，至爲可珍。

光緒保安州志四卷

光緒二年知州尋鑾晉修。

據序康熙己酉辛卯道光乙未各一修，此卽繼道光楊志而作者也。書凡四卷，而不分綱，不過以近事補入前志而已。

光緒永平府志七十二卷

光緒五年知府游智開屬樂亭舉人史夢蘭纂。

據凡例，萬歷初閩人郭造卿作永平志一百三十卷，顧亭林游永平時已稱其全書不可得見，然據卷末所錄舊志序，萬歷己亥河南按察司副使管永平府事徐準序云，宏治十四年郡張行人纂者簡而賅，萬歷十九年閩郭文學纂者博而賅，刪繁補缺可爲全書，是郭志之前有張志，郭志之後有徐志，其後復有崇禎壬午知府李在公所修之本，因亂未刊，順治戊戌有萊陽宋琬所修之本，乾隆甲午有江寧王金英所修之本。據凡例云今存者此二本。康熙志體例未允，考據多疏，其所援引俱不注書名，乾隆志體例較爲整齊，而於前志所引古事古人仍復承譌襲謬，豪無辯證

。今本於前志之疏舛頗有訂正之功，並具於卷首辯譌條下。但如稱遼道宗改元壽隆，舊志於齊陶傳及紀事中皆引作壽昌誤，其實道宗紀元爲壽昌非壽隆，此不誤而以爲誤也。至凡例首稱讀史方輿紀要紀永平事有引金志云云，遂謂金元郡乘今皆不傳，不知所謂金志乃金史地理志，非府志。此而不辨，亦可謂率爾操觚矣。然其注意輿圖，刪除濫載，終爲有識，異於他志。未可非也。

凡十二卷，一疆域等圖，二以下爲沿革等表，十九以下爲封域建置賦役藝文四志，四十九以下爲列傳，七十一二爲志餘。

其中變例如特立后妃一傳以處燕遼諸后，列女則存其名氏爲表而餘其事實爲傳，疊牀架屋，徒滋篇幅，實未見其宜也。

永平爲漢遼西右北平地，北朝以後爲平州，洪武間定永平府名，乾隆二年改山海衛爲臨榆縣，於是領盧龍遷安撫寧昌黎樂亭

臨榆灤州六縣一州。

順治盧龍縣志六卷

順治十七年知縣李士模修。據序稱前此無志也。盧龍自唐以來爲平州治所，明設永平府，遂爲附郭縣，而志乘缺如可異也。書六卷，一星野等，二城池等，三后妃等，四先聖人物，五烈士等，六藝文，以伯夷叔齊爲先聖別出於人物之外，其體例類如此，無甚可取。然邊地志書，版本精雅若此者亦罕覩也。

同治遷安縣志

光緒十一年知縣牛昶煦補成本

同治癸卯知縣韓耀先主修。

據其凡例仿景定建康志之例爲圖者二十有九，爲表者四，爲志者三，末立志餘一門以收軼事叢談。

遷安於漢爲遼西令支縣，金大定中立今名，元改平州爲永平府，以是至於明清仍其貫焉。志於沿革改志爲表，深得立言鈎玄之妙。故由沿革以至於選舉列前五卷，由疆域以至田賦列第六至十二卷，由宦績以至列女列第十三至十八卷，而藝文缺焉。斟酌損益，稍殊近代方志通式，知其不憚改作饒有特識。其辨証周將軍故里遼太后城遷民鎮諸條訂正舊志之譌謬可謂有功。又志餘所錄亦頗有異聞足存者。

據敍錄遷安舊無志，萬歷九年知縣白夏因邑人王之衡稿釐訂之，康熙十二年知縣王永命因其殘本並邑人劉明經鈔本復加編述，訂爲二卷，未付梓也。康熙十七年知縣張一謬與邑人郭聯因王志之舊更輯成八卷，乾隆丁丑知縣燕臣仁重加編纂，凡三十卷，本志屬稿時亦已漫漶十存二三矣。

光緒撫寧縣志十六卷

光緒三年丁丑知縣張上猷主修，樂亭舉人史夢蘭編纂，蓋與樂亭志同纂也。

據載舊志修輯姓氏，知縣譚琳劉馨修。考譚爲順治十年任，劉爲十四年任。劉傳有一縣志自明萬歷十九年修散佚者多公爲諮詢補續一之語。是撫邑之志蓋創於萬歷。而萬歷殘本今亦不復見矣。本書凡例又云，「舊志修于康熙壬戌趙端，去譚劉之修甫數載。」

縣在漢爲驪城，至唐武德二年始置撫寧縣，乾隆二年割縣之東境分置臨榆縣焉。

書凡十六卷，一封域等，二古蹟等，三風俗等，四城池等，五學校，六壇廟，七關堡等，八戶口，九賦役等，十職官，十一

選舉，十二名宦，十三四鄉型等，十五列女，十六志餘。

同治昌黎縣志十卷

同治四年知縣何崧泰修，副貢生遷安馬恂纂。

據序康熙十三年知縣王曰翼修輯，以後杳無賡續。

昌黎漢縣。本書地理篇云，遼以定州俘戶置營州鄰海軍，其縣一曰廣寧，金大定因與關外廣寧縣同名，改爲昌黎，即今之昌黎縣。辯舊史昌黎地里之誤甚詳。然昌黎柳城之考見於顧氏日知錄，志不引之何也。

至其體例猶乎舊習未有更張。一天文，二地理，三建置，四田賦，五職官，六人材，七列女，八藝文，九大事紀，十志餘，凡十卷。

乾隆樂亭縣志十四卷

乾隆二十一年知縣陳金駿修。

據所錄舊序，萬歷二十一年知縣潘效復創修，天啓二年知州劉松補修。

漢勃海郡有臨樂縣，王莽改曰樂亭，金大定中因置今縣，明以後屬永平府。

書凡十四卷，一二職方，三建置，四田賦，五風土，六兵防，七官師，八選舉，九名宦，十人物，十一列女，十二雜記，三十四藝文。

風土篇述順治年間膏腴之地盡歸旗圈，田之屬民者不過十分之二，率皆水窪沙坨，農以勤力勝之，畝獲不過斗餘云云。能實寫農民生活狀況，故非他志所及。

又雜志篇述一縣治往嘗有怪，居者憚之。成化間冢宰尹公聞此事，會推縣尹，乃於辛丑進士中擇才望有德福者知縣事。得沁水李公瀚。仍擇欽天監官善術者偕往。及至，監官視之曰，怪在譙樓，時譙樓建置久矣，撤之果得一巨蛇。又壁間掘一女尸，不知何時，顏色如生。出而瘞之，怪遂息。李官至尙書，壽幾九秩云。一案朱國楨湧幢小品云，一李瀚沁水人，爲樂亭知縣。邑門外有古木數十章作祟。吏茲土者多病死，人爲危之。公一日毀臺斬木得朽骨若干。一此卽一事之傳聞異詞也。雖屬詭誕，亦明代傳說之可珍者矣。

光緒樂亭縣志十五卷

光緒三年縣人舉人史夢蘭撰。

夢蘭以私人撰志得以獨行其志，故釐訂矯革之功爲多。略舉其

要，廢星野之篇，一也。刪八景之名，二也。世紀注明所采之書，三也。古蹟寺觀叙雜志，此明韓浚嘉定縣志所以爲四庫提要所譏，今遵武功縣志將古蹟歸地理寺觀歸建置，三也。以此而論，固勝於舊志矣。然注意其細而未及其大，所以蕪辭仍滿卷也。

凡十五卷，一二三地理，四五六建置，七職官，八選舉，九十一十人物，十二十三食貨，十四武備，十五雜志。

嘉慶灤州志八卷

嘉慶庚午知州吳士鴻修。

據所錄纂修舊志姓氏，正德間郡紳許莊私輯一州事實，嘉靖戊申知州陳士元就而訂之，萬歷戊午知州周字用原板續修。康熙八年知州侯紹岐增修，十九年知州馬如龍續編。

灤州始置於遼，清以隸永平府，故源流較短。

書八卷，一疆理，二建置，三則壤，四學校，五官師，六選舉，七八藝文。則壤志中有明代歷朝戶口，又其鄉里分屯社二種，土民爲社，遷民爲屯，皆他志所不易覘。觀其所引陳周二志叙引，則編次之法一本舊志也。

光緒灤州志十八卷

光緒乙未知州楊文鼎修。

據凡例云，嘉慶志分八綱七十一目，門類較孫志爲備，今仍其大概而爲之變通，蓋猶乎前規也。然其有進乎昔者則圖績之精詳也，有增乎昔者則鐵路礦務之屬也。其時學校巡警尙未舉辦，故志未之及矣。

凡十八卷，一圖，二至六爲沿革爵秩選舉等表，七至十三爲封

域建置學校賦役等志，十四至十七爲官師等傳，十八爲外編。灤州始置於遼，軍號永安，金元因之，雍正以後爲散州，隸永平府，本書沿革表敘此未能明析。

學校一門備載禮樂器，繪圖貼說至佔兩冊之多，而礦務爲灤州新政之要，反僅摘鈔公牘數篇。且仍公牘體裁乖於史筆。亦泥古而不知通之過也。

然寺觀門於祠宇之香火一一爲之疏記，此殊足考見宗教與社會經濟之關係，他志所宜取法者。風俗方言或見封域或見外編亦較他志爲核實。

乾隆臨榆縣志十四卷

乾隆丙子知縣鍾和梅主修。臨榆置縣始至乾隆二年，在前明爲山海衛，固久爲重鎮。志中尙錄存康熙己酉管關通判陳天植及

康熙仲春永平余一元重修山海關志序，據光緒縣志則嘉靖乙未兵部主事葛守禮創修萬歷丁酉張時顯天啓庚戌邵可立增補而崇禎辛巳山石關內道范志完修山石志也。

志目如次，卷一沿革星野災祥，卷二疆域山川里市風俗物產，卷三城池公廨學校秩祀古蹟勝境邱墓，卷四賦役，卷五積貯驛遞鹽法關法，卷六邊海，卷七八職官，卷九選舉，卷十十一人物，卷十二三十三十四藝文。

臨榆故爲關，是以此志於關之禁令防禦獨詳，在方志中爲別具一格者。其風俗一門，尙無雷同之弊。

光緒臨榆縣志二十四卷

光緒四年知縣趙允祐修，以時方修畿輔通志檄徵縣志也。

凡二十四卷，一至五爲表之屬曰沿革職官選舉，六至九爲輿地

編，十至十二爲建置編，十三十四爲武備編，十五至十七爲賦役編，十八至二十三爲事實編，二十四爲續編，曰補遺志餘。不曰人物傳而曰事實編，謂非國史不得立傳也。

其凡例末條云，舊志雖云簡略皆經當時修輯名人考訂，新志多就取裁，原板仍存以備徵信。其謙慎之意甚美。以視他志之動攘前人之作爲己作而毀之惟恐不盡者，斯爲超出矣。

民國臨榆縣志二十四卷

民國十七年知事仵塘主修，縣人程敏侯稿，此據仵程兩序而可知者也。前有高凌霨序則云修於縣人谷芝瑞，而谷序則又云聘高爲總纂。蓋徇俗互相標揭，非其實矣。

據其目錄凡二十四卷。曰沿革職官選舉三表，輿地建置武備賦役交通事實六編。而以圖以冠志餘殿焉。其稍變於舊志者，則

以事實當人物也。

是書之精采在輿圖之精密。若邊城若街市若道路，開卷瞭然，可省文字之煩，實舊志所不及，亦今世諸新志中所罕覩。然其體例多可議者，窺其宗旨，似欲略古詳今，於舊志所已有者櫟括概要而不復相蹈襲。故沿革僅有一表而於設關置縣之詳未之及焉。然於賦役壇廟學校風俗物產等門率多逐錄舊文。至交通一篇自應於京奉鐵路經過之商貨運輸旅客往來情形詳爲記載，且秦王島爲船舶鱗萃之所，其出入口狀況亦概未述及。致使虛立一卷之名，僅得數紙之實。以視他編，繁簡懸絕。至於北戴河爲近年新開闢之遊覽區，人耳其名，其中經營點綴，亦地方一段故實。乃既不著之勝境，亦不列之山川。僅於卷首圖畫中及山川門聯峯山條一見之，實疏罅之大者。

選舉表中田震東以孫中玉官山東兗州鎮守使贈光祿大夫建威將

軍。按清代無鎮守使官，而民國亦不應有封典，其爲舛誤不待言。鄉型一篇附錄田中玉傳，按生存之人不入人物已成舊志定例。所以杜迎合而存公允，自來無敢公然犯之者。此風一開，以後之志乘恐將成爲市恩之書，雖有直筆亦不足以取信矣。此不可爲法也。

按光緒永平府志卷二十一撫寧縣下云，戴家河海口在縣東南四十里，明時海運此爲積儲之地。附注云，前志所載滹河水道今實難辨，而郡志滹水下流第曰爲蒲汎河爲獅子河會戴家河由聯峰山南入海，而戴河之由來概不爲載。

乾隆遵化州志二十卷

乾隆五十八年知州傅修主修。

遵化爲漢無終地，縣始置於後唐，故爲薊州屬縣，康熙二年建孝陵於縣西鳳臺山，升爲州，乾隆八年復升爲直隸州，領豐潤玉田兩縣。

據所錄舊序，縣故無志，萬歷戊午知縣張杰始修，康熙中知州鄭僑生續修，乾隆二十一年知州劉靖再修。

凡二十卷，一二三陵寢，四五方輿，六建置，七賦役，八兵防，九典禮，十封表，十一風土，十二十三職官，十四名宦，十五選舉，十六人物，十七列女，十八至二十藝文。

賦役篇載原額地七千餘頃順治初圈佔之後僅存十之一，民生貧瘠可想，風土篇載列肆居奇者率多山右人，此種事實他志鮮道

及者，蓋視爲無足重輕，而不知流寓戶口之多少大有關於經濟勢力之變遷也。

光緒玉田縣志三十卷

光緒十年知縣夏子塗修。

據舊序，萬歷辛亥繆思啓創修，康熙甲寅知縣王時泰重修，辛酉王光謨踵成之，乾隆丙子知縣謝容再修。

玉田漢無終地，唐萬歲通天元年立今名，明隸順天府，雍正曾隸永平府，乾隆以後屬遵化州。

凡三十卷，一至七輿地，八至十一建置，十二十三賦役，十四典禮，十五祥書，十六十七職官，十八十九選舉，二十名宦，二十一至二十七鄉型，二十八至三十列女。

廣韻載陽氏出無終，至今望族仍以楊氏爲稱首，蓋陽變爲楊也。

。此爲世族中一大案，本書能注意及此，殊徵特識。輿地中之風俗方言諸篇亦頗能審核。惟創立待定傳一門以納生存人物，其利病尙有可議。

乾隆豐潤縣志八卷

乾隆二十年知縣吳慎修。

據舊序隆慶庚午縣人谷嶠康熙癸丑知縣張如騫各一修。

書凡八卷，一星土建置沿革疆域山川城池官署學校，二壇廟古蹟田賦倉儲武備，三職官封贈，四選舉風俗物產，五忠義政事文學武功高行孝友淑德，六流寓貞節雜記，七八文苑。據其凡例云，皆據舊志刪繁補漏考故增新也。

凡例又云，一欲觀之書如徐夢莘之三朝北盟會編宇文懋昭之大金國志等皆求之而未得。一當時檢書之不易如此，欲求著述之

審慎，何可得哉。

本書於攷據非所長，然雜記篇舉縣之特產及工業如桃花城豐腴麥笠煤窰漚酒頗多事實。較他志之敷衍具文抑遠勝矣。

舊志以豐潤爲漢右北平土垠縣地，畿輔通志則兼舉徐無。置縣之始實在金源，初名永濟，蓋避衛紹王諱改今名也。元史作豐閏。明爲薊州屬縣，康熙中改屬遵化州，雍正中又改永平府，乾隆中復改屬遵化州。

乾隆易州志十八卷

乾隆十二年知縣張登高主修，蓋乾隆九年知縣楊莘本有志，登高取而刊行之也。按志所載謝遷舊志序，弘治元年詔修憲宗實錄遣使采摭四方事實以備纂述，於是知州羅綺始成易州志。至十五年後復經纂訂，萬曆辛卯及順治乙酉又兩次重修。據學部志目有順治易水志知州朱懋文修，康熙易水續志知州韓文煜修。

易自漢爲縣。明隸保定府。雍正間卜秦陵於此，升爲直隸州，以涑水廣昌二縣隸焉。涑水故屬保定，而廣昌故屬山西也。本書以秦陵圖及統制列於卷首。統制云者，秦寧鎮所統轄之規制也。卷一爲星野祥異，二建置沿革，三公署，四村社，五學校，六丁役，七田賦，八祀戎，九古蹟，十風俗，十一政事，

十二職官，十三宦蹟，十四科，十五人物，十六至十八藝文。據其凡例稱文物事實不專於易者概從刪，是其旨趣在求簡。然藝文志所載韓愈送李端公及董生二序，豈專於易耶。蓋俗儒秉筆，不能博搜往籍。耳目所周，不過家絃戶誦之詩文。故於所不必載者不能忘情，而於必應載者反視爲無足輕重。然此亦無庸專以責之易志矣。其最謬者，建置沿革一篇有始皇二十五年併燕置上谷郡領易涿遂瀛等十二州縣數語，此是何等書法邪。

乾隆涿水縣志八卷

乾隆二十七年知縣方立經修。

據所錄楊莘序，縣志一修于康熙丁巳知縣陸屢箴，再修于乾隆己未知縣王治。又據王序云，一舊志三卷，始之者前明唐公治南公椿也。（一嘉靖末年任一萬歷元年任）去華撫實，縷析條分

，釐爲十一卷者，我朝陸公展箴也。今已磨滅不可復傳。一學部志目陸展箴作陸展十一卷作十卷蓋皆誤字也。

凡八卷，一地理志，二建置志，三食貨志，四祀戎志，五職官志，六科貢志，七人物志，八藝文志。

涿水置縣始於開皇中。自改隸易州而後，密邇秦陵，又境內有怡賢親王園寢，蹕路所經，行宮所在，聲明文物不無可紀矣。

乾隆廣昌縣志八卷

乾隆二十五年知縣趙由仁修。

據舊序，廣志始修于明崇禎間知縣劉世治。據凡例稱知縣王佩琦吳繼誠均有修本，惜未得見舊本。今所存者惟知縣杜登春康熙三十三年所修之本也。

廣昌漢蜚狐縣屬代郡，遼定今名。清初屬山西大同府蔚州，雍

正初定秦陵，以廣昌爲來脉所關，始改隸直隸，今稱涑源。
書凡八卷，一方輿志，二建置志，三學校志，四職官志，五賦
役志，六選舉志，七人物志，八藝文志。

光緒廣昌縣志十四卷

光緒元年知縣劉榮修，其時任知州者則陽湖趙烈文也。

卷首錄舊志序而不載其年月，蓋崇禎五年知縣劉世治創修，康熙三十年杜登春補修，乾隆二十五年知縣趙由仁再修，本書則奉續修畿輔通志採訪條款歟而輯者也。

書凡十四卷，一輿地志，二建置沿革表，古城考，三職官表，四選舉表，五吏政略，六戶政略，七禮政略，八兵政略，九刑政略，十工政略，十一前事錄，十二金石錄，十三古蹟錄，十四列傳。似亦暗襲永清志之規模，惟無所發明耳。

乾隆冀州志二十卷

其中二三四三卷爲抄本

乾隆十二年知州范清曠修。

據所錄舊序，成化十一年知州李德美創修，嘉靖二十七年知州王元亨重修，康熙十四年知州李顯忠又修。明史藝文志有冀州曹安志，今則亡矣。

書凡二十卷，一職方，二建置，三典禮，四五賦役，六鄉閭，七風物，八封表，九至十一職官，十二至十四選舉，十五至十七人物，十八拾遺，十九二十藝文。據其凡例云，仿新修畿輔志而稍變其例。故法度犁然，明贍有餘。

冀州爲漢信都，北朝以來冀州治信都，相沿不改。雍正二年，由正定府屬州改直隸州。割深州之衡水共南宮新河棗強武邑爲五縣焉。

民國冀縣志二十卷

民國十八年新城王樹枏纂。

冀州爲禹貢九州之一，所統至廣。自漢魏以來冀州刺史部常理信都。迨隋初郡廢，始專有州之名。明並以所治信都縣省入，民國復改爲縣，於是至廣之域夷爲至狹矣。然則冀縣範圍止以信都爲限，而故書所稱冀州不得濫載。去取之間不容忽也。

本書仿廣陵通典及讀史方輿紀要之體，貫串史事，自爲論斷而以所引諸書附於其後。聯綿數卷，不分篇第。在方志中誠爲創格。今按其全書二十卷，大抵一二爲史事，三爲山水，四五爲建置，六爲祠祀，七八爲村鎮，九至十三爲職官，十四至十六爲田賦，十七爲巡警學校自治等，十八至二十爲人物。其脈絡依然可尋也。

稽其得失，有可議者六焉。記冀州大事但宜取其涉于本州者其因本州而旁及者不能一一毛舉，此自著書通例，否則將成全史而非一縣之志也。本書卷一述袁紹得冀州但云袁紹之強自得冀州始，而其下引袁紹傳及英雄記韓馥事實之，是矣。乃記高歡起兵則徧舉參贊大謀之李元忠婁昭以至侯景數十人刺刺不休。夫高歡起兵之事非一端，此數十人亦並非必與冀州有關。若概須加入，則雖盡舉北齊一朝之史豈能竟其說。此其一。自兩晉以來諸侯王久不就國，其爲國屏翰者皆別領節鎮。本書卷一歷述列朝大事，於封國致詳獨甚。且於唐順宗封子綽爲冀王下云，其時河北皆爲王氏父子所據，蓋亦虛封。殊不知諸王莫非虛封。既爲虛封則其封號僅爲掌故之一端，而殊非地方之大事。今於封號則斤斤往復，而於歷代名宦之政績反不叙列。於此不免輕重倒置矣。此其二。述高齊事至九紙，而自順治至民國反

僅五紙。於史家詳近略遠之旨殊乖。此其三。卷四宋太祖建隆二年增修冀城條下云，城內有漢冀州從事安平趙徵碑云云，今按碑刻與宋城何涉，此類自以別爲金石爲宜。此其四。卷九稱漢文帝十三年遣丞相史出刺並督察監察御史。今按監察御史唐官，漢之侍御史亦非丞相史所能督察。此語未詳所出，顯然訛謬。此其五。卷十七所述大抵皆警務學堂自治司法等新政。自成一卷，元無不可。然學堂一門仍兼叙古學校及選舉制，殊爲不倫。此其六。蓋貫羣書以成文，過求詳博，不免有失檢之處也。

至其每事必詳制度之沿革，又能以表譜馭繁蹟之文，若水患表及賦稅表，皆深得史法。抑又非廣陵通典所及也。

道光南宮縣志十六卷

道光十一年知縣周栻主修。

據所錄舊序，康熙十二年知縣胡景銓曾修一次，（學部志目景銓作胤銓誤也）魏裔介爲之序。據凡例明代有葉邢兩志，葉志無存，邢志闕略，縣人盧鳳有志十卷早失其稿，鄭宏慶續邢志係抄本亦無從覓，惟胡志具有全書。

書十六卷，一地輿，二建置，三學校，四典禮，五賦役，六風土，七事異，八官師，九選舉，十人物，十一列女，十二至十六藝文。

觀其書法大抵步趨靈壽，自以爲得。殊不知藝文以有關一邑之政教風俗者爲前編關一人之學問經濟者爲後編實非善法。而靈壽所創之方言一例轉未之取，是誠不足言體例矣。然凡例稱一舊志流腐載南宮子既非核實且失之褻，又列扁鵲鄧禹魯義姑俱失之誣。一是修志者未嘗無去取翦裁之能，徒以惑於積習，故雖知其誣而仍不敢不載也。

其轉錄邢志稱「先時居民撤屋掘土深入丈餘，輒得磁甕瓦甓。其中皆金銀珠貝或大窖貯古錢至數石。儒學明倫堂前出銀二窖，盤碗盆盞畫以蛟龍，至於玉盃金鼎簪珥跳脫不可勝計。計自成化十七年發至弘治間其藏始盡。每掘獲一物人必糾衆持挺呼號晝夜攘奪，鈇鉞莫能禁也。今田父野老拾一二小物考其器名圖象皆王侯之制，其故殊不可曉。」此爲考古學中一段故實。意其所稱必漢廣川王墓也。蓋漢之南宮嘗屬廣川國，隋以後始屬冀州也。

南宮漢縣，其後迭有興廢，清初屬正定府，雍正初改隸冀州。

光緒新河縣志十六卷

宣統元年補刊本

光緒元年知縣趙鴻鈞修，宣統元年知縣王樹霖取而補其闕遺刊行之也。

按舊序，志創于嘉靖四十三年知縣蔡懋昭，修于萬歷二十二年知縣徐治民，再修于康熙十八年知縣王汝翰。

清河漢堂陽縣，元立今名，雍正二年升冀州爲直隸州，以縣隸焉。

書凡十六卷，一圖考，二天文，三地理，四建置，五學校，六賦役，七典禮，八風土，九職官，十選舉，十一人才，十二列女，十三紀事，十四十五藝文，十六雜志，譌奪頗殊甚。

乾隆棗強縣志八卷

乾隆十七年知縣單作哲修。

按所錄舊志序，知有嘉靖萬歷康熙二本，（詳見嘉慶志條下）據單氏自序謂規模一本舊志，而筆削之指間有異同，草創甫就，卒卒授梓。凡爲八卷，一地理志，二建置志，三賦役志，四職

官志，五選舉志，六人物志，七藝文志，八雜稽志。棗強漢縣，其字是疆非疆，而雜稽志云，「疆與疆通，則棗疆者產棗之疆，一異矣。唐以後屬冀州，雍正二年冀州升直隸州，以縣屬焉。志於董仲舒故里及宋河故道等引證頗多，綜其大體在舊志中爲文字修潔者。嘉慶志序稱之爲不誣矣。

嘉慶棗強縣志二十卷

嘉慶壬戌知縣任銜蕙繼其父增宰是邑而屬陽湖楊元錫編纂。據前有總督顏檢序及卷末敍錄，則嘉靖三十四年知縣羅廷唯始撰邑略，萬歷二十二年知縣郭維寧續修，萬歷丙辰知縣王鶴齡再修，康熙六年知縣胡夢龍重纂，八年復爲之序，乾隆十七年知縣單作哲繼纂。羅郭王三志皆泯滅，惟胡單二志僅存。然據學部志目尙有康熙十九年知縣董廷榮一志也。

觀敘例一篇，類本章氏之說，甚至語句亦多襲舊。雖無所發明，可謂知取法乎上者矣。

其目次一天章紀，二恩澤紀，三圖考，四沿革爵封表，五職官表，六選舉表，七地理志，八建置志，九田賦志，十學校志，十一典禮志，十二循政略，十三史傳，十四列傳，十五列女傳，十六風土記，十七雜記，十八十九藝文錄，二十敘錄。

綜其爲書，簡核明淨，實方志中之謹飭者，然循政略述其父字而不名，終乖史法。據方宗誠續志序云，「單君高密宿儒，又嘗從游于方望溪，得明著述之體要，故其爲志博考詳稽微若不足，而義法謹嚴文體精潔則任志有不逮焉，」蓋亦見及此也。

同治棗強縣志補正五卷

同治十二年知縣方宗誠撰，據其序，單任二志皆稱精善而任志

爲尤詳。同治十年訪求舊志則僅得一朽蠹單志，胡志已無有矣。惟任志板本具存，乃用宋張湜會稽志續編明張愷常州府志續集之例，但補記嘉慶八年以後之事實，並以單任二志互相校閱，擇善而從，徵引古籍，正其遺誤云。

同治武邑縣志十卷

同治十一年知縣彭美撰。

據序舊志始撰於萬歷庚寅，知縣王學易，續修於康熙甲戌知縣許維挺。

武邑爲漢縣，所隸州亦相承不改。

本書凡例云，一王志不可見，僅存許志，缺訛太甚，難資考核。茲歷一百七十餘年，事實日積，文獻難徵，同治二年兩次城陷，卷冊被毀。一此舊事散佚失傳之由也。又云，一茲編謹從

簡嚴，凡非關本縣及歷代沿革之際非實與本縣相繫者不敢旁徵。一此又其修纂之宗旨也。然如學校志備列從祀先賢名氏亦何嘗不仍蹈他志積習。篇幅雖窘，亦非真能簡者也。

乾隆衡水縣志十四卷

乾隆三十二年知縣陶淑撰。

按舊志歷修姓氏，萬歷十年知縣周子文創修，順治二年知縣張恒十四年知縣任宏孝康熙七年知縣王萬方十九年知縣蕭鳴鳳重修。

衡水立縣自隋開皇十六年，其後或屬冀州，或屬深州，或屬正定，雍正二年始改屬冀州。其故城沒於漳水，永樂間遷今治。本書宦績門有云唐羊元珪，未詳何許人，延載元年爲衡水令。按唐無延載年號，不知何所據而云然。即此一端可知其陋。綜

其全體亦復膚泛無可稱者。

書十四卷，一圖考，二地理，三建置，四田賦，五典禮，六學校，七官師，八選舉，九十人物，十一以下藝文，藝文所采多非專屬衡水者，亦且挂漏甚多。

康熙趙州志八卷

寫本

康熙十二年知州祝萬祉屬學正閻永齡州人進士王懿等編纂。

據所錄惟隆慶元年知州蔡懋昭序，云宏治癸丑知州張清嘗彙編之而不及六邑，正德初知州程遵乃以六邑事總編之而各爲一卷。其沿革如此而已。

州爲漢恒山鉅鹿郡地，明永樂以後爲直隸州，領縣六，曰寧晉隆平柏鄉高邑臨城贊皇。

其目次一地理，二建置，三田賦，四祠祀，五官師，六人物，七風俗，八藝文。

其中如物產一門雜引古事，人物篇悉取戰國以來趙人引入，殊爲蕪濫。

光緒趙州志十六卷

光緒二十三年知州孫傳斌取州同孟傳鑄遺稿修訂刊行。

趙州爲漢常山地，北朝始立趙州。本書沿革表省北齊改郡曰南趙郡州曰趙州一節，殊嫌簡漏。

書十六卷，一二輿地，三建置，四祠祀，五六官師，七至十二人物，十三至十六藝文，大致仍用舊志之文。惟舊志風俗雜考屬邑皆爲一綱，今則屬邑另編爲變舊例耳。

趙州故蹟之可珍者曰柏林寺，寺有吳道子畫壁。曰安濟橋。據唐張嘉貞安濟橋銘，爲隋匠李春之迹。朝野僉載稱其工磨礪密緻如削，望之如初月出雲長虹飲澗，上有勾闌皆石獅子。其工程偉傑可想。本書並未述其今狀，亦不列入古蹟，皆非法也。即以藝文而論，李賀詩買絲欲繡平原君有酒惟澆趙州土何未采

入耶。

光緒趙州屬邑志八卷

不著撰人姓氏年月，前有序曰，「趙志在前代有彙編之而不及屬邑者，有總編之而各爲一卷者。有至隆慶初州守蔡公始合屬邑約會成書，所以存州縣統轄之體也。康熙間州守祝公重修州志，邑輯爲一卷附州志後，迄今二百餘年無續修者。」茲蓋因重纂州志摘錄舊志並據各縣采訪冊編爲八卷，附州志後也。

乾隆柏鄉縣志十卷

乾隆三十一年丙戌知縣鍾慶華修。

據舊序，柏志始修于明萬歷二十五年知縣馬寫。順治庚寅署知縣彭述古得姚燕魏公所著柏志遺稿續刊成之。其後甲戌太學生

魏惻吾復出所著邑志，知縣張延庭取而刊之。康熙三年魏裔介撰爲十卷。十九年庚申再撰，知縣謝廷瑞取而刊之。故鍾氏之序曰，柏志創自前令馬寫，張延庭續成，今所存者刊於謝廷瑞，其裁定則魏文毅相國承先志而繼述之者也。

書凡十卷，一星野等，二古蹟等，三祠祀等，四墓域等，五戶口等，六名宦等，七列女等，八縣令表等，九貢生表等，十祥異等。

柏鄉古鄗邑地，隋置今縣，明隸正定府。雍正二年升趙州爲直隸州，遂爲屬縣。

據鍾氏自序云，一藍本舊志，參以畿輔趙州各志，復走吏百餘里外從正郡購取舊卷，亦多散佚無稽。不得已抱郡志歸，又皆勝國嘉靖前事。其新志則柏鄉已改隸趙州，概從芟不錄。退則訪書吏之最年老及已退事者，口述數宗，分籤珍紀，餘或剝苔

別薛，錄取碑銘，又或從梅頭墻壁搜得一二事。『載筆之難如是，今觀其部居修整，或尙魏氏之遺規也。』

康熙臨城縣志八卷

中有嘉慶年中增入者

康熙辛未知縣楊寬修，其前有萬歷二十五年縣人喬璧星承知縣楊鵬搏令撰本，更前有嘉靖三十年知縣王永興撰本。今本又喬之孫已百所纂也。

臨城爲漢房子縣，天寶中改今名，自是以來屬趙州。

書分輿地建置食貨官師選舉人物藝文述考八志，具體而微。

深州風土記二十二卷

同治十年知州吳汝綸撰。

據叙錄云，康熙志張蜚英後叙云，深之有志，自前明成化間始。但事出草創，叙次舛駁，不足徵信。成化之後，凡有萬曆及康雍乾道四志。汝綸撰是書，所因者蓋寡。汝綸於同治十年十一年官是州知州。其後移官他處。蓋屬稿未定，故不以志名，而變其稱以示謙也。書刊於文瑞書院，卽深州之書院。距其經始蓋幾三十年矣。書既不以志名，則自可不拘志體。卽小有罅漏，亦可無深論。然汝綸桐城文士之傑，近代方志寂寂少佳構，則又不容不取而抉摘其瑕瑜以爲後來借鏡之資也。

書爲篇二十一，曰疆域，曰河渠，曰賦役，曰學校，曰兵事，曰官制，曰職官，曰名宦，曰藝文，曰古蹟，曰金石，曰人譜

，曰薦紳，曰名臣，曰文學，曰武節，曰吏績，曰孝義，曰流
寓，曰烈女，曰物產。就中有例屬創闢足徵特識者焉，人譜一
篇是也。中國自秦漢區分郡縣以來，人民里貫遂往往爲一切政
治社會制度所附麗。試舉其大凡。鄉舉里選，則人民參與政治
之塗徑也。月旦評，則輿論機關也，鄉官，則人民自治團體也
。里社，則社會娛樂也。社會義學，則社會救濟事業也。凡此
或導自漢魏，或盛於唐宋。要皆賴有固定之里居，敬恭桑梓，
長養子孫，情誼隆洽，根柢盤固，而後能發揮其力量竭盡其職
務。此可觀於承平之世者也。至若戎馬之變，饑饉之災，與夫
政治之壓迫，不幸被其地。則雖安其土樂其業之民亦不得不去
而他徙。於是鄉里之組織，必首蒙其破壞。推遷演迤，莫窮其
紀，新舊相兼，吐納相代。譬如植樹，往往易地而新萌滋焉。
凡此則又與文化之開拓息息相關者也。徵之於古，則秦代之徙

民實蜀實咸陽開五嶺。此以政治之壓迫而遷徙者也。王莽之亂，開闢地江南之漸。建安之亂，洛都轉致空虛。永嘉之亂，士族相携南渡。此以戎馬之變而遷徙者也。至於饑饉之徙民，更史不絕書矣。驗之於邇，則江南巨族，多托始於趙宋。湘蜀大姓，多啓業於清初。黔滇人士，多衍支於流宦。故欲推知近代史跡，卽私家譜牒而了然。不待他求矣。覈而言之，人民里貫，是政治社會制度所從出也。其遷徙之迹，又文化升降所從顯也，自漢以來，歷世久遠。苟能舉諸巨宗彊族，溯其淵源。蹤其分合盛衰往來久暫。斯誠治史者之一偉績，足令吾曹深明歷來社會組織之進化情狀，且布露吾民族精神與世共見也。惜乎昔之治方志者，多忽視譜牒爲無從重輕。而私家譜牒又闕不可見，散不可紀。汝綸獨以卓然遠到之識，創人譜一例，網羅散逸，詳而不冗。可以垂爲法式。其所舉安平崔氏自漢至五代千

有餘年。斯實北方文化史中心問題矣。又云，一自明至今五百餘年，族姓視前一變。永樂間遷民實畿輔。州所屬諸望姓大抵遷自永樂者爲多。金元以前千餘年舊族今存者希矣。『然則世變之劇，顧可不深長思歟。表而出之，彰撰者之用心也。』

其體例之善次於人譜者，曰金石文字，記其出處，記其現狀，並詳著其原文不稍變易。一州掌故，苞舉無遺。千百年後，雖金鎔石泐，而文字流傳班班可考。保存史料之法，莫善於此。所錄明洪武學校格式碑，足徵明代地方教育制度，且補明史選舉志之疏闕。致爲可珍。大抵近代諸建置碑記，驟觀之似瑣陋無足數，往往於其中得社會經濟情狀之真。苟能率海內方志盡如深州之例，其裨益史學當無窮矣。

又次則賦役篇。自洪武以來賦役源流一一疏通證明，不避煩瑣而有綱舉目張之效。

其文詞之美者，則疆域一篇。疏舉版圖分合，言皆有物。非他志蹈襲具文可比。兵事一篇，尤其稱意之作，他志亦多未具也。然篇以兵事爲名，而敘金施宜生事及清末傳教事，皆稍有闌入之嫌。物產一篇，爲全書最後脫稿者。附論農商狀況，士女風俗，兼仿史記貨殖列傳漢書地理志之體，得事覈詞雅之長。昔章學誠撰文史通義，歷詆文人不宜修志。今觀汝綸之書，視學誠之卓識，何嘗有不及哉。安見文人之必不能撰史也。學誠見康海之武功濫獲虛譽，故有激而爲此說。然明人疏陋纖詭，本不得與於文學之林。不直不能撰史也。

據畿輔通志云，深州志明嘉靖時附於正定志，萬歷中劉應民始分編纂輯，國朝康熙丁丑李天培重修，雍正壬子知州徐綬續輯，道光七年知州張範東邑人李侍御廣滋增修。

深州置自隋開皇中，唐廢屬冀州，旋復，元初屬河間府，明屬

正定府，清因之雍正初升直隸州，領武強饒陽安平三縣。

乾隆饒陽縣志四十卷

乾隆十四年知縣單作哲修。作哲修棗強縣志已箸錄。

據序云，饒之有志創自萬歷二十九年知縣翟燿，爲前志三卷。繼修于順治三年知縣劉世祚，是爲後志二卷。百有餘年始一重續焉。

書分上下二卷，一沿革志，二星野志，三方域志，四建置志，五地征志，六官田志，七戶口志，八課程志，九經制志，十積貯志，十一溝洫志，十二土宜志，十三學校志，十四典祀志，十五禮儀志，十六武備志，十七風俗志，十八封爵志，十九恩榮志，二十雜稽志，二十一二三官師錄，二十四五選舉錄，二十六名宦傳，二十七循良傳，二十八鄉賢傳，二十九仕績傳，

三十儒學傳，三十一文苑傳，三十二孝友傳，三十三忠義傳，三十四善行傳，三十五六七貞烈傳，三十八事紀，三十九四十字紀。

本志並無凡例，繹其序跋所載，一依類條次，其前志誤者正之，略者增之，支且蕪者汰之，採訪於士民事可疑人未詳者闕之。一蓋依據舊志略爲損益而已。末有邑人尹德備一跋，稱揚單氏政績。雖屬諛言，猶勝於以本人事蹟濫載於志中也。

縣爲漢置，元明屬晉州，清初屬正定府，雍正二年改隸深州。

康熙安平縣志十卷

康熙二十六年知縣陳宗石纂修，前有于成龍序，蓋以康熙十一年奉修一統志之詔也。

據序稱邑志創修于嘉靖二十九年知縣沈同人，續于萬歷十六年

邑人王三餘，再修于萬歷二十三年知縣何璽。

安平縣秦屬上谷郡，唐初於縣置深州，尋移州治饒陽縣，以安平屬之，元明以來，屬正定府，清還以屬深州直隸州也。

書凡十卷，一輿地志，二建置志，三古蹟志，四賦役志，五職官志，六選舉志，七人物志，八九藝文志，十雜紀志。多分子目，殊極繁瑣。

雍正定州志十卷

雍正十一年知州王大年修。(學部志目作黃大年誤也)

按所錄修志姓氏，有宏治癸丑官賢嘉靖壬午倪璣萬曆己未沈庭英康熙壬子黃開運四本。

定州之升直隸州在雍正二年，原轄曲陽新樂二縣，十二年以保定之深澤來屬，而新樂仍歸真定。本志卽兼括兩縣而修者。

按元代聚工匠於定州，此實北方工業藝術集中之地，而志無述焉。

書凡十卷，一圖經星野等，二禮儀，三學校，四賦役，五職官等，六七人物等，八紀事等，九十藝文。

道光定州志二十二卷

道光二十九年知州寶琳修。

書立六門，曰天門，曰歷紀，曰地理，曰人物，曰政典，曰藝文。每門咸有子目若干。其中最可稱者爲鄉約類。其凡例云，一鄉約類前志僅登其名，他志亦多從簡略，今從定州舊立之四十餘約，每約繪圖，復以所行保甲法詳說之，改其類曰鄉約，務使四境之廣，粲若列眉，一鄉之微，瞭如指掌。一每鄉爲圖，真他志所無也。

然於人物門力矜其去取之嚴，謂有一身事兩朝及數姓與迹附畔逆者概從刪撤。此又過也。

康熙曲陽縣志十一卷

康熙壬子知縣劉師峻撰，前有魏裔介序。

其凡例云，舊志繁雜無次，今從簡確，然不及舊志撰人姓氏及時代。此一異也。曲陽爲漢縣，漢書地理志注已云有嶽祠，唐

以後爲定州屬縣，祀獄之典崇焉。而志於崇祀之禮秩廟貌之規模一不言及，僅錄祭文數篇而已。此二異也。體要尙如此其疏，他無論矣。

凡十一卷，一圖攷，二方域，三建置，四賦役，五官職，六禮儀，七選舉，八人物，九風俗，十藝文，十一雜志。

光緒曲陽縣志二十卷

光緒三十年知縣周斯億修。

曲陽舊志修於康熙壬子知縣劉師峻，劉志自稱概從簡確，本志則以詳備矯之。凡例自云參用洪亮吉涇縣淳化孫星衍三水武億偃師安陽李兆洛鳳臺董裕誠長安各志。故倬然有名著之風。就其凡例中所自舉者，如謂舊志多空言臆說，實事反荒略不備，今詳考史傳參以碑誌，除風俗人物得之采訪外，餘均註明所出

。又謂前志於人物風俗多有褒無貶，今則美惡同登以示法戒，皆確有所見，不同凡響也。

書凡二十卷，一輿地圖說，二縣治沿革表，自漢以來職官表羣職表，三自唐以來貢舉表仕進表鄉飲封贈表，四列女表，五大事記災異記，六山川古蹟考，七城廨建置考，八學校考，九禮儀風俗考，十財賦考土宜物產考，十一二十三金石錄，十四藝文錄，十五循良傳，十六名賢傳，十七文學傳武略傳，十八忠節傳孝義傳，十九工藝傳祿仕傳，二十列女傳叙傳。

曲陽爲北嶽廟所在，其山川古蹟考備載其制而分別注明今存今無。曲阜鹿邑等志之於孔廟上清宮皆未能及此。如輿圖之分社爲篇，大事記之辯通鑑柏肆谷之誤，皆精詳不苟。不獨遠勝劉志，抑近志中所罕見也。

工藝傳所載楊瓊以雕石之工爲元世祖所賞，兩都宮殿石工出其

手者不可枚舉，且與王氏同業世婚，實爲今日定州石工所自昉。兩姓事跡亦載王氏追遠碑及楊瓊神道碑（本書卷十三金石錄）比而觀之，尤可見其淵源也。

雍正深澤縣志十一二卷

雍正十三年乙卯知縣趙憲請羅定知州縣人王植纂輯。

據凡例云，深澤前明無志，自康熙乙卯邑令許來晉始爲搜葺，於鄉紳張靖之家得前教諭張勸所輯稿，復較閱郡志祁志與邑士紳王鏞袁斌等參互考訂之，是爲舊志。

深澤立縣自漢，宋以後屬祁州，雍正二年定州改直隸州，十二年以曲陽及深澤隸焉。

書凡十二卷，一編年志，二輿地志，三建置志，四職官志，五禮儀志，六食貨志，七選舉志，八人物志，九十一藝文志，

十二附餘志。

本書稍殊別者則編年一志。他志編年多僅從史籍中采取關於本邑戰伐大事實之。而本書所列則舉凡建置之興廢制度之沿革下逮故老之傳聞，凡有年月可籍悉爲排比。雖不能無挂漏，固深合方志之義者也。

乾隆熱河志一百二十卷

乾隆四十六年和珅等奉敕修，已入四庫箸錄。

熱河久在邊外，雖在在有遼金元諸朝之史蹟，而未爲史家所重視，故掇拾之功尤難。御製序云，一爲各省之志書易，爲熱河之志書難。彼其以漢人書內地事，且各府州縣本有晉乘楚檇杌蒼而輯之，其易也不待燭照數計而龜卜也。熱河之志則以關外荒略非內地，而遼金元之史成于漢人之手，所爲如越人視秦人之肥瘠，忽然，故曰難。夫遼金元非若唐宋之興于內地而據有之也，又其臣雖有漢人通文墨者，非若唐宋之始終一心，於其主語言有所不解風尚有所不合。且遼金元皆立國不久旋即遜出，則所紀載欲其得中得實蓋亦難矣。夫遼金元之史紀內地而欲其得中得實尚且難之，况邊關以外荒略之地乎。其不能得中得

實亦益明矣。一本書於此獨三致意，於遼以上兼考慕容氏遺址焉。

熱河以溫泉得名，康熙中建避暑山莊，乾隆中改名承德府。本志名熱河，仍從其朔也。

書凡百二十卷，一至十二天章，十三至二十二巡典，二十三至四徠遠，二十五至四十四行宮，四十五至四十八圍場，四十九至五十四疆域，五十五至六十三建置沿革，六十四暑度，六十五至六十八山，六十九至七十二水，七十三四學校，七十五六藩衛，七十七至八十二寺廟，八十三文秩，八十四兵防，八十五職官題名，八十六官蹟，八十七至九十人物，九十一食貨，九十二至九十六物產，九十七八古蹟，九十九至一百二故事，一百三至一百六外記，一百七至一百二十藝文，就中暑度一門刪星野之談天，測斗極之出地，最爲精識。

道光承德府志八十六卷

道光九年熱河都統成格知府海忠修，光緒十二年知府廷杰重訂。乾隆勅修熱河志以來邊地之紀載差備。成格復以府尚無志，於是悉遵熱河志程式而廣所未備，別類分門爲八十六卷。所輯宋遼軼事甚富，而采臨安志引書之法亦最精洽也。

民國隆化縣志六卷

民國八年知事羅則逖修，通縣施畸纂。

宣統二年熱河都統與民政部議准實行畫撥承德豐寧兩縣地建隆化縣，初建於唐三營之圍場總管衙門，民國四年改建於皇姑屯之行宮爲縣治也。

凡六卷，一曰地理志，二曰世紀志，三曰風俗志，四曰俊義志

，五曰著述志，六曰政典志。

其著述志實卽鈔錄詩文，而漫列哲理攷證諸目，不知何取。其餘各篇亦多虛事鋪張羌無實事也。

乾隆口北三廳志十六卷

乾隆二十三年宣化知縣黃可潤校修。口北三廳者張家口獨石口多倫諾爾也，元爲上都興和路及興松雲三州地，明爲開平衛及興和守禦千戶所地，又爲全寧衛之西北境大寧都司朶顏衛及營州前屯興州五屯衛之西北境，後俱廢爲韃靼諸部落駐牧地，清初壩內爲農田壩外爲察哈爾東翼四旗西翼正黃半旗遊牧地，雍正中設三廳理事同知隸口北道。

本書凡十六卷，一地輿，二山川，三古蹟，四職官官署壇廟，五經費地糧村窰戶口風俗物產，六臺站考牧，七藩衛，八人物

列女九至十世紀十二至十五藝文，十六雜志。

其地輿山川古蹟三篇據諸史及金幼孜北征錄周伯琦扈從北巡後紀等書疏証古今地名之同異，尤注意于元開平之故蹟，較若列眉，足與日下舊聞考媲美。惟古蹟篇云斡耳朶卽遼史中所謂斡魯朶疑卽當時之帳殿，斯則偶未檢元史，不知其已明云斡耳朶卽宮殿也。世記一篇歷舉歷代兵事深爲周備，藝文篇所載詩文，亦皆切於掌故者。

方志考稿甲集第二編

東三省

乾隆盛京通志四十八卷

乾隆元年府尹宋筠府丞王河等纂，咸豐元年府丞雷以誠補修重刻。

前志爲康熙二十二年將軍伊把漢府尹董秉忠等修也。本書開卷即未列前志纂修年月，序文中亦無一語及康熙志之始末，是不待讀之終篇，已決其無著述之法矣。

凡四十八卷，一至四爲典謨志，五京城志，六壇廟志，七山陵志，八宮殿志，九苑囿志，十建置沿革志，十一星野志，十二疆域志，十三十四山川志，十五城池志，十六關隘志，十七驛站志，十八公署志，十九二十職官志，二十一學校志，二十二

選舉志，二十三戶口志，二十四田賦志，二十五風俗志，二十六祠祀志，二十七物產志，二十八古蹟志，二十九帝王志，三十三十一名宦志，三十二至三十四人物志，三十五三十六孝義志，三十七列女志，三十八隱逸志，三十九流寓志，四十方伎志，四十一仙釋志，四十二至四十七藝文志，四十八雜志。

其中率陋之處不可悉數，姑摘其一二端如古蹟一篇但舉遼金諸州縣之名，而大半不能指其爲今何處。夫古蹟云者，謂其有蹟可尋也。若但舉其名，復奚賴於志也。后妃一門專以遼金兩朝爲斷。不知慕容基業，渤海建邦，亦不宜沒其世數。至於京城宮殿等皆寥寥數紙，圖尤麤劣，實無以稱陪都志典制。當時物力全盛，而成書不過如此，亦可異矣。

書名盛京通志，其實以後來之東三省爲範圍。按其沿革篇云，「順治元年悉裁諸衛，設昂邦章京副都統總治之。順治十年以

遼陽爲府，置遼陽海城二縣，寧古塔設昂邦章京副都統諸員。十四年除遼陽府名，以瀋陽爲奉天府，置府尹。康熙元年奉天昂邦章京改鎮守奉天等處將軍，寧古塔昂邦章京改寧古塔將軍。三年錦州改爲錦縣，廣寧改爲廣寧府，設廣寧縣，寧遠州。四年裁廣寧府設錦州府移駐錦縣。是年奉天府又添設承德及蓋平開原鐵嶺四縣，遼陽改爲遼陽州。二十三年，於黑龍江岸築愛琿城設將軍副都統駐防，自是西抵山海關東抵開原奉天將軍統之。西接開原威遠堡東抵海濱寧古塔將軍統之。東連寧古塔西至喀爾喀南至松花江北至俄羅斯黑龍江將軍統之。雍正五年，於寧古塔境內設永吉州長寧縣。十二年於明復州衛地設復州，於明金州衛地設寧海縣，又於錦州府增設義州。一是其大較也。

乾隆四十四年盛京通志一百三十卷

石印本

乾隆四十四年武英殿大學士阿桂等奉勅重修。以舊本叙事簡略體例亦多未合也。

凡一百三十卷，一至七聖製，八九綸音，十至十七天章，十八京城，十九壇廟，二十宮殿，二十一山陵，二十二星土，二十三建置沿革，二十四疆域形勝，二十五至二十八山川，二十九至三十二城池，三十三關郵，三十四津梁船艦，三十五六戶口，三十七八田賦，三十九至四十二職官，四十三四學校，四十五六官署，四十七至五十選舉，五十一二兵防，五十三至五十七名宦，五十八至六十四歷朝人物，六十五至八十一國朝人物，八十二至八十六忠節，八十七孝義，八十八文學，八十九隱逸，九十流寓，九十一方伎，九十二仙釋，九十三至九十六列

女，九十七至九十九祀，一百至一百四古蹟，一百五風俗，一百六七物產，一百八雜誌，一百九至一百十四歷朝藝文，一百十五至一百三十國朝藝文。

其建置沿革表分奉天府錦州府吉林黑龍江四部，是仍以盛京爲總括東省之名也，惟所載偏於留都者爲多耳。

本書視前志於旗田官莊園場賦則多所詳定，人物兼載遼金宗室，皆爲較勝。不獨四庫提要所稱舊本不載盛京興京東京創建修葺之由等條而已也。

民國瀋陽縣志十五卷

民國五年知事趙恭寅修。

據例言，一縣志向無成書，光緒末葉都林布篆承德時始與邑紳從事編輯，金正元繼任，就原書付梓，是爲瀋陽志之嚆矢。是

編多采舊志，而稍有異同。

勃海大氏始置瀋州，是爲設治之始。元爲瀋陽路總管府，明爲瀋陽中衛，隸遼東都指揮使司。清初建都，尊爲盛京，順治十四年設奉天府，康熙四年設承德縣，民國二年復明舊名爲瀋陽縣焉。

書凡十五卷，一地理，二職官，三民治，四教育，五財政，六司法，七實業，八交通，九人物，十古蹟，十一禮俗，十二物產，十三宗教，十四慈善，十五藝文。

地理篇於疆域山川而外兼述宮殿陵寢，用光緒順天府志例也。瀋陽爲前代陪都，其興王基業猶在，固宜特筆紀之，以別於古蹟。然猶惜其過簡，不能望宋敏求朱彝尊之書也。

民治篇分列戶口選舉警察保衛四項，似足包羅一切。然近今民治之選舉與前代貢舉終有不同，不能併爲一談。警察亦不屬人

民自治，皆應別出也。

人物篇中氏族一門紀滿洲漢軍諸族源流，最爲有功史乘之作。

遼陽鄉土志一冊

光緒三十四年知州洪汝冲修。其時學部有編輯鄉土志之令，屬州人永貞撰稿也。

州爲遼之遼陽縣，元置遼陽路行中書省於此，爲關東統部治所。形勢雄重可知。明置都司城，順治十年設遼陽府。十四年移府於盛京爲奉天府，遼陽縣仍舊。康熙三年升爲州。雖地望稍降，固關外諸州縣中之饒有史事者也。

本書分兩部。一曰鄉土歷史志，設置沿革政績錄兵事錄耆舊錄人類戶口氏族宗教實業工政商政學務警務屬之。一曰鄉土地理志，州境區界公所城池橋梁渡船祠祀廟宇古蹟墳墓市鎮學堂山

水道路田賦釐稅物產商務屬之。
然歷史地理斷難強爲區分。蓋地方志云者，本以地理爲綱。而紀述現狀亦必側重其歷史背景也。

民國海城縣志八卷

民國十三年知事廷瑞修。前志修于宣統元年知縣金衍海，本書繼宣統志而作也。

縣在遼爲海州，明置海州衛，順治中裁衛設縣，屬遼陽府，十四年改遼陽爲州，遂爲奉天府屬縣。

凡八卷六目，曰地理人物政治人事物產藝文。

咸豐開原縣志八卷

咸豐七年知縣全祿修。

據序，舊志乾隆五十六年知縣明亮修。據凡例云，久係傳鈔。蓋雖修而未刊行者也。

開元之名昉自元之開元路，明太祖改元字爲原，而清因之。永樂七年置安東衛於三萬衛之西南，開元城爲治所。康熙三年置今縣，隸奉天府。

凡八卷，一星野祥異，二建置沿革疆域形勝山川城池關隘，三物產古蹟景物公署職官，四學校祀典，五禮制壇廟選舉兵防驛站，六民戶口民田賦風俗，七名宦人物忠孝節烈流寓仙釋，八藝文雜錄，諸門之上復冠以天文地理人事之目，亦猶乎明人陋習也。

其建置沿革敘述異常簡略，而古蹟篇中反徧列遼東諸古地名，禮制一門抄撮汎濫，尤變本加厲。蓋僻縣可紀之事不多，不得不敷衍成篇也。

民國鐵嶺縣志八卷

附康熙志

民國四年知事陳藝修。

其序曰，一鐵嶺舊有鈔本兩卷，稿成於康熙丁巳，知縣賈宏文修，邑人董國祥纂，歷二百餘年未梓行。一今志更定新例，而以舊志附行，亦創體也。

凡八卷，一圖，二氣界疆域沿革城市官廳鄉村六志，三戶口山水道路險要田畝物產祠廟古蹟八志，四政績兵事縣署行政改革禁煙監獄教育警察田稅鹽貨稅地方雜捐自治十一志，五農事工藝商務鑛務四志，六宗教慈善禮俗民族人民程度災害佚聞鐵路交涉外國教育堂醫院學校九志，七名宦寓賢鄉官忠節孝義耆舊儒林列女職官科舉選舉十一志，八藝文志。

明史兵志遼東都指揮司統衛二十，其第六衛曰鐵嶺，康熙三年

始置縣，光緒三十二年增設法庫廳，割縣西陲隸焉。其在遼爲銀州富國軍地。

書中農事工藝諸篇頗有事實，非如他志僅取官文書綴錄塞責。惟人民程度一篇命名嫌與教育相複，又佚聞篇所載嫌與古蹟無多差別耳。

民國錦縣志二十四卷

民國九年知事王文藻修。

據序云一錦縣無舊志，惟盛京通志風俗總載云，人多慷慨尙氣節，有墨胎氏之遺風，注云錦州府志。觀此則似盛京通志未修之前錦州府已有志矣。一今茲纂修蓋未覩前志也。

凡二十四卷，一二地理，三四建置，五職官，六經政，七八教育，九選舉，十武備，十一財政，十二實業，十三交通，十四

宦蹟，十五十六人物，十七禮俗，十八十九物產，二十宗教，二十一慈善，二十二至二十四藝文。

錦州始置於遼，爲臨海軍節度治所。康熙元年以錦州爲錦縣，屬奉天府。四年設錦州府，以錦縣爲附郭縣。民國二年裁府設錦縣焉。縣城卽明廣寧中左二屯衛城也。

本志凡例四十餘條，於近代各志體例講之甚悉。折衷準則，頗費苦心。蓋關外州縣與旗官轄境錯雜，制度紛糅，而國體變更以後立言之體復多所殊異。志雖泰半以盛京通志爲依據，然其整齊排比之功亦不可沒也。

但有失之過詳之處，如教育中之紀文廟祀典推原溯流，已與本縣有風馬牛之概，而藝文中錄及本縣職官之詩文，更爲他省俗志所無之例也。

其新增之專篇，若宗教慈善以及附見經政篇之戶口表附見人物

篇之氏族源流，皆確有裨於文獻。民國以來各省志書尙往往泥於舊習，於當代制度略無一語，以此衡之，爲卓識矣。

猶有憾者若工藝幣制自應分入財政實業。而本書乃以治玉治革之工業及典商錢票二事分列於禮俗篇，此仍不免囿於俗例也。

宣統新府志

宣統元年知府管鳳蘇撰。

其序云，「凡所列之表皆就光緒三十四年所調查統計者編纂。始于宣統元年春，越九月而出版。其間事實之變遷又不知凡幾。日編一頁，夕付手民。脫誤尤多，前後體例皆未能一致。」今按其書但載表式，更無卷數。唯列沿革疆域道里航路山川戶口村鎮職業居留衙署巡警衛生教育司法監獄歲入歲出實業貨幣交通諸門而已。雖其中如商業店鋪及司法案件諸表實爲志書不

可少之史料。然究是報告之文書，非地方之史乘。前有楊德隣序云，一舉凡體例編目之說一掃而空之，事維其實，數維其詳，將以鑑別其妍媸得失際癥結以奏刀圭。一亦紀其實也。

府在明爲藩中衛與廣寧左衛界。治所本葦塘，河流遷徙，積淤漸平，地當南北孔道，村落聚而成市。乾隆初年移巨流河巡檢駐此，是爲有新民屯之始。其時全境屬承德廣寧二縣。嘉慶十三年設新民撫民同知。光緒二十八年設府，除自理地方以廣寧小黑山新設之鎮安縣養息牧新設之彰武縣隸焉。三十二年，復分遼中縣隸奉天府。

民國寬甸縣志略二冊

民國四年知事程廷恒撰。

寬甸城相傳勃海所築六甸之一，明末與滿洲構置兵於此，始

著於世。同治十三年奏准開墾，居民漸集。光緒二年設治。嗣爲南滿鐵道所經，非復昔日景象矣。

本書爲略者六，曰建置兵制地理古蹟人物風俗，爲表十六，曰經緯方里，曰疆域，曰山川，曰政績，曰司法，曰宗教，曰學校會社，曰歲入歲出，曰自治，曰戶口，曰巡警，曰礦產，曰郵遞，曰祠廟，曰物產，其曰略者，亦僅能撮舉膚闕之詞而已，轉不如諸表之猶存事實也。

民國莊河縣志十一卷

民國八年知事廖彭修，十年刊成，縣人宋掄元等纂。

縣在清初爲蓋平縣地，乾隆三十七年始置岫巖通判，復以極南沿海之區過於寬遠，析置莊河廳，民國改縣焉。海口外有鹿島，卽毛文龍屯駐地也。

凡十二卷，一地理，二古蹟，三職官，四人物，五民治，六教育，七財政，八禮俗，九交通，十實業，十一物產，十二藝文。文字荒陋，其地理篇稱趙爾巽爲次帥，人物傳謂李秉衡曾爲東三省大經略，古今無此書法無此官稱，他可知矣。

西安縣志略

宣統元年知縣雷飛鵬撰。

西安者，故盛京圍場東邊之威遠堡門，滿洲初起時之葉赫部也。太祖旣平葉赫，以其地爲大圍場，自康熙以來，獮狩之禮不時行，然猶守入圍之禁。顧年代綿遠，居民漸次闖入，頗以蕃息。光緒二十六年，始弛禁招墾。次年遂設縣治。其曰西安，以在盛京行圍西流水域與鄰縣西豐先後建設故均冒西名。縣以光緒二十九年建城，初分圍地爲十六社，泊舉行自治，乃并社

爲鄉。此其建置之大較據志可徵者也。

志爲篇十一，曰建置，曰監獄，曰地形，曰戶籍，曰自治，曰財計，曰保衛，曰教育，曰實業，曰禮俗，曰敘志。其十篇固皆依據事實質而不虛。復於其間列表以明升降變遷之迹，覈繁複錯綜之數。如建置篇則有政紀表，戶籍篇則有戶口年齡職業表，財計表列表尤夥。斯皆修志之良法。若以衡之舊志，則凡舊志之可省者省焉。若藝文之類是也。可併者併焉。若列女之附於戶籍是也。其舊志所視爲具文而此書發揮甚當者，尤莫如禮俗。夫禮俗之所以可珍，爲其足以與他處相較而辨其異同尋其源委。不避俚俗，不辭習見，然後不爲虛作。此書得其意矣。凡建置久長者，其志易撰而難工。建置促近者，其志難撰而易工。若西安之比者，固在易工之列。然綜觀全書，去取剪裁適如其分，簡而不疏，密而不紊，非具史識者未易幾及。況其行

文雅潔亦已接軫陽湖，不信邊荒之區乃有此佳志也。

宣統昌圖府志

宣統二年知府洪汝沖因陸軍部徵舊志無以應而有是修也。

昌圖本屬科爾沁左翼三旗，同治三年設理事同知，光緒二十五年改府，轄遼源州奉化懷德康平三縣。

志凡六章，曰疆域志政治志實業志交通志風俗志人物志。

雖資料稀簡而所載表冊爲多，不以文字見長，獨得保存故實之法。亦方志中之別開生面者。就中如司法狀況及患病種類諸表，關係社會狀況實非淺鮮。使撰志者盡能甄采及此，以視虛載節婦姓名累冊不休者，有功於史學豈道里可計哉。

民國昌圖縣志十八卷

民國五年知事程道元修，續文金纂。

昌圖爲科爾沁旗地，嘉慶七年（蒙古游牧記作十七年）招墾設治，初爲昌圖廳理事通判，旋升爲撫民同知。光緒二年升府。民國二年改縣。

書凡十八卷，一天文，二地理，三建置，四祀典，五職官。六政事，七財政，八教育，九實業，十慈善，十一交通，十二宗教，十三戶籍，十四禮俗，十五物產，十六人物，十七選舉，十八藝文。

其天文中尙存星野，地理中尙存勝景，甚至每景綴以自作之詩，已屬結習未除。至宗教編所述各教考本爲旒贅，兼復紕繆百出。尤爲可已而不可已者。若夫人物兼載生存，則與奉化志例正同。非方志正格也。

光緒奉化縣志十四卷

光緒十一年知縣錢開震修，安州陳文焯纂。

奉化者，故昌圖廳之梨樹城也。光緒四年昌圖升府，乃卽城設縣，與懷德康平並隸焉。

邑本蒙荒，嘉慶以來始闢而居之，爲蒙漢人雜居之所，故考訂史材，彌爲不易，書凡十四卷，曰天時地理建置祀典勳職人物選舉兵賦物產藝文雜錄，其凡例云，一直隸臨榆新志例謂志者史之一體，縣志一書凡所紀載皆志也，若再別其篇目曰某志，似志之中又有志矣。所論實爲近理。今節取之，於每卷標目改某志曰志某。則仍通卷皆志之意，無並語脚病矣。若他志經改曰編曰書曰略，似皆覺有未安，姑合焉。一昌圖府志亦同此說。語已陋淺。又云，一本邑泉水無名或隨口呼道，多爲鄙俗不雅，今準懷仁新志例半爲更定。一似此尤爲乖妄矣。至如人物藝文不避生存之錄。雖曰窮荒草創，不得不通變宜民，然而難乎傳信矣。

雙山縣鄉土志

民國三年知事牛爾裕撰。

雙山本內蒙哲里木盟達爾汗王旗地，光緒三十三年丈放，宣統二年設安墾局，民國元年改設縣治，蒙荒無歷史可言，志僅鈔纂案牘以應故事而已。

光緒吉林通志一百二十一卷

光緒十七年將軍長順等修。編修李桂林纂。

吉林元無省志，僅附見於盛京通志，已詳前條。道光四年吉林將軍衙門堂主事薩迎阿撰吉林外紀非純乎志體也。志吉林尤難於志盛京。本書序云，一方志之書首重沿革。乾隆中勅修熱河志及皇輿西域圖志皆爲剽舉。其沿革僅始自秦漢以來。吉林則肇自唐虞，事追隆古，較西北之開闢獨前千數百年。挹婁勿吉之殊稱，肅慎女真之異號，別爲七部，判爲五京，夫餘界接於掩漉，黑水中分於欄地，部族之數旣已糾紛。而大嶺以東，七縣隸於都尉，粟末以北，三州置於渤海，郡縣之制，權輿斯託。必盡明昔時四至八道之分，始能定今日星羅碁布之勢。此沿革之難志者一也。鄭樵云，疆域有時而更，山川千古不易。山

川者疆域所由分也。吉林之山則長白峙其東南，綿亘千餘里，三江發於長白，其源流或千餘里或五六千里。自來史志，荒略殊多。如蓋馬之號，明志誤認於遼東，黑龍之名，金史謬施於宋瓦，是由禩年縣長，道路悠遠，傳聞不免失真。兼之文字互殊，聲音屢譯，記載尤不能無誤。今欲例綜禹貢，兼桑經鄴注之規，體列方言，備譯史舌人之掌。藉非尋山脈水訪瀆搜渠，何以得其主名信今傳後。此山川之難志者二也。：凡此皆地志之通裁而於吉林爲創例。既無徵於文獻，固極費於搜羅。加以食貨之數，經政之常，學校之規模，與夫古今職官之同異，雖皆整齊故事，排比舊文，要其去取之間，亦貴具有微旨。不敢蹈歐陽修刊落事實之失，仍斬免羅鄂州抄取計簿之譏。別識心裁，蓋有志焉而未之逮也。一本書之作蓋其難其慎矣。

凡一百二十二卷，一至五聖訓志，六天章志，七八九大事志，

十至十二沿革志，十三至二十七輿地志，二十八至三十五食貨志，三十六至四十三經制志，四十四至四十九學校志，五十至五十七武備志，五十八至七十一職官志，七十二至一百十九人物志，一百二十金石志，一百二十一、二志餘。

民國農安縣志八卷

民國十六年知事鄭士純修。

農安爲蒙古科爾沁部郭爾羅斯旗，嘉慶五年設長春廳理事通判，光緒八年增設農安分防照磨，十五年設縣，隸長春府。本志以縣當遼之龍州黃龍府，所引證有未盡足據者。然具有精心，亦近志中之難得者。其凡例自云，體例多采吉林通志及寧安等縣志，關外諸志於考證沿革動云古肅慎夫餘靺鞨，重規疊矩，千手雷同，實爲錮習。本志雖知廣引故書，而仍未能免此也。

書凡八卷，一沿革大事象緯輿地，二交通物產實業田賦，三建置職官行政司法，四教育祀典選舉自治，五軍警兵事外交，六稅捐度支錢幣，七鄉村氏族戶口風俗慈善衛生宗教，八人物古蹟金石藝文志餘。其凡例自云仿通考通志而爲之名目。然田賦與稅捐，古蹟與金石，皆分列兩處，未見其當也。

雖然有可稱者兩事焉，一曰編年紀月預爲續修地，免後人之改作也。二曰用寧安志例附刊照片以輔筆墨所未及也。修志者咸能用心若此，則秉筆非艱而傳世可期彌久矣。

民國扶餘縣志

民國十三年吉林省議會議員縣人張其軍撰，其例言自云以報告本縣一切狀況及鼓吹本縣文化爲宗旨，又云利在盡人能讀。蓋通俗之書也。

縣在康熙中爲新城縣，光緒三十二年升府，民國改縣。因避與山東新城同名，改曰扶餘。以古國之名名縣易致混淆，抑非良制也。

民國雙城縣志十五卷

民國十年知事高文垣修，縣人前候選訓導張龔銘纂。蓋以省令徵縣志，取鄉土志增損之而成也。

凡十五卷，曰沿革志輿地志職官志政治志賦役志禮俗志物產志教育志實業志交通志宗教志人物志列女志藝文志拾遺志，其規模固已大殊前志。蓋事實較豐故易爲力歟。

就中沿革一篇叙述詳確而無附會之弊，禮俗一篇悉本現狀而言，不與古禮相牽合，皆近世方志所不及。其他亦俱精當無可議者。獨人物志多載時人，諛言滿幅，藝文志自錄所作詩文。無

論如何，難逃後日之誹訕。謂之瑕不掩瑜可也。

近今諸志於並時人物每不能割愛，此或各有不得已之苦衷。然使撰志者專立氏族一門，據諸家譜牒以入志，則無論存歿，可以一律登載。其所重者在族姓之盛衰不在一人之美惡褒譏，不致有貢諛豪士之嫌矣。奈何其弗思也。

雙城鄉土志二冊

民國五年知事魏紹周修。

嘉慶十七年於阿勒楚喀拉林西北古雙城子地方移駐京旗一千戶兼移奉吉兩省三千旗戶，編爲二十四屯。光緒八年，設理事通判以治之，管理地方旗民事務，爲雙城廳。至宣統元年改府，民國復爲縣，今爲中東路所經，頓成都會矣。

書列歷史政績兵事耆舊人類戶口宗教學務實業地理山水道路物

產商務諸門，類皆勉強湊泊而成。蓋當時縣境既尙未發達，故實亦荒寂無傳，固不免於艱窘也。惟金大定二十五年所立得勝陀頌一碑，殊爲重要史料，得勝陀在涑流河之例，（今稱拉林河）太祖誓師伐遼之地也。持以此證金史，則雙城之爲金會寧府肇州近之矣。

民國寧安縣志四卷

民國十三年知事王世選修。

其凡例自云，一寧安向無志乘，本志根據省志盛京志，並仿上海晉江南陽豐鎮青陽營口各縣志成例而變通之。一其所取法固非必上乘，殆偶取邊省所見之志而即依爲藍本耳。

寧安爲故寧古塔地，於唐爲勃海國境，故志采唐晏所著渤海國志頗多。所記前代掌故，凡屬於寧古塔者，悉已包羅。其凡例

云，一緣甯古塔在有清咸豐以前疆以東海，廣博無垠。其建置所及，詔令條教所頒，頗多聯合。非詳其沿革莫諗源流，異乎泛引也。

書凡四卷，一輿地建置，二職官祀典選舉自治教育司法軍警賦稅，三度支交通職業古蹟宗教祠宇，四人物物產風俗賑卹藝文志餘。

觀其制名，已多未安者。例如國家祀典與民間祠祭在民國以來久已無懸絕之畛域。若文廟關岳廟之春秋祭祀更非一縣所獨有。則祀典不宜與祠宇分篇。賦稅爲度支之一項，則賦稅不宜與度支分篇。軍隊與警察性質不同，則軍警不宜併爲一目。職業僅及商工農漁獵四項，則其目亦嫌空設。此其蔽也。

然其古蹟中之古城古陵墓古金石古建築紀述特詳，兼附照片。甯安有俗稱東京城者，吳兆騫詩指爲金源建國處。本志則據新

唐書松漠紀聞等書證爲勃海國之上京。其故城內三殿基址巍然如舊，基高丈餘，上排礫石，每排均十，似九間制，礫圓徑二尺餘。其規制之崇闊可知。加以據山林之險，帶江湖之利，隩區天宅，豈必在九州之內哉，讀此志所記，彌令人神往也。

寧古塔夙爲中原遷客所萃，金人挾徽欽二帝北行，相傳曾至於此，清初南中士大夫荷戈來此者項背相望，故載筆者頗多。如寧古塔紀聞柳邊紀略吉林外紀諸書，皆足取材。本志在闕外諸志中最爲雅馴，亦以此也。

民國樺川縣志六卷

民國十五年知事唐純禮等修。

樺川向爲三姓副都統轄境，光緒三十二年設依蘭府，民國元年設縣。

凡六卷，一大事沿革輿地，二交通實業，三物產建置職官行政司法選舉自治，四教育禮樂軍警兵事，五田制財政度支貨幣殖民風俗，六宗教慈善衛生人物古蹟金石藝文。

大體無乖而過於繁冗。如禮樂篇之祀典儀注久不奉行，且並不專屬一縣，乃亦蹈襲他志積習依樣葫蘆，殊無取也。

呼蘭府志十二卷

民國四年前知府黃維翰撰。

其例言自稱「始于光緒三十四年，迄宣統二年脫稿，壬子以後搜叢稿補成之，視原稿約損十之三四。」又云，「黑龍江省舊無省府縣志，黑龍江外紀卜魁紀略黑龍江述略諸書文簡而事覈，然皆略而不詳。此書得之父老傳說者十之三四，得之實地調查者十之四五，得之於舊記者十之二三，一邊塞之地，前無依據，而哀然成此巨帙。其用力之勤誠不可沒矣。」

呼蘭者以呼蘭河得名，金史之胡刺溫水也。距會寧府百里而近。清初屬索倫部，旋隸黑龍江將軍，設呼蘭河八卡倫。雍正十二年置呼蘭城。同治元年設廳。光緒三十一年升府，移治蘭城而設巴彥州於舊呼蘭廳，又巴彥分境設木蘭縣，分府西北境設

蘭西縣，於是轄一州二縣。

書分十二略，曰地理政治財賦交通外交祠祀學略武事人物禮俗物產藝文。其建置鄉區職官隸於政治，災祲隸於財賦，皆異於他志之例，然所存事實甚豐。

新闢之區人口未殷，故人物篇較簡寂。其例言云，一呼蘭旌著舊檔全體清丈繙繹經年，所得者以歷年職官戶口節孝名數爲多，一此誠可珍之史料。然相其義類，似應以節孝等名氏與戶口種族（人物略云有滿洲達呼爾蒙古索倫瓜爾察錫伯巴爾虎額魯特他賁漢人回民十一種）分列二篇。今混曰人物略，抑稍失當矣。

方志考稿甲集第三編

山東

雍正山東通志三十六卷

雍正七年山東巡撫岳濬修，繼康熙十三年巡撫張鳳儀志作也。其序云，一山東之有通志自前明嘉靖朝始。帙簡義略，粗有規模。康熙甲寅詔修一統志而山東通志緣是再輯，擴前志十之三四。一本志之修蓋以雍正七年詔增修一統志及各省通志故也。今按所載嘉靖十二年志陳沂序，一正德間中丞白沙黃公舉六郡志事未就，嘉靖初余憲副子華嘗手撰志草，亦未成而去，九年庚寅沂轉官茲省。越二年壬辰巡按方公（按方名遠宜）至，首詢志事，適陸憲副舉之有督學之任，得余志草十有二卷，六月十有六日開局於貢院，迄明年三月稿成，人物初取白沙公稿餘

取余稿云云。一按元人于欽有齊乘蓋可云山東舊志之嚆矢也。本書嚴訂義例，一曰叙志目，二曰正字體，三曰謹書法，四曰審詳略，五曰別異同，六曰信古而擇，七曰隨俗而遷，八曰正訛以傳信，九曰闕疑以慎言，其所見皆不過如此。

凡三十六卷，其目曰典謨星野建置城池疆域山川形勝圻封古蹟巡狩闕里田賦鹽法學校選舉兵防驛遞河防漕運海疆秩祀橋梁風俗物產職官公著宦績人物列女仙釋方技陵墓五行經籍藝文雜記。就中經籍一門最爲率陋。不注存佚，不注來歷，又不知分類。蓋成書苟簡又無名手爲之訂例也。

宣統山東通志二百卷

光緒庚寅巡撫張曜創修，榮成進士孫偉田總纂，中間時作時輟，宣統三年始漸次告成，民國戊午付印。

本書體例頗殊前志，茲彙括其略例曰，輿圖第一，山川則案其脈絡，道路則案其迂直，古城之有阯者市鎮之大者村社之近驛路者皆有圖。通紀第二，以編年之體書水旱兵戎大政。疆域志第三，其子曰沿革表，曰城池，曰封建，曰山川，曰形勝，曰古蹟，曰風俗，曰物產。職官志第四，編其名籍曰表，詳其制度曰攷，記其政蹟曰傳。田賦志第五，其子曰戶口，曰稅則，曰倉儲，曰荒政，曰鹽法，曰關權，皆詳其輕重多寡及其歲入動支起運存留之數以四柱核之而書於冊。其各府州縣所用權衡度量則爲之表。學校志第六，志學校貢舉之制，其貢舉名籍則依科編年而爲之表。典禮志第七，尤重典禮之特行於山東者，若闕里釋奠之禮，若時巡祭泰嶽之禮。兵防志第八，其大者曰駐防，曰海防，而附以官制表。河防志第九，依年編載而以表明之，別志漕運與海運。藝文志第十，曰經籍，曰金石。

人物志第十一，於通例外特闢二門，曰先賢傳，曰兩漢經師，凡近人列傳見國史者錄之，見碑碣者錄之，見他省名宦者錄之，見刊行集部者錄之，凡錄皆注其所出。雜志第十二，其子曰軼聞，曰瑣事，曰流寓，曰寺觀，曰仙釋，而以舊志序例題名終焉。

其總例曰，一凡各志有表有考有紀載，皆先爲長編，稽之正史以溯本原，考之國朝官書以昭法守，再參之雜史別集以及私家撰述，乃定著於冊，皆注其所出於下。一善哉斯言，其定例不可謂周密，顧成書不自一人，今檢其文亦未必盡能注所出，尤以金石一門凌亂爲甚，至人物志之未能完善，更爲本書附識中所自道。衆手修書艱於畫一，觀此益信矣。

道光濟南府志七十二卷

道光二十年知府王鎮繼前任王贈芳修成。

府志修于康熙三十一年，淄川唐夢賚所撰。本志多據山東通志例糾正之。雍正以後泰安武定均升府，統屬亦大有變遷。然仍多遵錄舊志之語，非全體更張也。

濟南之爲府在宋時，雍正以後定轄歷城章邱鄒平淄川長山新城桓臺齊河齊東德州清平禹城臨邑平原陵縣長清濟陽十七州縣。凡七十二卷，一星野，二沿革，三疆域，四圻封，五六七山水，八城池，九公廨，十橋梁，十一十二古蹟，十三風俗物產，十四田賦，十五戶口，十六倉儲，十七學校，十八祠祀，十九兵防驛遞，二十災祥，二十一郵政，二十二鹽法，二十三至三十二秩官，三十三至三十八宦蹟，三十九至四十四選舉，四十

五至五十六人物，五十七至五十九列女，六十仙釋，六十一方伎，六十二僑寓，六十三陵墓，六十四經籍，六十五至七十藝文，七十一雜記，七十二補遺。其補遺卷中云，江祿齊州濟南人，顯然錯誤。

山東通志云清初有張泰運王萃同輯府志，此書蓋不傳也。

乾隆歷城縣志五十卷

乾隆三十七年升東昌府知府前知縣胡德琳修。蓋李文藻周永年同撰稿也。

縣志自崇禎庚辰縣人葉承宗始修，康熙元年知縣李師白再修。

（據學部志目）本書以葉志脫誤時見，李志未能是正而作也。（據胡氏序）

元和郡縣志云，晉永嘉之後移治歷城，自是以來鮮有改易，明

以來爲濟南府附郭縣。

凡五十卷，一二總紀，三至五地域考，六至九山水考，十至十三建置考，十四至十八古蹟考，十九至二十二藝文考，二十三至二十五金石考，二十六封建表，二十七職官表，二十八至三十一選舉表，三十二襲爵表，三十三地封表，三十四宦蹟錄，三十五至四十八列傳，四十九五十雜綴。

其自序云，一凡歷代掌故風土之記寰宇之志及直省通志名人總集下逮裨官小說無不搜羅，金石之文無不抉剔，山川之脈絡溝渠之分合皆親至其地綜覽而條析之，雖不敢謂豪髮無遺憾，而訂誤者十之三，補缺者十之五。一觀其徵引之繁，良非虛語。康熙濟南府志謂一通志云晉永嘉之後移治歷城，晉永嘉乃宋元嘉之誤。一胡氏據元和郡縣志較其舛謬，道光濟南府志遂援以糾正之，其考證之功，誠足多矣。

民國續歷城縣志五十四卷

民國十三年刊成，縣人毛承霖等修。

據凡例，一歷邑舊有志書，康熙時爲葉志，乾隆時爲胡志，茲之所續，續胡志也。續修之舉起於光緒季年至宣統三年，錄稿十餘帙，實未成書。己未秋檢出原稿重加釐訂。刪削者十之二三增益者十之五六，一惟毛氏則躬與始末者也。

凡五十四卷，曰總紀，曰地域考，曰山水考，曰建置考，曰古蹟考，曰藝文考，曰金石考，曰職官表，曰選舉表，曰世襲表，曰賾封表，曰宦蹟錄，曰列傳，曰雜綴。

書雖成於民國，然事實以宣統三年爲斷，故僅以續志爲名。蓋不欲多所更張也。其中地域考多采滄州葉氏考古錄，山水考多錄前志，體例既無所更訂，資料亦尠擴充。雜綴一門至盈兩冊

。中如周書昌言一士人宿泰山云云，無論其虛誕不經，且與歷城何涉。乘筆者之不能別白，咎無可辭矣。

道光章邱縣志十六卷

道光十三年知縣吳璋主修，刑部主事前翰林院庶吉士吳縣曹懋堅纂，即璋之內姪也。

書凡十六卷，一星野，二建置，三山水，四古蹟，五賦役，六禮俗，七職官，八選舉，九名宦，十十一人物，十二列女，十三藝文，十四金石，十五軼事，十六外編補遺。

據舊序，宏治壬子知縣陸里創修，禮部主事楊循吉纂，李東陽作序。正德癸酉呂秉彝續修。嘉靖丁酉祝文冕又修。萬歷丙申知縣董復亨三修。康熙庚午知縣鍾運泰四修。乾隆乙亥知縣張萬青五修。可謂勤矣。中如古蹟一篇，徵引考訂尙頗勤核。章

邱故高唐縣，隋改今名。

道光鄒平縣志十八卷

道光十六年知縣羅宗瀛取順治徐志爲藍本續修也。

據歷修姓氏，嘉靖十二年知縣葉林始修，順治十六年知縣徐政，康熙三十四年知縣程素期，嘉慶八年知縣李瓊林各一修。

徐志有顧炎武爲之校編，馬驢爲之討論，施閏章爲之撰序，號爲最善本。書大要取其原文而以近事附入也。

本書略依其例，曰總紀，曰方域考，曰賦役考，曰建置考，曰山水考，曰古蹟考，曰表，曰宦蹟考，曰人物考，曰藝文考，曰雜志。凡十八卷。

其方域考包沿革疆界星土里社四門，賦役考包戶丁田賦鹽法雜稅四門，建置考包城池學校官署壇廟兵驛坊表六門，古蹟考包

城址墳墓園亭寺觀四門，表包封建職官選舉地封襲爵五門，藝文考包金石著作二門，雜誌包風俗物產災祥軼聞四門，實較他之繁立名稱者爲簡淨。

惟地圖僅列方域，沿革一種雖於史地之考證裨益甚鉅，而他項城垣公署之建置概無圖以明之，殊無以存故蹟。此俗例之似贅而實不可缺者也。

其總紀一篇意在歷叙本邑大事。至附益之道光以後事實稱人以字以古官名，直如函牘體裁，最爲不合。而伏生祠入於古蹟中之墳墓一門，又不爲馬驥立一詳傳，續纂者皆不能辭疎漏之咎。要之徐志本取馬氏遺草而成，故規模雅飭一如其所著釋史。珠玉在前益難爲繼也。

鄒平爲漢梁鄒鄒縣兩縣地，北齊曾置平原，隋復故名，梁鄒遂廢，唐隸淄州，宋以後隸濟南。

乾隆淄川縣續志八卷

依康熙志本

乾隆八年知縣王康修。

據序，一志權輿於嘉靖二十五年，及隆萬間有王秋澄先生起而纂訂之，迨康熙丁卯高念東唐濟武摺摭而會萃焉。又有淄乘徵一冊，考疑訂誤云云。『蓋其在明代，嘉靖二十五年知縣王琮，三十九年孫孝，萬歷二十一年知縣朱萬春，三次修輯。康熙間知縣張帽屬縣人秘書院檢討唐夢賡撰稿。卽今志所本。今志凡例云，舊志精詳典核，極稱善本，故悉刊原文而以續修者附入每篇之後，亦創例也。』

淄川爲漢般陽縣地，劉宋置貝邱，隋開皇中改今名，唐置淄州，元爲般陽路，洪武十二年降爲縣，屬濟南府。淄水經其東南。雍正十三年以本縣南鄉離城最遠，分益都之顏神鎮爲博山縣。

，并割十七莊屬焉。蓋由一道而爲州爲縣，古今之變也。書八卷曰輿地志，建置志，賦役志，官師志，選舉志，人物志，藝文志，軼事志。所續之事實既無多。如星野之類續以歌訣，尤爲陋誕。

嘉慶長山縣志十六卷

嘉慶六年知縣倪企望修。

據序一縣志成於前明韓希龍，易世而後，殘缺失次。康熙丙申孫衍彙纂爲十卷。一凡例則云，一前令文宗玠有續志稿二卷，自康熙辛卯至乾隆庚辰五十年事蹟略存梗概，亦前後志絕續之梯級也。一本書藝文志中錄存舊稿序文尙多，皆未刊者也。凡十六卷，一輿地，二建置，三食貨，四災祥，五秩官，六選舉，七至十一人物，十二至十五藝文，十六雜綴。

長山爲漢於陵宋武強地，開皇十八年改今名，唐宋以來屬淄州，明初州廢改屬濟南府。

康熙新城縣志十四卷

康熙中知縣崔懋撰。前有康熙三十二年王士禛序。禛字未改，是猶康熙版也。然漫漶脫落幾不可識矣。

新城之置自元至元十九年併淄萊路田索二鎮於驛臺立新城縣治，隸般陽路。明洪武十二年改屬濟南府。據王序志初修於嘉靖，再修於天啓，此爲三修。又云今賢使君修舉廢墜，又得梁溪嚴子傅氏以良史才左右而傾助之。是主修於崔而嚴實爲之秉筆也。又據凡例云，山川古跡藝文多從司徒王公所纂備考一帙摭拾纂輯。司徒王公謂王之垣也。然學部志目稱天啓志知縣張必大修，崇禎志知縣孫胤奇修，順治志知縣馬孔彰修，孫馬二志

皆寫本也。

凡例所標更張各節，如列傳向入藝文今移置人物志，又舊志備載繪音，今則但於恩卹款內具載姓名爵秩。如斯之類固已今勝于前。

然人物篇以魯仲連王蠋冠首，如此則凡春秋戰國之齊人不皆可以入選耶。藝文篇列王之垣進聖功圖疏及請正位中宮疏，如此則凡新城人之文集不皆可以入選耶。

同一文也，有置之藝文無足輕重置於他處其涵義始顯者。例如卷十二王之垣所撰趙公去思碑記云，一趙公自衣夏惟一葛冬惟一布，士民則之無敢奢華者，宴會酌定肴十五器，果五品，飯三道，不宰雞鵝，每席折雞鵝銀五分。一之垣明嘉靖間人，則所紀爲明中葉風俗及物價。此至可珍之史料也。若入之社會風俗或經濟制度門中，其爲用不尤顯耶。方志之必須重加整理者

，此類是也。

續志二卷亦崔懋撰，不分門類，惟列有關建置之公牘數十篇而附以雜詩數首。蓋亦保存史料之善法。但宜云附錄而不宜遽名爲續志耳。章實齋力主通志掌故文徵三門鼎立，其亦斯意也。

乾隆齊河縣志十卷

乾隆二年知縣上官有儀修。學部志目題爲雍正志，今按其成書已在乾隆中，改題從其實也。

齊河本古祝阿縣地，唐廢祝阿爲禹城，宋置齊河鎮于縣境，齊阜昌中始設縣，自是因之未改。明清隸濟南府。萬歷戊寅訓導陶性康熙十二年知縣藍奮興各修一次也。

書凡十卷，一沿革地理星野城池，二山川橋梁官署衢市，三戶口賦役物產風俗，四學校兵防祠祀坊楔，五驛傳舖舍職官宦蹟

，六恤政災祥選舉，七鄉賢，八贈廕忠烈孝義列女，九古蹟墳墓藝文，十詩文寺觀。

其藝文不應與詩文分爲二志，或係刊刻偶誤。然驛傳鋪舍之分，并非誤字也。要爲體裁之不當而已。

康熙齊東縣志八卷

康熙己丑知縣余爲霖修。

據歷修姓氏，正德十一年知縣蕭敬諫創修，萬歷十五年知縣劉希夔繼修。

齊阜昌間改淄川之趙巖口爲齊東鎮置夾河巡檢司，元升爲縣，明代以地狹人少，割青城鄒平章邱等縣地隸之，轄濟南府。

書凡八卷，一職方紀，二建置紀，三賦役紀，四官師表，五選舉表，六人物表，七藝文編，八雜錄編。其雜錄皆案牘文字之

有關地方掌故者。

末附志續數十紙，嘉慶間所增也。

乾隆德州志十二卷

乾隆五十三年知州王道亨修。

據舊序萬曆甲戌知州唐文華曾修一次，是爲唐志。即四庫存目之李榆志也，然李榆序稱以德州舊志浮舛混淆漫無統紀命予重輯，則唐志以前尙有不可考者矣。天啓五年知州安受善復修，是爲安志。康熙十二年知州金祖彭序則稱州人工部員外郎程君正夫輯德州詩搜又搜及志草，垂成而卒，乃補而刻之，是曰金志。據鄒士廉金志正僞辯則又謂正金志修于康熙十二年僞金志改於康熙十八年。亦可異矣。

又據凡例云，一明洪武三年修大明一統志，州縣仍無專志，永

樂十六年詔天下郡縣衛所皆修志，邑之有志，實始於此。萬歷四年唐志凡例云，志以舊志爲本，天順間重修一統志，采用德州志語，則天順以前已有德州志可知，傳說景泰五年知州洪釗有德州志略，已無可考。

張慶源有記德州志本末一篇云，「余所及見者有州人田山薑先生長河志籍考一編州人宋蒙泉先生德州新志稿七冊，州人吳八千先生桑梓圖考一卷，河潔紀略一卷，又與州人鄒君聖裔協纂擬稿十二卷，太倉孫筠亭先生德州志稿八冊，一可謂富矣。」

德州在漢爲鬲縣，唐置長河，宋置將陵，元置陵州，明以德州移治隸濟南府與陵縣易相混淆，故志於沿革篇辯之曰，「今之德州昔之所謂將陵，所謂陵，今之陵縣，昔之所謂德州，所謂安德也。」

凡十二卷，一沿革等，二紀事，三河渠，四疆域等，五建置，

六州衛戶口賦役，七漕政等，八宦蹟，九人物等，十貞節，十一叢記，十二藝文。

嘉慶德平縣志十卷

嘉慶元年知縣鍾大受修。

據舊序，嘉靖甲寅知縣趙鏞始修，萬歷丙午康熙壬子乾隆癸巳知縣王霖戴玉緝錢大琴三次續修。

德平爲漢平原鬲縣地，唐置今縣，屬德州，其後因而不改，明以來爲濟南府屬縣焉。

書凡十卷，一方輿，二建置，三食貨，四典禮，五官師，六選舉，七人物，八恩卹，九祥異，十藝文。

選舉人物於唐以前史傳諸人並不明述何縣之人已屬舛略，其藝文志載知縣何元熙城隍廟求雨祭文及先天甲字壇式，滿紙荒唐

，非驢非馬。又詩詞載蕭統贈明山賓及李白經鸚鵡州弔禰衡二詩什，亦適彰其挂漏也。

其序自云，「趙王戴三志無存，惟錢志成於乾隆癸巳不甚合體，紀載亦多滲漏，」蓋齊固失之，楚亦未爲得也。

光緒德平縣志十二卷

光緒十九年知縣凌錫祺修，繼嘉靖志而作也。

凡例云，「茲編根據舊志，間亦略有異同，斤斤之心求免舛誤。一然前志之疏繆，實不特無所繩糾，且因訛襲陋而不覺。至事實亦所增無幾。不知何取乎此重規疊矩也。」

嘉慶禹城縣志十二卷

嘉慶戊辰知縣董鵬翮修，訓導牟應震纂。（其名見本書藝文志）

禹城古祝阿地，唐天寶立今名，洪武初屬濟南府，雍正二年曾改屬高唐直隸州。

書凡十二卷，一圖書，二星野，三疆域，四建置，五食貨，六典禮，七官守，八選舉，九人物，十藝文，十一災祥，十二外志。中如食貨一篇以地銀米麥四項分列舊額新額爲表，高下釐然。人物一篇斷自舊志所載明代人物，不濫引史乘以爲光寵。皆頗得法。

藝文篇中有張象津撰潔川義學記，稱潔川有韓氏村一村老老幼幼不世其先人學而奉西洋教者十八九矣。西洋教者世所稱耶穌之天主教也。此記嘉慶中作，此大有關於宗教史之故實也。

同治臨邑縣志十六卷

同治十三年知縣陳鴻翔修。

據舊序萬歷十九年縣人邢侗始撰，順治九年知縣陳起鳳續修，康熙五十二年知縣唐開陶又續，六十一年知縣魏壯又補修。據學部志目則尙有天啓志知縣趙有午修。

凡十六卷，一二輿地志，三食貨志，四學校志，五六祠祀志，七職官志，八選舉志，九人物志，十至十二藝文志，十三至十五金石志，十六雜事志。

其凡例自云，「不數月而成書，雖體例視邢唐二志爲完善，而書成倉卒或不免罣一漏萬也。」今觀其所采擷多出舊志。新增事實若同治六年之河患及七年之捻患亦殊簡略。

臨邑爲漢縣，永平中封北海興王子復爲侯邑，其後復爲縣治。唐以來屬齊州，元曾割屬河間，旋屬濟南。明以來遂定爲濟南府屬縣。

縣西之漯陰城卽齊之犁邱邑，漢置漯陰縣屬平原郡，後漢曰隰

陰，劉宋得廣固遂於此僑置臨邑，是今之臨邑自劉宋始。至漢之臨邑則在今茌平地，舊志以漢之臨邑爲今之臨邑而通志改定之也。

乾隆平原縣志十卷

乾隆十三年知縣黃懷祖修。

據舊序萬歷十八年知縣劉思誠修，邑人進士高知止撰。其後二十年知縣黃景章即其版而稍續之。本書趙重煦傳云一嘗重修縣志鋟板行世今徧購不得僅得其科日志一冊。一重煦順治時人。凡十卷，曰疆域建置食貨學校祠祀職官選舉人物雜志藝文。

縣在漢爲平原郡平原及繹幕揚虛諸縣，唐以後屬德州，洎隸濟南府。

道光陵縣志二十二卷

光緒乙亥增補本

道光二十五年知縣沈淮主修。

光緒元年知縣戴杰因沈志板片殘缺，於濟南假得全帙，檢輯遺聞，增補重刊。

據舊序，陵志明嘉靖癸丑知縣孫昂創修，萬曆甲辰知縣宋文明續修，康縣癸丑知縣史颺廷再修。

書凡二十二卷，一沿革表，二爵封表，三秩官表，四選舉表，五疆域志，六河渠志，七賦役志，八建置志，九風土志，十古蹟志，十一學校志，十二祀典志，十三禮儀志，十四兵防志，十五祥異志，十六藝文志，十七金石志，十八官師傳，十九人物傳，二十流寓傳忠義傳，二十一列女傳，二十二雜記。

縣爲漢厭次地，晉以後爲安德縣，明洪武始改置陵縣，屬德州

。本書藝文雜記幾全爲東方朔事，據凡例云援開慶四明續志止載吳丞相一人詩詞之例也。大致敘述詳核，於祀典必考其源流，於金石甄綜亦多，非率爾操觚者也。

道光長清縣志十六卷

道光十四年知縣舒化民修，奉新舉人徐德城纂。徐氏序云，舒氏爲靖安人，以德城曾與修靖安志，故以志事委之。

據舊序，志創于萬歷乙未知縣李宗延，康熙壬子知縣岳之嶺重修。

長清爲漢盧縣，隋析長清鎮置今縣，宋以後迄爲濟南府屬縣，南北朝相拒守之碭礮城即在縣境矣。

書凡十六卷，一二地輿志，三四職官志，五六食貨志，七八學校志，九十祠祀志，十一至十四人物志，十五藝文志，十六雜事志。

據其凡例，舊志所載悉存之不稍刪改，事有異聞，則數說并存。蓋其慎也。又於標識行款分別義例頗爲森嚴。其用心殊爲精到。此自著述之金針，不得以其瑣屑而少之也。即其所增訂之案語觀之，其於舊志切磋之功爲不少矣。

縣有靈巖寺，在縣東南之方山，水經注所謂玉符山。李吉甫十道圖以潤之棲霞台之國清荆之玉泉與此爲四絕。金史稱靈巖寺有屋三百餘間，且連接泰安之天聖寨，介於東平益都之間，駐兵於此足相應援。故本書別附靈巖志略以紀之。仿欽縣志黃山高要志端溪之例也。然所錄多據李興祖靈巖舊志，於史事徵引未備。

乾隆濟陽縣志十四卷

乾隆二十九年知縣胡德琳修，德琳于三十九年又修東昌府志。

據序，成化己巳知縣張端創修縣志，萬歷己酉知縣侯加乘續修，順治己丑知縣解元才繼之。張爾岐撰縣志九卷見山東通志箸錄也。

書凡十四卷，一輿地，二建置，三賦役，四水利，五禮樂，六職官，七選舉，八人物，九至十三藝文，十四雜記。

濟陽自金天會七年始析章邱之標竿鎮及臨邑縣地置。張爾岐故里也。其鄉賢傳中據舊志列顏氏家訓中所紀張祿一人。不知北朝之濟陽當指濟陽郡而言，非後來所置之濟陽縣也。故書中籍隸濟陽之人豈可勝計。獨取張祿以冠于篇，抑又陋矣。

嘉慶東昌府志五十卷

嘉慶十三年知府嵩山取四年知府張官五稿修訂。

乾隆三十九年胡德琳志序云，康熙五十年孫元衡欲延劉淇修之，以憂去不果，後金啓洛又修之，稿垂成而去任，今存者係明萬歷所修。據學部志曰萬歷志萬歷二十八年知府王命爵修也。東昌在漢爲東郡魏郡清河平原四郡地，唐爲博魏貝等州地，元爲東昌路，洪武初改府。乾隆以後定轄縣九，曰聊城堂邑博平茌平清平莘縣冠縣館陶恩縣，州一曰高唐。

本書於舊志體例之更定，若刪除總紀增入秩祀學校專篇，未必遽當。然於地理志考證實多糾定之功。如舊志以聊城爲邢地，齊取於邢而有之，以爲西鄙之類。誠舛繆之尤也。

凡卷五十，曰疆域圖考歷代沿革星野山水五行風俗形勝分封兵

革建置食貨秩祀學校職官名宦選舉列傳忠烈孝義儒林文苑隱逸
僑寓方伎仙釋列女經籍金石古蹟物產藝文異聞志餘。

康熙聊城縣志四卷

康熙二年知縣何一傑據萬歷十四年前任韓士廉本補修，故結銜
尙是韓名，實可題萬歷志也。書已漫漶不可讀矣。

聊城自秦漢以來爲縣，隋唐以來爲博州治，明初立東昌府，以
爲附郭縣焉。

書凡四卷，一建置等，二官守等，三人物等，四藝文。

宣統聊城縣志十二卷

直統二年知縣陳慶蕃修，縣人靳維熙取同治乙丑葉錫麟纂成書
，繼康熙志而作也。

書凡十二卷，一方域志，二建置志，三田賦志，四學校志，五典禮志，六職官志，七選舉志，八人物志，九列女志，十藝文志，十一通紀，十二雜綴。視前志爲加詳，然非志體則一也。末附耆獻文徵二卷，不知既有藝文志雜載詩文，何以又須別出此二卷也。

康熙堂邑縣志二十卷

光緒壬辰重刊

康熙四十九年知縣盧承琰修，確山劉淇纂。

據緣起篇云，一縣志自萬歷三十七年知縣王應乾始修，崇禎壬子年知縣楊希震增修，順治三年知縣郭毓秀稍加釐定，康熙七年知縣張茂節增修，此舊志源流。本書蓋據縣人穆策撰本也。緣起篇又云，一著述必賴依緣，憑虛而造雖聖者不能也，夫博聞實錄既不著於前，雖雋識通才亦無所展于後矣，且世有拙

工不安厥分，妄以蠶管之識，纂易不刊之書，豈惟斲小大木，亦且行傷其手。如其聞見最審，別爲續略，如邑談之類，以待能者，便是南董之流矣。一此數語已具卓識矣。其述例篇亦云，一自漢以降郡書都簿所在多有，如三輔黃圖華陽國志之屬，益斐然成章，星陳諸史之外。而馬端臨亦云唐宋以來郡邑志凡數百家，顧今所流傳十無二三。其近世所爲志多自明以來，大抵隨時綴葺，削舊增新，初猶錦繡相參，繼則純乎大布，寢更寢陋以迄於今。觀天察地則道聽而塗言，稽古證今則吠聲而逐景，曩篇經其剪裁，則天吳紫鳳顛倒補于童褐，今事藉其結構則街談巷議淺鄙均于市躐，冠每篇以小序乃屬宇內公言，載不類之篇翰斯實無因嫁禍，一切劬勩歸之鹵莽，遂使堯禹山川淪于譌冊，褒鄂面目死于庸毫，諸如此類不可縷述，簡牘至此，良可歎也。且每有編錄，工拙比肩，識判論乖，十羊九牧，自

古拙多工少，代異黨同，狂者既以不狂爲狂，斯能者以不能束手矣。夫其是非大者尙須精鑒卓裁乃後知其優劣，至若疆里短長，姓氏舛逸，即芸夫牧豎起而叫呼之，然則斯文之得喪雖曰繫才而一事之廢興亦有天幸者矣。且夫國史方志雖大小殊科而究其情實則體同一貫，苟非上保六籍下籠百氏包舉萬有囊括衆材，本之於古而並能，通之於今而不流，而使偏才單藝畢議功能，更將舉其一而廢百顧之左而失右，辟猶一竿之奏仰冀九成，茅茨不工妄希雲構，鮮不斂手而逃壓覆是懼者矣。其論甚確也。

凡二十卷，一疆域建置沿革星野形勢城池，二里甲，三山川封建公著學校，四五戶口賦役，六倉庾祠祀兵防舖遞漕渠橋梁坊表寺觀，七古蹟邱墓風俗物產災祥，八至十職官，十一名宦，十二至十四選舉，十五至十七人物，十八十九藝文，二十緣起

述例。

道光博平縣志六卷

道光十一年知縣楊祖憲修。

按舊序志修于萬歷辛卯知縣華汝梅縣人馮訓，康熙三年知縣堵巖重修。本書繼堵志而作。堵志爲在平張翁所撰，翁又撰康熙癸卯在平縣志也。

凡六卷，其目一曰星野辯歲運譜禮祥考祀典紀地輿考，二曰疆域圖山川紀勝景錄古蹟考，田賦籍村落紀城宇圖壇廟記。三曰官師表選舉表，四曰宦業傳人物孝義傳節孝傳賸恩考，五曰土俗紀民風解時政論藝文錄，六曰藝文錄動植錄。

其名詭異不脫明人習氣。書中多采前志原文，如民風解全是明隆萬間人口氣，並不明著引舊志，則後之讀者知爲誰之語哉。

是篇有云，「其流至於市井販鬻鬻走卒亦多纓帽緋鞋紗裙細袴。」亦聊可見明季服飾風尚。

康熙庚寅在平縣志五卷

康熙庚寅知縣王世臣取康熙癸卯前任王畫一志續修之也。

其前有萬歷十二年志舊序，蓋知縣王國弼修也，萬歷三十五年復有知縣吳道明之增修。

在平自秦漢以來爲縣，唐曾省入聊城，今爲東昌府屬縣。故本書藝文中有魯仲連遺燕將書，尙非附會也。

凡五卷，一圖緯天文地理建置賦役，二人物，三四五藝文。

嘉慶山東清平縣志

嘉慶三年知縣萬承紹撰。

書仿周氏永清志體，然前後無序，使非有職官表則并不知作者

姓名矣。

其目爲紀一表二圖三書六列傳五凡一十七篇，紀之屬曰恩澤，表之屬曰職官選舉，圖之屬曰輿地建置水道，書之屬曰吏戶禮兵刑工，傳之屬曰名宦列傳鄉賢列傳前志列傳列女列傳前志列女列傳。

光緒莘縣志十卷

光緒十三年知縣張朝璋修。

據舊序，志修于康熙十一年知縣劉維禎。劉序云明季孫愈賢重修邑志迄今四十年。及康熙五十二年知縣劉肅又修。

凡十卷，一封域志，二建置志，三食貨志，四禮異志，五官師志，六選舉志，七人物志，八九十藝文志。

縣在漢爲東郡陽平縣，隋改清邑，復改莘縣，宋金元間皆屬大

名府，明以來爲東昌府屬縣。

乾隆館陶縣志十一卷

光緒癸巳知縣劉家善重刊

乾隆元年兼知縣張興宗取雍正五年前任趙知希稿續刊成之。

據舊序萬歷元年知縣李冲奎康熙十四年知縣鄭先民屬縣人編修
耿願魯各修一次。

本書大體皆雍正稿而以所續者附於其後，則仍宜改題雍正志爲是，其所續人物並未注明年代，竟至閱之終卷不知所言爲何代之事。此亦舊志疏漏之一端也。

書凡十二卷，一圖考，二輿圖志，三建置志，四職官志，五選舉志，六賦役志，七學校志，八祀典志，九名宦志，十人物志，十一藝文志，十二雜志。

光緒館陶縣志十二卷

光緒十九年署知縣劉家善修。

據舊序，志創于萬歷間知縣李冲奎，康熙十四年知縣鄭先民續修，雍正五年知縣趙知希再修，乾隆元年兼知縣張興宗取而刊之。

館陶之爲邑古矣。唐屬魏州，宋金屬大名府，元屬濮州，明始改屬東昌府，弘治三年升臨清爲州，割隸焉，此其大較也。書凡十二卷，一圖攷，二輿圖，三建置，四職官，五選舉，六賦役，七學校，八祀典，九名宦，十人物，十一藝文，十二雜志。

觀其體例，蓋於舊志之後續以近事，初未重加編勒。然所續固多可存之料。例如田賦志中之清地均里記，清牌記，除催包空

由及孝平沙薄減則記等，悉載原文，可令人考見原委，實爲良法。所續多出知縣郎國楨手，郎爲康熙二十年知縣，蓋雖嘗執筆而未以付梓歟。

萬歷恩縣志六卷

萬歷己亥知縣孫居相修，前有于慎行序，其言曰，一恩志創于天順庠博丁君琰，嘉靖丁酉始繕成之。一縣與故直隸清河縣境接壤，隋唐貝州地，宋以平王則亂改恩州，明初降縣，改歸東昌府屬。

凡六卷，一輿地，二建置，三貢賦，四人物，五雜志，六詞翰

宣統恩縣志十卷

宣統元年知縣汪鴻孫修。

據序縣志自萬歷創修後，有雍正癸卯知縣陳學海一本也。

凡十卷，一天文志，二輿地志，三營建志，四食貨志，五武備志，六職官志，七選舉志，八人物志，九藝文志，十雜記。視舊志爲稍變，然宣統中新政盛行，變革甚繁，僅於學校中附學堂，武備中附巡警，其他概無一語，未免乖時矣。

又人物有列女而易爲貞烈。不知列女可以概貞烈而貞烈不可以概列女也。

乾隆泰安府志三十卷

乾隆二十五年知府顏希深創修，知府陶吉秀刊成。

泰安本爲州，隸濟南，雍正十三年升府，轄泰安新泰萊蕪肥城東平東阿平陰七州縣，故乾隆以前有州志而無府志也。

按顏氏序中所約秉筆之士有歷城周書昌等，是志當不同凡構。然於古蹟門湯登周漢明堂遺址而不言其今作何狀。其他援引甚多而皆不過類書體裁，初無傳信之意。大非撰志者所應出也。蓋古蹟云者，其類有三。故書傳有此蹟，目驗相符，更無疑竄，一也。遺址歸然，傳聞髣髴，而稽之故書無可核証，二也。僅載故書，久湮方向，等于夢影，一過無痕，三也。此三類者，必不可混其虛實併爲一談，致使方志之書等諸類書之纂。而謬種流傳迄無覺悟，惟孫星衍氏之志假師差能注意及此。泰山

名蹟文化所繫，彌應有切實詳明之紀載。今則散見山水寺觀古蹟金石諸門，復無由考其虛實存廢，誠遺憾矣。

書三十卷，一星野，二方域，三山水，四古蹟，五封建，六建置，七祠祀，八田賦，九學校，十一職官，十二十三選舉，十四十五宦蹟，十六至十九人物，二十至二十七藝文，二十八金石，二十九祥異，三十辨誤。

人物藝文二篇遂居全書之半，斯固大邦文物豐盈有所不能割愛。然若以藝文分隸各篇，當不致龐然獨多若此。其以郡人著述置於前而以有關涉之詩文列後，體例亦本不純。意者珥筆之士聚訟異庭，不容獨斷，遂以調停塞責。斯固修志者之通病矣。

道光泰安縣志十二卷

同治六年知縣楊寶賢重刊

道光八年知縣徐宗幹修。

據舊序，萬歷三十一年知縣任宏烈撰州志，康熙九年知州鄒文郁續編，乾隆四十七年知縣黃鈐再修。據學部志目則尙有弘治志知州胡瑄修也。

凡十二卷，一天章恩賚盛典紀沿革職官表歷代巡望考，二方域考，三山川考，四建置考，五田賦考，六學校考，七祠祀考，八選舉考，九人物列女傳，十政績錄，十一金石錄，十二藝文錄，而以雜稽錄附焉。

泰安州明置，雍正二年升直隸州，十二年又升府，仍附郭設泰安縣。

本志於泰山事蹟挂漏甚多，記次無法，更不如府志矣。

康熙東平州志八卷

附康熙五十九年續志七卷

康熙十九年知州張聰修。

按舊序前志修于萬歷丁丑知州邱如嵩。

凡八卷（學部志目作六卷蓋誤）一方域，二建置，三丁賦，四職官，五選舉，六人物，七藝文，八雜著。以節序風俗入方域，以兵革災祥行幸郵典封號馳恩蔭子全入雜著，其亂可知。

末附康熙續志七卷，康熙五十九年知州李繼唐修，卷目仍前，但取近事增入也。

東平自漢以來爲郡國，隋置鄆州，唐宋以來方鎮之地，而明降爲散州，屬濟寧府，清改屬泰安府，其地望遂淪降。然史乘故實實繁，本志采摭殊多闕漏。

光緒東平州志二十七卷

光緒五年代理知州恩奎屬編修江寧盧崙兵部主事州人蔣作錦編纂。

據本志所載歷屆修志銜名，創修於嘉靖己亥州學正江甯凌雲，再修於萬歷丁丑知州邱如嵩，三修於康熙癸丑知州張承賜，四修於康熙庚申知州張聰，五修於康熙庚子知州李繼唐，六修於乾隆辛卯知州沈維基，七修於道光乙酉知州周雲鳳。

東平在漢國領須昌等縣，唐屬鄆州，洪武初改州，以須昌省入，隸濟寧，旋改隸兗州，雍正初改升直隸州，旋復降爲州，改屬泰安府。

書凡二十七卷，一星野志，二方域考，三山川考，四五漕渠志，六建置考，七田賦考，八學校考，九典禮考，十職官表，十一選舉表，十二藩封志，十三恩榮錄，十四宦績傳，十五人物列傳，十六列女傳，十七至二十藝文志，二十一、二金石錄，二十三大事記，二十四古蹟錄，二十五五行志，二十六、七雜綴。東平爲漕運要樞，元明兩渠略有更易。故運道之變遷，閘壩之

修繕，泉源之來歷，並爲有關係之事。本書特立漕渠志以紀之，宜也。其餘藝文金石皆能取法乎上，故在山東諸志中猶爲中駟也。

據凡例自云，「此次纂輯新志，原係前任創議未行之件，援案舉辦，爲期不過三月，屬稿僅止一人，書籍卷宗又復鮮所依據。一然大體雅正，已難能矣。」

道光東阿縣志二十四卷

道光九年知縣李賢書修。

按舊序宏治庚申知縣秦民望始修，萬歷壬午知縣朱德載重修，康熙四年知縣劉沛先五十四年知縣鄭廷瑾又修。據凡例知康熙兩次重修皆仍萬歷之舊板，萬歷志實于慎行等撰也。

縣爲古東阿穀城二邑。北齊之來省穀城，明初遷縣於穀城鎮。

雍正以來屬泰安府。縣所轄之安平鎮卽俗所謂張秋，在元爲景德鎮。商賈輻輳，兵革屢經，視縣治尤重焉。寰宇記稱貢阿膠出于阿井卽在此鎮，本書有引張秋志之文，惜未見其書。凡二十四卷，一天文志，二方域志，三山水志，四古蹟志，五建置志，六田賦志，七學校志，八祠祀志，九封建志，十官師志，十一宦蹟志，十二選舉志，十三十四人物志，十五至二十二藝文志，二十三祥異志，二十四雜記。

嘉慶平陰縣志

嘉慶十三年知縣喻春林修。

據序，一嘉慶間邑令何樊諸公始纂厥志，至順治七年陳公秉直輯而修之。一康熙十三年知縣陳肇林又修。

本書既無目次，門類亦不全，不知何以簡略至此也。

光緒新泰縣志二十卷

光緒十七年知縣徐志愉取舊志增修。據所錄舊序則前志乾隆四十九年知縣江乾達所修也。

晉泰始中羊祜表即平陽故地置新泰縣，歷代疆域廣狹不同，故境內所屬之敖山蒙山亦互異。蒙陰志元省新泰入沂水縣，似有兩新泰，而其實非。志之沿革篇於此頗費辨証焉。

書二十卷，一疆域等，二里甲，三山川等，四戶口等，五賦役，六倉庾等，七古蹟等，八九十職官，十一名宦，十二三十四選舉，十五十六十七人物，十八十九藝文，二十緣起述例。據其述例云，「自明以來大抵隨時綴緝削舊增新，初猶錦繡相參，繼則純乎大布，寢更寢陋，以迨於今，觀天察地，徒事撫拾，稽古證今，茫無識解，甚且纂輯近事，雜以街談巷議，每

篇冠以小序，不過字內公言，體例舛錯，簡牘滋繁，諸於此類，不可勝紀。蓋襲劉淇之說也。

康熙萊蕪縣志十卷

此本已殘缺，據學部志目知康熙十二年知縣葉方恒修，觀其職官紀至康熙初年而可信也。

據所錄，有嘉靖乙卯知縣陳甘雨一序，餘無所考矣。

書凡十卷，與學部志目符，而編簡錯亂其細目亦無從對核矣。萊蕪漢縣，屬泰山郡，應劭曰魯萊柞邑也。後魏移置嬴縣於此，唐初復置，明以後屬泰安府。

光緒肥城縣志十卷

光緒十七年知縣凌紱曾修，羽鸞書院山長大興邵承照纂。

按舊序，志始修于隆慶壬申知縣顧庭縣人巡撫河南右副都御史李邦珍，重修于康熙壬子知縣尹任，三修于嘉慶丙子知縣曾冠英。

凡十卷，一方域志，二古蹟志，三建置志，四禮儀志，五學校志，六田賦志，七職官志，八登進志，九人物志，十雜志。

其凡例歷述朝邑武功靈壽三體之是非，而仍折衷於靈壽。雖議論不盡可宗，然固猶知博采羣言者。中如風俗不應入方域，寺觀不應入古蹟，則仍未當也。

同治五年黃崖張積中一案案情複雜離奇，本書有黃崖紀事略一篇述之尙詳。惜未能薈當時公牘纂成之耳。

咸豐武定府志三十八卷

咸豐九年知府李熙齡修，前志修于乾隆己卯知府赫達色也。

武定由州升府未久，明志有邢侗所撰州志。茲編亦僅循前規補入近事而已。然據其所糾，如誤以附郭之惠民縣圖爲府圖，及分山川於輿地之外，皆確有輔正之功也。

武定在漢爲樂安國，唐置棣州，明爲樂安州。宣德中平高煦，改稱武定以旌其功。雍正十二年升府。屬州一，曰濱州，縣九，曰惠民青城陽信海豐樂陵商河利津霑化蒲臺。

凡三十八卷，曰星土沿革疆域形勝風俗物產山川城池公署鄉都市鎮學校壇壝古蹟驛遞田賦兵制祥異封建職官宦蹟選舉人物列女藝文雜記。

大抵摘取各縣志中語排比成卷，甚至即用舊志板片未之易也。

按光緒惠民縣志錄明武定州志歷修姓氏，遂載於此以備攷。

嘉靖志 知州劉佃州人劉幾先修。

萬歷志 知州桑東陽太僕寺卿臨邑邢侗修。

據學部志目則尙有崇禎志知州鄒士禎修，康熙武定州志知州王清賢修。

光緒惠民縣志三十卷

光緒十二年知縣沈世銓修。

惠民自雍正十二年置，爲武定府附郭縣。僅乾隆四十七年知縣倭什布屬全州劉長靈所纂一志也。

本書仍前志體例，凡三十卷，一天文志，二至六地輿志，七至十建置志，十一學校志，十二賦役志，十三兵防志，十四職官志，十五選舉志，十六風土志，十七五行志，十八至二十六人

物志，二十七至三十藝文志。

冊內附光緒現行賦役全書，亦可珍之史料。

乾隆陽信縣志八卷

乾隆二十四年知縣王允深修。

其序云，舊志修于康熙壬戌，前任邱天民於乾隆九年重修，具草而未果，及是而始克成書也。按舊序則志創于嘉靖十一年知縣徐九臯，而其後萬歷十三年知縣朱大紀康熙二十一年知縣周虔森修者再矣。

陽信漢縣屬樂陵郡，明宣德中改樂安爲武定州，雍正十二年復升武定爲府，遂以縣屬焉。

凡八卷，一輿地，二建置，三田賦，四典禮，五職官，六選舉，七人物，八藝文。

按其沿革篇以漢之厭次爲縣地，而東方朔事未加蒐採，去取之豐約兩皆無當也。

民國陽信縣志八卷

民國十五年知事朱蘭縣人勞之常修，繼乾隆王志而作也。

凡八卷，一輿圖天文志輿地志，二祥異志職官志戶口志田賦志，三典禮志教育志選舉志，四新政志兵事志，五人物志，六列女志，七物產志，八藝文志。

按其體例，殊多乖錯。舉其尤者，蓋有十六端。星野多出附會，乾隆熱河志已一掃舊習，值此科學大明之會，不宜猶蹈故常，一也。歲時風俗自是民間習尚，不關天文，更不宜入天文志，二也。侯封非今日所有，論其茅土之分則宜歸於沿革，論其簪纓之行則宜歸於人物，不應別爲一門，三也。古蹟可包古墓

，今先古墓而後古蹟，則爲先其分而後其全，四也。祥異屬自然現象，獨振屬社會事業，不必因祥異而後有獨振，則獨振不宜附入祥異，五也。戶口志應臚列歷代戶籍以資比較，不應獨據現在數目，六也。風俗爲志地者最宜注意之事，不應附入戶口志，七也。鹽課雜稅不應統以田賦志之名，八也。朝賀祭祀救護鞭春聖諭鄉飲賓興上官皆不專屬於一縣，且爲前代已廢之禮，於已廢者累紙不休，於現行者一語不及，九也，學校書院錄其所存書籍最爲舊志陋習，使爲杭州府志不將盡錄文瀾閣四庫書目耶。今志教育而漫錄學校存書，零星儉陋，無所取義，十也。學校非現代教育制度專有之名，今他篇皆兼溯舊制，何以學校不及舊時縣學及書院耶。即云已廢，則朝賀聖諭獨非已廢耶。十一也。志宗教但當述其在本縣之狀況，不必追溯各教歷史，本書宗教篇云，一回教以求長生說天道爲宗旨自唐時回

紇我微降入中國其教始東。一嚮壁虛造，徒資貽笑，十二也。選舉志所包自進士至掾吏其類不同。又自實行憲政以來，既有選舉一門附入新政志，更不宜沿襲舊日選舉志之名，自致牽混，十三也。史志所以紀代嬗之迹，不宜有新舊之分，若別舉新政以爲篇名，則其他盡爲舊政耶。今新政志中立法司法行政財政教育實業交通保安等但當各從其類，統系自明。卽以教育而言，固已有教育志矣。於此複出，其義安在，十四也。人物志分孝友文學等目久爲通識所譏，本書凡例尙斤斤以移彼入此爲言，何其固蔽，十五也。物產志之天然物表幾類自學科學課本，絕無史志之價值，十六也。衆手成書，遂至于此，蓋深可惜矣。

康熙海豐縣志十一卷

康熙九年知縣胡公著修，縣人張克家纂。

其叙曰：「海豐舊有誌，蓋成于明孝武之間，今山東通誌所列邑中數事則猶舊誌所載也。蕪水易氏典教吾庠時以上大夫命卽舊帙益以新裁爲卷十八云云。」

凡十二卷，一沿革表，二疆域誌，三風土誌，四事記，五建置誌，六職官表，七選舉表，八賦役誌，九名宦列傳，十人物列傳，十一藝文誌，十二雜誌。其按語多冠以某某氏曰，不脫時文氣習。

海豐隋無棣縣，洪武中改今名，雍正後爲武定府屬縣。

民國無棣縣志二十四卷

民國十三年知事侯蔭昌修，縣人張方墀纂。繼康熙庚戌張克家志而作也。

海豐故無棣縣，民國復舊名，以避廣東同名之縣也。

凡二十四卷，其目曰疆域建置爵秩賦役學校兵防典禮選舉宦蹟人物列女祥異風土藝文叢志。

其體例無一不仍舊貫，使非閱其首卷，決不知爲民國所修之書，不知何取乎此疊牀架屋之作也。海豐吳氏爲近代鑒藏名家，若能取其所藏古物別爲吳氏鑒藏志一篇，其爲一縣之光不遠勝於千篇一律之鈔襲乎。

乾隆樂陵縣志八卷

乾隆二十七年知縣王謙益修。

據所錄舊序，萬歷辛卯知縣王登庸始修，順治庚子知縣郝獻明再修。

書八卷，一二輿地，三經制，四秩官，五選舉，六人物，七八藝文。過於求簡遂致不倫。如祥異列於經制篇是也。

樂陵自漢以來爲縣，而所隸不常。唐宋元改隸河北滄州，明改隸州樂安，宣德中平漢王之亂改武定，清升府，樂陵遂爲屬縣。至漢之厭次卽武定府治。志以東方朔入人物，似涉誇張矣。據鄉都門稱鄉圖之制，洪武十四年所制。本縣分東西南北四路，每路分若干約，每約復領若干莊，此縣制之獨殊者。蓋約卽保之異名歟。

咸豐景濱州志十二卷

咸豐十年武定府知府李熙齡修

據舊序州志蓋始于萬歷十一年知州艾梅。艾志序云濱舊志二，泰宏間一梓傳簡止五六十葉，一筆記幾百葉，蓋皆不傳矣。康熙四十四年又修一次。

濱縣之置在周顯德中，分隸州置也。清初爲直隸州，雍正十二

年撤隸武定府，據乾隆府廳州縣圖志漢千乘郡溼沃縣地也。縣杜氏自明以來簪笏相仍，及文端文正父子祖孫迭居顯列，亦一邑之雅實。惜志不能爲世系表，俾後人得考見其興替之由也。書凡十二卷，一方輿志，二建置志，三禮典志，四賦役志，五紀事志，六風俗志，七秩官志，八名宦志，九選舉志，十人物志，十一十二藝文志。

光緒利津縣志十卷

光緒九年知縣盛贊熙修。

據序萬歷十七年知縣馮執中因前任賈光大所修之書而增補之，康熙癸丑知縣韓文焜復新之，嗣是乾隆戊寅唐寬劉文確程士範皆有續冊。

本書仿周氏武清志爲之，凡十卷，一曰皇言紀恩澤紀，二曰輿

地圖建置圖，三曰職官表選舉表，四曰封蔭表，五曰吏戶禮兵刑工六書，六曰政略，七曰宦蹟列傳忠節列傳儒林列傳文苑列傳，八曰孝友列傳義行列傳隱逸列傳仙蹟列傳，九曰列女列傳，十曰雜志。

然其皇言紀僅載平定準噶爾告成太學一文，蓋以此碑立于學宮，然皇言亦不應僅紀碑刻，紀碑刻亦不應僅紀此碑，得毋優孟衣冠之誦耶。至其六書除戶書外餘多取各縣從同之條例漫錄一二，虛應此名。按其實際羌無一物。又建置風俗物產皆入輿地圖。此又章氏所無也。總之震於章氏之名，實不善於學章氏者耳。

金明昌三年升渤海縣永利鎮爲利津縣屬濱州，雍正十二年武定州升府，以縣來屬焉。

光緒霑化縣志十六卷

光緒十七年知縣聯印修，前鄆縣知縣張會一等纂，奉巡撫張曜備修山東通志之命也。

據舊序志始于嘉靖己未知縣石璽，草創未就，萬歷丙申知縣段展屬縣人吏科給事中丁懋遜重修。（其名官師志失載今據學部志目補，懋遜序明稱關中段侯也）其後有吳趙李三家之纂述，蓋均無刊本也。

凡十六卷，一星野等，二城池等，三丁賦等，四秩祀等，五官師等，六選舉，七至十人物，十一列女，十二至十五藝文，十六叢談。

其叢談中附著書目錄，盡村塾之書，不如其已也。

宋慶歷三年升濱州招安鎮爲縣，金改今名，雍正十二年與濱州

俱隸武定府。

乾隆蒲臺縣志四卷

乾隆二十八年知縣嚴文典修。

據舊序嘉靖乙丑縣人王爾彥創始萬曆辛卯知縣李時芳付梓，康熙二十六年知縣嚴曾業又修。

三齊記厭次東南有蒲臺，始皇嘗頓臺下縈蒲繫馬，水經注古貞女蒲氏築三臺並峙，蓋命名之由。開皇十六年置縣，雍正以後爲武定府屬縣。

凡四卷，一星土等，二戶口等，三惠政等，四流寓等。

乾隆青城縣志十二卷

乾隆二十四年知縣方鳳修，縣人周琰纂。

據凡例舊志未知所始，萬歷癸丑毀於火，三十年邑人楊夢袞重修。學部志目有萬歷志知縣王儀修也。

縣始置於金天興二年屬濟南路，明初曾廢而復置，雍正十二年武定改府，以縣隸焉，

凡十二卷，一輿地志，二建置志，三祀典志，四田賦志，五職官志，六選舉志，七名宦志，八人物志，九列女志，十祥異志，十一十二藝文志。

末有道光間所增公牘數種。

道光商河縣志八卷

道光十五年知縣龔廷煌修。

據凡例云，一志創自萬歷十二年知縣曾一侗，修于崇禎十年。康熙乾隆二志稿應修一統志而設，嘉慶志稿收羅較廣而未剪裁。

。一蓋本志直接明代志而作也。康熙志作於十二年，修者知縣趙攀麟。

凡八卷，一曰輿地志，二曰建置志，三曰賦役志，四曰禮樂志，五曰職官志，六曰選舉志，七曰人物志，八曰藝文志。

商河始置自隋開皇十六年，於漢勃縣故城置淄河，以漢許商之名名之也，宋改商河，雍正以後隸武定府。



乾隆臨清直隸州志十一卷

乾隆五十年知州鄧希曾繼前任張度修成。

按所載有嘉靖辛酉知州成憲光序稱，一州舊有志凡再舉矣。一今皆無考。據山東通志則嘉靖志蓋州人方元煥所撰，其後則康熙壬子知州于容明乾隆己巳知州王俊等各一修。

臨清魏太和中置，五代至宋金屬大名府，明宏治間升爲州，屬東昌府。乾隆四十一年再升直隸州，領武城夏津邱縣三縣。運河貫境。漕舟腐集，觀本書建置之市衢及關榷諸篇，人物熙穰之態如見。

凡十一卷，一疆域志，二建置志，三田賦志，四學校志，五典禮志，六秩官志，七選舉志，八人物志，九關榷志，十兵防志，十一事類志。

其闡權志分目曰設關本末，關署口岸稅額，（附臨甄），戶部權稅分司表，工部營繕分司表，兵防志分目曰鎮弁額兵駐防將弁表，武備事蹟表，附屯衛井衛弁表，其詳晰抑非他志所及。而臨甄一記可與會典相發明，關係工業史尤重要也。

道光續武城縣志十四卷

道光二十九年知縣厲秀芳修，繼乾隆十四年駱甸芳而作也。

凡十四卷，并無目次，蓋依志而行無所更張耳。乾隆四十一年自東昌府改隸臨清州，外此蓋無甚變革。

民國武城縣志十五卷

民國元年知縣王延綸等修輯。

據志舊序，武城志創修於嘉靖己酉知縣尤麒，續修於隆慶己巳

知縣金守諒，三修於順治庚寅知縣黃萬達，四修於乾隆己巳知縣駱大俊，五修於道光辛丑知縣厲秀芳。

凡例云，邑志以駱李之編輯爲最，厲公惕齋續志四冊悉按舊志門類。是役也亦恪遵續志，廣加搜採。故題曰續編也。

書十五卷，一星野建置附續巡幸，二疆域城池山川形勝，三田賦，四學校，五祀典，六選舉武備驛遞郵政，七風俗物產，八職官公署，九宦績，十人物，十一列女，十二勅封坊表邱墓祥異，十三四藝文，十五雜記。

武城在隋唐屬貝州，明以來屬東昌府。歷來各志率皆附會絃歌之說，非實錄也。本志修於民國初年，而一仍舊式，其乖於時代亦遠矣。

乾隆夏津縣志十卷

乾隆六年知縣方學成修，教諭梁大鯤纂。

據凡例始修於嘉靖庚子知縣易時中，時中事見明史儒林傳。康熙癸丑癸巳兩次復修。

夏津在漢爲鄆縣，天寶立今名，宋金屬大名府，元始改屬山東，明以後爲東昌府轄縣焉。

凡十卷，一疆域，二建置，三學校，四食貨，五典禮，六官守，七選舉，八人物，九雜志，十藝文。綜觀全書，似專爲方氏鋪揚之用，無足取也。

乾隆邱縣志八卷

寫本

乾隆四十一年知縣黃景曾修。

據序一志肇於康熙四年乙巳，繼修于雍正六年戊申，一據本書藝文志萬歷四年修于知縣侯國安，康熙志修于知縣張璉，雍正志修于知縣王輅也。

凡八卷，一地理志，二建置志，三祀典志，四田賦志，五職官志，六人物志，七雜志，八藝文。

縣爲漢斥邱縣，唐平恩縣，至元二十六年改置邱縣，初屬東昌。乾隆四十一年升臨清爲直隸州，以縣屬焉。

乾隆兗州府志三十一卷

乾隆三十三年知府王鶚刊成，元任戶科給事中陳顧灝纂修。前無序言，亦無年月，以其叙事斷限而知爲三十三年也。明志有于慎行所撰，據學部志目康熙志二十五年知府祖允圖修續志五十八年知府金一鳳修也。

凡三十二卷，曰沿革星野山川建置風土帝蹟闕里封建職官田賦學校選舉兵防驛遞河渠古蹟寺觀陵墓宦績人物列女藝文災祥雜志辨誤。中多殘缺不可讀。

闕里志別爲一篇，所以尊聖，其意甚是。然并先儒事實而一一列之，則過於汎濫矣。不如曲阜縣志之得體也。

兗州在漢爲魯國山陽等郡，隋唐以來置兗州，洪武十八年升府，乾隆中定轄十縣，曰滋陽曲阜寧陽鄒縣泗水滕縣嶧縣陽穀壽

張汶上。

康熙滋陽縣志四卷

此書不完，著者姓氏年月無從考見。據學部志目蓋即康熙十一年知縣李濬所修。

光緒滋陽縣志十四卷

光緒十四年知縣周衍恩取咸豐九年知縣莫熾延濬陽黃恩彤所纂本增修而刊行之，前志修于康熙十一年知縣李濬也。

凡十四卷，一疆域志，二職官志，三建置志，四秩祀志風俗志物產志田賦志，五學校志選舉志，六古蹟志，七宦績列傳，八九人物列傳，十列女傳，十一十二藝文志，十三案牘告示碑記，十四雜記。

其凡例云，一前志於疆域分割不明，以致宦績人物移客就主觸眼夢如，而古蹟墳墓兩門尤形鄙倍。大都沿襲傳聞罔思考據。今悉爲訂正併詳各條下。一是其留心史乘之參證，較之僅據俗說者爲高矣。

本書蘇茜傳云，所著有縣志稿蒐羅繁富，今茲修志多所取材。又張奉欽傳云，蘇於乾隆戊午科舉經魁，歷四十年，成書五十卷，奉欽子東淵鑿壁藏之，至今猶稱完璧。則今志多本之蘇稿也。

滋陽爲明以來兗州府附郭縣，魯之負瑕，漢之瑕邱，劉宋以來並爲兗州治所。趙宋改磁陽，以山爲名。成化三十三年因魯王府多火災，改從水以厭勝之。此語舊志必有所本。方輿紀要失載，仍作磁陽，誤也。

乾隆曲阜縣志一百卷

乾隆三十九年知縣潘相撰。

其自序云舊志肇輯于明嘉靖中藩僚孔宏幹，厥後知縣孔宏復宏毅相繼增修，國初知縣孔衍淳（學部志目衍作胤誤）又即舊板附刻已事。其綱四，曰土地人民政事文獻。其目九十有二，卽今所存六卷三本者。相以于敏中之愆惠劉綸之審訂而成是書。規模宏大，古今所罕。凡爲卷一百，首奎文二卷以紀御製，次圖考十二卷以紀祭器文物，次仿歷史本紀綱目前編及歷城諸城安邱諸志之法爲通編二十一卷以志編年之事，次類記二十一卷以括方志之目。約其類別，一疆土，二物產，三風俗，四職官，五賦役，六學校貢舉，七武備，八秩祀，九祀典，十恩例，十一古蹟，十二金石，十三著述，卷五十七以下則一聖蹟，（孔

子及四配）二賢躅，（弟子）三世家，（孔氏子孫）四列傳，自展氏以下凡佔十八卷。其以行誼別者，則曰孝義，曰忠義，曰隱逸，曰卓行，曰言語，曰節鎮監司治蹟，曰守令治蹟，曰經學，曰文苑，曰鼎甲，曰武功，曰邑令，曰學博，曰方技，曰賢淑，曰貞女，曰烈婦，曰節婦，曰壽婦，而以闕疑補遺終焉。曲阜令自唐以來相沿用聖裔。乾隆二十一年始廢此制，而衍聖公專以襲爵主嚶。其所屬則有四氏學教授學錄翰林院五經博士太常寺博士國子監學錄學正至聖廟執事官六品官典籍司樂屯田管勾守衛林廟百戶等員。至于賦役則全縣納糧之地五千一百餘頃，而孔氏輕糧之地佔四千二百餘頃，都計一縣民地止一千餘頃，而孔顏二氏所買民地又居其半，民地實不過數百頃而已。蓋一縣之故實，自聖蹟而外鮮可紀矣。本書搜羅宏博，詳而不蔓，實稱佳構。亦乾隆中葉右文之治足以啓之也。惟所編通編

義法雖善而不載出處實一大病。列傳多裁翦故書而成，病亦坐此。若禮典之濫載會典中婚喪冠服等通禮職官之濫載歷代官制，抑其偶失審慎者矣。

光緒寧陽縣續志二十四卷

光緒丁亥知縣陳文顯修。

按舊序，康熙十一年知縣劉興漢四十一年知縣李溫皋咸豐元年知縣陳紀助各一修。本書以咸豐志爲藍本，仍舊者十七新增者十三，故曰續志也。據學部志目則尚有乾隆志八年知縣李夢雷修。

凡二十四卷，一疆域，二星野，三官師，四藩封監司，五建置，六里社秩祀，七田賦，八學校，九選舉，十古蹟，十一宦績，十二人物，十三良吏傳，十四篤行傳，十五孝友傳，十六列

女傳，十七至二十四藝文。

據其凡例，藝文碑志甄錄從寬，故卷帙殊富也。雖嫌過濫，然藝文詳載年代爵里，猶堪取法。

寧陽爲漢侯國，唐爲龔邱縣，金大定中復爲寧陽，屬兗州府。

光緒寧陽縣鄉土志一冊

光緒三十三年知縣曹倜修。

本書僅供學校課本用，不足以言著述。然氏族一門述周吳黃曹四姓皆以洪武初年自山西洪洞縣遷來，其寧陽舊族惟兩姓，斯亦舊志所未注意者也。

康熙鄒縣志十二卷

附光緒續志十二卷

康熙五十四年知縣婁一均撰。

據所載前志姓氏有萬歷間知縣許守恩等天啓間知縣黃應祥康熙十二年知縣朱承命各本。

卷端錄康熙十一年禮部題本一道，議復保和殿大學士衛周祚疏稱各省通志宜修，除河南陝西二省已經前撫臣賈漢復纂修進呈外，請勅下直隸各省督撫纂輯成書總發翰林院彙爲大清一統志。此奏頗關故實。

附續志十二卷光緒十八年知縣吳若灝修，亦緣張曜巡撫山東有重修山東通志之舉也。

凡十二卷，曰天文方域建置學校祀典賦役職官選舉武備金石藝文人物，以視前志區爲土地人民政事三部爲近雅裁矣。

順治泗水縣志十二卷

順治辛丑知縣劉桓修，康熙壬寅縣人建陽縣知縣盧應龍刊成，

學部志目題康熙志亦似不如從其修志之年言之也。按舊序，志始于嘉靖辛亥知縣張祚，繼修于萬歷丙申知縣尤應魯。

凡十二卷，其目曰方輿志建置志食貨志職官志選舉志人物志藝文志災祥志牧政志。其曰牧政者意謂牧民之政也。

中有康熙元年以後所續者，蓋取舊版而附益之耳。

縣爲古卞國，漢置卞縣，後魏省入汶陽縣，開皇十八年改置今縣，屬兗州，元曾省入曲阜，旋復置。泗水發源處有泉林，此爲一邑之勝。

光緒泗水縣志十五卷

光緒十九年知縣王佐才修，繼順治志而作也。

凡十五卷，一方輿志，二建置志，三官師志，四名宦志，五牧政志，六食貨志，七學校志，八秩祀志，九風俗志，十選舉志

十一人物志，十二節烈志，十三舊跡志，十四災祥志，十五藝文志，大致仍前目，蓋僅能追步，不暇繩愆也。

康熙滕縣志十卷

康熙五十五年知縣黃浚修。

據舊序，萬曆十三年知縣楊承文屬縣人王元賓始修。然王序云，「余束髮爲諸生時見傳抄志二本，至隆慶丁卯侯維藩始授梓，一則尙有隆慶志也。又據道光志則尙有崇禎壬申知縣荊爾植志也。」

凡十卷，一圖經沿革譜等，二選舉譜等，三災祥志等，四賦役志等，五古蹟志，六宦業傳等，七八人物傳隱逸傳等，九藝文志，十詩。

滕爲漢蕃縣，開皇中改今邑，金曾置滕州，明廢屬兗州府。

道光滕縣志十四卷

道光二十六年知縣王政撰。

政爲善化進士，志蓋其所親秉筆也。然體例殊駁雜。卷一曰沿革，曰封爵職官二譜，卷二曰選舉封贈武功爵三譜，卷三山川志，卷四賦役祠祀二志，卷五建置災祥古蹟三志，卷六春秋三國世家宦績志賓師僑寓，卷七八九人物傳，卷十十一列女傳，卷十二二十三藝文，卷十四雜志考異佚事。惟列傳並著來歷，采掇之勤審尙爲可取耳。

滕在春秋爲滕薛小邾三國，隋始立滕縣，金元置滕州，明廢州以縣屬兗州焉。

乾隆嶧縣志十卷

乾隆二十六年知縣忠璉修。

按歷修姓氏，萬歷壬午知州王希曾延縣人兵部右侍郎賈三近始修，康熙癸丑知縣田頌吉又修，（學部志目頌作顯誤）以應一統志之徵也。乙丑知縣劉允恭又修，乾隆十六年知縣駱大俊又修。（駱志蓋未刊）

凡十卷，一地理，二建置，三祀典，四田賦，五漕渠，六選舉，七職官，八人物，九列女，十藝文。

縣在春秋爲郟國，漢爲蘭陵丞二縣地，屬東海郡。金興定中曾置嶧州，後州廢爲縣，屬兗州府。

光緒志稱忠氏所修志已非司馬原書，而體裁大致相類。地理約而不遺，建置贍而不穢，其他序次有概有詳。然按其書殊不見所以可稱之迹。

光緒嶧縣志二十五卷

光緒三十年知縣周鳳鳴修，縣人內閣中書王寶田纂，繼乾隆忠

志而作也。

凡二十五卷，一境至表，二疆域沿革表考，三暑度表，四封爵表，五山川考，六風俗考，七物產考，八建置考，九學校考，十祠祀考，十一軍政考，十二漕渠考，十三田賦考，十四郵政考，十五災祥攷，十六大事記，十七世家，十八封爵列傳，十九職官列傳，二十選舉攷，二十一鄉賢列傳，二十二續列女傳，二十三藝文志，二十四古蹟攷，二十五雜記。

大致較之舊志稍有擴充，然書法雜亂，或稱見某書，或稱見某文，或無所指，或沿用舊志而不注明，令人迷惘。

光緒壽張縣志十卷

光緒二十六年知縣劉文燿屬淮安舉人江西雩都知縣王守謙纂。蓋守謙與文燿同年，過境小駐，因以志事屬之，才三月而書成。

近年州縣官以修志調劑私交，相沿成習，如此而求成良志，憂乎難矣。

書凡十卷，一方輿，二建置，三典禮，四食貨，五官師，六選舉，七人物，八藝文，九武備，十雜事。

據所錄舊序，萬歷中知縣周三錫創修，康熙元年知縣陳璜續修，五十六年知縣滕永禎再修。

壽張爲漢以來故縣，洪武十八年定隸兗州府，宋世宋江結砦於梁山濼卽壽張之故事，而志僅略引水滸傳奇數語，架空虛說，非簡則誣矣。

萬歷汶上縣志八卷

附康熙續志

萬歷戊申戶部主事縣人檀芳遠撰。其序云出於王君之手者十之九謂南京尙寶寺卿邑人王命新也。

汶上爲魯中都，漢爲平陸縣，金太和中定今名，爾時屬兗州府東平州也。

書八卷，一方域志，二建置志，三職官志，四政紀志，五官蹟志，六人物志，七雜志，八藝文志。

明人方志簡陋殊甚，惟如壇祠之類尙可考見爾時民間習尙耳。末附康熙續志，康熙五十六年知縣聞元昊修，一如前志之例。若沿革疆域風俗物產遂不重出。雖無史識而不矜己長猶爲可取也。

乾隆沂州府志三十五卷

乾隆庚辰知府李希賢修，寶應舉人凌遇莘纂。

沂州自雍正十二年徇河東總督王士俊議始升府，領蘭山郯城費縣莒州蒙陰沂水日照六縣一州。

書凡三十五卷，一天象，二至七輿地，八至十二食貨，十三學校，十四秩祀，十五十六紀事，十七至十九職官，二十宦蹟，二十一兵防，二十二至二十四仕進，二十五至二十七人物，二十八九列女，三十至三十五藝文。

其中如水利海防頗存故實，是其長也。然沂州爲古琅邪，世族相承，若能如章氏士族表之例明其統緒，實較凌亂無章之人物傳爲優。此又非其所及也。

康熙沂州志八卷

康熙十三年知州邵士修，亦應一統志之徵也。

其凡例云，嘉靖辛亥之志太簡，萬歷戊申之志近繁，萬歷志知州徐汝翼脩，嘉靖志則無考也。

凡八卷，規制部之屬曰建置星野疆域山川藩封祠廟秩祀物產風俗古蹟，政事部之屬曰戶口地畝賦役錢糧農桑學校兵防驛遞郵典捕鹽，宦常部之屬曰職制衙署秩官宦蹟，仕進部之屬曰科第制貢例監雜職武科胥弁封廕坊表，人物部之屬曰帝后名獻忠貞孝義節烈懿行流寓隱逸仙釋，藝文部之屬曰沿革賦詩遺文雜志。其目直似類書矣。

沂州爲漢東海郡琅邪國，後周立今名，明屬濟寧濟南府，最後屬兗州府。州治爲故臨沂縣，雍正十二年升府，復置蘭山爲附

郭縣。故本書雖修於改府以前，而仍簽署蘭山縣志也。

民國臨沂縣志十四卷

民國六年知事楊孝則等修，民國以來沂州府廢復設臨沂縣，實繼乾隆二十五年府志而作也。

凡十四卷，一疆域通紀，二山川古蹟，三民風物產，四秩祀教
育宗教，五食貨建築，六登進，七藩封職官宦績，八兵防警察
交通，九十一人物，十二金石著述，十三藝文，十四雜志。
其通紀一篇上篇紀兵事下篇紀災異，雖不能祛弊習，猶有勝於
雜糅不分者。然大體嫌於泯舊不合時代。秩祀已非民國所有而
立爲專篇，實業狀況地方自治等類反均不著一字，則又奚取於
修此志也。

乾隆郟城縣志十二卷

乾隆二十八年知縣張金城修。

據舊序舊志始于萬歷十三年知縣顏若愚，續於康熙十二年癸丑知縣張三俊，康熙五十年知縣荆文康，及乾隆十四年知縣王植又增修之。今所據唯萬歷及康熙癸丑志也。

書凡十二卷，一恭紀巡幸，二輿地，三編年，四建置，五食貨，六秩祀學校，七秩官，八選舉，九十人物，十一藝文，十二附餘。

郟爲春秋古國，漢爲東海縣，隋唐屬邳州，尋省，元復置，明清因之。雍正以後屬沂州府，縣屬之紅花埠南距宿遷之峒嶧驛四十五里，爲昔日驛路南北咽喉。昔人行役之詩有關者甚多，志皆未之錄也。紅花埠者據乾隆山東通志古蹟門云寰宇記梁天

監二年僮縣人張高等鑿溪引流水溉田二百餘頃俗名紅花水。埠之得名以此。

嘉慶郟城縣續志十卷

嘉慶十五年知縣吳塔修，續乾隆張志而作，前志已具者不復見也。

凡十卷，一巡幸志，二田賦志，三祭秩志，四建置志，五職官志，六選舉志，七人物志，八列女志，九著述志，十藝文志。其藝文仍無所附益，蓋率爾之作，欲其博考羣書難矣。

康熙費縣志十卷

康熙二十八年知縣黃學勲修，其中上台詳文云，隆萬而下百二十年之事實竟闕略而無傳。前志源流無聞焉。

凡十卷，一曰地理志，二曰建置志，三曰官師志，四曰賦役志，五曰秩祀志，六曰科貢志，七曰人物志，八九十曰文籍志。其秩祀一篇兼記盜賊，殊爲無理。然藉此頗存明代佚聞。學部志目載此書僅存七八二冊，是此完本亦殊難得矣。

光緒費縣志十六卷

光緒二十二年知縣李敬修修，前有教諭劉鼎叙，道修志始末甚詳，蓋因巡撫張曜議修山東通志而有是舉也。前志乃康熙己巳知縣黃學勲纂修，至是二百年矣。山東通志云嘉靖間王圭峰始修費志二卷，萬歷初王慎等作費縣志八卷，逮明季毀於兵燹。凡十六卷，一疆域，二山川，三封建等，四賦役等，五祀典，六學校，七選舉等，八營汛等，九城池等，十十一人物，十二列女，十三古蹟，十四金石，十五邱墓，十六祥異。

費爲古邑，自宇文周以來隸沂州，雍正二年升沂州爲直隸州，十二年再升爲府，故縣隸焉。

據劉序，志於考證頗具苦心。然沿革一門實虛有其目而無其文。惟山川古蹟中頗有可取者耳。其精采最富者要推金石。元和章武二石闕皆詳記其畫象，深有裨於考證。蓋候選教諭王咸昌手筆也。其所獲各碑，今據劉序云擬打集學宮構亭覆照，不知其究何如矣。

嘉慶莒州志十六卷

嘉慶元年知州許劭錦修。

莒爲古國，漢魏以來遞屬琅邪城陽，金升爲州，明屬青州府，雍正十三年撤去直隸，改屬沂州府焉。

據本書藝文志所錄舊志序，知成化間任順創修，萬歷辛巳知縣王明時屬州人何思謹一修，其後州人何鐸再修。外此復有州人劉璞所撰之野述。璞官御史與楊左同劾魏闕，死贈太僕寺少卿者也。學部志目尙有康熙志知州張文範修，雍正志知州李方膺修。

書十六卷，一星野沿革等，二城池官署等，三丁賦街坊等，四倉儲鹽法等，五古蹟墳墓等，六職官，七宦績，八選舉，九十人物，十一十二列女，十三十四藝文，十五記事，十六雜綴。街坊門云州境初置五鄉，統社二百八，後以戶口繁衍立社益多，難於統率，割五鄉爲二十牌。此魯省之特制也。

城陽景王爲漢以後四方崇祀之神，載籍記之綦詳，正爲莒州故實。而志未全加采輯，亦其所短矣。

道光沂水縣志十卷

道光七年知縣張燮修。

按舊志序志始修于萬歷丙申蒙陰進士公鼎，康熙壬子知縣黃臚登繼之。

凡十卷，一二輿地建置，三食貨，四禮制，五兵防職官，六仕進，七八九人物紀事，十藝文。

其書僅能據府志以補舊志之缺而已。

縣爲漢琅邪之東莞縣，隋曰東安，繼改沂水，唐宋屬沂州，明屬青州，清爲沂州府屬縣。

康熙蒙陰縣志八卷

康熙二十四年知縣劉德芳修，崑山葉澤森纂。

前志修于康熙十二年知縣屈逸乘，劉氏譏其紕繆失實而重撰，然檢其書亦不解所糾正者究爲何事也。

本書名獻門有明人公一鳴傳云，一以蒙素無志，每采葺故實爲蒙志考，杜洽舊志多取裁焉。一公杜皆萬歷間人也。其書序門存舊序二篇，一卽杜志序，一卽屈志序。屈名逸乘，河南閩鄉人。學部志目作屈南宮恐誤。

書凡八卷，一封圻志建置志賦役志，二山川志學校志風俗志祠祀志，三職官志選舉志，四五人物志，六七八藝文志雜稽志。蒙陰以蒙山得名，書所謂蒙羽其藝，詩所謂奄有龜蒙。漢置今縣。高齊以後省，元皇慶中復置。本書郵鋪門云，一順治十年寇息道通，朝議以東南諸路從中州而至京師實爲遠道，不若從沂蒙一帶爲捷徑，蒙陰之置郵，實始於此。一自此遂爲驛道衝要，自蒙陰至沂州中有青駝寺驛，清代諸家詩文集集中詠之者甚

多也。

又蒙頂茶爲唐以來名產，據本書所載則已不產矣。

康熙日照縣志十二卷

康熙五十四年知縣楊士雄修。前有知縣成永健序，不知所云何事，凡例云，采用杜志必繫以舊，亦不知杜志何時所修。纂修之縣人丁肯以自作之詩入文苑中，儼然爲私人作文集矣。其荒陋較他志尤甚。

日照爲漢海曲縣地，王莽末琅琊呂母起兵攻海曲以成赤眉之亂，卽此地矣。金始置日照縣，屬莒州。

凡十二卷，一圖考等，二風俗等，三鄉里等，四職官等，五倉廩等，六學校等，七歲貢等，八壇祠等，九人物等，十列女等，十一政事等，十二文苑。

光緒日照縣志十二卷

光緒十一年知縣陳懋修，前有丁守存序云，「志創自萬歷十八年知縣杜一岸，重修於康熙十一年知縣楊士雄，迄今二百十年中惟知縣成永健於康熙五十四年將文苑一卷略爲增修。」

凡十二卷，一曰疆域志，二曰營建志，三曰食貨志，四曰禮樂志，五曰秩官志，六曰選舉志，七曰考鑑志，八曰人物志，九曰列女志，十十一曰藝文志，十二曰掇餘志。義例亦較舊志爲整齊。

乾隆曹州府志二十二卷

乾隆二十一年知府周尙賢修，雍正十三年始升州爲府，故前無府志也。

凡二十二卷，曰輿地河防食貨學校秩祀五行職官選舉人物藝文雜志。

曹在漢爲濟陰東郡地，其建州在唐初，明始屬山東。雍正中升府設菏澤爲附郭縣，并以直隸之濮州及所領縣來隸。凡領州一曰濮，縣十曰菏澤曹縣范縣觀城朝城鄆城單縣城武定陶鉅野。自宋咸平以來，河徙而南，曹鄆實當其衝，故河防爲專志。就其所載各碑記而觀之，其工作制度經費名額亦累代經政之要也。州多盜賊，自古已然，而黃巢爲州之冤胸人，本志僅於雜志中略述數語，抑不足以盡之也。

康熙曹州志二十卷

康熙十三年知州佟企聖修，以衛周祚請也。

按舊序志始于正德十年知州吳瓚，繼前任伍禮本而修，萬歷二十二年知州許恩續修，天啓元年知州潘永澄又修。今所據者潘本也。

凡二十卷，一圖考，二輿地，三建置，四帝迹，五古蹟，六風俗，七職官，八田賦，九學校，十秩祀，十一典禮，十二選舉，十三兵衛，十四河防，十五十六人物，十七十八藝文，十九災祥，二十雜志。

州爲古曹國，漢爲定陶國濟陰郡，後周始建州名，明以來隸兗州府。修志時未建府更未立荷澤縣。故書題署荷澤縣志，而注今之荷澤昔號曹州未有新編仍循舊例也。

其職官篇悉錄唐天平節度使。按天平軍既不治曹州，惟石晉之威信節度乃足當之耳。若統部之官必皆入錄，則漢之兗州刺史何爲獨遺之耶。

自明宏治五年劉大夏塞黃陵岡，於是楊劉決河以來之民因爲之大紓。讀河防一篇彌有陳迹之惑。

光緒荷澤縣志二十卷

光緒六年知縣凌壽柏修。

縣立於雍正十三年，二百餘年始有是作也。凡二十卷，大致如康熙曹州志。

光緒曹縣志十八卷

光緒十年知縣陳嗣良修。

按舊序志始修于宏治中知縣鄒魯，嘉靖己亥萬歷庚寅崇禎庚辰康熙壬子乙丑丙申，知縣隆文良錢達道郭萬象門可榮朱琦郭道生各一修。陳氏序云，嘉慶十八年暨咸豐八年兩次城池失守，志及原版遂俱燬失也。

縣本唐宋以來曹州附郭濟陰縣，洪武初以水患移縣治於安陵，又移磐石鎮，於是改州爲曹縣。正統十一年復於舊乘氏地置曹州，而以曹縣屬焉。民國以後州改菏澤縣，與曹縣並置，州與縣名實最易混淆也。

志凡十八卷，一疆域志，二建置志，三賦役志，四物產志，五學校志，六祠祀志，七河防志，八王侯志，九官職志，十名宦志，十一選舉志，十二三十三十四人物志，列女志，十五繪音志，十六十七舊藝文志續藝文志，十八雜稽志。

卷帙雖豐而所載多浮泛之詞，嘉慶教匪咸豐捻匪兩次變亂，距

修志時近在眉睫，并無一語爲之記注。空錄人名與詩文以充篇幅，何爲也耶。

乾隆濮州志六卷

乾隆二十年知州邵世昌修，山陰柴揆纂。

按舊序，嘉靖癸未知縣張震延進士鄧文度始修，萬歷壬午尙寶司少卿州人李先芳康熙十一年知州張實斗五十年知州鄧玠各一修，本書蓋仍李志面目也。

書凡六卷，一曰歷代建置沿革表郡邑疆域總圖郡治疆宇圖郡治城市郡城疆宇總考郡志考諷警衛分圖星野考古蹟考河渠議帝系表帝紀世家年紀，二曰賦役志學校志職官考風俗記兵防志官師歷年表科第表二貢考，三曰名宦記鄉賢記，四曰孝友傳明經傳武烈傳古交篇遊寓傳烈女傳隱德傳兵家傳豪俠傳貨殖傳仙釋傳

衛人志雜記，五曰王言詩類，六曰文類北山野史傳。其中古交篇取羊角哀下儀等事湊成一紙有半，絕無理由。自作北山野史傳以殿卷末，尤爲可笑。然貨殖一傳猶爲得良史之意者也。

濮州爲漢東郡，隋以後置濮州，元明以來屬東昌，雍正八年定屬曹州府。

宣統濮州志八卷

宣統元年知州高士英主修，實卽取舊志而增訂之也。

書凡八卷，一建置等，二賦役等，三官師科第等，四名宦鄉賢，五孝友列女，六隱德武烈等，七王言詩類，八藝文。

其中最陋略者無過疆域沿革，其舊志舛誤處已爲葉氏續山東考古錄所糾，而新增者亦仍蹈空疏之弊。蓋州爲秦東郡地，晉析置濮陽國兼置兗州，領郡國八，理於此。唐以後置濮州，金屬

大名府，明改屬山東東昌府，領縣三，雍正八年改散州也。
藝文未附李先芳北山野史傳，自稱與李于麟謝茂秦爲友，文字
詭僻不經，亦足徵舊志之荒陋無人起而正其失矣。

嘉慶范縣志四卷

光緒丁未石印本

嘉慶十四年知縣唐晟修。

據舊序嘉靖十四年始修，萬歷四十一年縣人范汶續修，康熙十
一年知縣霍之瑄再修。

凡四卷，一沿革等，二古蹟等，三節烈等，四藝文。

縣爲漢東郡屬縣，其後因之，屬濮州。曹州立府遂來隸焉。

道光觀城縣志十卷

寫本

道光戊戌知縣孫觀修。

據序，一萬歷間榮陽喬君創輯縣志，康熙初武進沈君奉檄纂修

，相去未及百年而喬志已無善本。按喬名崑，萬歷十七年任，沈名璣，康熙十一年任也。序又云，一乾隆丙戌秀水盛秦川先生權篆斯邑，欲修邑志不果，後篆東昌濟寧諸志每見於涉於觀者輒手書之爲四卷，曰觀錄，本志引之。一盛名百二，所修濟甯州志已著錄也。

凡十卷，一二輿地志，三學校志，四秩祀志，五賦役志，六職官志，七選舉志，八人物志，九藝文志，十雜事志。

凡例云，一志書體裁乾隆年間有部頒式，依江南通志之例也。今事體條目大略皆仿其式。一

觀城蓋古觀國，開皇中置縣，唐宋屬澶州，明屬濮州，雍正十三年隨州改入曹州府。

光緒鄆城縣志十六卷

光緒十九年知縣胡建樞就康熙丙申志原本續增也。

據序，縣志始于隆慶元年知縣王敬，崇禎甲戌知縣米嘉穗又修，康熙乙丑知縣陳良謨又修，康熙丙申知縣張盛銘又修。又云，一傳聞正德初年有野人逸書紀鄆事大略，嗣趙若唐因之，稍加筆削彙成一冊。一則鄉里私撰不足與數，且亦旨遠難稽矣。凡十六卷，一方域志，二建置志，三田賦志，四學校志，五人物志，六職官志，七八選舉志，九災祥志，十忠節錄，十一十二節孝錄，十三至十五藝文錄，十六恩榮錄。

志於集市一門增添貨食，注明時日，俾後人得考經濟狀況，實徵特識，然謂舊志藝文不錄行迹，別邑史於家乘，誠不刊之論，則又過也。

縣爲漢廩邱縣地，開皇中置鄆州，改縣曰鄆城，以爲治所。唐移治須昌，以縣屬焉。雍正十三年改隸曹州府。

乾隆單縣志十三卷

乾隆三十五年知縣勒善修。

按舊序，隆慶己已知縣夏維藩順治甲子知縣徐化民（學部志目民字缺蓋未見此書也）康熙壬午知縣王鏞各一修。

凡十三卷，一舊序等，二輿地志，三食貨志等，四官師志，五六至八人物志，九至十二藝文志，十三雜志。

篇簡錯亂糝粘不可讀矣。

道光城武縣志十四卷

道光庚寅知縣袁章華修。

按舊序嘉靖乙丑知縣鄭漢一修，康熙庚戌知縣劉佐臨再修，康熙庚午知縣楊宮建三修，康熙壬午知縣趙嗣晉四修。其初志則

正德年中所修，因河患損失無存矣。

凡十四卷，一輿地志，二建設志，三食貨志，四學校志，五禮儀志，六職官志，七武備志，八選舉志，九人物志，十列女志，十一藝文志，十二金石志，十三外志，十四補遺。

縣爲春秋時郟地，秦漢置成武縣。隋唐曾置戴州，貞觀中廢州以屬曹州，明代忽譌爲城武，志稱鑄印之誤，殆必不然，是必有持厭勝之說特加土旁者，雍正以後，隸曹州府。

乾隆定陶縣志十卷

光緒二年知縣周忠重刊

乾隆十七年知縣雷宏宇修。

按舊序，嘉慶四十四年知縣唐桐始修，萬歷七年知縣黎邦口（此字元缺蓋以避諱故，刊志者不知臨文不諱之義遂致無所考矣）二十年知縣陳以見又修，二十六年知縣楊克順又修，順治十

二年知縣趙國琳又修。

凡十卷，一封域志，二建置志，三賦役志，四職官志，五選舉志，六七人物志，八雜稽志，九十藝文志。

定陶爲秦漢故縣，貞觀中省入濟陰，太平興國四年復置曹州，立府以後遂爲屬縣。禹貢濟水東出於陶邱北，鄭君云陶邱在定陶縣西，爾雅山再成曰陶丘，似是地名所由。志云，堯初居此故曰陶唐，殆非也。范蠡居陶爲陶朱公，蓋戰國時當齊趙梁宋之衝爲商業重地也。

道光鉅野縣志二十四卷

道光三十年知縣黃維翰修。

據舊序志始于嘉靖丙午知縣江廷藻，萬歷庚寅知縣殷汝孝天啓癸亥知縣呂鵬雲至康熙戊子知縣張宏各續修一次。黃氏但稱天

啓康熙二志不審何故。

凡二十四卷，一恭紀志，二編年志，三方輿志，四山川志，五建置志，六食貨志，七學校志，八秩祀志，九職官志，十口碑志，十一選舉志，十二十三人物志，十四烈女志，十五至十九藝文志，二十至二十二金石志，二十三風俗志，二十四雜稽志。其凡例云，「新采藝文及一切碑碣係名筆可傳者悉分載金石藝文二志，若文無可傳而其間事蹟覺有不能泯沒者只節存其略，用小字載於各碑碣之下。」又云，「碑碣文字除照舊志登錄外，間有文義不雅馴及過於冗長而又不能擯棄者悉就臆見所及略爲刪訂。」殊不知保存事實正要不易原文。志之所欲存者事也，不問其文之雅馴與否也，金石之文，一經點竄，義必泯矣，此治絲而棼之也。

其以宦蹟爲口碑，不免偏好詭異而無當於理也。

鉅野爲漢山陽郡縣，唐於此置麟州旋廢，五代及宋置濟州，金徙州治於任城，省鉅野縣，元復置爲濟州附郭，洪武以後仍治任城，以縣爲屬，雍正以後曹州升府，以縣隸焉。

乾隆濟寧直隸州志二十四卷

乾隆五十年知州王道亨主修，其實前任胡德琳藍應桂所經營也，前淄川知縣盛百二纂。

據舊序稱濟志明宏治時有莫驄所撰本而不傳，萬歷己酉濟寧道副使王國楨始創修之，康熙癸酉知州廖有恒續修。據其凡例則尚有康熙中知州吳標牧濟管試錄，崇禎時舉人鄭與僑有濟州遺事記。據山東通志則有正德間周品之濟寧衛志也。

濟寧初爲漢東平之任城縣，後漢爲國，後魏置濟州於濟北郡之碭城，元爲濟寧路，明初改府，繼降爲州，乾隆以後定爲直隸州，領金鄉嘉祥魚臺三縣。運河所經漕督駐所也。

書凡三十四卷，以聖製冠首，一紀年，二至六輿地，七至十建置，十一至十七古蹟，十八封建題名，十九職官，二十選舉，

二十一宦蹟，二十三至二十八人物，二十九三十列女，三十一至三十三藝文拾遺，三十四雜綴。

蓋濟寧事實夙富，記載又多，故卷帙獨豐。本書甄采周備，記注詳明，甚合撰志之法。至如排比位置不得其宜，如街衢門引史外傳逸陳氏卜居之事，宜別立著姓以紀之。雜綴門引楊士聰核真略明季流寇之事宜別立大事記以紀之。則當時秉筆者尙未足語此也。

道光濟寧直隸州志十卷

道光二十年知州徐宗幹修，咸豐戊午知州盧朝安始刊行之。

其志原一篇略謂一州志明成化初濟寧分司成化辛丑進士無錫莫騄纂，其書見於藝文志而萬歷時已不得其完本，又州志八卷，萬歷三十七年按察副使王國楨編，又州志十卷康熙十二年知州

廖有恒修，濟寧直隸州志三十四卷乾隆四十三年致仕山東按察使沈廷芳修，濟寧直隸州志三十四卷乾隆五十年知州王道亨又修，濼源書院山長盛百二補輯。一

一其屬縣之志，則金鄉縣志創始於明萬歷七年邑令商邱楊楫，其秉筆者爲邑人胡汝桂，康熙十二年邑令傅廷俊修之，五十一年邑令沈淵重修之，成十六卷，書皆不存。其有者乾隆三十三年邑令王天秀屬邑人孫巽之所撰也。嘉祥縣志明萬歷間邑令南郡龔仲敏創之，順治九年邑令遼左張太昇修之，邑人董方大實任其事，乾隆四十三年邑令長白倭什布重修之。魚臺縣志順治九年邑人朱之玉所修者久佚，康熙三十年邑令馬君續修，乾隆二十九年邑令雁門馮振鴻又修之，即今所存者是也。一

一其兗州府志則有四十卷，康熙二十三年知府遂寧張鵬翮因明穀山于文定公慎行所纂重加修輯，又續編二十卷康熙五十八年

知府山陰金一鳳因張志續修，惟田賦戶役二門就前編補入，餘與張志各自爲書相輔而行，體例最善。一

本書凡十卷，一星野志五行志大事志，二方輿志山川志，三食貨志風土志，四建置志兵革志，五學校志秩祀志名勝志，六職官志，七選舉志，八人物志，九藝文志，十雜稽志。

其風土篇中鄭輿僑儉戚說及徐氏諸公牘摹繪習俗至爲周悉，附義宅義田亦可考見社會制度，惜語焉不詳耳。他志乃並此無之也。

咸豐年濟寧州續志四卷

咸豐九年知州盧朝安修，朝安既刊道光志，更續此志也。其時軍事漸興而寇氛尙未到濟寧，所紀已及城守團練之事矣。

書凡四卷，一星野志五行志大政志建置志兵防志學校志，二職

官志選舉志，三人物志，四藝文志。

咸豐金鄉縣志四卷

咸豐十年前通城縣知縣縣人李壘撰。

按序，一金鄉有志自明萬歷中楊侯始，國初有傅志多所裁損，沈志復補之，乾隆中重修者有王志。一楊名楫，傅名廷俊，康熙六年任，沈名淵，四十四年任，王名天秀，乾隆三十年任。本書於舊志序跋全刊去不載，其失甚矣。

凡四卷，一志序姓氏志圖輿地建置食貨學校，二秩祀兵防職官選舉，三列傳藝文，四事紀補記。

金鄉爲古緡國，漢置東緡縣，後漢析置金鄉縣，以山爲名也。唐屬兗州，元屬濟甯路，明復屬兗州，乾隆四十五年定屬濟甯州。

光緒嘉祥縣志四卷

光緒二十四年知縣章文華修。宣統二年刊成。章氏會稽人，不解何以無一語及實齋也。

縣志蓋始于萬歷間知縣龔仲敏，一修于順治壬辰，再續于乾隆戊戌。本書既不著歷修姓氏，學部志目亦以順治志爲龔氏撰，皆率爾之過。順治志蓋張太昇，乾隆志倭什布修也。

凡四卷，一方輿志建置志食貨志祀典志，二職官志選舉志，三人物志，四藝文志。

縣本任城鉅野縣地，金皇統中析置今縣，取義於獲麟也。雍正後爲濟寧州屬縣，漢武氏祠石刻在此。

乾隆魚臺縣志十二卷

乾隆丁丑知縣馮振鴻修。

據凡例，舊志修于順治九年者已不可見，續修于康熙三十年，迄今已逾七紀。按職官傳順治志修于知縣王榮國康熙志修于知縣馬得禎也。

魚臺爲春秋之堂邑，漢方與縣，唐寶應中改今名，明以來爲兗州府屬縣，運河所經也。

凡十三卷，一輿地，二山水，三災祥，四建置，五舊蹟，六賦役，七學校，八祀典，九職官，十選舉，十一人物，十二列女，十三藝文。

光緒魚臺縣志四卷

光緒十五年知縣趙英祚繼乾隆馮志而作也。

凡四卷，一方輿志山川志建置志舊蹟志食貨志，二職官志選舉志國朝選舉表，三人物列女，四金石藝文。

其金石志頗蒐漢石刻，勝舊志之棄陋多矣。

順治登州府志二十二卷

康熙甲戌知縣任崧刊成
附乾隆續志十二卷

順治庚子提督學政按察僉事施閩章等修。

其凡例云，此書本之水經注杜氏通典齊乘一統志山東通志仍以泰昌舊府志參之，其嘉靖志已亡而八屬志亦未備，未免闕漏。若通志誤以東海祝其爲在今府境之類，實賴本書爲之糾正也。凡二十二卷，一星野災祥，二沿革疆域形勝山川，三城池公署，四學官祀典，五武備，六鄉都坊市橋梁宮室，七古蹟陵墓寺觀，八物產風俗，九戶口田地賦役驛傳，十兵事海運，十一封建宦蹟，十二十三職官，十四十五辟舉科貢封廕武弁，十六十七人物，十八流寓列女仙釋，十九二十二十一藝文，二十二雜志。

本志雖續修于康熙三十三年知府任璿，然所續順康間事殊不甚

多。其序論諸篇彬彬雅可誦，蓋猶施氏手筆。至於卓然史裁則猶未逮，舊序云草創于愚山討論於亭林，恐未然也。

未附乾隆續志，乾隆七年知府永泰修。專補康熙三十年以後之事，其大者如榮成海陽二縣之分設海運之停止，皆是也。

光緒登州府志六十九卷

光緒七年知府費湘修。

其序曰，一郡縣之志，守土者固無以辭其責。然吏從遠方來，於茲土素無雅故，惟鄉人士君子有篤念桑梓論著於錄者，而後長吏有所因以藉手。昔者先聖言夏殷之禮而愾歎於杞宋文獻之不足徵，良有以也。茲瀏覽所屬舊志，其因此以成書者多矣。今茲之役，求之不少概見何歎。夫留心文獻，未可責於俗吏，而能以論著成書有資文獻者，亦未可以望之於俗人。彼其人已

雅意著述矣，類不樂與俗吏爲周旋，使出其所著投諸吏手鮮有不按劍以相眇者。此其秘而不出也固然其無足怪，今余爲此役，竊不敢自儕於末俗矣，乃亦求之而不出，豈郡地諸牧令猶有未能免俗者乎，抑亦諸君子懲於曩之按劍遂病於獻玉者之再別乎，否則留意於文獻者寡而無復如昔日人士之盛也乎，余甚惑焉。伏願自今以往長民者皆不以俗吏自爲，而鄉人士君子亦有以樹文獻之望，無使郡邑故事至於頽敗不可收拾焉。一其言也蓋爲鄉里人士不肯舉故實以相資也。夫方志之撰集，仰給於鄉人之飲助者，若譜牒也，傳狀也，著作也，古物也，傳聞也，非以公誠之心悉索而獻之於秉筆者之手，則雖班馬復生亦難成傳世之作。無如鄉人狃於蔽習，其送上官府者，類爲空洞不實之家狀，苟冀附名邑乘，取寵一時。甚至請托贈遺，踵門而至。秉筆者兼容并收不加別白，則殺青以後不外節孝名冊風月閒

吟，充塞篇幅而已。此所以舊志動遭詬病無肯閱之終卷者也。其失也，蓋由鄉里人士不能深明撰志之宗旨與夫著作之必資忠信而後能傳。而采訪諸人亦不能明訂標準躬自探討，若章實齋之親訪婦女，咨其生平。於是求之者與供之者兩皆趨於歧路。此一說也。更有進者，一邑之故實不能獨責之民間。縣庭掾史典柱下之藏，凡出入之文移，貯庫之物品，老吏之傳聞，何一而非志之資料，以守土之官，當書筠之職，固可悉數徵集以入於書，豈有聞見空疏之患哉。賈氏雖未能見及此，而知屬望鄉人之留意文獻，固猶具深衷者哉。

書凡六十九卷，一至六疆域志，七至十六營建志，十七至二十三食貨志，二十四至三十七職官志，三十八至四十八選舉志，四十九至六十忠節志，六十一至六十四藝文志，六十五至六十九金石志。

登州府志有順治本爲之前驅，乾隆續修于後，而未加更張。本志斷自升府，而以升府以前之事附列于後，復統爲八志，綱舉目張。其講求義例尤勝於施氏。自比於歐陽之繼宋薛，亦非盡詡辭也。

道光蓬萊縣志十四卷

道光十九年知縣王文燾修。據序，前志爲康熙十二年知縣高崗所修也。

凡十四卷，一天文志，二地理志，三文治志，四武備志，五食貨志，六官職志，七八選舉志，九十人物志，十一恩綸志，十二至十四藝文志。

觀其自序，於舊志蓋鮮所變革。其地理志至以縣城龍脉爲言，其陋可想。

光緒蓬萊縣續志

光緒八年知縣鄭錫鴻等修，繼道光志而作。體例如舊而事實不充。

乾隆黃縣志十二卷

乾隆二十一年知縣袁中立修。

按序，舊志創于嘉靖辛丑知縣賈璋，一修于崇禎庚辰知縣任中麟，再修于康熙癸丑知縣李蕃。

凡十二卷，一圖考志，二疆域志，三建置志，四賦役志，五典制志，六職官志，七八人貨志，九紀述志，十十一藝文志，十二忠烈志。

其圖考志之名已未允協，風俗祥異軍旅著述四項謂之記述志，

彌爲無理。

漢故黃縣，屬東萊郡，唐先天中析蓬萊之黃冠村立今縣，明以後爲登州府屬。史記秦伐匈奴使天下飛芻輓粟起於黃腫，即縣名所始矣。

同治黃縣志十四卷

同治十年知縣尹繼美修。

尹氏序曰，一縣志創修于嘉靖乙巳知縣賈璋，再修于崇禎庚辰知縣任中麟，康熙癸丑知縣李蕃三修，乾隆丙子知縣袁中立四修，其書因陋襲謬，不貫不該。一其凡例詆舊志於李篤傳引後漢書外黃令毛欽脫去外字。又太倉公澹于意史記明著臨淄人志乃載作黃人。諸如此類，信可訾矣。

凡十四卷，分疆域營建食貨賦役祥異秩官選舉人物藝文雜事十

志。

志既力矯舊志之舛陋，故於沿革古蹟引証頗賅。黃故漢縣，唐以後隸登州，洪武九年升登州爲府，以縣屬焉。

光緒棲霞縣志十卷

光緒五年知縣黃麗中修。

按舊序萬曆壬子知縣胡修康熙壬子知縣胡璘乾隆甲戌知縣衛萇各一修。

凡十卷，一疆域志，二建置志，三典祀志，四賦役志，五官師志，六七人物志，八祥異志，九十藝文志。

本書蓋就乾隆志原本而以乾隆後事續於其末。

縣爲唐蓬萊縣之陽疇鎮，金於此置淘金所。齊阜昌中始置今縣，洪武九年升登州爲府，以縣隸。郝懿行王圓照之故里也。經

師才媛風流相映，而本志不采曬書堂集紀其家世遺聞著述種類，無非拘於俗例之過也。

順治招遠縣志十二卷

道光丙午重刊

順治十七年知縣張作礪修，縣人張鳳羽纂。

據凡例邑無舊志，故取郡志之涉縣事者爲之。

凡十二卷，一星野等，二山川等，三學宮等，四風俗，五物產，六賦役等，七職官，八科貢，九人物等，十至十二藝文。

縣爲掖縣屬之羅峰鎮，今始置縣，屬定海軍，明初升登州爲府。割萊州之招遠萊陽隸焉，海濱僻處，蓋無可紀。

道光招遠縣續志四卷

道光二十五年知縣邊象曾修。

據序。康熙初年奉勅纂一統志，先令修進直省通志。山左各府州縣計陸續報修一百十四部，無志者祇霑化一縣，其順治年間修輯迄今二百餘年未經續修者，泗水招遠二縣而已。一招遠於宋爲羅峰鎮。改置爲縣自金始，無怪故實之無可稱。本書僅零星續補前志成志體者也。

其物產篇云，一問有增入亦稽諸類書。一夫志一邑之物產豈稽諸類書所可辦。其知識若此，毋怪各志中之物產無非雷同矣。

康熙萊陽縣志十卷

康熙十二年知縣萬邦維修，亦奉朝旨循衛周祚之請也。據府志初修舊志多取材於順治間張允齡志稿，然據本書所錄舊序萬歷十一年知縣程時建已有修本也。

凡十卷，一疆輿志，二建置志，三食貨志，四學校志，五官師

志，六頁舉志，七典禮志，八人物志，九外紀志，十藝文志。卷首載奉檄催繕成書情形，其率濫可知。

萊陽漢昌陽縣地，後唐避李國昌諱改今名，洪武九年自萊州府改隸登州府。

同治寧海州志二十六卷

同治三年知州舒孔安取縣諸生宮卜萬稿而刊之。

按舊序志始于嘉靖丁未知州李維孝，修于康熙十一年知州楊引祚也。

凡二十六卷，一沿革天文，二三疆域，四食貨，五風俗，六至十建置，十一封建，十二至十六職官，十七至二十四人物，二十五藝文，二十六外書。

其古蹟考蒐采頗豐，外書一篇有海山七真人考記金元間道教傳

說，可珍也。

州相傳爲春秋牟國，隋唐曾置牟州，劉齊置寧海軍，旋升州，此州名所自來也。明以來屬登州府。

道光文登縣志十卷

道光十九年知縣歐文踵前任蔡培修成，前志修于雍正三年知縣王一夔也。

凡十卷，一星野等，二賦役等，三職官，四選舉，五人物等，六列女，七寺觀等，八九藝文，十雜文。

縣爲周牟子國，漢爲不夜縣地，北齊析牟平置今縣，取山爲名。武德中置登州治焉。洪武中升爲府，縣與寧海州並隸焉。其沿海三衛，成山於雍正間建築成縣，威海靖海二衛仍歸文登。威海在縣南九十里，靖海在縣北一百二十里。

道光榮成縣志十卷

道光庚子知縣李天隲修，前志修于乾隆十五年知縣李文瀾也。凡十卷，一疆域，二建置，三食貨，四學校，五典禮，六職官，七選舉，八人物，九藝文，十外志。

本文登縣地，明置成山衛，雍正十二年裁衛設縣，立今名，屬登州府。斗入海中爲海運海防要地。

乾隆山東海陽縣志八卷

乾隆七年知縣包桂纂修。

據凡例暨沿革所載，海陽舊爲大嵩衛，雍正十三年請裁四衛等事，始割萊陽，加大嵩舊地爲新邑，奉旨定名海陽。故原無舊志也。海澨小邦，故實寥寂，本書勉存形式而已。觀其卷首所

列分類次第說及海陽十景圖，舛陋可知。

書凡十卷，一二圖說星野沿革疆域，三山川都鄙橋梁陵墓古蹟災祥戶口田賦風俗，四物產鹽法海道學校建置祀典，五驛遞兵務積儲職官科貢文武，六封蔭人物列女外紀，七藝文，八詩。

光緒山東海陽縣志十卷

光緒六年知縣王敬勳修，南河補用副官李爾梅舉人姜式甫纂。據舊序，乾隆創修縣志後，尙有道光十九年知縣朱家學續修本。其凡例云，舊志成於乾隆七年，距改縣僅六年，故所志多大嵩衛事。今志則存舊例而續增新事而已。

書凡十卷，一沿革建置山川都鄙海道災祥風俗古蹟，二官制敍官戶口田賦鹽法，三學校兵防驛遞積儲秩祀，四科貢辟舉獎叙封蔭，五文武人物外紀，六列女，七殉難物產，八九十藝職。其分類瑣屑彌不如乾隆志也。

乾隆萊州府志十六卷

乾隆五年知府張桐取前任嚴有禧修本刊行。

據舊序，萊志則修于嘉靖中郡守胡公，萬歷三十一年知府龍文明重修，其後繼以陳志。陳志者，知府陳謙所輯，康熙四十七年任也。山東通志謂明詩鈔引王士祿云，萊乘一編文獻所資，萊乘者明末掖縣畢拱辰所撰也。

凡十六卷，一星野等，二城池等，三丁賦等，四學校等，五兵防等，六封建等，七選舉，八封蔭，九官蹟，十至十二人物，十三至十五藝文，十六大事記等。

據其凡例駁訂舊志之誤，如云舊志以慕容德所居之廣固爲今陝西成固縣，舛謬誠匪夷所思。本書細爲推較不使或有濫遺。其用力有足多者。然其義例則猶是俗裁也。

萊州始置於唐，明以來爲萊州府。領縣五州二，掖縣平度州濰州昌邑膠州高密卽墨。

乾隆掖縣志八卷

附嘉慶續志四卷道光續志二卷光緒續志四卷

乾隆二十三年知縣張思勉修，嘉慶十二年知縣張彤續修，道光二十二年知縣楊祖憲又續，光緒十二年知縣魏起鵬三續，凡四種合裝，亦創例也。然眉目不分明，殊難卒讀。

初志凡例云府志皆資邑乘而修，掖旣無志反取府志爲嚆矢。又參熊稿及毛氏志林志小草本，蓋明代無志也。

凡八卷，一星野等，二賦役等，三職官等，四封廕等，五仙釋等，六七八藝文。

掖爲漢東萊郡縣，自唐以來爲萊州理所。明洪武以後升府，遂爲萊州府附郭縣。

康熙平度州志十二卷

康熙丙午知州李世昌修。

按本書藝文志有官廳志序，蓋修于正德丙子也。

凡十二卷，一沿革等，二田賦等，三名宦等，四人物等，五褒封等，六祀典等，七至十二藝文，末附膠萊河輿論及全圖。膠萊河，元人鑿以漕江南粟者也。明開會通河而膠萊遂廢。茲篇爲前知州杜志口作，錄存之以見修復之利害也。

道光平度州志二十七卷

道光二十九年知州吳慈修，掖縣李圖纂。

凡二十七卷，一圖說，二沿革表道里表封建表，三歷代職官表，四明職官表國朝職官表，五選舉表，六國朝選舉表，七封贈

表，八山川志，九建置志，十物產志風俗志，十一賦役志，十二典禮志，十三學校志，十四兵防志藝文志，十五王侯列傳，十六官師列傳，十七歷代人物列傳，十八明人物列傳，十九國朝人物列傳，二十二十一列女列傳，二十二僑寓外徙列傳方外列傳，二十三形勝考古蹟考，二十四金石考，二十五訛遺考，二十六大事記，二十七雜記。於前志訛誤頗多訂正。平度爲漢東萊郡屬縣，兼爲盧鄉地，唐以後爲膠水，明改置平度州屬萊州府。

乾隆濰縣志六卷

乾隆二十五年知縣張耀璧修，長洲舉人王誦芬纂。

據舊序志始于萬歷癸酉，序之者南京工部尙書縣人劉應節。實縣人劉廷錫所撰也，繼修于康熙壬子知縣王珍。

凡六卷，一輿地志，二建置志，三田賦官師選舉志，三典禮志，四人物志，五六藝文雜稽等志，

隋開皇中始置濰州，明洪武中降爲縣，隸萊州府，清因之。

志於古籍中泛及齊事之語多爲引用，已屬不合。而藝文中有劉以貴濰水源流考一篇，翔實可稽，不以入之輿地志，則其用不顯。雜稽志漫錄古書中近於荒唐之言數則，而並不注其出處，皆循例敷衍而已。不足責也。

乾隆昌邑縣志八卷

乾隆七年知縣周來邵修。學部志目作來邵誤也。

按序知前志修于順治辛丑黨丕祿，明志則萬歷戊寅知縣侯鶴齡也。然學部志目尙有康熙志知縣許全臨修也。

縣爲漢北海都昌縣，宋建隆中置今縣，明屬萊州府，非漢山陽

之昌邑也。

凡八卷，一星野等，二城池等，三戶口等，四學校等，五勳土等，六人物等，七坊表等，八藝文。卷帙窘短蓋故實甚少也。

咸豐青州府志六十四卷

咸豐己未知府毛永柏修，前四川按察使郡人劉耀椿等撰。

據舊序，嘉靖乙丑年知府杜思始修，萬歷乙卯年知府王家賓復修，康熙己丑知府張連登辛丑陶錦兩次修，道光壬寅議修而未卒業。據明史藝文志嘉靖志蓋臨胸馮惟訥所撰。又鍾羽正有青風土記四卷也。而山東通志載曹琬有青州考也。

凡六十四卷，一輿圖，二沿革表，三道里表，四封建表，五至十一職官表，十二武職官表，十三滿洲駐防職官表，十四王侯官屬表，十五至十九選舉表，二十襲蔭表，二十一二山川考，二十三形勝考，二十四古蹟考，二十五六七營建考，二十八學校考，二十九兵防考，三十郵政考，三十一賦役考，三十二風土考，三十三藝文考，三十四至三十七名宦傳，三十八至五十

人物傳，五十一術藝傳，五十二仙釋傳，五十三僑寓傳，五十四五雜傳，五十六至六十二列女傳，六十三祥異記，六十四雜記。

青州自隋唐以來治益都，故元爲益都路，明興仍改青州，曾爲山東行省治所，雍正間升莒州爲直隸州，沂州爲府，定轄縣十一，曰益都博山臨淄博興高苑樂安壽光昌樂臨朐安邱諸城。本書體裁雅正，在山左諸志中爲上駟。光緒臨朐志稱其博雅精密足爲傳信。雖不免過當，要爲難能者也。

康熙益都縣志十四卷

康熙十一年知縣陳食花修，應一統志之徵也。

凡十四卷，一疆域等，二戶口等，三官署等，四城池等，五封建等，六選舉，七八事功，九忠義等，十僑寓等，十一十二遺文等，十三藝文，十四雜志，所采人物蓋莫知所自。

光緒益都縣圖志五十四卷

光緒三十年知縣李祖年主修，膠州法偉堂編纂。

據官師志，萬歷四十四年知縣田仰始修縣志，據卷末所錄楊璉一文，則稱「聞諸青之有志也蓋自洪武天順間已有創始者。」康熙間知縣陳食花開志局，閱三月而書成。（據凡例稱在康熙十七年而官師志則稱康熙十六年王綽任知縣且蒞任六載下注見舊志又見十七年孝子張獻策墓碑）再檢所錄舊序明云康熙十一年知縣事陳某題，而覆按官師志則是年知縣實華祖芳。三者互歧，不可詳矣。

據李氏序稱，「善乎龔定庵之言曰，作志者當思君子卑遜之道，直而勿有之義，宜繁不宜簡，誠爲知言。予與小山先生（任氏）往復切磋，力持此議，先生亦深韙之。故新志之成，增於

舊志者十七八，人物一志尤爲詳盡。然先生尙以未能爲李之才作佳傳，恨搜輯之多逸焉。一然則其編輯宗旨在力求詳贍，論甚正大。然檢其所錄，則凡屬青州範圍者罔不列入。是直青州府志而非益都縣志也。蓋自北齊移益都爲青州治所，相沿千有餘年，其分析固有不易者。故志中之古蹟山川二篇直以府志爲主，（見凡例）蓋亦有不得已者與。

其號爲圖志者，於圖表特詳，且采新法爲之，遠非舊志疏闊者可比也。凡圖之屬爲四卷，一天象，二地形，三道里開方，四水道。志之屬十六爲五十卷，一大事，二疆域，三山川，四風土，五古蹟，六營建，七官師，八食貨，九典禮，十學校，十一選舉，十二武備，十三藝文，十四金石，十五人物，十六雜志。

疆域古蹟諸篇皆考證詳明，而風土志中載趙行志趙執信二文，

於明清二代風俗尤有存古之功。要之近代方志中之能逮此者尙
尠，稍復過繁，不足爲大病矣。

乾隆博山縣志十卷

乾隆癸酉知縣富申修。

凡十卷，一星野等，二城池等，三戶口等，四兵防等，五古蹟
等，六名宦傳等，七孝友傳等，八列女傳，九藝文志，十雜志
縣在金爲淄川縣之顏神店，雍正十二年設縣，仍屬青州府。

博山出鐵及石炭，其土宜陶，陶業爲縣之利源，其來已久。又
其特產有淄石黃丹白礬綠礬，合此數者能製琉璃。琉璃之入中
國遠在漢時，魏書西域傳復言月氏人傳其法於中國，隋何稠別
加發明，遂爲吾國特殊工業。博山獨擅其製。是建邑雖晚而所
繫甚重也。

道光博興縣志十三卷

道光二十年知縣周壬福修。

按舊序，有明知縣陸南至一序，蓋在萬歷二十一年也。康熙十三年知縣萬雲五十八年知縣李元偉各一修。

凡十三卷，一疆域志，二河渠志，三建置志，四賦役志，五風土志，六典禮志，七爵封表，八秩官表，九選舉表，十宦績志，十一人物志，十二列女志，十三雜志。

其條例一曰擇善以從古，謂開方製圖也。二曰從時以適宜，謂水名從今稱而注以即古某水也。三曰因序以見誼，謂篇第也。四曰反實以徵信，謂芟去濫收諸人也。五曰博採以求暢，謂志在乎此而事連乎彼，故雖地有所限而義不可不求其通，開方新圖已備今之輪廣，而古今遷徙之迹則必待歷代沿革圖而後明。

，水道圖與河渠志雖紀一邑之水，然必參以舊志水道全圖而後水之源委備，廣採前人論說而後水之始末見，故曰博援以求暢也。六曰摘詞以省繁，謂河渠以志水利，而舊志備載上下申剗案文動數萬言，列女或旌與否其從一之終固不待問而知也，而志家載侍藥祈代孝舅姑撫孤等語每每相複，反無以信其必然，茲編於河渠擇其濬築之要而刪其枝葉語，列女除一二奇節事迹少異者有傳，餘第記姓氏也。七曰比義以起例，謂執一事以爲斷則難足合數人以較論則立辨也。八曰分類以備體，謂史記列傳皆題姓氏惟循吏儒林游俠諸傳人多事簡乃立篇目以統之，初非爲品題人物，唐書五代史法其意而忠烈死事一行諸傳要皆有截然不可淆者，後之爲志者每人而立之目反無以見分隸之確然，是以通志黜之，統曰人物，今依其例也。九曰致詳以存舊，謂近代方志紀人物多不能述事實，寥寥作贊語，幾無以傳信後

人，而於正史所載各傳又隨意割截，謂可與己文修短相稱，而不知於古人生平得失已歿其真，明交邱馬中丞文煒東阿于文定公慎行修其邑志皆錄正史全文，本朝李南礪文藻歷城諸城志亦然，茲自三國至唐宋皆錄正史原文，惟明時距創志未遠所聞或詳于正史從舊志也。十曰缺疑以待後，謂舊志所載往往傳聞不暇詳考，而志之與正史舛異者已爲辨訛數條，其餘無以稽其是否爲存疑也。一於舊志弊習，糾抨多允。

縣爲古薄姑地，漢曰博昌，後唐避李國昌諱改今名，明以來爲青州府轄縣。

乾隆高苑縣志十卷

乾隆二十二年知縣張耀璧修。

康熙十一年五十五年有知縣宋弼古今譽二志，見學部志目，本

書未道及之。篇幅窘短，僅注意小清河議而已。

凡十卷，一沿革等，二建置志等，三職官志等，四學校志等，五選舉志等，六人物志等，七賦役志等，八藝文志等，九河渠志等，十災祥。

漢千乘郡之高苑縣也，明以來隸青州府。

雍正山東樂安縣志二十卷

雍正十一年知縣李方膺修。

按舊序志始于成化間知縣沈清。嘉靖丙午縣人太僕寺卿李舜臣及萬歷癸卯知縣孟楠各一修。（學部志目孟作高誤）

凡二十卷，一星野，二建置，三川澤，四城池，五田賦，六公署，七學校，八兵防，九職官，十選舉，十一宦績，十二人物，十三恩榮，十四列女，十五風俗，十六物產，十七祀典，十

八五行，十九雜記，二十藝文。

本志建置篇以縣爲西漢千乘郡之千乘縣而無據，方輿紀要則以爲漢齊郡之廣饒縣，蓋本胡朮禹貢錐指說也。隋移千乘縣治此，唐曾置乘州，旋廢，金天眷中改今名，明以來屬青州府。

本書卷十九有外徙一篇，記明代縣人外徙者五姓，此實獨創之例，精識過於恒人。蓋一邑居民來去遷徙必有所因，皆足以窺政教之移易與夫一方隆替之漸。昔之爲志者能注意於內徙之家族已甚鮮矣。其進而及於外徙者，前此尙未之有也。本書惜亦僅能舉此五人而不能徧考耳。

嘉慶壽光縣志二十卷

嘉慶四年知縣劉翰周修。

按序，舊志修于康熙三十年知縣劉有成，乾隆二十年王椿續修

，據學部志目則尙有雍正志知縣李方膺修也。本書抨擊前志以樹鄒爲樹灌以符秦時王猛爲秦人次于漢魏前，又如劉錯劉賞諸人應載而不載，任昉竇瑛段文珍諸人或不應載而載，至於蘇秦墓東方朔墓沿襲無稽，悉從傳會。誠爲精審。然亟稱武功志不置，其識度抑凡近矣。

壽光漢縣兼平望鉅定劇縣地，明以來爲青州屬縣也。本書前有天津吳人驥序中述古樹灌國之在壽光頗詳辨。

凡二十卷，一至六輿地志，七建置志，八九食貨志，十秩官志，十一貢舉志，十二至十六人物志，十七至十九藝文志，二十雜綴。

嘉慶昌樂縣志三十二卷

嘉慶二年知縣衛禮焯修，其前志則刊於康熙十一年知縣賀基昌

也。

凡三十二卷，一二總紀，三星野考，四山川考，五古蹟考，六建置考，七典禮考，八田賦考，九風俗考，十兵防考，十一藝文考，十二封建表，十三沿革表，十四秩官表，十五選舉表，十六武科表，十七議叙表，十八誥勅表，十九宦績表，二十鄉賢傳，二十一忠義傳，二十二孝友傳，二十三事功傳，二十四篤行傳，二十五文學傳，二十六武胄傳，二十七高士傳，二十八一行傳，二十九僑寓傳，三十方技傳，三十一三十二列女傳。大致仿萬歷安邱志而作。

縣爲漢營陵縣北海郡所治，隋唐改營邱，宋改今名，明以來屬青州府。

光緒臨朐縣志十六卷

光緒十年知縣姚延福修。

據凡例，一舊志創于嘉靖三十一年知縣王家士，再修于康熙十一年知縣屠壽徵。今明志不存，存者屠志。其於掇拾舊文排比故事使踵事者有所憑藉不可沒也。然體例踳駁，文詞繁碎，於山水則樵寫林壑，於藝文則綴輯詩賦，或六典攸闕缺而弗錄或一人數傳複而無敘。一又云，一舊志之目四十有六而無子目，龐雜之弊不可勝言，如志輿地矣而不考沿革，志山川矣而不序險隘，此爲有名無實之弊也。志坊表鄉社矣而又列鋪舍市集，志鄉領耆賓矣而又別傳耆耆者，此覺牀架屋之弊也。一其所抨彈實爲痛切。然明志明見學部志目而云不存，何也。

明末縣人傅國有昌國餘鱣一書，取宋昌國縣名名之。書作于嘉靖修志後五百餘年，爲尹志所本。刊本已無存，本志據其後人手寫本引用多條，亦縣志之別行者也。

本書凡十六卷，一輿圖疆域，二沿革，三山水，四古蹟，五建

置，六賦役，七學校，八風土，九藝文，十大事表，十一秩官表，十二科貢表，十三宦績，十四人物，十五列女，十六雜記。事實多出采訪及輯縣人著述而成，詳博非苟作也。

臨朐爲齊之駢邑，漢置縣屬齊郡，唐宋屬青州，元省入益都，尋復置，明以來屬青州府。劉裕參軍胡藩大破南燕兵之地也。漢朱虛侯國亦在今縣東六十里矣。

萬歷安邱縣志二十八卷

附康熙續志三十五卷

萬歷己丑知縣熊元修，縣人江西巡撫馬文煒纂。

凡二十八卷，一總紀，二星野考，三山川考，四古蹟考，五建置考，六典禮考，七雅樂考，八賦役考，九風俗考，十方產考，十一藝文考，十二歷代地理沿革表，十三歷代封建表，十四歷代秩官表，十五歷代貢舉表，十六明興以來地封表，十七宦

蹟傳，十八儒林傳，十九事功傳，二十文苑傳，二十一武胄傳，二十二高士傳，二十三篤行傳，二十四孝義傳，二十五僑寓傳，二十六列女傳，二十七雜見傳，二十八儼德傳。其曰雜見傳者，以處無可歸類之人，其曰儼德傳者則盜賊之倫也，命名皆詭誕不安。安邱相傳爲莒渠邱地，漢置縣屬北海郡，後漢曰安平，晉仍曰安邱，明以來爲青州府屬縣。

本書總紀一篇爲一邑編年之史，輔以歷代地理沿革封建表綜核詳明，法度嚴整。人物諸傳不改史文，而每人並著時代尤遠勝他志之雜糅鋪敘。故明諸志能臻此境者鮮矣。

末附康熙續志二十五卷，康熙二年知縣任周鼎修，大致守前志繩尺。但去其地理封建儼德三門。

惟前志雅樂一考本屬贅旒，已爲四庫提要所譏，而續志仍復襲未芟，續以泛語，實無謂也。

乾隆諸城縣志四十六卷

附道光續志十一卷

乾隆甲申知縣宮懋讓修。

序云一萬歷癸卯知縣王之臣（學部志目之作立誤）屬縣人兵備使陳君煒爲志，其於建置因革多謂本永樂間鈔志。及康熙癸丑知縣卞君穎重修之，全用其文而續以後七十年事。一

凡四十六卷，爲總紀二。爲考十二，曰星野疆域山川建置古蹟田賦武備風俗方物藝文金石。爲表十一，曰歷代地理沿革歷代封建歷代職官歷代選舉國朝選舉明景泰以來議敘明洪熙以來誥勅歷代襲廕雜見。爲錄二，曰宦蹟。爲列傳十八。

其體例蓋秉之宮氏親裁。諸考除藝文金石外，皆剪裁爲文，雅飭可誦。非如他志條列而已。其於星野力闢俗說之誣，於風俗力祛雷同之陋，可謂卓然。然恨其偏重文詞，於事實尙少記注

耳。

宮氏字杜洲，秦縣人，由副貢以知州借補來縣，筮仕東省歷二十年，乾隆二十九年題補濱州，人方恨其去，旋以病未赴卒於縣館。本志宦績錄未載此事。蓋志甫成而宮氏卒，縣人爲補入也。

附道光續志十一卷，道光十四年知縣劉光斗修，候選知縣舉人富平朱學海纂。一依前志規模，續增乾隆以來事實。於前志之遺闕亦稍有掇補。縣之劉王二氏代有聞人紀之特詳也。

道光膠州志四十卷

道光二十五年知州張同聲修。

按舊序州志始于萬歷十九年知州余邦輔，康熙十二年知州孫蘊韜，乾隆十七年知州宋文錦各一修。

據凡例，康熙志成而有張謙宜州志別本正其得失，乾隆志成而有法坤宏法古篇之新志刊誤二十五條，張賓雁更爲劉志疏證三卷糾其全書，爲州志前編七卷補其疎漏也。

本書凡四十卷，一圖，二沿革表，三道里表，四封建表，五歷代職官表，六元職官表，七明職官表，八本朝職官表，九金元選舉表，十明選舉表，十一本朝選舉表誥敕表，十二山川志，十三建置志，十四物產志，十五風俗志，十六賦役志鹽法志，十七典禮志，十八學校志，十九兵防志，二十藝文志，二十一

侯王歷代官師傅，二十二明官師傅，二十三本朝官師傅，二十四歷代人物傳，二十五明人物事功文苑傳，二十六明人物忠節孝友篤行傳，二十七本朝人物事功傳，二十八本朝人物文苑傳，二十九本朝人物忠節孝友篤行傳，三十藝術傳，三十一僑寓外徙傳，三十二三十三列女傳，三十四大事記，三十五祥異記，三十六雜述記，三十七形勝考，三十八古蹟考，三十九金石考，四十訛疑考。

其凡例翹舉十條，一曰審名以紀地，二曰據地以書人，三曰本官以述政，四曰尊時以考禮，五曰因民以紀事，六曰取獻以徵文，七曰法古以辨體，八曰博采以備義，九曰辨誣以存信，十曰附今以待後。其於古事之去取主嚴，故膠東膠西等及已變之海運削而不書。其於俗例之混淆膚泛殊不謂然，故災異風俗物產等非屬於本土者亦削而不書。可謂能力矯浮濫之弊者也。

乾隆高密縣志十卷

乾隆十八年知縣張乃史修。

按舊序萬歷乙巳知縣唐允中始修，康熙庚寅知縣張浩復修。

凡十卷，一輿地志，二建置志，三賦役志，四典禮志，五學校志，六官師志，七選舉志，八人物志，九藝文志，十雜稽志。水經注云，縣有密水故有高密之名。漢爲高密國，開皇三年改膠州爲密州，以高密縣屬之。元於膠西縣置膠州，以縣屬焉。明以來隸萊州府。

光緒高密縣志十卷

光緒二十二年知縣傅賚予修，繼乾隆志而作也。

凡十卷，目如前志。

其藝文中載鄭玄諸文，此豈可盡耶。雜稽中所引各書均不載出處，抑非法也。

同治卽墨縣志十二卷

同治壬申知縣林溥修。

據所錄舊序，縣志創于萬歷七年知縣許鍵，修于乾隆二十八年知縣尤淑孝，又百三十年而後有今志也。

凡十二卷，一方輿，二建置，三學校，四武備，五賦役，六職官，七選舉，八名宦，九人物，十藝文，十一大事，十二雜稽卽墨爲瀕海口岸。今之所謂青島，卽縣屬之一島也。自明以來海防通商胥爲要政，本志藝文雜稽兩篇中紀之頗詳。

膠澳志十二卷

民國十七年膠澳商埠督辦趙琪請袁榮叟編纂，蓋方志中之晚出

者矣。然所述事實雖新而體例則多仍舊，舉其細目以俟參評。

一沿革志，曰歷代設治沿革，曰德人租借始末，曰日本佔據始末，曰中國收回始末。二方輿志，曰境界，曰面積，曰山川，曰島嶼，曰地質，曰氣候，曰里程。三民社志，曰戶口，曰方言，曰風俗，曰宗教，曰生活，曰職業，曰工資，曰物價，曰結社，曰養卹，曰犯罪，曰游覽，曰移殖，四政治志，曰設官，曰法制，曰警察，曰衛生，曰自治，曰司法。五食貨志，曰農業，曰林業，曰漁業，曰鹽業，曰鑛業，曰商業，曰工業。六交通志，曰道路，曰郵電，曰膠濟鐵路，曰航運。七教育志。八建置志，曰港灣，曰溝渠，曰橋梁，曰水道，曰公產，曰市廩，九財賦志，曰稅制，曰度支，十人物志。十一藝文志。曰書目，曰文存，曰金石。十二大事記。

至其體例八條爲全書揭明宗旨，宜以近代史家目光重定方志價

值。然稽其所言，仍多泛論，舉其尤者稍論正之。

其言曰，一三通者今之文化史經濟史法制史政治史而方志之所從出。一然通典通考紀歷代典章制度之因革損益，其用爲史料之會集，與通志爲一家之著述意在輯成通史者不同。自四庫總目已析爲兩類。三通之名，殊乖大雅。若云三通爲方志所從出，則所從出者又豈直此三書而已。

其言又曰，一公史之作爲將來取鑑，非爲既往留芳。故曰史鑑。鑑者爲人而鑑非爲鑑而鑑也。一但史非鑑戒之作，近世早有公評。前人過拘此義，乃致史失其職。循名責實，無寧謂史爲既往留芳，非爲將來取鑑，猶爲近似。蓋史職在追存既往不在逆億將來也。史鑑之名起於流俗。司馬光書本名通志，資治通鑑者乃神宗所錫嘉名，後人取二字以名其書尙可。若謂通鑑曰鑑，則通典可云典通考可云考邪。

然其博采羣言平亭新例亦深有可取者。其言曰，一事有關於國故民生者縱屬胥吏戶版之籍市井泉貨之簿悉皆所當存，若其否也雖有鴻文鉅製亦當屏而不錄。一斯言也，非舊志家所能道。本書民社志之生活工貨物價諸篇蓋取諸此。雖然，史之爲用當紀其因仍蛻變之迹，若僅取目前狀況而筆錄之，則但供他日史料而已，非史也。其生活工貨物價諸端，唯述近數年狀況，而一戶版之籍泉貨之簿一屬於既往者未嘗有一焉，仍非當也。不獨此諸端而已，本書全帙皆嫌於既往之史迹少所存也。

若其中文字之罅漏，排比之外錯，固非宏旨所在。姑舉示一二以資商榷。沿革志第一葉劉宋以卽墨屬北海太守。縣當云隸郡，不當云隸太守。若然東漢隸北海國當云隸北海王邪。一也。人物志以已見前志者爲表，近人則別爲傳，斯雖變通舊例，原無不可。然存沒不分則時代莫辨。二也。民謠足以窺見思想信

仰之一斑，不應附入方言。三也。風俗篇言土著之民在前明中葉多由河南福建廣西雲南遷徙於此，譜牒間有可考，而未嘗列表以明之。四也。

大抵其取材甚博，尤詳於數字之紀載，蓋自青島割借以來，德日人著述間出皆可資爲依據，而官廳文牘近在眉睫，得以恣意援引，故非憑斷爛舊志張皇補苴者所可比矣。

方志考稿甲集第四編

河南

順治河南通志五十卷

順治十七年巡撫賈漢復修。

序云，一舊有通志天順間創始於提學副使劉公昌，後十餘年副使胡公謚略加芟潤，後八十年續修于都御史鄒公守愚，又三年而成於都御史潘公恩，迄今百三十年矣。一蓋漢復履任後自十五年三月徵集諸郡縣志，十七年五月編纂就緒。

凡五十卷，一圖考，二三建置沿革，四星野，五疆域，六山川，七風俗，八城池，九河防，十封建，十一戶口，十二田賦，十三物產，十四職官，十五公署，十六學校，十七選舉，十八祠祀，十九陵墓，二十古蹟，二十一帝王，二十二至二十四名

宦，二十五至二十八人物，二十九孝義，三十列女，三十一流寓，三十二隱逸，三十三仙釋，三十四方伎，三十五至四十九藝文，五十雜辨。

雍正河南通志八十卷

道光六年補刊本

雍正九年河東總督嵇文鏡奉勅編，文鏡沒後王士俊代爲總督成書表上，纂修者有孫灝顧棟高諸人，已見四庫著錄。及乾隆三十二年巡撫阿思哈續修一次，是曰續志。道光六年布政使楊國楨以板片殘缺重刊之。

書八十卷，曰聖制，曰輿圖，曰沿革，曰星野，曰疆域，曰山川，曰城池，曰禮樂，曰兵制，曰河防，曰水利，曰封建，曰田賦，曰戶口，曰漕運，曰鹽課，曰郵傳，曰風俗，曰物產，曰職官，曰公署，曰倉庾，曰學校，曰選舉，曰祠祀，曰陵墓

，曰寺觀，曰古蹟，曰帝王，曰名宦，曰人物，曰理學，曰儒林，曰忠烈，曰孝義，曰文苑，曰隱逸，曰列女，曰流寓，曰仙釋，曰方技，曰藝文，曰辨疑。

其體例極爲煩瑣。人物削去張商英蒲宗孟，藝文至分五律七律，不出兔園見解。而四庫提要反稱其整密。蓋舊志淺陋異常而本書糾正違失實稱允當。例如開封府下，二漢陳留郡刪去小黃外黃，河南郡刪去京卷故市苑陵，又無水利漕運二門，於大河遷徙沿革亦不詳著。皆無史識。而藝文載關羽辭曹操書，古蹟載鄭武公交印臺，帝王志誤以梁唐五代俱都洛陽，則彌堪發噤。以此例彼，則本書所訂義例固已遠勝耳。

康熙開封府志四十卷

康熙三十四年知府管竭忠修，據所錄舊序蓋有順治庚子奉賈漢復命所修一本，時奉巡撫顧濟之命修志也。

其時尚沿明制，許鄭未升直隸州，陳州未升府，故開封轄境殊廣。

凡四十卷，一圖考，二建置沿革，三星野，四疆域，五山川，六河防，七帝王，八封建，九城池，十公署，十一學校，十二典禮，十三戶口，十四田賦，十五物產，十六古蹟，十七陵墓，十八祠廟，十九寺觀，二十職官，二十一、二名宦，二十三選舉，二十四至二十七人物，二十八游廡，二十九仙釋，三十方技，三十一至三十八藝文，三十九祥異，四十辨疑。大抵取材

各屬縣之志，綜輯而成。或循疆理而分，或依義類爲別。篇章充塞，讀之欲睡。所謂辨疑亦僅撫拾流傳瑣事。差無考證，略舉數條而已。

乾隆祥符縣志二十卷

乾隆四年知縣張淑載修，大梁書院山長翰林院庶吉士會稽曾煜纂。

凡二十卷，一輿圖，二地理，三河梁，四古蹟，五六建置，七禮樂，八九祠祀，十田賦，十一官師，十二選舉，十三循吏，十四十五人物，十六雜事，十七至二十藝文。

祥符爲梁宋都城，而地理古蹟寥寥數葉，其不能無闕失不待言矣。又剽剽漫漶，篇簡錯落，難可卒讀。

光緒祥符縣志二十四卷

光緒二十四年知縣沈傳義等修，明道書院院長湘潭黃舒昂纂。按其叙錄，邑之有志自萬歷甲申知縣李伯仁始，繼則三十六年知縣王鶴齡順治十八年知縣張俊哲乾隆四年知縣張淑載也。

書凡二十四卷，一輿圖志，二欽定皇輿表，三職官表，四選舉表，五地理志，六七河渠志，八田賦志，九建置志，十禮樂志，十一學校志，十二三祠祀志，十四古蹟志，十五至十八人物志，十九經籍志，二十二十一麗藻志，二十二金石志，二十三雜事志，二十四序錄。似較俗製爲優。然觀其凡例僅沾沾於形式之末，非能見其大者也。就中如金石志雖增舊志所無，而但錄其目不錄其文，殊不足以供考證。古蹟志雖極意搜訪，然不知引據宋東京考，且強分爲城岳岡海等目鄰於兒戲。要之未

合著作之體也。

明宏治中有重建清真寺碑稱金大定間有李俺艾高等七十姓來汴立一賜樂業教，卽汴人所謂挑筋教，實猶太教也，至今苗裔猶存，爲世界宗教史上一大案。本書金石祠祀兩志均漏列。

祥符者漢陳留浚儀縣，東魏於此置梁州，後周改汴州，宋祥符中改今名，爲開封府治。梁宋兩朝所都。其宮闕遺址，蓋以明代曾遭河水之灌不易復尋矣。

宣統陳留縣志四十二卷

宣統二年知縣武從超修。

按凡例，順治十五年始修，康熙三十年續修，考前者出於知縣張重潤，後者出於知縣鍾定也。凡例又詆其俚俗寡陋兼有其失，然本書亦未有以勝也。

凡四十二卷，一建置沿革，二星野，三疆域，四城池，五學校，六祀典，七公署，八人丁田賦，九山川，十河防，十一風俗，十二古蹟，十三祠廟，十四寺觀，十五橋梁坊表，十六物產，十七聖相，十八后妃，十九藩封，二十官制，二十一知縣表，二十二佐貳表，二十三儒官表，二十四科第表，二十五薦貢表，二十六至三十七人物，三十八災祥，三十九墓域，四十雜志，四十一二藝文。綱目不分，譌敬滿紙，殆轉不如舊志。陳留秦縣，漢爲陳留郡治，自梁以來爲開封府屬縣。

乾隆杞縣志二十四卷

乾隆五十三年知縣周璣修，時畢沅任巡撫也。

按所錄舊序，萬歷己亥知縣馬應龍康熙癸酉知縣李繼烈乾隆乙丑知縣王之衛各一修。萬歷志序云，國初有舊志在六十年以前

無論，至嘉靖丙午雷化蔡時雍編一志蓋已佚矣。

凡二十四卷，一聖製，二天文志，三四地理志，五建置志，六禮樂志，七田賦志，八風土志，九職官志，十一選舉志，十二武備志，十三至十八人物志，十九二十列女志，二十一二三藝文志，二十四叙錄志。

其人物志中有善良一目，夫人物分目已爲不當而況此膚泛之目乎。

縣在漢爲陳留雍邱縣，隋置杞州，其後州廢爲縣，屬開封府，括地志武王封禹後于此也。漢之外黃圉縣皆在縣境。志於史事殊少措意。

乾隆通許縣志十卷

乾隆二十五年知縣阮龍光修，邵自祐纂。

據舊志姓氏，正德志爲縣人山東鄒城知縣韓玉所創修，嘉靖辛丑知縣陳正順治戊子知縣賈待旌康熙庚午知縣吳轍雍正戊申知縣王應珮繼之。

據凡例，舊志門類無次，紀序冗雜。今悉爲更訂，各以類從。所舉糾正諸條，爲功亦不細也。

凡十卷，一輿地，二建置、三田賦，四禮樂，五官師，六人物，七選舉，八九十藝文。

通許置縣始于宋咸平中，初名咸平縣，金大定中以名與咸平府同改今名。明以來隸開封府。

建置稍晚，故蹟殊多附會。如引左傳鄭伯使許大夫百里奉許叔以居許東偏而遂以百里爲標題。縣治東有六營遂謂蘇秦率諸侯之師伐秦建營於此。並堪發噱。

道光尉氏縣志二十卷

道光十年知縣沈澁修。

沈氏序云，一尉志初本纂于明永樂十六年，其後正統成化嘉靖間屢有刊本，今皆無存。順治四年邑令衛紹芳因嘉靖殘本而輯成之，十五年高桂又奉文重修。一閱一百七十年而有是輯，據其凡例則因者十之一二創者十之七八也。

尉氏秦縣，漢書地理志注，應劭曰古獄官曰尉氏，鄭之別獄也。臣繼曰鄭大夫尉氏之邑也，明以來爲開封府屬縣。

書二十卷，一星野，二沿革，三疆域，四建置，五學校，六賦役，七職官，八選舉，九至十四人物，十五至二十藝文。

其凡例以舊志列御製及論誥於藝文爲不當，於是將紀恩之作提弁簡端，累累數十葉。然靳讓之謝恩疏仍入藝文，何也。

嘉慶洧川縣志八卷

嘉慶二十三年知縣何文明修。

略不載舊志源流，據學部志目有康熙洧川志知縣張世綬修也。凡八卷，一方輿志，二建置志，三籍賦志，四職官志，五選舉志，六人物志，七藝文志，八雜志。

縣爲春秋時之曲洧，漢潁川郡之新汲縣地，唐爲尉氏縣地，金興定二年始以宋樓鎮爲洧川縣，屬開封府。

道光鄆陵縣志十八卷

道光十二年知縣何鄂聯修，陽湖洪符孫纂。

據所錄舊序，有正德四年知縣和春嘉靖十六年縣人劉詡順治七年知縣孫丕承十六年知縣經起鵬乾隆三十七年知縣施誠嘉慶十三年知縣吳堂各一修。施志復從薛瑄集中得鄆陵縣志一序爲鄆

陵訓導王賢作，則尤在其前矣。

凡十八卷，一輿圖，二沿革表，三職官表，四選舉表，五六地理志，七建置志，八政典志，九學校志，十祀廟志，十一十二十三麗藻志，十四至十六人物志，十七雜事志，十八序錄。猶其父之道架也。顧鄆陵文采無甚足傳者，志亦依舊聞稍爲整比而已，不能見精采也。

縣爲春秋時鄭邑，漢爲潁川屬縣，隋曾置洧州旋廢。

同治中牟縣志十一二卷

同治九年知縣吳若煇修。

據順治吳志序，一牟志一修於明正德九年，再修於陳幼學先輩，爲萬曆三年，三修於天啓四年。今薦紳家無藏本，父老不能言遺事。至順治己亥而知縣吳顏芳起修之，康熙乙卯知縣韓蓋

光乾隆十九年知縣孫和相又修之。一及是而經咸豐三年之亂板籍盡毀。乃從省志府志中搜補并向地方採訪而成此書也。

凡十二卷，一輿地，二建置，三禮樂，四田賦，五職官，六選舉，七名宦，八人物，九至十一藝文，十二雜記。據其凡例大抵仍前志之目而於刪汰重複殊不爲無功。

中牟雖古地名，實非今縣，今縣則始置於漢，隸河南郡，實左傳所謂鄭之原圃也。宋以來隸開封府。大河自鄭州來東抵祥符界，在中牟境者曲折纒亘九十餘里，沿河築堤爲害久而益劇，蓋自北宋而已然。本書輿地篇記之最明覈有體。惟咸豐三年粵寇陷城竟無敘述，殊爲疏漏之大者。

道光禹州志二十六卷

道光壬辰知州朱煒修。

按所存舊序有順治八年朱裴康熙二十九年喬翔鳳乾隆十年邵大業三篇，其萬歷九年一序則無可考矣。

凡二十六卷，一輿圖，二紀事沿革表，三封系表，四職官表，五選舉表，六疆域表，七山川志，八古蹟志，九戶口志，十田賦志，十一建置志，十二學校志，十三祠祀志，十四寺觀志，十五陵墓志，十六經籍志，十七至二十四列傳，二十五識餘，二十六志原，分列明析，刊除蕪陋，頗非近人所能及。例如削去藝文志而代以經籍志，元明以前列傳直錄史文，錄舊志文悉著來歷，輿圖不列景物，皆倬然可稱。

州爲古陽翟地，韓自新鄭徙郡，秦置潁川郡，金置潁順州尋改爲鈞州，以州有鈞臺也。明初以陽翟縣省入，萬歷中以避神宗諱改今名，鈞州陶業，擅名甚久，本書僅識餘有輯錄一篇，而亦不得其詳。

嘉慶密縣志十六卷

嘉慶二十二年知縣景綸修，候選知縣進士武進謝增纂。

據知縣秦勤重修密縣志序曰，一志始於成化甲辰而不著其名氏，江陵蕭公河朔苗公相繼纂修，舊本皆不存，唯李公芝圃修於順治癸巳，體制雖具，近於簡略，袁公良怡修於康熙乙亥則浮文太盛。本志蓋繼康熙志而作也。

本志例云，一志之爲道不合史法則陋，全用史法則僭，史有紀表志傳，郡邑乘亦備其體，是僭也。觀宋濂浦陽人物記康海武功志微意可知。今以圖表志錄爲四綱，而於人物列女概不名傳，懼侵史職也。一以此爲言，其識度可知矣。

凡爲四類，圖之屬九，表之屬三，沿革職官選舉，志之屬十，曰疆域山水建置學校典禮田賦風土循政人物列女，錄之屬二，

曰雜錄敍錄。

密亦漢縣，清初曾自禹州改屬許州，復自許州改屬開封也。

乾隆新鄭縣志三十一卷

嘉興董本誠撰。本誠字思堂。乾隆四十年修。

據凡例，新鄭志創自萬曆戊午，順治己亥一修，康熙己亥再修。本誠以縣令親修志書，蓋頗自負史才。其序有云。『余輯新鄭邑志成，有譏其太繁者。余曰，夫志之作何昉乎。古者邦國之志，小史掌之。四方之志，外史掌之。志猶史也。紀天下之事者存乎史，紀一邑之事者存乎志。志固博通乎史而詳史之所略者也。蓋先王疆理天下，物土之宜而布其利，達其志而通其欲，其事至纖至悉，無不各有所掌。風俗之美惡則大師大行人志之。戶口之登耗則閭師閭胥志之。民之有德行道藝者族師黨

正之屬志之。皆各爲一書，月要歲會以統於小史外史而貯之柱下，則謂之寶書。西漢計書先上太史令其副白丞相。東漢郡國志上蘭臺。至學士大夫所纂，若關中之記，華陽之志，襄陽之傳，三輔九域十道之圖，以及一方一邑之事，列於藝文經籍之目者，咸班班可考焉。然則志之作可略乎哉。一其言未嘗不是。然其藝文志至收及韓非論子淫論等文。濫占篇幅，實爲無識。雜志一門亦猥濫無法。甚矣知其一不知其二之難與言著述也。

1

2000

乾隆歸德府志三十六卷

光緒己丑知府徐慶重刊本

乾隆十八年知府陳錫輅修。

前志修于順治庚子知府宋國榮。宋序云，一明初爲州，嘉靖二十四年改爲府，又二十年而李公嵩爲志，及光緒重刊時則僅存陳本矣。其時奉詔徵方志，採訪一時未能藏事，而九屬之志僅存其四，爰就舊本釐正其譌誤，先付手民，擬俟續輯成書卽分附各門之後也。

凡三十六卷，一方輿沿革表，二古封建表，三四五職官表，六至八選舉表，九十地理略，十一至十三建置略，十四至十七水利略，十八十九賦稅略，二十二十一名宦略，二十三至二十七人物略，二十八九祀典略，三十藝文略，三十一武備略，三十二三古蹟略，三十四災祥略，三十五六識小略。

亦蒼錄諸屬縣志而成，而去其冗複，故卷帙不多。然終非府志體也。

歸德爲古宋國，漢改爲梁，隋唐置宋州，天寶初改爲睢陽郡。張巡許遠所死守以蔽遮江淮者也。宋以歸德軍節鉞發祥故升曰應天府，建爲南京，金以後爲府。領縣八曰商邱甯陵鹿邑夏邑永城虞城考城柘城，州一曰睢。

康熙商邱縣志二十卷

康熙四十四年知縣劉德昌修。

按舊序舊志之修出於萬歷十年邑令呂乾健縣人吏部尙書宋纁，毀於崇禎壬午之春，及順治十五年而知縣劉之驥復修。

凡二十卷，一沿革等，二賦役，三學校等，四祠祀等，五官師等，六選舉，七恩例等，八聖蹟等，九賢達等，十武功等，十

一列女，十二至十九藝文，二十摭佚。

商邱爲漢以來睢陽縣，唐宋曰宋城，嘉靖二十四年升州爲府，置此爲府治。在漢爲梁國都，在宋爲發祥之所。史事斑斑而志全無記載。

光緒商邱縣志二十卷

光緒十一年知縣張多壽修，繼康熙劉志而修也。

康熙甯陵縣志十二卷

康熙三十年知縣王圖甯修，奉巡撫閩興邦命也。光緒十九年知縣汪鈞澤重刊。

前有宋肇序云，一明嘉靖間創於呂司寇公坤，國朝續而修之者爲邑紳李公若星。一

凡十二卷，一天文，二地理，三建置，四田賦，五學校，六職官，七名宦，八選舉，九人物，十祠祀，十一藝文，十二雜志。建置志記公署丈尺四至，用意甚周，他志少用此例者。甯陵漢陳留縣。春秋晉會諸侯於沙隨，亦縣境也。

乾隆鹿邑縣志十二卷

中有道光中補葉

乾隆十八年知縣許葵修。

按序其所據者爲嘉靖王志順治陳志康熙呂志，以較光緒志則所見多嘉靖一本也。

凡十二卷，一方輿略，二河渠略，三建置略，四田賦略，五官師略，六名宦略，七貢舉略，八人物略，九列女略，十祀典略，十一古蹟略，十二藝文略軼事略。

其古蹟略中有李三姐墓銘及道光中所補胡天游詩不知此等文字

正所以傳其人，宜入列女。軼事略中有記唐橋店鳴蠶一條，亦應入物產。總由拘拘於俗例，遂致漫無歸宿若此。

光緒鹿邑縣志十六卷

光緒二十二年知縣于滄瀾屬上元蔣師轍纂。

據凡例云，一舊志有六。曰樂志，成化時訓導樂韶所創也。曰王志，嘉靖時（二十八年）邑人王堯日所重纂也。曰順治十二年陳志。曰康熙三十一年呂志。曰乾隆十八年許志，國朝知縣陳王猷呂士鵠許莢所踵修也。曰顏志，知縣顏懋倫手訂之稿未刊行者也。今所見者惟陳呂許三志，呂志襲陳志而隱沒其實，許志本呂志而點竄其文，實則義例疏舛，皆不足爲依據。一
本書自命遵章氏架縷。舉其類例，一圖，二疆域考，三建置考，四川渠考，五古蹟考，六民賦考，七學校考，八兵事考，九

風俗物產考，十藝文考，十一秩官表，十二科貢表，十三宦績傳，十四人物傳，十五列女傳，十六雜記。然前志不別爲一篇而附之雜記，此抑非實齋之法也。

鹿邑爲古苦縣地，開元中立今名，屬亳州。明始改屬歸德府。名蹟之流傳最久者莫如漢之老子祠唐宋以來之太清宮。志云，韓林兒盜據亳州撤紫極殿爲僞宮。嗣是屢經兵火，雖修葺不廢，而規模疏陋不能復初。今惟存正殿五楹。舊傳有八檜，皆老子所植，並亡。門外有鐵柱一，高七尺，圍尺八寸，舊志謂爲唐時舊物。一猶知詳記廢興之迹。然太清宮之於鹿邑，實宜用曲阜志例，別立一篇，綜括史乘而爲之，以見道教勢力集中之地有如此者。今但雜采瑣記入雜記中，未是。

民國夏邑縣志九卷

民國八年知事徐德芬修。

按舊序，嘉靖二十四年知縣鄭廷佐一修，順治十五年知縣劉芳顯康熙三十七年知縣方立楨續之。

凡九卷，一地理志，二建置志，三廟祀志，四田賦志，五官師志，六人物志，七列女志，八選舉志，九雜志。

縣爲戰國時下邑地，漢置縣屬梁國，方輿紀要云，金始改今名，本志云，明初改，是據明史。可徵其不苟。然全書陳腐未祛，不足以云民國所修之志也。

光緒永城縣志三十八卷

光緒二十七年知縣岳廷楷修。

按舊序，縣志蓋始於隆慶間縣人秦時雍，順治年知縣程孔思續修，（十六年任）康熙三十年知縣周正紀再續，三十六年知縣耿晋光教諭侯良弼又重修之，相去六年不應遽有更張，蓋繕稿上

之長官飭令重訂也。（據侯序）

書凡三十八卷，一聖制，二地理，三四職官，五建置，六學校，七兵防，八九度支，十祀典，十一名宦，十二選舉，十三俗產，十四古蹟，十五災異，十六至二十七人物，二十八至三十二列女，三十三至三十六詞章，三十七叛逆，三十八雜識。其中新立之名目有二，曰聖制者錄諭旨及御製碑也。曰詞章仿登封志麗藻之名而小變之也。

縣西接徐州碭山，東南至宿州，西南至亳州。漢爲沛郡芒縣以芒山得名也。隋末置永城，屬譙郡，唐屬亳州，宋因之，元改今屬。縣西北有太邱城，陳實爲太邱長即此矣。睢水渙水所經，漢書所謂睢渙之水出文章。本書引呂氏懷清堂雜記云，永邑鄉村多種桑，蠶成婦孺拈絲織紬名曰土綢，堅白異常，前明織造局遣烏材至亳州采辦充貢染成朱紫色尤鮮以作宮眷之用。又

載貢棗事實。皆可入物產篇中者也。

乾隆虞城縣志十卷

乾隆三年知縣張元鑑等修，永豐知縣鹽城沈儼纂。

按凡例，舊有弘治二年刊本，嘉靖二十三年寫本，萬歷二年刊本，萬歷志修於知縣胡宗淳，其後順治十五年有知縣史鵬康熙三十年有知縣李仲極二次修。

凡十卷，一圖考等，二山川等，三公署等，四職官等，五選舉，六人物，七列女，八九藝文，十雜志。

左傳少康奔虞卽此，漢爲梁國虞縣，隋改今名，唐屬宋州，宋以來爲歸德府屬縣。

光緒睢州志十二卷

光緒十八年知州王枚修。

其序曰：「雖于周時爲宋鄙，嬴氏始建城郭曰襄邑。漢魏隋唐之世，隸屬不一，趙宋建爲拱州，而邑始躋州，金時屬南京路，而州始名睢。在元屬汴梁路，在明屬開封府，嘉靖年改屬歸德府而我朝因之。居中原之要區，故世亂則兵戈易及，鄰祀宋之故國，故世治則文物懋昌。其有志也創始於明宏治年郡人李孟暘，一修於嘉靖年州牧程應登，再修於我朝康熙年州牧馬世英陳應輔。」

其凡例云，「舊志原板兵燹後毀失無存，僅於縉紳家覓得一部，蓋失修已二百年。」志乘廢墜之易如是。又云，「郡縣志本無一定體例，但使不詭於正即不必率議更張，是編舊志所載未嘗妄易一字，第以續采者附諸其後。」一則即是編可以追溯舊志面目矣。

凡十二卷，一地理，二三建置，四官師，五選舉，六七八人物

，九十一藝文，十二存遺。

康熙考城縣志四卷

康熙三十七年知縣陳惠敏修。

據順治戊戌縣人李如蘭序云，考志自明神宗乙酉後一修于杜侯，再脩于楊侯。杜蓋名志晦，楊名九星，皆萬歷間任。又至順治癸巳有知縣劉公修而未成，至是知縣楊種堃續修之也。凡四卷以迄于今。

書凡四卷，一建置，山川賦役，二人物義民孝婦烈婦節婦方伎，三藝文，四職官災祥土產古蹟陵墓，觀其目次，荒陋可知。縣爲春秋時戴國，漢爲梁國留縣，東漢章帝時改名考城，屬陳留郡。金以來爲開封府屬縣。當大河衝決之所。春秋齊桓公會諸侯於葵丘在今縣境。

乾隆柘城縣志十八卷

乾隆三十八年知縣李志魯修。

其序云，一志肇於萬歷間郡守李本固，順治丁酉前令張澤爲之重輯，然一當河水陷城之後，一當定鼎草創之初，中多脫誤。及康熙戊寅史鑑踵修之，皆各仍其舊而無所是正。迄今七十六年，李志已無傳本，張志僅有存者，史志亦漫漶不可句讀矣。一則前志不存，重修良不可已也。又據巡撫何燭序云，一予讀漢書灌嬰傳至擊柘公王武一語，知柘之爲邑舊矣。後閱水經注及天下金石志見柘有漢時許君清德碑唐令李仲華德政頌，亟取柘志細按之，咸缺而不詳。一則前志雖存亦不足取也。

凡十八卷，一輿地，二建置，三四職官，五賦役，六學校，七

祠祀，八選舉，九至十一人物，十二至十七藝文，十八雜志。
本志雖甄采較豐，然如以左氏盜殺之於陳宋之間爲柘境，殊爲
附會過甚。

乾隆陳州府志三十卷

乾隆十一年知府崔應階修。

據學部志目有順治十七年于明舉所修陳州志，而本書於前志源流未之及。

凡三十卷，一沿革，二星野，三疆域，四山川，五建置，六學校，七八聖蹟，九祀典，十古蹟，十一風俗，十二賦役，十三職官，十四名宦，十五武備，十六選舉，十七八人物，十九忠義孝弟，二十流寓隱逸方技，二十一二列女，二十三仙釋，二十四至二十九藝文，三十雜志。

道光淮寧縣志二十七卷

道光六年知縣永銘修，前有知縣瞿昂序，前志修于乾隆十九年

其時任知縣者馮奕宿也。

凡二十七卷，一輿圖，二沿革志，三疆域志，四山水志，五籍賦志，六風土志，七學校志，八祠祭志，九兵防志，十營建志，十一古蹟志，十二五行志，十三藝文志，十四職官表，十五選舉表，十六藩封世襲表，十七名宦傳，十八十九人物傳，二十十一列女傳，二十二流寓傳方外傳，二十三至二十六集文，二十七志餘。

淮寧古宛丘地，漢爲淮陽國陳縣，隋改縣曰宛丘，屬陳州，明初省縣入州，雍正十二年升府，遂置今縣附郭。以宣和初曾升淮寧府得名也。

乾隆商水縣志十卷

乾隆十二年知縣張崇樸修，四十八年知縣牛問仁謂其頗有蕪詞

及違碍字句，奉長官命改刊。其前志修於順治十六年知縣高璟等纂于縣人郭天錫，學部志目稱知縣郭天錫誤也。本志修于知縣張崇樸，任知府者則崔應階，稱知縣崔應階亦誤也。

凡十卷，一輿地志，二建置志，三祀典志，四田賦志，五職官志，六選舉志，七人物志，八藝文志，九憲章志，十紀事志。縣爲漢汝南汝陽縣地，隋置澗水縣，取澗水爲名也。屬陳州，宋改今名，雍正以後爲陳州府屬縣。左傳以申息之師戍商密，自指今浙川一帶，彼時烏得有此名。而本書猶沿舊志引此語。

乾隆西華縣志十四卷

乾隆癸酉知縣宋恂修。

據序清初邑令武超凡重修邑志，閱數十年邑令介公錫齡續修未成。於舊志源流，無所叙列。

西華漢汝南屬縣，唐以來隸陳州，清升州爲府以縣隸焉。書凡十四卷，一方輿志，二河渠志，三建置志，四籍賦志，五職官志，六選舉志，七八人物志，九列女志，十補志，十一至十四藝文志。其職官志有宋氏本人宦績，他篇亦多鋪張語，祇見其不讓也。

乾隆頂城縣志十卷

乾隆十一年知縣張爲且等修，奉修通志檄也。

按所存舊序，一曰徐志，萬歷戊子知縣徐東漸修。一曰王志，萬歷甲午知縣王欽誥修。（學部志目作王欽懷題曰隆慶志）一曰李志，順治戊戌知縣李芳春修。一曰黃志，順治己亥知縣黃陞修。一曰顧志，康熙庚午知縣顧芳宗修。然王徐殆實即一本，李黃亦即一本也。本書僅雜錄舊序而不著其次第存廢，卽此一

端徵其無條理矣。

凡十卷，一輿地志，二建置志，三田賦志，四災祥志，五官師志。六選舉志，七八人物志，九十藝文志。

縣爲漢汝南項縣，梁太清初改置潏州，北齊爲信州，後周爲陳州治，隋始改爲項城縣，唐初置沈州於此，旋廢。元初省入商水縣，後復置。本書沿革條云，晉屬陳，後又屬梁，南北朝劉宋屬陳，此數語真難索解矣。

縣東有公路城，袁術所築。又縣北有互縣城，相傳卽論語所謂互鄉難與言者。

乾隆沈邱縣志十二卷

中有同治中補修者

乾隆十一年知縣何源洙修，其時奉布政使趙城通飭備修省志。前志修于順治十二年知縣李芳春也。

凡十二卷，一天文志，二地理志，三建置志，四食貨志，五祀典志，六學校志，七秩官志，八官師表，九人物表，十鄉賢列傳，十一叢紀志，十二藝文志。

縣爲古沈子國，漢爲寢縣地，唐神龍初置沈邱縣，屬潁州，明初省，弘治十一年復置，屬陳州，升府以後遂爲屬縣。

道光太康縣志八卷

道光八年知縣戴鳳翔等修。

據序，舊志一修于萬歷己亥知縣張爾基，再修于順治己亥知縣張懷璧，三修于康熙丁丑知縣朴懷寶，四修于乾隆二十六年知縣武昌國。

凡八卷，一圖經等，二建置等，三秩祀等，四職官等，五人物，六列女，七八藝文。

太康爲秦漢陽夏縣，隋改今名，自是以來隸陳州，宋至明隸開封府。雍正十二年升陳州爲府，以縣屬焉。本書沿革表頗訂舊志引用故書之誤。顧其凡例云，「藝文邑人所作，但得佳製雖與志無關必爲選入，至大吏邑侯文人墨客卽事題詠，采擇付梓亦足增邑乘之光。」識趣如此，其他不足道矣。卽如袁謝二氏，聲華屢代，乃絕未齒及也。

道光扶溝縣志十二卷

道光十二年知縣王德瑛修。

據所錄舊志姓氏，成化中縣人贈戶部主事杜璿陝西兵備副使嚴憲創修，萬歷中縣人兵部員外郎何出圖再修，順治九年知縣楊在陞三修。康熙十三年知縣高錫爵四修，十九年知縣屠又良五修，三十二年知縣繆應晉六修，二十八年知縣趙如桓七修，乾

隆十年知縣周銓八修，二十七年知縣七十一董豐垣九修。

扶溝漢縣，屬淮陽國，宋以來爲開封府屬縣。雍正十二年升陳州爲府遂以縣隸焉。賈魯河所經，自周家口通汴之商旅所必出，固大邑也。然馬殷爲縣人，志未爲之載筆，亦缺失也。

凡十三卷，一聖製，二輿圖，三疆域，四建置，五賦役，六典禮，七風土，八職官，九選舉，十人物，十一藝文，十二災祥，十三志餘。

光緒扶溝縣志十六卷

光緒十九年知縣熊燦修，以光緒十五年修會典奉檄修志也。

凡十六卷，一沿革表，二疆域志，三河渠志，四建置志，五官師表，六賦役志，七典禮志，八學校志，九武備志，十風土志，十一選舉表，十二人物志，十三列女志，十四藝文志，十五

灾祥志，十六志餘。

其凡例云，一風土志十修攙入條告四五十條，至舊志所載風俗多行刪削，今於酌收舊志外復增入冠婚數事而刪去條告，一殊不知舊志所載風俗固不盡可刪，條告亦多切用之語。不得遽以爲贅也。其藝文志除書目外兼列詩文，亦未免調停兩可之見。扶溝漢縣，初屬淮陽國，繼屬陳留郡，唐屬許州，宋屬開封府，雍正以後爲陳州府屬縣，賈魯河及溱洧二水所經也。

道光許州志十六卷

道光十八年知州蕭元吉修。

例言云，一明儒邵文莊公牧許修州志，論者稱爲拱璧，與武功志并傳，我朝州牧甄君汝舟續纂，雖云仿其體例究未見文莊原本。一今按邵文莊者無錫邵寶，成化中任。其書蓋不可見也入清有康熙五年知州胡良弼及乾隆十年甄氏二次修也。

凡十六卷，一方輿，二建置，三籍賦，四五官師，六選舉，七八九人物，十列女，十一祥異，十二古蹟，十三金石，十四藝文，十五仙釋，十六識餘，

許爲漢潁川郡屬縣，建安中改許昌。爲五都之一。陝洛殘破，此地遂爲新興之區。曹氏積穀治兵以爲基業，本志於此絕未措意也。自北朝立許州，至雍正二年升爲直隸州，十三年復升爲

府，置石梁爲附郭縣。乾隆十六年復故，領臨潁襄城郟城長葛四縣。

順治臨潁縣志八卷

順治庚子知縣李馥先修，奉巡撫賈漢復命也。前有畢沅序道古堂外集一頁不可解。

按舊序前志修于嘉靖八年知縣盧鏜也。

凡八卷，一方輿，二建置，三賦役，四教典，五官師，六人物，七雜稽，八藝文，

末附乾隆續志八卷，乾隆乙丑知縣劉沅修，體製如前。

民國臨潁縣志十六卷

民國四年知縣陳俊修。

其序曰，一光緒戊申前任陳垣倡議復修，旋以去任，稿成未付梓，陶前任延豐君仲虎繼輯，三年而書仍未成，民國改元邑紳復舉管君從五取豐稿刪其繁複，又期月始就緒。一

凡十六卷，一方輿，二建置，三賦役，四教典，五六官師，七至十人物，十一十二列女，十三十四雜稽，十五十六藝文，其第十三卷附兵戈志，第十四卷附巡蹟考，皆莫明所謂。至於教典仍存朝賀而學校選舉巡警概不一記，直是抄錄舊志而已，何得謂之民國重修耶。

縣爲漢潁川臨潁縣，隋以來屬許州，曹魏時棗祇募民屯田許下引流以溉，後人以名河，此爲縣之故實，本志初未載也。

乾隆襄城縣志十四卷

乾隆十年知縣汪運正修。

據縣人劉青芝序云，襄城造志自明嘉靖辛亥邑教諭林鸞始，其自序云，鄉達許尙書廓李尙書敏辛副使訪王學使錦創有草稿，蕩失之矣。乃手自纂定，共成八卷。雖采掇未免疎漏而其中體例猶爲近古。越七十年爲萬歷戊午，譚邑侯性教張憲副寧復纂邑志亦八卷，援引頗博，詞亦斐然。乃有林志所詳而反遺者，撰述時未覩林志邪。一入清後順治辛卯知縣佟昌年一修，繼以是志。

凡十四卷，一方輿志，二建置志，三籍賦志，四官師志，五選舉志，六七人物志，八列女志，九雜述志，十至十四藝文志。

乾隆鄆城縣志十八卷

乾隆十八年知縣傅豫修。

按學部志目順治志順治六年知縣荆其惇修，乾隆志乾隆十年知

縣趙作霖修，而本書殊未叙及。

凡十八卷，一方輿志，二建置志，三籍戶志，四典禮志，五古蹟志，六雜稽志，七八九藝文志，十職官年表等，十一鄉官世表等，十二選舉年表，十三至十八列傳。

縣爲古鄆國，漢爲潁川郡鄆縣，後魏置潁川郡於此，北齊改置臨潁郡，隋廢尋置道州，改縣曰鄆城，後又廢道州，以縣屬許州，其後因之。縣東洄曲卽吳元濟聚精兵處也。

乾隆長葛縣志十卷

乾隆十二年知縣阮景咸修，前志修于康熙三十年知縣何鼎也。凡十卷，一方輿，二建置，三籍賦，四官師，五選舉，六人物，七列女，八雜述，九十藝文。

長葛爲春秋鄭地，西漢時以社中樹暴長更名長社縣，仍屬潁川

，西魏屬許昌郡，唐乾元中爲許州治，雍正二年，升許州爲直隸州，仍爲屬縣。

縣之名人以漢魏鍾氏爲著，此外無甚可述者。

乾隆鄭州志十二卷

乾隆十三年知州何源洙修。

按其序略稱清初知州劉永清一修，康熙癸酉則知州何錫爵乾隆乙丑則知州張鉞各一修，源洙即錫爵子也。去張志成時不過數年，不應再修，蓋出於炫名之意，其實卽張志，初無更易也。凡十二卷，一星野，二輿地，三建置，四食貨，五禮樂，六官師，七選舉，八九人物，十至十二藝文。

州本管叔封地，鄭武公隨平王東遷而有其地。按漢書地理志爲河南中牟縣境，今志云秦并六國置管縣屬三川郡，不知所據。晉分河南置滎陽郡，後周置滎州，旋改鄭州，隋置管州，旋復故名，治管城縣，及明而以附郭之縣省入，雍正初曾升直隸州，領滎澤滎陽河陰汜水四縣。繼入開封府，旋又復故。

乾隆榮陽縣志十二卷

乾隆十一年知縣李煦修。

按序云，前志修于康熙戊午，據學部志目則顧天挺修也。

凡十二卷，曰星野地理建置賦役禮樂事實秩官選舉人物藝文，類爲庸濫之語。

乾隆榮澤縣志十四卷

乾隆十一年知縣崔淇修。

據縣人李士甄跋，一榮遭明季兵燹，邑乘舊編無存。自順治己亥渭南段侯創修成帙，至康熙乙亥王侯畹重修之。

凡十四卷，一星野志，二地理志，三建置志，四職官志，五選舉志，六人物志，七賦役志，八河防志，九禮樂志，十風俗志

，十一古蹟志，十二祥異志，十三十四藝文志。

滎澤縣名始立於隋，古滎陽地也。唐宋以來爲鄭州屬縣，雍正十三年鄭州自直隸州改爲散州，遂屬開封府。古來征戰之地。而志雜叙古事於古蹟志中，未免簡率。

民國河陰縣志十七卷

民國六年，知事胡荃修，睢縣蔣藩纂。

其凡例云，一河陰舊志在明者久佚，清順治時知縣范爲憲踵修，康熙時知縣申奇彩重纂，范志無存，卽閩中丞所謂荒悖失倫者，申志舛陋麻沙，等諸自郛，洎乾隆中葉縣併滎澤，志之失修者二百餘年，近世蘇孝廉鵬翥竭平生精力撰河陰志稿十五卷，拾遺訂墜，厥功匪淺，惜考古尙疏，取材近濫，不無遺憾，茲編審誤訂譌，旁稽遐覽云云。一

凡十七卷，一圖，二沿革考，三疆域考，四山川考，五建置考，六古蹟考，七民賦考，八風俗物產考，九學校考，十兵事考，十一藝文考，十二職官表，十三選舉表，十四宦績傳，十五人物傳，十六列女傳，十七雜記，附金石考二卷，文徵三卷。文字體裁略與徐繼畬五臺新志爲近。然叙次之雅斷制之嚴皆遠不逮，亦聊勝于舊志之庸濫者耳。

縣本漢滎陽縣，唐開元二十二年以地當汴河口，分汴水滎澤武陟三縣地，於輸場東置，以便漕運，會昌中河陽升孟州，遂割河陰改隸，乾隆二十九年省入滎澤，志於歷來以他郡之河陰濶此者辨之甚嚴。

乾隆汴水縣志二十二卷

乾隆九年知縣許勉燉修。

按凡例，舊志成於順治十六年知縣吳與岱之手，而不及其他，藝文篇亦未錄存舊序也。

凡二十二卷，一星野，二沿革，三地理，四建置，五六職官，七八選舉，九十人物，十一賦役，十二祥異，十三風俗，十四禮樂，十五古蹟，十六評論，十七事實，十八至二十二藝文。其例言云，「虎牢巖邑，著于春秋，爲城爲戍，繫鄭不繫鄭，或罪鄭之失險，或罪諸侯之據險，先儒論斷及史集所傳言之詳矣。特列評論一志，薈萃成編。」夫可評論之事豈止此一端而已，是亦經生與時文家之習氣也。但其沿革篇概錄諸史地理志原文，實較他志之妄自芟改者爲善。

汜水爲春秋時鄭之制邑，漢置成皋縣，屬河南郡，開皇十六年改今名。縣西二里之崤關卽虎牢也。

乾隆河南府志一百十六卷

乾隆四十四年知府施誠修，同治六年知府陳肇鏞重校刊。

宋敏求曾有河南志不傳，順治十六年知府朱明魁康熙三十四年知府張聖業各一修，雍正五年知府張漢復爲續志。

凡一百十六卷，一輿圖，二沿革表，三星土志，四疆域志，五六建置志，七至十六山川志，十七至二十四職官志，二十五戶口志，二十六禮俗志，二十七物產志，二十八祠祀志，二十九學校志，三十至三十五選舉志，三十六帝紀，三十七聖蹟志，三十八至五十四人物志，五十五至七十六古蹟志，七十七至一百五藝文志，一百六至一百十一金石志，一百十二至一百十五經籍志，一百十六祥異志。

其凡例自云，有分縣而書之例，有分時代而書之例，如建置職

官等以分縣爲例者也，如選舉人物等以時代爲例者也，視他志之但依縣排列者爲勝。

洛陽爲漢魏以來故都，直至北宋猶加修葺，宋氏之書雖不克覩，固猶可薈集羣書追摹其狀。本志古蹟篇雖彙彙數冊，然唐宋人小說中所載洛都風物遺聞絕未一引。又唐宋名人寓居洛下者多不勝舉，即如杜甫明明有田在東京，本志人物流寓門寥寥殊不盡也。至其藝文一門所收尤爲雜濫。謂以郡人之著作爲標準耶，則不勝載也。謂以關於郡事者爲限耶，則不知韓禽虎賀若弼論夷齊論與洛郡何關也。

河南府之名始于元，雍正二年以所屬陝州升直隸州，定領洛陽假師鞏孟津宜陽登封永寧新安瀍池嵩十縣。

順治洛陽縣志十一卷

順治戊戌河南督糧道武攀龍修，其時賈漢復巡撫河南督修志書

也。明季之亂，故典蕩然，極意搜訪，克成是書。凡十二卷，曰天文地理人物田賦官師選舉秩祀祥異古蹟陵墓雜記藝文而以圖考冠焉。體例文字皆由明人纖詭之習，以供文士把玩而已，非所語于地方之史也。惟卷末有洛陽古今藝文名目，其意欲列舉關於洛陽掌故之書名，似尙有見地。

其叙有云，嘉靖戊子武部路君直草創斯舉，初就梓于定陶陶君遷喬，嗣重刻于霸州江君北。

嘉慶洛陽縣志六十卷

嘉慶十八年知縣魏襄舉人陸繼輅同撰。

順治戊戌武攀龍修，後康熙十年知縣吳源起刊其訛謬補其未全四十年知縣錢肇脩續成一編，乾隆九年知縣龔崧林復繼之。凡六十卷，一皇德記，二巡幸記，三沿革記，四星象記，五輿

圖記，六七八土地記，九山川記，十帝王記，十一后妃記，十二大事記，十三拾遺記，十四格言記，十五旌異記，十六宮殿記，十七壇廟記，十八至二十一冢墓記，二十二伽藍記，二十三名園記，二十四風土記，二十五物產記，二十六至三十選舉表，三十一官品表，三十二官階表，三十三戶口簿，三十四會計簿，三十五靈徵志，三十六學校志，三十七溝洫志，三十八第宅志，三十九衙署志，四十營建志，四十一異物志，四十二經籍志，四十三儒林志，四十四道學傳，四十五名宦傳，四十六忠節傳，四十七孝義，四十八文苑傳，四十九武功傳，五十良政傳，五十一逸民傳，五十二藝術傳，五十三二氏傳，五十四循吏傳，五十五庶公傳，五十六至五十八列女傳，五十九金石錄，六十序錄。

其書修于乾隆府志之後，宜於古蹟彌有發明。然土地宮殿分爲

兩篇，彼此參錯，土地記叙次稍較乾隆府志爲優，而惜其不著來歷，若宮殿記則直等於禁扁宮殿簿，大抵執筆者習見兔園分類之式，故必亭館觀閣街里坊市等依名立類，而不知此非著述之法，尤非作史之法。滿目榛楛，濫費紙墨，真可慨矣。觀其目次必自命承孫洪之餘緒者，不知別營建於衙署，分談選父子爲兩傳，孫洪皆絕不至此。又帝王則以定都於洛者爲限，后妃則以洛陽人爲限，已屬無謂。后妃之出於洛陽者，又豈止此數人。凡此皆絕未經心，致貽大謬。徒襲其貌，何爲也哉。

乾隆偃師縣志二十九卷

乾隆丙午知縣湯毓倬與孫星衍同纂。按其序則畢沅巡撫河南時自以爲唐偃師畢氏之後，屬地方長吏重修縣志。其時蓋由孫氏秉筆，嗣孫氏入翰林，乃以所成之地理山川陵廟稿寄縣，縣則

別延湘潭張度西開局補成之，而縣人武億實當考證金石文字之責焉。

又按其序，明嘉靖間魏志以前無可考，順治戊戌艾元復所修曰艾志，久佚。康熙戊寅邑令王澤長所修曰王志，亦佚。乾隆乙丑邑令朱績志所修曰朱志，亦因二十八年洛水漲溢板片無存。中州古邑而志乘殘缺若此，宜畢氏之引爲急務也。

本書志記表傳錯雜無序。卷一二地理志，卷三山川志，卷四陵廟記，卷五風土記，卷六學校志，卷七祀典志，卷八賦役志，卷九帝紀考，卷十職官表，卷十一名宦傳，卷十二選舉表，卷十三至二十二名臣儒林忠節政績文苑孝義隱逸流寓列女仙釋方技等傳，卷二十三至二十六藝文志，卷二十七八金石錄，卷二十九三十祥異志大事紀逸事紀終焉。

偃師立縣始于西漢，其後別立平縣緱氏縣而偃師專其名。自帝

譽盤庚以來爲都畿所在。迄于唐宋，文物隆焉。考古之家宜所樂道。孫氏志地里，詳稽經典，綱舉目張，首沿革，次建置，次疆域，次古蹟，雖未明標子目，而次序井然，似較他志之瑣縷劃分者爲尤善。山川志采摭水經注疆域志太平寰宇記等書而成。其中如柏谷隄一條，據統倬按語，親往勘查而後知其形勢與郵書所引戴延之西征記相合。千年故蹟，印證通明，苟能一類此，迎刃豁然，自是史家快事。然如所引寰宇記之石室水經注之僵人穴初未明言能否指實其處，則與前後義例不合，此博而不純之過也。陵廟紀不言存廢，亦同此誤。然據其自序稱借張君並騎聯轡遍歷境內山川升高望遠準道里核形勢浩乎有得，復於深谷荒塋野燐土繡中遣人搜剔金石文字，來者臚至幾倍於前，於是發史傳以下諸書悉心勘訂，證柏谷塢轅轅關，杜工部墓在偃師正郡志鞏縣之誤，得張延賞董晉諸碑于巖間，清燕

欽融靈龜山之墓，釐許遠墓前之廟，證馮王寺之爲北齊平等寺。實事求是，諒非虛語。即孫星衍未在縣久居，亦以經行目驗證漢時井渠之制行於假師，蓋當時樸學風氣正開，人握鉛槧，家懷緹素，皆有信今傳後之想。不肯隨俗苟同也。

風俗志以下蓋非孫氏之稿，然其體例殆亦秉諸孫氏也。夫沿革可憑故籍，而風俗尤重現狀，乃亦僅撫書冊成語敷衍成篇，其亦昧乎志風俗之本意矣。此則不可爲法者也。

帝紀考爲假志特創之例，蓋以縣爲殷都故也。準此以言，不將凡曾建都之地皆應立此一考。長安縣志將悉載漢唐諸帝紀耶。職官選舉兩表不相連屬，而以名宦傳直接職官表之後，是蓋變例爲便於檢釋起見。然凌雜甚矣。

仙釋傳於玄奘不引慈恩傳高僧傳而獨引宏簡錄，此則當時風氣不甚措意釋氏，故視爲無足重輕，漫取以充篇幅也。

藝文金石兩錄蓋假師志所憂憂自鳴者，故其量幾占全書之半。按其區分之例，蓋以不存于金石實質者屬藝文，故唐人集中誌銘多入焉。然金石中之周寅簋銘何嘗有實質，寧不可與尙書般庚之篇齊觀耶。

金石錄者，蓋卽以武億之假師金石遺文紀充之，而武氏則就韓甲辰所采輯加以跋語。自成一書，自無不可。乃卽以入志，實缺翦裁也。蓋成書不出一人之手，體例難於純一，自昔然矣。

乾隆鞏縣志二十卷

乾隆己酉知縣李述武修。

其序云，一鞏邑志不知椎輪所始，國朝順治初年修之者張君好奇也，康熙三十年修之者顏君光昌也，五十一年修之者多君時奇也，其本皆散佚，乾隆十年邱君軒昂續修之，今又四十三年

矣。一

凡二十卷，一輿圖志，二地理志，三建置志，四山川志，五祀典志，六風俗志，七物產志，八賦役志，九學校志，十一職官志，十二選舉志，十三十四人物志，十五十六古蹟志，十七金石志，十八十九藝文志，二十祥異志。筆墨凡庸，差存故實而已。

周爲鞏伯國，漢爲河南鞏縣，自是以來鮮所變革。輟轅之險，古籍所著。自王世充與李密之戰，則黑石山亦爲兵事上所必爭矣。

光緒宜陽縣志十六卷

光緒七年知縣謝應起等修。

按舊序，順治十六年知縣王鼎允縣人耀州知州劉潔康熙三十年

知縣申明倫乾隆九年知縣周洵各一修，乾隆志奉布政使通飭也。凡十六卷，一圖，二天文，三輿地沿革，四祀典禮儀，五建置學校賦稅，六風俗土產古蹟，七官職，八九人物，十紳耆，十一十二列女，十三至十五藝文，十六金石軼事。

漢宜陽縣，屬宏農郡，後魏末置宜陽郡，後周置熊州，貞觀中曾以穀州治此，後唐曰福慶，宋曰福昌，元曰宜安，明初復舊。戰國以來爲征戰必取之地矣。本書輿地篇紀載甚博洽。

乾隆登封縣志三十二卷

乾隆丁未知縣陸繼夢請洪亮吉撰。

登封爲嵩山太室所在，神州喬嶽，縣歷歲年。本書畢沅序云，撰一方之志難，撰一方之志而有名山大川在其境者尤難。其言可謂能道其苦。泰安府志不能詳紀岱嶽，已爲詬病。洪氏以碩

學宏才爲名邦秉筆，宜大有以異乎凡流也。然觀其全帙，蓋惟以考稽故籍衷於雅訓見長，其於綜核傳信之功亦未能備。試逐條繫以評焉。

其敍錄每門繫以韻語，且必云仿某代某書而定名。曰皇德記，則仿侯瑾漢皇德記也。曰輿圖，則仿隋志周輿圖記也。曰土地記，則仿晉朱育會稽土地記也。曰山川記，則仿齊劉澄宋初山川古今記也。曰大事記，則仿漢司馬遷等大事記也。曰道理記，則仿隋西域道理記也。曰風土記，則仿晉周處風土記也。曰壇廟記，則仿齊壇廟記也。曰伽藍記，則仿晉楊街之洛陽伽藍記也。曰冢墓記，則仿宋李彤聖賢冢墓記也。曰職官表，則仿漢班固百官公卿表也。曰選舉表，則仿唐選舉表宋選舉格也。曰戶口簿，則仿宋元康六年戶口簿記也。曰會計簿，則仿宋李常元祐會計簿也。曰學校志，則仿宋崇寧學校新法志也。曰衙

署志，則仿宋無名氏衙署志也。曰名勝志，則仿口口口名勝志也。（原文有缺字，疑係仿宋王象之輿地紀勝也。）曰物產志，則仿唐經籍志地理類無名氏諸郡土俗物產記也。曰循吏傳，則仿魏明帝海內先賢傳也。曰烈士傳，則仿晉華儁廣陵烈士傳也。曰列女傳，則仿漢劉向列女傳也，曰逸人傳，則仿晉張顯逸人傳也。曰高僧傳，則仿釋惠皎高僧傳也。曰麗藻錄，則仿唐人麗藻錄也。曰金石錄，則仿宋趙明誠金石錄也。曰雜錄，則仿後漢雜事晉朝雜事也。曰序錄，則仿漢王符潛夫論序錄也。畢氏序云一穉存病夫近時府州縣志皆俚而不典，信傳聞而忽書傳，故其命名皆取于秦漢以來至唐宋而止。一即謂此也。然其中稱朱育不曰吳而曰晉，楊銜之亦不曰魏而曰晉皆可疑。

其中最典實者莫如土地記。然如八風山谷出石，平城永固堂取此石爲之，見水經注卷十六，此志缺引。又引歐陽修詩不稱書

名但稱歐陽永叔詩，類此疏略，尙有可議者。

此外中嶽廟爲累代相傳巨構，其制度之因革，允宜詳爲記載。乃壇廟記僅以乾隆五十一年巡撫畢沅奉勅重修數語了之。少林寺關係佛教入華歷史，且自北齊以來爲拳僧所聚，佚事流傳，彰彰口耳。本書伽藍記未引日知錄之文，而篇首之漢法王寺見於傅梅嵩書，實爲不經之談，反取以爲冠。物產志歷取羣書中嵩少所產羅列誌之，自爲賅博，然所謂物產者非僅記古昔物產而已足也。諸如此類，皆不得不責備於賢者也。

民國洛寧縣志八卷

民國六年知縣賈毓鶚等修。

按舊序，康熙三十一年知縣佟賦偉乾隆十二年知縣單履咸五十四年知縣張楷各一修。

凡八卷，一天文地理山川古區里區，二溝洫土產田賦風俗建置
祀典，三學校學務表職官科貢，四人物，五列女，六七八藝文
時政，以時政附於全書之末，而所載又不過議員題名之錄。其
繆且陋不待言矣。且至今尙不肯芟除星野謬說，反自撰自注八
景詩以充形勝，蓋鄉曲之見，直不知志爲何物，亦不足責也。
凡例有云，一舊志於洛寧風俗統論其大要而已，茲於冠婚喪祭
之儀約以三禮爲依據，參以文公家理，足徵今俗所存尙存古人
遺意，至於士農工商之職業，舊習方綱，新智未淪，是在司教
育之責者爲之振興於其間。一夫風俗云者志其時與其地之實際
狀況而已，初無可褒貶於其間，不必服官者講明禮意移風易俗
而後可以入志也。自來謬種流傳，動以古禮附會今俗，有如癡
人說夢，優孟登場，不自悟其醜怪。悲哉，民國六年所修之志
猶欲以三禮爲依據參以文公家禮也。

縣爲漢澠池縣之西境，西魏於黃櫨城置北宜陽縣，後改熊耳縣，屬宜陽郡，後周移于劉塢，屬同軌郡，隋義寧中移于永固城，因符堅舊城置縣曰永寧，宋以來屬河南府，民國改稱洛寧。

乾隆新安縣志十四卷

民國三年石印本

乾隆丙戌知縣邱峨修。

據序云，一勝國以前志委諸燼，順治中莆田俞公始訪求遺佚，約略成書。繼以寧遠佟公稍加增訂，迄三十餘年太原韓公乃復蒐輯付梓，今又七十餘年云云。一俞名遜，佟名希聖，韓名佑唐也。

凡十四卷，一封域志，二營建志，三秩官志，四惠政志，五武備志，六風土志，七賦役志，八祀典志，九禮儀志，十選舉志，十一人物志，十二三藝文志，十四見聞志。

大抵卽依韓志爲藍本，而或併或分，或增或汰。其尤陋者如星野之錄步天歌尙未剷除。而新安之史事素爲繁富，亦絕未采入。皆足徵其爲敷衍之作。惟所增風土一門有工匠日價一則爲他志所罕有也。

新安爲漢宏農屬縣。明以來隸河南府。漢武爲楊僕徙關卽在此，歷朝爲仰攻函谷必經之路。

嘉慶澠池縣志十六卷

嘉慶十五年知縣甘揚聲修。

據舊序前志修于順治十五年知縣張璟，再修于康熙九年知縣鄧琪葵，又修于乾隆十一年知縣梁易簡。

凡十六卷，一沿革等，二建置等，三職官，四選舉，五六人物，七八古蹟，九至十五藝文，十六金石，略具志體而已。

澠池漢宏農縣以縣在嶠澠間故名。貞觀中移治雙橋，即今治。

乾隆嵩縣志二十卷

乾隆三十二年知縣康基淵修。

按舊序萬歷壬午王守誠康熙癸卯知縣楊厥美壬申知縣盧志遜各一修。王序云，嵩古志散佚，聞諸先民藏在澤宮，詞簡事該，不知載筆者何人始自何時也。宣德中邑人胡敏重修，至正德初陸宜春復取胡志廣爲三卷，據凡例則今存者楊盧二志而已。

凡三十卷，一沿革表，二職官表，三貢舉表，四兩程世表，五沿革，六星野，七疆域，八山川，九風俗，十城垣，十一里保，十二市鎮，十三公署，十四河渠，十五食貨，十六學校，十七祀典，十八戶口，十九田賦，二十倉儲，二十一兵防，二十二宅坊亭墓，二十三至三十列傳。其曰兩程世表者，紀程頤程

顯之家世也。

嵩爲漢宏農陸渾縣，唐先天中析陸渾置伊陽縣，紹興初升爲順州，金改嵩州，治伊陽，元以縣省入州屬南陽府，明初改州爲嵩縣，移屬河南府。

明末李闖屢寇是邑，自是史跡之大者。乃摘錄盧志一段以細字夾注於星野篇中，是無識之甚也。

光緒陝州直隸州志十五卷

光緒辛卯知州趙希曾修，後任孔廣聰與黃璟繼成之，自乾隆丁卯知州龔崧林後而有是修也。

凡十五卷，一輿地，二建置，三賦役，四文治，五職官，六名宦，七選舉，八九人物，十一列女，十二十三藝文，十四金石，十五紀遺。

州爲漢弘農郡地，後魏置陝州，唐時陝虢觀察使所駐，爲關中門戶。季年升爲節鎮。明初以州治陝縣省入，雍正二年升爲直隸州，領閔鄉盧氏二縣。本書於兩縣屬事亦兼及焉。

光緒陝州直隸州續志十卷

光緒壬辰知州黃璟修，距趙志之修僅一年也。

黃氏自序云，仿近人江寧府志高陵縣志例得續志十卷，五閱月而稿脫。黃氏文人，所注意者圖繪詩什而已。其自序滿紙駢儷殊鄰纖俗。

凡十卷，一地輿，二建置，三學校，四禮樂，五職官，六人物，七列女，八藝文，九金石，十志餘。

光緒靈寶縣志八卷

光緒丙子知縣周淦修。

其序曰，一靈寶之有志不知始何時，自前明嘉靖邑令苟公汝安重修後一百二十餘年，至我朝順治丁酉，梁公儒宋公勝鯉次第重修。又三十餘年爲康熙二十九年，霍公濟遠大加考定，又五十八年爲乾隆十二年，周公慶增王公道暉初公元方相繼增補。至於今蓋又一百二十八年矣。一

其凡例云，一舊志起天文迄外紀，綱舉目張，各有成式，凡六卷。茲擴爲八卷。即續有更正采輯仍附於各條。一則一仍舊貫者也。

靈寶爲古宏農屬縣，宋尙屬永興軍，金始屬南京路。雍正二年升陝州爲直隸州。自河南府以縣隸焉。

凡八卷，一天文等，二建置等，三風俗等，四選舉等，五忠義等，六七八藝文。

光緒閩鄉縣志十二卷

光緒十九年知縣劉思恕修。

按舊序，萬歷甲辰知縣黃方順治甲午知縣張三省己亥知縣楊遵乾隆丁卯知縣梁溥林各一修。

本書大抵依據梁志。其凡例云，一百四十餘歲未曾修輯，故

老傳聞，漸就消歇，碑版記載，大半湮沒，又遞遭兵燹，案卷散佚，所掇拾者不過十一於千百，而采訪所及又或濫或疏不盡可登簡策，乃不揣固陋謬加丹鉛云云。一則其率略可想而知。凡十二卷，一疆域，二建置，三職官，四田賦，五學校，六典禮，七祠祀，八風俗，九選舉，十人物，十一列女，十二藝文。本漢湖城縣之園鄉，後周曾置郡及縣，旋廢。開皇十六年置縣，遷今治，唐屬虢州，宋以後屬陝州。縣境之盤豆城稠桑驛爲古來戰伐之地，泉鳩里則漢戾太子死處也。本書山川篇有一雉岡坡，在湖城縣出拓跋氏書一一語，殊不可解。其全帙亦皆雜湊而成也。

光緒盧氏縣志十八卷

光緒十八年知縣郭光澍繼前任修成。

凡例云，一明季慘遭寇火，舊志灰息，順治初年方始議修，十五年乃少創起。凡例，至康熙三十三年續修於邑令廣陵謝公，博收廣葺，正舛去訛，視舊志已大改觀，乾隆十二年陸川李公任盧，適奉檄纂修邑誌，於燼滅之後搜闡無遺。一謝名廷爵，李名炘。

禮凡十八卷，一天文，二地理，三山川，四田賦，五學校，六樂，七選舉，八九人物，十列女，十一職官宦蹟，十二祥異，十三古蹟寺廟，十四至十七藝文，十八外紀。

卷末有李旭春之兵燹，荒年紀略兩篇，雖俗筆而固能傳信。

縣爲虢之莘地，漢因盧敖得仙始置縣，屬宏農郡，唐屬虢州，明初屬陝州，後改屬河南府，雍正十一年復改屬陝州。熊耳山在縣境。

道光直隸汝州志十卷

道光二十五年知州白明義修。

凡例云，舊有金王宋三志，金志康熙二年知州金先聲修，王志三十四年知州王登魁修，宋志乾隆八年知州宋名立修。

凡十卷，一沿革表疆域表星野山川表，二職官表，三城池志公署志，四籍賦志倉儲志溝渠志食貨志，五兵防志學校志祀典志風俗志，六七人物志，八選舉志，九古蹟志災祥志，十藝文志。統所領四縣排編而成也。

漢爲潁川河南南陽郡地，東魏置北荊州，後周置和州，隋初曰伊州，大業中改曰汝州，治承休縣，後曰梁縣，明初以縣省入，成化六年升直隸州，領魯山郟縣寶豐伊陽四縣。志以汝墳爲州之事實，誤矣。

乾隆魯山縣志九卷

乾隆八年知縣徐若階主修。

例言云一豫省郡縣國初俱無志，順治己亥撫軍賈漢復始檄修志，一跋云一魯邑志創自舊令傅君燮調，再修於王君雍，迄今蓋五十年，一此始卽奉檄後所修之志也。

魯山古魯陽地，漢始置縣，元魏置魯陽郡，繼置廣州，唐改魯山以屬汝州，相沿未改。

本書九卷，一輿地志，二山川志，三田賦志，四建置志，五職官志，六選舉志，七人物志，八藝文志，九雜志。

中所甄錄如物產篇云，金李復亨奏民間銷毀農具以供軍器，竊以爲未便，汝州魯山寶豐鄧州皆產鐵，募工置冶可以獲利。觀此則魯邑故產鐵而後無聞焉。又保甲門於村落保甲之制述之甚

詳，其言曰，「牌民十戶爲一甲，十甲爲一保，保甲各設長一人，近於村百家設長一人，卡房一處，設健役二人，而鄉約所屬地方參錯不一，則附名數于後，共二百九十六保，一千九百三十七甲，牌民一萬八千三百三十二戶，卡房三十八所，健役七十六名，鄉約一百四十五名，村長一百七十五名，按魯邑牌名一萬八千三百三十二戶而戶口僅六千六百四十八丁何也。蓋戶口分隸里甲各設長以便催科輸貢納賦皆各列版圖者也。若城市鄉村或工商羈旅或房佃傭耕則與土著者均隸保甲給門牌以嚴禁匪類。牌民煙戶二倍于人丁戶口者此也。」若此之類，頗存故實，非泛應故事之志書可比。

嘉慶魯山縣志二十六卷

嘉慶元年知縣董作棟主修。武億纂輯。據序云，自乾隆八年重

修，今五十餘載，而不詳其始。蓋魯山實無前明之志歟。

按其體例，記之屬曰聖製曰帝賚，圖之屬，表之屬曰沿革曰爵封曰職官曰選舉，志之屬曰地理曰典祀曰田賦曰兵防曰水利曰藝文曰金石，傳之屬曰史傳曰集傳曰列傳曰列女傳，紀之屬曰循政曰大事，是與假師縣志一轍，而分別部居似猶勝之。蓋據金石以證史事爲武氏專長，且亦當時風氣。故其凡例曰，志不爲蹈空皮傳上依史傳外取掌故諸書及省通志汝州志縣舊志金石文字考信闕疑悉本舊文。又曰采輯金石遺文與縣中墟聚里居山川關隘對證互見，實爲史志所未載，反得散見於此，是以不憚博引詳稽，取爲方志之要。是其志也。然其志山川悉以故書爲本，自云凡不見於大記錄者皆不存。實偏古廢今之過，未足爲訓矣。

縣在漢爲魯陽屬南陽郡，元魏於此置廣州，尋改魯州，唐以後

稱魯山，屬汝州，西接嵩縣，南鄰鄧州。唐宋以來最可紀之事莫若毛葫蘆鄉兵，而舊志概未之及。本書引崔應麒保魯去思碑調指揮武舉監官軍僧毛兵若干數分鎮要害，又附錄日知錄論少林僧兵事，差存梗概。（兵防志）

又引顧亭林云，各州縣志郵鋪之紀未有如海州之詳核者，書之爲式。是顯氏所據，當爲前明圖志，世所罕覩。今具存此兩事，皆讀魯山縣志所不可不知者也。

魯山僻縣，文獻難徵，乃藝文則以墨子爲首，金石則以藏於縣人之漢鏡兩枚爲首，皆似未妥。

其人物傳之區分，則以正史有傳者爲史傳，集諸書成文者爲集傳，舊志所有者爲列傳，與他志之體稍異。

觀其大事記一篇，托始於明，悉襲乾隆徐志紀事篇之末段，至康熙二十九年爲止。其後復續以明正德等年事，未復出魏書宋

史數節。然則其爲隨章綴記，未曾定稿可知。而主修者以爲無足重輕，漫取付刊，反不如舊志之次序井然，猶爲有法度矣。

同治郟縣志十二卷

同治三年知縣張熙瑞等修，蓋卽咸豐九年知縣姜篋所修本而續之也。

凡十二卷，一沿革志，二職官志，三輿地志，四建置志，五政典志，六祀典志，七學校志，八選舉志，九人物志，十雜事志，十一藝文志，十二序錄志，其序錄志中止存順治十六年知縣王昕康熙三十三年知縣金世純乾隆七年知縣張楣嘉慶七年知縣章玉森四序，其明志則無所考也。

郟自漢立縣，屬潁川郡，後魏改龍山縣，隋初改汝南，復改輔城，終改郟城，元初省入梁縣，後置置郟，屬汝州。春秋時之

邾城城父皆在境內，其特產以邾麵及襄陵酒爲著也。
雜事志有紀流氓紀土賊紀魯山土匪紀教匪紀捻匪紀皖匪諸篇，
事實頗豐。

道光寶豐縣志十六卷

道光十七年知縣李彷彿修。

本書卷末存李發秀馬格陸蓉三序，陸志修于嘉慶二年，餘不詳。
凡十六卷，一宸翰恩賚，二三輿地，四五建置，六典祀，七
籍賦，八兵防，九職官，十選舉，十一名宦，十二人物，十三
十四列女，十五藝文，十六雜記。

縣爲自唐武德四年始析邾城之古郟城置龍興，宋熙寧五年省爲
鎮入魯山，元祐元年復置，尋改名興寶，宣和二年改今名，屬
汝州。本志云，一寶豐南滎北汝二水橫亘東境，與襄邾接者彌

望，峰巒西則自青條嶺至石門寺數十里，中更噴崕崎嶇與汝州魯山地參互盤錯，又商賈取經踰路者悉由寶豐南趨閩越北趨河朔秦晉，牽車肩負，絡繹蜂午。

道光伊陽縣志六卷

道光十八年知縣張道超修。

據修志姓氏，順治己亥知縣孫光焄王宗朱纂修，康熙甲戌知縣謝夢弼纂，乾隆壬戌知縣崔洪纂，乾隆丙戌知縣李章瑄纂，而不詳其原始。

伊陽唐析陸渾置，明初屬南陽府，其後改隸汝州。

書凡六卷，一地理等，二建置等，三學校等，四人物等，五六藝文等。其藝文二卷除濫載文詞外，列著述書目數紙，而張氏本人所著至十一種之多。閱其書名無一可傳者。以主修之縣令自纂其名于鄉土藝文中。何其厚顏哉。

乾隆彰德府志三十二卷

乾隆三十二年知府盧崧修。據其自序崧曾修江南吉安府志，畢沉見而獎許之也。

所錄有嘉靖元年禮部尙書崔銑序，稱「正德己卯太保湯公李公於中秘得宋相臺志十二卷，元續志十卷，郡守陳公萬言令所部各以其志送官，是歲冬以予輯而正之。」萬歷辛巳知府常存仁請大學士郭朴重修，順治十六年知府宋可發又修，康熙丙子知府湯傳楷又修，乾隆五年知府劉謙又修，二十五年知府黃邦寧又修。

乾隆庚申巡撫雅爾圖序云，「前志若崔文敏之簡質，郭文簡之詳贍，又或譌而闕，未易訂正。一本書凡例則云，一人物志崔氏草創所載無多，郭氏續後而不補前，故鄉賢之遺者甚衆，楊

黃又從而削之，尤爲憾事。一是前志皆以簡爲主而崔氏尤甚，今偏於繁抑非得已也。崔志見稱於徐元文，日下舊聞考四庫提要亦許爲謹嚴，亦康氏武功之流也。

凡三十二卷，一天文地理，二山川，三建置，四古蹟，五學校，六職官，七八宦績，九選舉，十武備，十一田賦，十二風土，十三至十八人物，十九二十列女，二十一寺觀，二十二至三十藝文，三十二雜記。

按嘉慶二十四年安陽縣志志原篇，據晁氏讀書志知宋有陳申之所撰相臺志十二卷，據崔銑自序知元人有相臺續志十卷，又清有許三禮之彰郡逸志，三禮康熙中人官至兵部侍郎，斯亦彰德之故實也。

康熙安陽縣志十卷

康熙三十年知縣馬國楨修，奉巡撫閻興邦命也。

安陽自後周以來爲相州治所，顧初無志，本書筭路藍縷聊勝於無。觀其凡例首條云，「志之有圖自東坡指掌圖始也，不踰數幅而疆域之廣袤名勝之阨塞與夫城郭宮室之壯麗如指諸掌，亦披閱者一快靚也，故特著之簡端。」議論如此，他可知矣。凡十卷，一輿地志，二建置志，三賦稅志，四職官志，五學校志，六選舉志，七人物志，八九藝文志，十雜紀志。

嘉慶安陽縣志二十八卷

嘉慶二十四年知縣貴泰修。

其序曰，「嘉慶安陽縣志前知縣長寧趙君希璜主修，河間紀相國集載有序文頗極推重，至以楷模許之。余承乏此土，求所謂趙志無復存者。問鈔版則收入歸裝載之去矣。趙君本知名士，復延偃師徵君武虛谷先生代爲捉刀，聞山川古蹟地理形勝以至

金石之搜剔稗野之舊聞皆徵君手輯之。徵君子小谷明府余二十年至契也。因走書小谷携舊藏刊本來鄴共相商榷，欲以廣趙君之傳，且以補此邦方志之遺也。遂開館於去年夏五月，並集人士之有學行而足以取重於鄉里者細心採訪，凡四閱月而蕪厥事。康熙安陽志淺率不堪，其後有乾隆三年知縣陳錫輅志及五十三年知縣陰珪續志及嘉慶四年而有趙志，自是名著，本書復批其郤而補其遺，允爲苦心之作，然其實所改正不多。

凡二十八卷，一縣境全圖等，二欽定皇輿表等，三職官表，四選舉表，五六地理志，七田賦志，八九建置志，十學校志，十一典祀志，十二兵防志，十三四五古蹟志，十六至二十四人物志，二十五循政志，二十六七藝文志，二十八志餘志原，附刊金石錄十二卷。

乾隆湯陰縣志十卷

乾隆三年知縣楊世達修，續康熙志而作也。

本書雜志云，湯志一修于成化五年知縣尙璣，天啓三年知縣楊樸重修，崇禎十年知縣沙蘊金康熙二十九年知縣趙光貴復修。凡十卷，一地理志，二建置志，三祠祀志，四田賦志，五官師志，六七人物志，八選舉志，九藝文志，十雜志。

縣爲古相里地，漢爲河內蕩陰縣地，唐自衛州改屬相州，宋曾屬澶州，旋復故，明以來爲彰德府屬縣。岳飛之故里，本書錄其佚事爲多。

雍正臨漳縣志六卷

雍正九年知縣陳大玠修。

按舊序，萬曆甲寅知縣趙友琴順治十六年知縣樂應昌康熙二十七年知縣陶穎發各一修。

凡六卷，一輿圖沿革天文疆域，二建置，三山川古蹟風俗土產陵墓寺觀賦稅，四職官，五人物流寓，六藝文。

縣爲漢魏郡鄴縣地，東魏天平初分置臨漳縣，自後周末移相州治安陽，於是魏晉以來之鄴城反在臨漳境。志宜述之史事多矣。乃泛錄曹操論多篇，何其陋也。

光緒臨漳縣志十八卷

光緒三十年知縣周秉彝修，繼雍正志而修也，自雍正以來惟咸豐庚申前任張濟曾刊藝文二冊而已。

凡十八卷，一疆域志，二建置志，三賦稅志，學校志，四職官表，五六選舉表，七八九列傳，十一列女傳，十二至十六藝

文志，十七補餘，十八瑣錄。
觀其例惟紀事沿革表差勝于前，若藝文分記詩賦雜志四項，彌
爲無謂。

乾隆林縣志十卷

乾隆十六年知縣楊潮觀修。

據序林舊無志，萬歷中年故邑人中丞馬公有志稿二冊，邑令謝
思聰因之，延邑人工部郝君持孝廉李君若杞纂輯。至順治十七
年邑令王君玉麟因前令楊君聲煥之迹而成志。又康熙三十三年
邑令熊君遠寄因前令徐君岱之稿而成續志。

書凡十卷，一疆域，二營建，三四山川，五風土，六賦役，七
選舉，八九人物，十秩官。

林爲漢隆慮縣，屬河內郡，避瘍帝諱始改隆爲林，金貞祐三年

升林州，元至元二年廢州爲縣，明以來遂屬彰德府。

縣有隆慮山爲古今勝區，志於此紀述特詳。其他則多因陋就簡。風土一篇衍爲十七記，名目雖繁，實非宏富。惟其器室記云，一南方屋材取諸杉，北方屋材取諸楊。縣屬杉不可得，楊亦罕有。雖在山林，選材不易。其取無盡而用不竭者，惟山石而已。凡屋制有山牆無壁柱，惟正廳用隔扇，餘皆一門二窗。惟大房用筒瓦，餘皆有底瓦無蓋瓦。其草屋用黃蓆草蓋用麥秸和土爲牆。棺槨以柏木爲上材，餘皆山中雜木也。日用器物編荆條爲筐，織高粱爲蓆。鐵器自壺關縣來，磁器自朱仙鎮來，竹器自清化來，瓦器自彭城來。一雖寥寥數語而人民生活狀況豁然如在目前。推斯意也，可以當地志之目矣。

乾隆內黃縣志十八卷

乾縣四年知縣李瀆修。

按舊志知嘉靖丁亥知縣張古萬歷庚子知縣王廷諫章邱縣知縣董復亨康熙元年知縣王爲仁等各一修，董氏自爲叙傳，意頗矜大，本志蓋依其例而稍併省之。

凡十八卷，曰沿革地理建置古蹟風土編年學校祠祀賦役職官選舉宦蹟人物藝文雜記。

乾隆武安縣志二十卷

乾隆四年知縣蔣光祖修，舉人揀選知縣會稽夏兆豐纂。

據序，一武安志始於嘉靖年學博陳公瑋，成於萬歷年邑令李公椿茂，康熙三十二年奉檄重修雕板，至康熙四十九年復就舊刻而續修之。一然其於前志源流殊未晰言之也。

凡二十卷，一星野，二沿革，三疆域，四山川，五城池，六建置，七學校，八祠祀，九賦役，十風俗，十一土產，十二職官

，十三選舉，十四宦蹟，十五人物，十六七八藝文，十九祥異，二十雜記。

武安漢縣，唐初屬洺州，繼立磁州，遂爲屬縣。明以來屬彰德府。

嘉慶涉縣志八卷

嘉慶四年知縣臧學標修。

據歷修姓氏，萬歷二十六年知縣李天柱四十五年知縣任澄清順治十五年知縣劉璿康熙三十年知縣楊以兼三十一年知縣左印奇五十三年知縣黃澤各一修。

凡八卷，一疆域，二建置，三政典，四秩官，五選舉，六人物，七雜志，八藝文。

漢爲魏郡沙縣，後漢改名涉。水經注云，漳水入縣人民徒涉更

名是也。後魏併入臨水縣，隋復置屬上黨，明初屬真定府，洪武二年定屬彰德府磁州，雍正中磁州割隸直隸，縣仍屬彰德。一縣曾移三省統轄也。

縣西有崇山，金曾升縣爲崇州，以此。環境皆山，風氣樸塞，本書風土篇云，男婦皆左衽，亦可異矣。

乾隆衛輝府志五十三卷

乾隆五十三年知府德昌修，前有畢沅序。

本書卷末有衛郡舊志序一篇，兵部侍郎郡人張衍慶撰。蓋爲嘉靖癸未知府申綸所修郡志而作。按選舉表知張登正德辛未楊慎榜進士也。其後康熙三十三年有知府胡蔚先一修。

凡五十三卷，曰輿圖，沿革，星土，古蹟，地理，封爵，建置，職官，田賦，祠祀，學校，選舉，人物，藝文，雜錄。其書得有畢氏指點，故沿革山川諸篇皆取證故書，不載俗說。

衛輝亦漢河內郡也，曹魏置朝歌郡，晉改置汲郡，治枋頭城，卽今滑縣也。隋唐曰衛州，明爲衛輝府。初領縣六，雍正三年滑自大名來屬，乾隆四十三年封邱自開封來屬，四十八年考城自歸德來屬，凡十縣，曰汲新鄉輝獲嘉淇延津滑滑封邱考城。

乾隆汲縣志十四卷

乾隆乙亥知縣徐汝瓚修。

據所載舊序，蓋汲志始于康熙丁丑知縣吳干將。以漢以來古邑而志乘僅一修，何其陋也。

本書十四卷，一、二地輿，三、四建置，五賦役，六風土，七爵秩，八選舉，九、十、十一人物，十二至十四藝文。

其凡例詆前志多沿襲郡志未盡確核，今頗多所訂正。蓋所刊落浮詞已不少矣。然于魏安釐王家一事記載亦殊太略。

乾隆新鄉縣志三十四卷

乾隆丁卯知縣趙開元撰。

按所錄舊修姓氏，萬歷己卯志知縣余相編次，萬歷甲午志知縣

盧大謨等纂修，崇禎庚辰志知縣米壽圖編次，順治己亥新志巡撫賈漢復鑒定邑人張縉彥纂修，康熙癸酉續志知縣周毓麟等鑒定邑人任昌期等纂修。又按凡例所稱，則邑志實自萬歷茹令鳴鉉始輯成書，余令相復修之，茹志未付剞劂，故其書不傳，余志亦復散佚。今所存者萬歷盧志崇禎米志順治新志康熙續志而已。盧米二志悉仍余志之舊，續志本新志而成也。趙氏自云此邦人士暢孝廉俊熟於掌故，出其舊纂若干卷，頗稱淵雅，乃取舊志及暢稿與邑中紳士從事排纂也。

書凡三十四卷，一曰圖說，二曰表，表之屬爲沿革封爵秩官選舉，三曰志，志之屬爲星野疆域形勝山川城池城堡關梁驛傳學校公署河渠賦役兵防風俗物產名蹟藝文祠祀邱墓祥異拾遺，四曰傳，傳之屬爲循吏人物宦望孝友儒林文苑廉介義行方技仙釋僑寓列女，人物以外復列諸目，則猶乎錮習未改者也。

隋開皇中割獲嘉汲縣地置新鄉縣，以新樂城爲治所因名，明以來爲衛輝府屬縣，黃衛沁三河所經也。

乾隆獲嘉縣志十六卷

乾隆二十一年知縣吳喬齡修。

據舊序志始于萬歷癸卯知縣張蘊道，續修于順治己亥知縣李玳，又修于康熙丁卯知縣馮大奇。

漢武帝元鼎六年車駕至汲新中鄉，獲南越相呂嘉首於行在，因以是鄉置縣名獲嘉。晉以後置汲郡，明以來爲衛輝府屬縣。

書凡十六卷，一沿革等，二山川等，三學校等，四祠祀等，五名蹟等，六七賦役，八河渠，九兵防等，十官師，十一選舉，十二循吏等，十三文學，十四十五藝文，十六祥異雜志。

順治淇縣志十卷

順治十六年知縣王謙吉等修。

據關輝祚跋云，淇舊有志。滅沒者不知幾何年，嘉靖間邑侯潛方公及蒲阪張公繼修之。方員嘉靖九年任，張宜二十年任也。書僅十卷，寥寥兩冊，略具形式而已。一地里志，二建置志，三貢賦志，四祠祀志，五官師志，六選舉志，七人物志，八九藝文志，十災祥志。

漢河內郡朝歌縣地，元初置淇州，又置臨淇縣治，明初改縣，屬衛輝府，本志沿革多訛誤。

道光輝縣志二十卷

光緒十四年知縣郭藻重刊

道光十五年知縣周際華修。

據舊序，舊志作於嘉靖六年，萬歷八年知縣聶良杞修，順治十六年知縣趙蔭奇再修，康熙二十九年知縣滑彬三修，乾隆二十二年知縣文兆爽四修。

凡二十卷，一圖，二三表，四地理志，五建置志，六田賦志，七渠田志，八學校志，九祠祀志，十循政志，十一人物志，十二列女志，十三經籍志，十四碑碣志，十五至十九藝文志，二十志餘軼事紀異。

康熙延津縣志八卷

康熙四十一年知縣余心孺修。

凡八卷，漫漶不可讀，舊志源流亦不存，僅知順治十六年曾一修也。

順治昨城縣志四卷

順治十六年知縣劉純德修縣人郭金鼎撰。

書僅四篇，曰地理，曰邑治，曰禮典，曰人物，據縣人王乘運序極言其地僻民貧，自庚辰（明末）之變，人死幾無子遺，故幾于無可志者。每門寥寥數語以應故事而已。板本亦漫漶難辨。雍正間併歸延津縣，蓋其領土實不足成縣也。

嘉慶濬縣志二十四卷

嘉慶六年知縣熊象階修。偃師武穆淳分纂。

其序略稱，「往年守偃師訪武虛谷先生，見其所爲河南諸縣志能考古能敘事，心好之。適奉檄之濬，因請修志，虛谷諾之。及抵濬，催虛谷至。謂余曰，明年九月當來，兩月可竣志事，

時戊午冬十一月也。如期遣車到假師而虛谷病遂不起。乃與邑中謹愿士商之，請其子小谷來分纂以續其先志。一斯亦修志之一段佳話也。據穆淳跋則惟分纂三表及建置學校祀典兵防水利循政金石十類，餘蓋熊氏所主也。

書凡二十四卷，一圖，二沿革表，三職官表，四選舉表，五方域志，六建置志，七學校考，八祀典考，九山水考，十水利考，十一兵防考，十二古蹟考，十三寺觀考，十四世家，十五十六人物記，十七流寓記，十八列女記，十九循政記，二十藝文錄，二十一二十二雜稽補遺，附金石錄別編上下二卷。

先圖表而後記述，蓋猶武氏諸志例也。然方域志中詳叙沿革則沿革表宜附之以行乃能相得益彰，其職官選舉表之宜附麗於人物記亦猶是矣。

顧本書有翹然特出之一點，則列女記中采及縣房存案是也。縣

胥本當史職，縣房案牘，本卽柱下之書。若戶口之冊，若詞訟之卷，皆撰志者所當取資者也。歷代志家舍近謀遠不知運用，於是真史料皆湮淪於蠹胥之手，其倖登志乘者則人莫肯顧之糟粕也。本書張雙姐邢福姐諸條，皆確有事實，較之他志之但錄姓名不可同日語矣。

惟雜稽篇有臣瓚辨一文，辨漢書注臣瓚之爲薛瓚，實與縣之事實無關，未免以炫博而軼出範圍也。

按其志原一篇述濟州源流頗精詳，撮錄如左。

元濟州志

姓氏卷數無考 佚

明一統志大名府形勝下引濟州志云，介東西山之間元時稱州洪武三年降爲縣，此必元志也。

明濟縣志八篇

佚

嘉靖七年知縣楊麟錢士聰孟奇合修。

明潯縣志

卷數無攷 佚

萬歷八年知縣任養心修。

明重修潯縣志八卷

存

崇禎七年知縣張肯堂修。

附保黎錄四卷。

潯縣志四卷

存

康熙十八年知縣劉德新修。

續志二冊

存

雍正二年知縣曾振宗修，乾隆十年馬日暄續。

熊氏跋中力詆崇禎張志之引書踈略，與康熙劉志之專務省文，於曾馬合志則摘其踈於攷證。蓋熊氏聞武億父子之緒論，其於方志之學故應勝前人也。

同治滑縣志十二卷

同治六年知縣姚錕修。

按舊序，嘉靖甲寅知縣張佳允順治甲午知縣王鼎康熙丙寅知縣姚德聞乾隆丁丑知縣吳喬齡庚辰知縣呂文光繼之各一修。張序云，「元至元五年滑宋忠肅公修東郡志十六卷，載滑事十之七也。」

凡十二卷，一圖說等，二山川等，三公署等，四祠祀等，五戶口等，六職官等，七選舉等，八名宦，九人物，十孝弟等，十一列女等，十二古跡等。

漢爲東郡白馬縣，隋爲滑州，唐乾元後置汴滑節度使治滑州，貞元中改義成軍，金元明皆隸大名，雍正三年改屬衛輝府。漢唐兩代皆爲重鎮，嘉慶十八年李文成之變，尤爲有清一代盛衰所繫。志於嘉慶之變僅輯錢儀吉等文，於名宦傳中無專篇以紀之。

順治封邱縣志九卷

附康熙續五卷

順治十五年知縣余縉刊，浙江溫處道參議縣人李嵩陽等纂。

詳按舊序，蓋嘉靖辛丑知縣朱縉萬歷乙亥知縣胡以祚曾兩修之。其邑三面瀕河，土疏易潰，父老相傳自古無二十年不衝決者。順治七年九年潰決相繼，民疲實甚。故其書亦僅能敷衍上台之督責也。

凡九卷，一封域，二建置，三民土，四學校，五職官，六人物，七八九藝文。

其例言云，「舊志文詞典贍體裁峻整，未易增損一字，今舊文俱錄存於首，凡續編者加一按字。」一則有此一編舊志雖佚猶存，以視他志好作更張者遠勝矣。

封邱爲漢陳留縣，左傳賜封父之繁弱以此得名，又會吳子於黃池，杜預云在縣南，又會晉侯同盟於蟲牢，亦在此也。
末附康熙三十六年知縣耿宏祚續本五卷。

乾隆懷慶府志三十二卷

乾隆五十四年知府杜琮等修。

按凡例，舊志創始前明，正德嘉靖一再修舉，國朝則順治己亥康熙乙亥先後刊行。

凡三十二卷，曰沿革星野輿地建置河渠田賦學校兵防職官選舉人物金石藝文雜記。

其目次稱末卷有原序附錄，檢覓未得，不解何故，惟卷首存康熙乙亥知府劉維世一序。其書大抵集各縣志而成無所發明也。懷慶爲漢河內郡，後魏置懷州，元延祐中爲懷慶路，明爲府，北倚太行，其氣候視河北他處爲溫煦。初領縣六，乾隆四十八年以後定領縣八，曰河內濟源修武武陟溫孟原武陽武。

道光河內縣志三十六卷

道光五年知縣袁通修，大興方履錢纂。

據凡例，舊志創于萬歷二十五年知縣盧夢麟，至順治十五年知縣孫灝奉賈漢復命修輯，康熙二十九年知縣李樸再修，萬歷志已佚矣。

河內爲懷慶附郭縣，古河內郡懷州故實皆入焉。宜其繁富。凡三十六卷，一聖製，二縣境等圖，三縣城等圖，四紀事沿革表，五封爵表，六職官表，七選舉表，八疆域志，九山川志，十風土志，十一祥異志，十二田賦志，十三水利志，十四祠祀志，十五學校志，十六營建志，十七兵防志，十八古蹟志，十九經籍志，二十二十一金石志，二十三文詞志，二十四循政傳，二十五先賢傳，二十七孝義傳，二十八忠節傳，二十九隱逸

傳，三十流寓傳，三十一藝術傳，三十二三列女傳，三十四釋道傳，三十五志餘，三十六叙傳。

中如金石志人物傳皆深費甄綜之功。其凡例自云，舊志所錄古事每有錯誤，茲雖載籍苦少，而史鑑及昔賢遺集，多所采擇，仍注明原引之書以待後人之考證。方氏以文學有聲于時，其下筆固超凡流也。

乾隆濟源縣志十六卷

乾隆二十六年知縣蕭應植修。

據舊序，濟源志輯於天順七年，嘉靖壬戌知縣李資元一修，順治十七年縣人劉漪再修，康熙二十九年縣人段維袞三修。隋開皇十六年始析軹北置今縣，明以來爲懷慶府屬縣。

凡十六卷，一沿革等，二山川，三建置，四五祀典，六水利，

七賦役，八職官等，九選舉，十十一人物，十二列女，十三至十六藝文。

乾隆原武縣志十卷

乾隆十二年知縣吳文烝修。

按舊序萬歷癸巳知縣張祥等始修，順治丁酉知縣竇弘舒承巡撫賈漢復命康熙庚午知縣詹槐芬承巡撫閻興邦命各一修。

凡十卷，一圖考等，二城池等，三禮樂，四賦稅等，五河防，六職官等，七名宦等，八九十藝文等。其文字殊舛陋。

原武漢縣屬河南郡，宋熙寧五年省入陽武縣，元祐元年復置。屬鄭州，元屬開封府，清改屬懷慶府。蓋以地居河北，統轄爲便也。縣有扈亭春秋時盟會之地。

乾隆修武縣志二十卷

乾隆二十二年知縣吳映白修，三十一年知縣戈雲錦繼成之。

凡例云，一修武舊無志，明冷令宗元始創爲之，繼修者署令鄭，順治十五年重加編輯，今志則康熙三十四年邊令憬所修，一職官表有天啓十二年知縣鄭之綰，不知卽所謂署令鄭否。

凡二十卷，一星野志，二疆域志城池志，三公署志學校志，四賦役志，五兵防志，六山川志古蹟志，七祠祀志陵墓志，八風俗志物產志，九災祥志，十沿革表，十一職官表，十二選舉表，十三名宦傳人物傳，十四儒林傳，十五孝義傳文苑傳，十六方技傳流寓傳，十七列女傳，十八十九藝文，二十雜識。序云三月告成，又苦無書籍，宜其簡而率也。

道光修武縣志十卷

道光己亥知縣馮繼照修。

凡十卷，一二三輿地志，四建置志令典志祥異志，五學校志，六祠祀志，七秩官表選舉考，八人物志，九列女傳藝文志，十金石志雜記，所謂令典志則田賦等也。

本書力矯前志之空疏，凡有紀述皆具來歷，且交互參訂必求其是，尤以沿革陵墓祠祀諸篇爲宏富。

道光武陟縣志三十六卷

道光九年知縣王榮峰修，方履籟纂。

據巡撫楊國楨序，縣志昉於明李日茂，順治十五年署令全元樞修之，康熙三年邑令甘國垓重修，乾隆二十年邑令查開而未竟

其業，二十一年邑令王靖續成。又據卷末所錄全序稱昔志之所略者務爲增之，近事之未入者務爲補之，知其以李志爲藍本。及今志之修，則其凡例云，舊志存者惟康熙三十年甘國珍所修之本，其書頗爲冗雜。乾隆二十一年查君開王君靖所修之本較爲完善，而板冊皆佚。似竟未見李志也。

卷首有采訪條例一篇，足徵舊志資料之源，據其凡例異於他志者數事。一本邑山少於川而黃沁兩河之隄防實關一邑之大政，故既作山川志而別爲河防一卷以昭慎重。一邑人譔述作經籍志一卷。一近人名志皆列金石一門，搜采邑中諸石刻全錄其文爲一卷。一詩文分注各志，又采其有裨於一邑之故實者別爲文詞志二卷。一先賢傳以外邑中自元明以下有德望學術者別載列爲耆舊傳。於是綜爲目次如下，卷一聖製，二目錄凡例等，三四圖，五紀事沿革表，六職官表，七選舉表，八疆域志，九山川

志，十風俗志，十一物產志，十二祥異志，十三田賦志，十四河防志，十五建置志，十六學校志，十七祠祀志，十八兵防志，十九古蹟志，二十經籍志，二十一碑碣志，二十二三文詞志，二十四名宦志，二十五先賢傳，二十六耆舊傳，二十七孝友傳，二十八義行傳，二十九忠義傳，三十隱逸傳，三十一流寓傳，三十二方術傳，三十三列女傳，三十四釋道傳，三十五志餘，三十六叙略。

乾隆孟縣志十卷

乾隆五十五年知縣仇汝瑚修，戶部主事前編修欽州馮敏昌纂。所存有康熙乙亥知縣張之紀一序稱勝國遺帙隨寇陷成煨燼，所睹順治己亥纂修者迄今已三十七年。

凡十卷，一聖制，二地理，三建置，四田賦，五職官，六人物

，七藝文，八金石，九史事，十雜記。

馮氏之書在河南諸志號爲與武洪諸作驟斬，今按其地理諸篇引舊志之說必以今狀爲斷，惟此一節差爲所長。至於其職官表自稱但托志局采訪諸君繙閱諸史，而不知碑誌文集俱當繙閱。其逸事篇自稱當不止此尙未窮搜，則已自承其疏簡。郝經爲陵川人，其著作不應入藝文，則仍舊志之擄摭依附。以徵辟科貢等表置於人物傳之後，孝義文學列女之前，則雜糅無序彌甚于舊志。總之矜文詞而忽事實，馮氏無以逃此譏也。

縣卽古盟津，漢爲河內河陽縣，唐置孟州，河陽三城節度治焉，明改爲縣，以河陽省入。韓愈墓在此，本書於此頗多辯証。

乾隆溫縣志十二卷

乾隆二十四年知縣王其華修。

據舊序，萬歷五年知縣張第自邯鄲調溫，仿邯鄲志而修，順治十六年知縣李若虞奉巡撫賈漢復命再修，嗣是康熙三十四年知縣張明達乾隆十一年知縣張承謨各一修。

凡十二卷，一圖說，二沿革表等，三秩官表，四選舉表，五天文志，六地理志，七建置志，八祠祀志，九學校志，十田賦志，十一宦蹟志，十二人物志。

溫爲周畿內國，漢置縣，明以來隸懷慶府，司馬氏之故里也。又以西漢傅氏封爵嬋媽，於是特闢帝后外戚爵封表以處之。然削司馬懿昭父子而不書，謂爲誅姦回於既死春秋謹無將之意。書生迂語，祇供嗚噓。其古事一篇附地理志而不置之沿革表後，亦非也。

然其宦蹟志兼及劣跡，詩文并從芟削，不立藝文一篇，猶從質之意也。

乾隆陽武縣志十二卷

乾隆十年知縣談誥曾修，奉藩司檄也。

據序，志創于宏治癸丑知縣張林茂，萬歷辛卯知縣王時泰續修，順治己亥知縣武九官又修，康熙庚午知縣安如泰又修。

凡十二卷，一輿圖沿革天文疆域，二三四建置，五山川古蹟風俗土產，六祠祀，七田賦，八職官，九十人物，十一藝文，十二災祥。

陽武爲漢縣，以博浪沙及陳平所生戶牖鄉事名於史乘。金晉置延州，元廢，明以來隸開封府。

本書沿革志叙里制之變更云，一明初爲五十一里，後爲四十五保。其後又併爲二十八保。保有長曰老人，統十甲，有催曰十季，輪流支應，周而復始，以應征比。然行之既久，諸弊叢生

。任事有專責則需索易，花戶無定所則催督難，故每當一役視爲苦海，富者動費百金，貧者鬻產難償矣。乾隆五年知縣宋維孜奉檄二十八保改爲二十八地方，挨里順庄，遵用滾單，不事敲朴而輸納恐後云云。一編里之法變而僅供催徵錢糧之用。於是實際之鄉里區域與保甲分爲兩事，由來久矣。故爲縣志者宜以所管村莊入疆域志，而歷來編里之制入田賦志。斯爲名實不違。而諸志多以村莊名列建置志，非也。

風俗志載乾隆四年巡撫頒發訓士條約內禮俗相交患難相恤二條，叙禮俗頗詳悉。亦顏氏家訓封氏見聞之遺也。

嘉慶南陽府志六卷

嘉慶十二年知府孔傳金修，前志修于康熙甲戌知府朱璘也。

凡六卷，一輿地志，二建置志，三賦役志，四官師志，五人物志，六藝文志。篇幅簡而不蕪，雖不足以言志法，固猶堪備檢閱也。

南陽自漢以來爲郡，乾隆以後定領縣十一，曰南陽南召鎮平唐泌桐柏新野內鄉舞陽葉，州二曰鄧裕，廳一曰淅川。

康熙南陽縣志六卷

康熙三十年知縣張光祖修，無前志源流，光緒志所譏爲疏陋者也。

凡六卷，一地理志，二建置志，三賦役志，四職官志，五人物

志，六藝文志。

漢南陽宛縣，隋初郡廢，改縣爲南陽，屬鄧州，元以後爲南陽府治所。

光緒南陽縣志十二卷

光緒二十五年知縣潘守廉修，榮成孫葆田纂。

序曰，一縣故無志，萬歷中知縣成遜與教諭宋昂創爲之，康熙三十年知縣張光祖因前令李本深所纂舊志以屬諸生宋景愈等重共搜輯，同治十三年吳若煊知縣事，始與教授宋君合議重修，甫開局而吳君去。一及是始有此修。孫氏曾聞張裕釗之緒論，故訂例頗優而製圖尤精美。

凡十二卷，一沿革表，二疆域志，三建置志，四職官志，五田賦志，六學校志，七祠祀志，八兵防志，九溝渠志，十藝文志

，十一人物志，十二雜記。

全書大抵集故書而成，一一注明來歷，鍼紕之迹宛然。然斷制太濫。例如云縣境蒲山有石室產朱草，乃據府志相傳山有朱草人得食之可以成仙。夫石室朱草之有無，當得之於目驗，不應徒據相傳之說遂勒爲定案，是以本書雖爲苦心經營之作，究之可以爲私家著述之善者，而不得列方志之上乘也。

乾隆南召縣志四卷

乾隆十一年知縣陳之煥修，奉布政使趙城命也。

縣在漢爲西鄂縣地，唐爲向城縣地，明初爲南召店巡司，成化十二年始置縣，縣北魯陽關與魯山縣分界，卽所謂三鷄路口也。順治戊戌知縣紀中興始爲志，陳氏序云上下二卷四十五版而止，其簡陋有如是，然本書亦仍舊貫略加補綴而已。

凡四卷，一輿圖等，二山川等，三人物，四藝文。

光緒河南鎮平縣志六卷

光緒二年知縣吳聯元修，前志修于康熙三十三年知縣張琮。

凡六卷，一圖沿革等，二建置志，三典禮志賦稅志，四職官表名宦志，五人物志，六藝文志。

漢南陽安衆縣，宋爲穰縣地，金初置陽管鎮，後置鎮平縣，屬申州，明以來爲南陽府屬縣。

乾隆唐縣志十卷

乾隆五十二年知縣黃文蓮修，文蓮上海人，曾撰河間府志。

按歷修姓氏，正德十三年知縣李鐸順治十六年知縣李興運康熙六年知縣田介三十五年知縣平鄆鼎各一修。

觀康熙六年曲耀燾序，知曾三刻而三遭巡撫之駁。僻邑修志之

不易如此，使長官能明訂體例延聘通人爲之執筆，亦何至枉災梨棗至是哉。

文蓮久歷民社，迭修志乘，宜較俗吏爲優。然亦平善而已。凡十卷，一輿地志，二建置志，三賦役志，四職官志，五宦蹟志，六選舉志，七八人物志，九十藝文志。

縣爲春秋時唐國。舊志至誤爲唐叔虞所封，大誤矣。漢爲南陽比陽縣地，唐始置唐州，頗當軍鎮之重。明初降縣，與所屬泌陽桐柏並隸南陽府。

道光泌陽縣志十二卷

道光四年知縣倪明進修，其前志修于康熙五十三年知縣程儀千等也。

漢置武陰縣，屬南陽郡，東魏改置臨舞縣及期城郡，隋郡廢以

縣屬顯州，唐改縣曰泌陽，本書凡例曰，一泌邑唐縣相距百里，唐貞觀中始置泌州，以比陽爲附郭，凡言泌州實今之唐縣也，五代朱梁改泌州爲唐州，移治泌陽，凡言唐州實則今之泌陽也。通志郡志未能限斷。一其言深爲明顯。

凡十二卷，一沿革表疆域志，二山川志古蹟志，三災祥志風土志，四營建志祠祭志，五學校志，六兵防志賦役志，七職官表宦蹟傳選舉表，八人物傳列女傳，九至十二藝文志。其體例在河南諸志中亦可謂雅正者矣。然內容殊多敷衍，例如泌陽焦氏簪笏繁衍，焦芳雖不足取，不應不爲之立傳也。

乾隆桐柏縣志八卷

乾隆十八年知縣華敬緒修，通渭舉人李南暉纂，奉布政使趙城命也。

按舊序順治十六年知縣賈或康熙乙亥知縣高士鐸乾隆十年知縣劉元亨各一修。

凡八卷，一天文志，二地理志，三建置志，四官師志，五食貨志，六典禮志，七人物志，八藝文志。觀其凡例，沾沾於序論之有無，天文之存廢，其識度可知也。

縣爲漢復陽縣地，梁置淮安縣，又置華州及上川郡治焉。西魏改州曰淮州，又改純州，後周置大義郡，隋廢郡改縣爲桐柏，屬顯州，唐屬唐州。

以桐柏山得名也。禹貢導淮自桐柏，故淮瀆廟在此。本書典禮志歷叙萬壽文廟諸儀之千篇一律者，獨於祭淮瀆之儀不一叙。甚矣抄襲雷同之害，竟無人發其蒙也。

乾隆鄧州志二十四卷

乾隆二十年知州蔣光祖修。

前志修于順治十六年知州陳良玉康熙三十三年知州萬儆，其明代之志則僅存嘉靖三十五年知州張僊四十三年知州潘庭楠萬歷三十年知州趙沛三序。

凡二十四卷，一沿革，二星野，三疆域，四山川水利，五建置，六學校，七祀典，八古蹟，九風俗，十賦役，十一職官，十二名宦，十三武備，十四選舉，十五人物，十六忠烈，十七孝弟義行，十八隱逸流寓，十九仙釋方伎，二十列女，二十一附傳，二十二藝文，二十四雜記。

州爲春秋時鄧國，兩漢爲南陽郡，後魏置荊州於此，隋初改曰鄧州，唐以來唐鄧隨三州爲重鎮，明以州治穰縣省入，領內鄉新野淅川三縣，自清代改散州以後，地望遂降矣。

日知錄所考唐鄧毛葫蘆兵，本書無一語及之，其他又何論矣。

康熙內鄉縣志十卷

康熙三十二年癸酉知縣寶鼎望修。

據所錄舊序，成化二十年知縣沃頰始修，萬歷辛丑知縣俞廷佐取前任尙從試稿刊之，順治十六年知縣王襄明續修。

內鄉爲漢南鄉地，西魏始立內鄉縣，明以來爲南陽府屬縣。

凡十卷，一輿地志，二建置志，三學校志，四食貨志，五風俗志，六職官志，七選舉志，八人物志，九藝文志，十兵事災祥雜記志。

其凡例云，一內鄉縣田賦值滄桑之後，版籍散失，原額無考，里書孫汝賢任臆開報，舛錯浮多，貽害無窮。前令高公始訪得萬歷九年丈田清糧碑崇禎間疏減加增九釐銀三分之一感恩碑於荊棘瓦礫中，茲植重修邑乘，復得舊存萬歷四十七年由單，尤

覺明白顯易，并載黑鉛紀事於末，庶將來救民者有所徵信而豁累焉。一由是以觀，方志必須詳載邑之故牘然後有裨於實政如此。彼斤斤於文章義法動以簡潔爲言者，其湮沒故實貽害後人之罪可勝道哉。黑鉛紀事者縣人籲請將額解黑鉛由三百斤增至二萬八千餘斤者加以豁免也。

乾隆新野縣志九卷

乾隆十九年知縣徐金位修。

所存舊序有崔誼之趙國佐張璽武國樞四序，而不存其年月。今按秩官表，崔爲順治甲午任，趙爲順治己亥任，張爲康熙辛酉任，武爲康熙辛卯任也。

凡九卷，一輿地志，二建置志，三秩官志，四名宦志，五人物志，六賦役志，七古蹟志，八祥異志，九藝文志。

新野本漢南陽郡屬縣，晉初爲義陽郡治，唐曾置新州於此，旋廢縣仍屬鄧州，宋爲新野鎮，元復置縣。

咸豐浙川廳志四卷

咸豐十年同知徐光第修。

據前任同知王官亮序稱繙閱舊志知爲康熙二十八年令郭公所修，今檢職官志無郭名，不審何也。要之僻阻之區文獻無徵必久矣。

廳爲春秋時析邑，漢置浙縣，西魏改浙川縣，唐曾置浙州於此，貞觀後州廢縣省，成化七年析鄧州內鄉縣地置今縣，清初改屬南陽府，道光十二年奏准裁縣，以南陽府同知改爲浙川廳撫民同知移駐城內。

凡四卷，一輿地志建置志賦役志，二禮樂志，三職官志人物志

選舉志，四藝文志。

乾隆裕州志六卷

乾隆五年知州宋名立修，前志修于康熙五十五年知州董學禮也。州爲春秋時之方城，漢爲南陽堵陽縣，西魏置方城縣，唐曾置魯州旋廢。金大和八年置裕州治方城，以縣屬之，明省縣入州隸南陽府，其後因之。

凡六卷，一地理志，二建置志，三賦役志，四名宦志職官志，五人物志，六藝文志，勉強湊成而已。

道光舞陽縣志十二卷

道光十一年知縣王德瑛修。

本書第十二卷，誌餘云，縣志不知所自始，嘉靖間知縣張穎重

修，康熙二十七年知縣蘇虔三十一年至四十九年知縣祖良屏于建邦乾隆十年知縣丁永琪各一修。

凡十二卷，一聖製，二疆域志，三建置志，四賦役志，五典禮志，六風土志，七職官志，八選舉志，九人物志，十藝文志，十一災祥志，十二誌餘。

舞陽爲漢南陽屬縣，以舞水得名，元省入葉縣尋復置，屬裕州，雍正中裕州爲散州，故徑屬南陽府。汝水渙水昆水澁水皆境內大川也。

本書風土篇有王氏自作厚風土告示，雖自炫之文，猶勝他志之敷衍數語也。

乾隆葉縣志八卷

乾隆丙寅知縣石其灝修。

據其凡例云，一葉之有志明以前無考。至嘉靖時先達牛太常始有定本，嗣後凡三增修，至康熙二十九年而書始大備，其時總修者呂令柳文分纂者邑人井天樞等。一

凡八卷，一圖考等，二城池等，三賦役等，四風俗等，五職官，六人物，七藝文，八雜記。其叙列凌雜，登載蕪溢，如以鄉飲酒置學校之後等類，不一而足。

同治葉縣志十卷

同治壬申知縣張佩訓修。

按所存舊序有萬歷二十年知縣高文登康熙辛未知縣呂柳文乾隆丙寅知縣石其灝三篇，高序云葉有志自邑人太常牛公鳳始，志創于嘉靖壬寅也。

凡十卷，一輿地志，二建置志，三禮樂志，四賦役志，五職官

志，六選舉志，七名宦志，八人物志，九藝文志，十雜記。
春秋楚遷許於葉卽此地，漢爲南陽葉縣，唐曾置葉州及仙州，
旋廢屬汝州，金改屬南陽府。光武大破王尋王邑兵於昆陽亦在
縣境矣。

嘉慶汝寧府志三十卷

嘉慶元年知府德昌修，南湖書院院長編修王增纂。

按凡例，一汝寧列郡自明以前從未有志，至成化癸卯陳學正鑿正德辛巳強長史晟採錄成編，萬歷戊申李少司空本固秦徵士鎬繼之纂輯，其書今皆不存。國朝順治壬寅金太守鎮始重修之，康熙乙亥何郡伯顯祖復爲增輯。金志之修適當勝國兵燹之後，事蹟興廢一時無從考核。何志猶仍金志舊編所載，附以無稽之言。兩志緣起皆遵臺使檄令重修，大約薄於時日，草率從事，未免抄撮成書。一

凡三十卷，一建置沿革，二城池，三山川，四村市關梁，五水利，六學校，七公署，八戶田，九軍制，十壇廟，十一古蹟，十二冢墓，十三寺觀，十四官師，十五宦績，十六選舉，十七

至十九人物，二十游寓仙釋方技，二十一二列女，二十三至二十六藝文，二十七八詩，二十九雜志，三十舊序，雜載詩文幾及其半，所引書文不載出處，河南諸府志中陋最甚矣。

府爲漢汝南郡，唐爲蔡州，陳希烈吳元濟秦宗權三次倚此爲固，金哀宗之亡也亦在此。元始立今名，雍正二年升所屬光州爲直隸州，定領八縣，曰汝陽上蔡確山正陽新蔡西平遂平羅山，州一曰信陽。

康熙汝陽縣志十卷

康熙二十九年知縣邱天英修，奉巡撫閻興邦命也。

按舊序前志蓋修于萬歷間知汝寧府黃似華及順治十七年知縣紀國珍。然不著年月，稽考甚難。

凡十卷，一二輿地志，三建置志，四食貨志，五典禮志，六爵

秩志，七職官志，八選舉志，九人物志雜記，十藝文。

漢置汝陽縣屬汝南郡，隋大業初析上蔡縣地別置汝陽縣，即今縣也。自唐以後皆爲郡治，東南有平輿城乃漢之汝南郡治也，又謂之懸瓠，南北朝時屢屢爭奪之地也。

嘉慶正陽縣志十卷

嘉慶元年知縣楊德容取前任彭良弼稿而增以補遺刊行之也。

正陽在漢爲慎陽縣，劉宋改爲眞陽，雍正二年因避諱改今名，隸汝寧府。

據序稱縣之有志肇自有明，康熙丙子知縣安圻重修。檢安序則嘉靖乙卯成於徐寬，順治庚子修於劉必壽，據凡例則云，一正邑志始於正德乙亥張學博起，編輯成書。繼修者焦學博濟成於嘉靖壬寅。何孝廉麟成於嘉靖乙卯。一數百年古縣，自黃叔度

而後，風流闕然，無佳志以傳其地，亦可慨矣。據本書凡例謂劉志評何志多慶幸頌美之詞，卽此已非志體，劉志則反而爲感慨，間及時事，安志概刪之而失於編次無倫，參雜論斷。今觀本書，亦僅能臚列項目無志法也。

凡十卷，一曰圖沿革城池，二曰山川學校建置田賦，三曰壇廟古蹟官師，四曰宦蹟選舉，五曰人物游寓，六曰列女，七八曰藝文，九十則補遺也。

康熙上蔡縣志十五卷

康熙二十八年知縣楊望修，前志于順治己亥知縣楊鴻羽也。

其凡例自云，「上蔡舊志久亡，至順治己亥始以數人臆說草創一書，遺漏殘缺，不稱信史，余特擇邑諸紳衿，較讐采訪，將十閱月而書成，雖僻地少所考證，較前書稍詳。」然本書藝文

志濫載平淮西碑等文，而不知淮西爲汝寧府事，上蔡不過其所屬。其庸濫猶是俗志積習，惟人物傳悉錄史傳原文，頗爲特識耳。

凡十五卷，一輿地志，二建置志，三溝洫志，四食貨志，五六典禮志，七爵秩志，八選舉志，九十一人物志，十二編年志，十三十四十五藝文志。

漢爲汝南郡屬縣。應劭曰，九江有下蔡，故此稱上。隋大業初改置汝陽縣，而改武津縣爲上蔡縣，唐仍屬蔡州。

乾隆新蔡縣志十卷

乾隆六十年知縣莫璽章修，編修會稽王增纂。

凡例云，一新蔡向無志乘，前明萬歷年間邑人劉氏大恩及其子若孫相繼編輯，勝國以來遺書僅存一二，國朝康熙三十年知縣

呂氏民服復取劉氏原本重新纂輯，迄今百有三年，舊板模糊，卷頁殘缺，今仍其大略增輯成書以備文獻之徵。一今舊序存藝文篇也。

凡十卷，一地理，二三經制田賦，四五典制官師宦蹟，六選舉，七人物，八列女，九藝文，十雜志。頗以簡潔爲勝。

春秋時蔡平侯徙都于此，故稱新蔡，漢爲汝南郡屬縣，其後屢有分合，明初定屬汝寧府。縣東有舒城，隋唐皆曾置舒州，故易與今安慶之舒州相混。

康熙西平縣志十卷

康熙三年知縣李宏植修，取九年前任沈棻所修而重訂之也。其前則順治十六年知縣王鳴璫一修。凡例云，嘉靖王誥志遭明季兵燹毀滅無遺也。

凡十卷，一輿地，二建置，三食貨，四典禮，五官師，六選舉，七經武，八文物，九藝文，十外志。

縣爲漢汝南西平縣，後魏置襄城郡於此。北齊改文城郡，隋初郡廢，以縣屬蔡州。古棠谿在縣境，漢志猶稱西平有鐵官也。本書凡例云，西平故家既乏典籍，又無遺老足徵，其取材艱窘如是。

乾隆遂平縣志十六卷

乾隆二十四年知縣金忠濟修，前有巡撫胡寶瑑序，據云神宗時邑令王致和有志猶未詳，至順治己亥邑令張鼎新起而重輯之。凡十六卷，一星野等，二建置，三土產風俗，四五田賦，六水利，七八學校，九十仕籍，十一貢舉，十二名宦鄉賢，十三貞烈，十四外記，十五十六藝文。

第十三卷記烈婦唐氏事云，一事在康熙四十八年，迄今五十餘載，幾湮沒莫傳，適採訪時聞城北門外義冢中有烈婦碑，橫仆草際往尋之，見碑已半埋蒿壤，字數行剝落不可認，幸載烈婦事尙明，因節取立傳，但無旌獎字樣，止云邑人同立，是當時未蒙旌獎，邑人特因其烈公同立碑志之也。一可見民間佚事搜訪之難。平日方志但據請旌冊而錄其姓氏，固不足恃。安得苦心不沒人之善如斯志者哉。

縣爲春秋時房國，漢爲汝南吳房縣，後魏改遂平，唐元和中復改今名，縣境有文成柵，即李愬禽吳秀琳處，又查牙山亦天險矣。

乾隆確山縣志四卷

乾隆十年知縣周之瑚修。

按凡例，確邑自有明末造舊志悉燼兵燹，順治十七年知縣吳國杰檢斷碑殘稿創修邑志十卷，復爲知縣張登第刪訂，約草稿四卷上之當路，迨康熙二十九年中丞閻梅公纂修中州省志，將原稿發還確邑知縣孫京授梨棗。

本書四卷，一圖像天文等，二山川等，三封建等，四藝文等，一依舊志條欵也。

縣爲漢汝南朗陵縣，梁置安昌縣于此，屬陳州，後魏移縣治于朗陵故城，兼置初安郡，隋初郡廢，縣移今治，旋改朗山，唐屬蔡州，宋眞宗時因避諱改今名。北抵遂平，南抵明港，爲南北往來孔道。

乾隆信陽州志十二卷

乾隆己巳知州張鉞繼前任馮原修成。

馮序云，舊志創于勝朝神廟時，宗伯何公洛文大參劉公尙朴實成之，至康熙十六年州守賈公待旌與劉君蓀芳等重輯之。然據凡例尙有康熙二十九年知州陳昌言一修未及，又萬歷志實修于知州楊若梓也。

凡十二卷，一天文志與地志，二建置志，三食貨志，四典禮志，五六官師志，七選舉志，八九人物志，十十一十二藝文志。信陽爲春秋時申國，魏分南陽置義陽，是其得名之始。唐爲申州，宋初改義陽軍，太平興國中改信陽軍，元以後爲州。南北行旅所必經，南汝光道所駐，復爲重鎮矣。左傳所謂大隧直轅冥阨即所謂信陽三關矣。今爲平靖黃峴武陽而武勝猶在其外也。又爲淮水所經，可以控制江左。元魏時田益宗所謂義陽差近淮源利涉津要，朝廷行師必由此道也。本志於歷代兵事既鮮著筆，驛路所經民風一切亦無一語及焉。


乾隆羅山縣志八卷

乾隆十一年知縣葛荃修。

按舊序，萬歷四十五年知縣劉明才天啓七年吏部主事縣人羅華袞崇禎戊辰知縣李崇德順治己亥知縣李廣明康熙辛未知縣魯麟各一修。凡例云，茲志本舊文而續增之，與康熙辛未志事同一例，但彼已名續志，今標爲增志也。

凡八卷，一輿地志，二建置志，三食貨志，四典禮志，五官師志，六選舉志，七人物志，八外紀志。

漢爲江夏鄖縣，開皇十六年置今縣，屬申州，唐武德中置羅州旋廢，明初會屬江南鳳陽府，旋改汝寧，成化十一年仍隸信陽州，其曰羅山者，以縣南有羅山也。



乾隆光州志六十八卷

乾隆三十五年知州高兆煌修。其書既無年月，復未著舊志源流，蓋倉卒去官未及審定歟。

凡六十八卷，一圖經，二建置志，三星野志，四疆域志，五山志，六水志，七形勝志，八城池志，九街巷志，十鄉里志，十一壇廟志，十二學宮志，十三書院志，十四秩官志，十五師儒志，十六公署志，十七戶口志，十八十九田賦志，二十土貢志，二十一鹽法志，二十二牙稅志，二十三倉儲志，二十四溝洫志，二十五津梁志，二十六關隘志，二十七八食貨志，二十九市集志，三十風俗志，三十一恤政志，三十二監獄志，三十三郵傳志，三十四坊表志，三十五坵墓志，三十六古蹟志，三十七八典禮志，三十九至四十一選舉志，四十二兵制志，四十三

封爵志，四十四藝文志，四十五紀事志，四十六至四十九宦蹟列傳，五十至五十四仕賢列傳，五十五武功列傳，五十六忠義列傳，五十七至五十九善行列傳，六十文學列傳，六十一寓賢列傳，六十二至六十五列女列傳，六十六方技列傳，六十七雜記，六十八總序。

每篇皆歷敘沿革，膚詞居多，以此頗占篇幅。然如鹽稅牙帖等篇固爲詳審，勝于他志，其考文垂憲之旨不可沒也。
末附光州志附錄十二卷，皆詩文雜著。

光緒光州直隸州志十二卷

光緒十二年知州楊修田修，以本州爲主而略及屬縣之事。

其序曰，一光州有志自宋時始，宋史藝志載有徐自明浮光圖志三卷，李棟浮光圖志二十卷，其書久已不傳，明史藝文志載有

張輝光州志十卷，國朝順治十七年州牧莊泰宏修之，康熙三十一年州牧繆發又修之，雍正二年升光州爲直隸州，一切署置多屬往昔所未有，舊志有宜增改者，乾隆十一年後州牧高鑒李訥相繼修之，名爲光州縣志，乾隆三十五年州牧高兆煌以舊板燬於火，重修之，名爲光郡通志。一其實高志名光州，不名光郡通志也。

凡十二卷，一建置志，二典祀志秩官志兵制志，三選舉志，四物產志古蹟志墳墓志，五藝文志，六宦蹟列傳，七善行列傳，八九仕賢列傳庶賢列傳方伎列傳，十至十二列女傳雜記，大致仍如前志例，惟過於冗濫之樂章儀注已芟除矣。

未附光州忠節志專以紀髮捻兩次擾境時殉難者，節孝志則列女傳所遺也，光緒庚辰姚國慶修。

光州爲春秋時光黃弦蔣諸國，漢爲汝南江夏二郡，魏分置弋陽

郡，梁始置光州，元以州屬汝甯府，明初改屬鳳陽府，旋復故。雍正二年以巡撫石文焯請與禹陝許鄭俱升直隸州，轄光山固始息商城四縣也。

乾隆光山縣志三十二卷

乾隆五十一年知縣楊殿梓修。

按舊序，萬歷己丑知縣牛應元壬子知縣施堯化順治己亥知縣管聲駿康熙丙子知州楊之徐各一修，牛序云，「光山舊有志，其篇章揉亂版刻脫誤山嘉靖丙辰迄今無所考徵。」一則尙有嘉靖一志也。又萬歷己丑志撰於縣人臨洮同知蔡光故習稱蔡志也。

凡三十二卷，一二圖經，三沿革表，四封爵等表，五職官表，六七選舉表，八山川志等，九城池志等，十里保志，十一市集志等，十二戶口志，十三物產志等，十四學校志，十五兵制志

等，十六壇廟志等，十七至二十三藝文，二十四五名宦列傳，二十六七仕賢列傳，二十八文學列傳等，二十九孝友列傳等，三十列女列傳，三十一游寓列傳等，三十三雜記。

凡例云，一志家體例非一，要以類聚羣分，有條不紊爲主。舊志意在簡要，事罕確稽，建置則略其歲年，宦蹟則遺其籍貫，樂安置自南朝，邑宰乃有抱朴，浮光著於桑氏，山名謂由僕生，而典禮一門臚及寺觀，其他沿誤率難覩縷。良由纂錄之時，但據里俗所傳，登之簡帙，後雖疊經修輯，仍舊增續後事，不復博稽載籍加之釐正也。今廣事蒐羅，必期徵信，按諸史法，用爲體裁，分體爲四，曰圖經，曰表，曰志，曰列傳。一蓋遙承巡撫畢沅指授，故非俗手所得比擬矣。

光山爲漢江夏西陽縣地，宋元嘉十五年以豫州蠻民立光城等縣，開皇中置今名，大業初弋陽郡治此，唐復改郡爲光州，徙治

定城縣，以光山屬焉，縣境有浮光山卽弋陽山，郡名以此，州名亦以此，木陵及白沙二關爲南北朝及宋金交兵爭奪之地。

康熙固始縣志十二卷

康熙三十二年知縣楊汝楫主修。

據序縣志始于成化之薛良，繼于嘉靖之張悌，再續于萬歷之余繼善，重修于順治己亥之包諶。今按薛志修于成化己丑張志修于嘉靖壬寅余志修于萬歷年丁酉也。

又據所錄薛良原序云，一固始志雖屢經修纂，所存書不過祇二十餘幅，遽爲虛文以應故事而已。一則成化之前亦未嘗無志也。然今之所存，蓋以康熙志爲最古矣。

卷首載康熙二十九年巡撫通飭修志牌照，所開凡例足徵當時方志通式所由來，錄其梗概以存故實。

一總圖 須精詳

一沿革 須照諸史考証毋得混入不必過多

一天文 略摘切要者勿用混載以分野所屬者廣也

一四至 疆域要考正

一建置 城池須載明幾時建某人修一一查明學校止載其起建修葺不必載開文其新定樂舞等宜增入

一河防 宜先叙前代而以近今所開所淤備細入之

一鄉村鎮集 止載方隅里數有古事者註之

一公署 止載創建始末

一橋梁 亦載建造始末

一倉庫社學 止載方隅建造日月

一街巷坊第 須註明何處以上凡有實事者當詳考而載之祀典及書院考証載之勿遺

一山川 須考果係封內者方載入而不可遺漏河道要將近日所開淤淤塞變遷等查明其闕事實備細註明不可以小說摭入如宜陽志之可笑也

一古蹟 須考明某代某人將事實註明不得遺漏不可以小說摭入如宜陽志之全載野史也

一風俗 略載之而不自加論斷

一土產 非地所出及平常草木可不必載須載其特產者

一陵墓 須註明某代某人有碑碣與否

一寺觀 必奉敕建或建置已久有可考載之餘刪

一賦稅 止載舊額若干新增新減若干不用一一細註有關係者全載之

一職官 須載其爵里時代年月有可紀者略書之實係名宦則立一小傳於後須
考正

一人物 聖賢忠貞並入其科貢等必載其家世時代年月字某號某分別某科某
項若係鄉賢爲立一小傳於後

一流寓孝義烈女隱逸方技 各考實詳核以載其節烈務在闡發幽光勿專
載世家而遺塞素

一藝文 須擇佳者或關邑乘者載之八替不可錄錄必錄其佳者

災祥雜志 做古爲之

本書目次，卷一沿革表，二建置志，三食貨志，四秩官表，五師儒表，六選舉表，七人物志，八典禮志，九武備志，十異流志，十一雜述志，十二藝文志。

固始爲春秋期思與寢丘地，光武始制縣名，洪武十四年隸河南汝寧府。本書沿革表於隋代止述改期思爲殷城，且唐代一節全不叙及，殊爲可怪。今按舊唐書地理志，隋弋陽郡武德三年改爲光州，置總管府，以定城縣爲弦州，殷城縣爲義州，以廢宋安郡爲谷州，凡管光弦義谷廬五州，而光州領光山樂安固始三縣。貞觀元年罷都督府，省弦州及義州，以定城殷城來屬，今不特不言屬光州并不言隸淮南道何耶。

其建置篇記楊行密廟與五代史王景仁傳合，食貨篇有洪武永樂正統成化隆慶萬歷崇禎等次清丈畝數，皆可珍之記載。

至水利篇載楊氏本人詳上憲文及邑人頌祝之語，差無故實。顯涉標榜，秩官篇以漢毛義曾爲安陽令列名，亦屬濫引。又自稱令汝楫曰亦屬陋習。惟藝文篇尙不汎濫爲可取耳。

乾隆固始縣志二十六卷

不全

乾隆五十一年知縣謝聘修，洪亮吉纂，繼康熙志而作，其時畢沅任巡撫也。

其首備載前序，詳著年月，即此一端已徵其勝于前志，洪氏專於輿地之學，其撰沿革篇先綱後目，刊偽存真，亦勝前志十倍。全書除沿革以外，尤注意於山川位置及水利。惟歲時風土禮俗物產仍不脫舊習。大事表以年號與祥異兵革並列爲三排，亦俗見也。

凡二十六卷，一縣，二城及故城，三山，四水，五清河水利等，六學校等，七坊渡，八鄉里等，九寺觀等，十祠廟，十一衙署等，十二典禮，十三賦役，十四歲時等，十五大事表，十六五等表，十七秩官，十八選舉，十九吏績，二十至二十四人物

，二十五列女，二十六藝文，所見本已不全。

嘉慶息縣志八卷

嘉慶四年知縣劉光輝修。

按序志初修于嘉靖癸丑，萬歷戊寅知縣王用賓甲申知縣曹舜弼順治丁酉知縣邵光蔭康熙癸酉知縣蔣彪各一修。

凡八卷，一圖經，二建置，三典禮，四選舉，五官績列傳仕實列傳，六孝義列傳貞烈列傳，七藝文，八內紀外紀。

其內紀分紀述災異二項，外紀分寓實方技醫術坵墓碑記辨異六項，其所謂紀述者卽歷代沿革兵事諸大端也。

縣爲春秋時息國，漢爲汝南新息縣，後周唐金三代皆曾置息州，明初改州爲縣屬潁州，洪武七年復改屬光州，後遂因之，隋唐於此采珉玉，本書食貨篇漏載此事。

康熙商城縣志八卷

康熙二十九年知縣許全學修。

前志修于順治己亥知縣高材，以往則無考也。嘉慶志稱迫於憲檄，止取備文，未加考訂，今觀其以災祥怪異入藝文志，則信非佳作矣。

書凡八卷，一輿地志，二建置志，三典禮志，四食貨志，五職官志，六人物志，七八藝文志。

嘉慶商城縣志十四卷

嘉慶八年知縣武開吉修，繼康熙志而作也。

雖較前已擴充而以祥異列藝文志仍其故智也。

凡十四卷，一二地理志，三建置志，四食貨志，五六學校志，

七官師志，八貢舉志，九人物志，十一烈女志，十二三十四藝文志。

縣爲漢汝南新鄴縣地，劉宋置苞信縣，隋改殷城屬光州，宋初避諱改今名，雍正二年升光州爲直隸州，以縣隸焉。縣東接霍邱，南鄰羅田，楚豫皖三省之銜，山勢綿亘。其境內之金剛台山鐵林山馬頭山皆古來阨塞也。

本志兵防篇述城守之法，頗有他處所未見者。

方志考稿甲集第五編

山西

雍正山西通志二百二十卷

雍正十二年巡撫覺羅石麟修。翰林院庶吉士宜興儲大文定例。據凡例「舊志始於明成化甲午督學僉事胡謐創修，越九十年嘉靖癸亥督學副使周斯盛重修，越五十九年萬歷辛亥按察使李維楨重修，至康熙壬戌學使劉梅重修，凡五易稿越九年而告竣。分類三十有二，今增其八爲四十類，而於每類中又各增十之二三十之六七不等。文雖不簡而事則較舊加詳，祛浮覈實，訂譌補缺，部次州居，差爲美備。」又云，「纂輯全賚文獻，晉志文獻俱不足徵，自程棧上黨記王松年三晉記外，其見於四庫書目者止傳太原事蹟雜記壺關錄以暨永寧公狄梁公諸記傳，其見於

崇文總目者止傳龍門王屋羊角山記鹽池錄晉陽見聞要錄以暨溫公豐公諸事狀，遐搜博覽總與各府州縣志書草檢參互裁酌以折其衷，信者徵之，疑者闕之，毋敢濫毋敢苛，必求至是。一書凡二百三十卷，一圖考，二星野，三至五沿革，六至七疆域，八城池，九至十六關隘，十七至二十八山川，二十九至三十四水利，三十五六學校，三十七八公署，三十九至四十四田賦，四十五鹽法，四十六風俗，四十七物產，四十八九兵制，五十至五十五武事，五十六驛站，五十七至六十古蹟，六十一帝王，六十二三封爵，六十四氏族，六十五至七十二科目，七十三至八十二職官，八十三至一百名宦，一百一至四十人物，一百四十一至四十五孝義，一百四十六隱逸，一百四十七八寓賢，一百四十九至五十八列女，一百五十九六十仙釋，一百六十一藝術，一百六十二至六十三祥異，一百六十四至六十七祠廟

，一百六十八至七十一寺觀，一百七十二至七十四陵墓，一百七十五經籍，一百七十六至七十九辯證，一百八十至八十一遺事，一百八十二至二百二十七藝文，二百二十八至二百三十雜志。

山西自古爲列郡之雄，而大文復深於地理之學。所補舊志之遺闕，如邊隘武事之類，皆犁然有當於人心。乃至經籍氏族諸門，亦深見卓識，非苟而已。視雍正間他省所修諸志遠勝也。惟雜志門采唐以來小說豐衍旁治至三卷之多，光緒志頗譏其採賸編瑣說以爲博。然大文纂輯之意固不可沒也，真史料多存於小說，是在善觀史者明辨而精析之，與其過而廢不如過而存也。第四十七卷物產門載「瓷器有黑白二種，府州胥出，凡盤盃器用胥極樸素，有唐魏之遺風。元史冀寧磁課五十八錠，明晉府置窯燒造充府用，其白者類土定，俗稱晉瓷。」又載「呂坤停

止砂鍋疏，查得陶器燒造地方止有儀徵瓜州河南正定江西五處，其器止有瓶罈瓷甕等件，竝無所謂山西砂器者，卷查嘉靖三十九年坐派潞安府砂器五千個，四十年坐派一萬五千個，萬歷十六年坐派一萬五千個，一此事他府縣志皆未之及，故知當時蒐采頗費苦心也。

光緒山西通志一百八十四卷


光緒十八年巡撫張煦繼前任曾國荃等修成，襄垣縣教諭楊篤刑部員外郎楊深秀等纂。

山西通志之存者惟乾隆儲志，然成書時蔚州廣昌改屬直隸，吉霍二州亦有易置，皆不及追改，其後乾隆丙戌巡撫雅德節采原書爲通志輯要十卷，嘉慶壬申巡撫衡齡復取原書鑿其建置沿革之不合增補分注，議重修未果也。

本書凡百八十四卷，圖二，曰疆域圖府廳州縣圖，譜六，曰沿革譜星度譜三代世譜秦漢以來別譜職官譜貢舉譜，考四，曰府州廳縣考山川考關梁考古蹟考，略七，曰田賦略水利略鹽法略秩祀略學制略營制略公署略，記六，曰巡幸記荒政記大事記經籍記金石記風土記，錄十二，曰名宦錄鄉賢錄忠烈錄孝友錄義行錄仕實錄儒行錄文學錄隱逸錄藝術錄方外錄列女錄。

凡例云，一凡六門爲類三十有七，頭緒繁多者則區爲子目，事體相近者則列爲附目，其詳具見各類小序。全書自五十卷後皆隨纂隨刻，惟人物一門多錄舊志，餘無所蹈襲，間有采用，亦必注明，冀存原書。一

就中疆域沿革圖譜最爲精審，曾抽出單行，雍正志以地理見長，視此猶有遜色。然其分類過於從簡，如歷代兵事附於營制，寺觀包於古蹟，抑未斟酌盡善也。



乾隆太原府志六十卷

乾隆四十八年知府虔禮寶繼前任修成。

據凡例，郡志始修于萬歷壬子，又修于崇禎癸未，又修于順治甲午，竟不著修者姓名。今按萬歷志縣人張惔言修，崇禎志知府孫康周修，順治志未詳。本書既不載姓名，其前志序跋亦不收入藝文志中。如此荒率，不解何以尙須歷數任而成也。

凡六十卷，一星野，二圖考，三地表，四沿革，五疆域，六城池，七關隘，八形勢，九山川，十水利，十一學校，十二公署，十三田賦，十四積儲，十五物產，十六戶口，十七風俗，十八氏族，十九祀典，二十兵制，二十一武事，二十二驛鋪，二十三古蹟，二十四帝后，二十五封爵，二十六陵墓，二十七至三十一職官，三十二三十三名宦，三十四至三十六人物，三十

七孝義，三十八至四十一選舉，四十二隱逸，四十三寓賢，四十四五列女，四十六藝術，四十七仙釋，四十八寺觀，四十九祥異，五十遺事，五十一辨證，五十二至五十九藝文，六十雜志。

其綱目不分姑不具論。若圖考中會城府城同一地也，一則以北爲上，一則以南爲上。自來諸志雖不措意於繪圖之學，尙不至如此之謬也。職官不以官職分類，遺事乃與雜志別行。此又稍諳方志通例者所必無之誤。至於考古之事，并顧氏日知錄之說而不知引。其於北齊北漢之史事彌無所疏通證明矣。遺事雜志但知取北朝以來繫太原郡望之人物雜采存之。不知郡望久屬空名。如此濫收又豈區區一兩卷書所能盡耶。

太原自漢以來爲郡，乾隆二十九年定領州一縣十，陽曲太原榆次太谷祁徐溝交城文水岢嵐州嵐興也。

道光陽曲縣志十六卷

道光二十一年知縣崔光笏繼前任修成。

按序，縣志始于萬歷三十五年知縣梁之垣，康熙二十一年知縣戴夢熊修，崇文總目載晉陽見聞錄四庫書目有太原事蹟雜記及王松年三晉雜記等書，本書蓋僅取戴志爲藍本，而仿永清志例成之也。據訓導張廷銓序云，抵長安半載偶於書肆敝篋中得殘編，細檢乃永清縣志，始知六官分隸之法。是道光中人尙鮮知讀文史通義者，書之顯晦有時不亦信哉。

凡十六卷，一至三爲圖之屬，曰輿地圖建置圖，四五爲表之屬，曰職官表選舉表，六至十一爲書之屬，曰吏書戶書禮書兵書刑書工書，十二爲略之屬，曰名宦政略，十三十四爲傳之屬，曰人物列傳列女列傳，十五曰文徵，十六曰志餘。

然其輿地圖實含疆域古蹟風土物產等類，雖曰檢視爲便，然廣泛至此，則全書不皆可謂之輿地圖哉。

陽曲有特殊工業兩種，一爲鐵冶，一爲琉璃，本書以鐵冶入兵書，以琉璃入輿地圖，而亦附見於工書，殊爲雜糅無序。使於工書中立專篇紀之不亦善哉。

陽曲爲漢太原郡屬縣，宋平北漢移并州治此。故明清皆爲太原府治。

道光太原縣志十八卷

道光六年知縣員佩蘭修。

按舊序嘉慶辛亥縣人浙江按察副使高汝行始修，天啓丙寅知縣屈鍾嶽續修，雍正辛亥知縣沈繼賢重修。據凡例，沈志大變高氏之舊，其書成後高氏八世孫若歧曾有糾繆之作。

凡十八卷，一星野沿革，二城垣山川水利學校，三公署田賦風俗物產祀典，四古蹟帝王，五名宦，六職官，七寓賢，八九選舉，十人物，十一列女，十二三十四藝文，十五祥異，十六遺事，十七渠案，十八雜志，其水利以外復有渠案篇者，以專紀明清兩代晉祠水利事也。

自秦漢以來并州治晉陽縣，北齊分晉陽置龍山，而以晉陽爲太原縣，又分太原置陽曲縣，唐以晉陽太原並爲赤縣，宋平北漢，改置平晉縣於故城東，移州治於榆次。太平興國七年移治於陽曲縣南之唐明鎮，卽今之省會。明初改平晉爲太原，嗣後遂爲太原府屬縣。去府西南四十五里也。自北齊以來爲都城，屯萃勁卒，控馭河南，形勢雄於九牧。直至北宋之初，始夷爲散州而地望降矣。然歷代軍城制度固猶可考見，本書不能作圖考以明之，爲可惜矣。

書前有穆彭阿序，詆近時方志爲書鈔爲文錄爲小說，謂是書雖未能廓清三病而簡當不煩差爲清省，是亦篤論也。

同治榆次縣志十六卷

同治二年知縣俞世銓修。

據舊序云，嘉靖間祭酒閻樸纂輯爲縣志八卷。萬歷丙申續于知縣張鶴騰，乾隆十三年續于知縣錢之青。

凡十六卷，一地理，山川，二城池公署，三學校壇廟，四職官，五選舉例仕，六田賦河渠，七風俗古蹟，八九人物，十一列女，十二至十四藝文，十五物產，十六祥異雜志，大抵依錢志之舊，而人物則復爲分立門目焉。

榆次爲北宋初并州治，白金以來爲太原府屬縣。

咸豐太谷縣志八卷

咸豐乙卯知縣章清選等修。

據所錄舊序，康熙十三年知縣趙希九，雍正七年知縣王廷贊，乾隆四年知縣王澤沛，三十年知縣高繼允，六十年知縣郭晉，凡五修也。

凡八卷，一圖考等，二年紀等，三古蹟等，四選舉等，五人物等，六七八藝文。

太谷爲漢陽邑縣，隋改今名，爲太原府屬縣。其中如辯馬嶺之非馬陵，頗能正舊志之非也。

乾隆祁縣志十六卷

乾隆四十三年知縣陳時修。

明志無考，今書卷首存邑人戴光啓序，康熙四年知縣郭霽修。康熙四十五年知縣朱理又修，雍正七年羅著藻又修。

凡十六卷，一輿圖星野沿革，二疆域山川城池關梁，三縣治學校田賦，四風俗物產古蹟祠廟封爵，五職官名宦，六選舉，七鄉賢，八九人物，十列女，十一至十五藝文，十六祥異雜紀。祁爲祁奚食邑，春秋昭二十八年晉分祁氏之田爲七縣。漢以後爲太原屬縣。王氏世爲太原祁人，然南渡以後已散居江左，是宜特撰王氏世系表以納之也。

康熙徐溝縣志四卷

康熙五十一年知縣王嘉謨修。

按序，縣志始修于萬歷三十五年知縣楊國楨，繼修于萬歷四十年知縣王敷學，王氏自序云，一閱一月而編成，舊志凡九十版

，新增二百六十版。其倉卒苟簡可想。然據其凡例所述則已增於舊者不少矣。

凡四卷，一圖考星野建置疆域山川城池公署學校，二祠祀貢賦屯田水利鹽法兵防馬政帝王職官名宦，三選舉人物忠孝貞節隱逸流寓仙釋風俗古蹟陵墓寺觀雜志祥異，四藝文。

中如隱逸流寓並無其人，空立其目，實爲怪事。

縣始置於金大定二年，爲太原府屬縣。

順治清源縣志二卷

順治十八年知縣和羹修，縣人曹州知州王灝儒纂。

據其序謂縣本無志，邑人羅國善者藏其祖考抄本，上自春秋下至有明嘉隆而止。

凡二卷，上卷曰沿革星野疆域形勢山川都分風俗景致古蹟陵墓

城池公署學校壇壝鋪墩祠廟寺觀屯鎮楯樾街市橋梁渠堰戶口丁役田賦物產災異職官宦績，下卷曰選舉褒崇人物藝文，纖陋已甚。

開皇十六年始置縣，金營置晉州於此尋廢。

光緒清源鄉志十八卷

光緒七年徐溝知縣王勳祥修。

清源自隋開皇中析榆次始置，乾隆二十九年以地狹始降爲鄉，入徐溝管。顧合治以後，界限未泯，故修志亦不得分編焉。據所錄舊序有順治十八年知縣和羹，乾隆五十七年鄉人舉人秦爲龍續修。本書蓋卽秦稿而成也。凡十八卷，曰星野疆域山川城池學校公署祀典田賦都甲風俗古蹟職官選舉人物列女祥異藝文志餘。

光緒交城縣志十卷

光緒七年知縣夏肇庸修，奉巡撫曾國荃命，時方修通志也。

按所錄舊序志始于萬歷間知縣張文璧周璧，繼之者康熙中知縣趙吉士及知縣洪璟，其刊修之年月一概不存，此秉筆者之無識也。

交城置縣在開皇中。寰宇記云，縣西北有大通監，蓋產鐵之區也。本書左券序云，「康熙初邑北境有交山爲羣盜藪，遺民害者垂數十年。趙君設方略相機宜，不數年而渠魁盡殄。余嘗讀夏子宛來交山平寇一書，竊善其伐謀制勝。」今志乃一字不及何也。

凡十卷，一天文門，二輿地門，三建置門，四官政門，五禮制門，六賦役門，七選舉門，八人物門，九十藝文門。

光緒文水縣志十二卷

光緒九年知縣范啓堃等修。

按前志傅星序，蓋始于嘉靖癸丑，修于天啓乙丑知縣米世發，再修于康熙十二年知縣傅星也。所錄舊序概不存其年月，遂使讀者無從知其爲何時人。檢其宦蹟篇亦多如是。殆前志之過。然其凡例云，一縣丞於何年裁缺，訓導於何年復設，丁賦於何年歸地，無從稽考。一此等案牘斷不至撫藩各署亦復無存。無非修志者憚於攷索而已。夫修志而不能窮力於攷索，但摭摭舊志無關宏旨之細事，一再變易，以矜其能。眞狙公之技，何足以云著述。此所以頻修邑志徒爲梨棗之厄，見者莫不嘖噫而去之也。

縣爲漢大陵縣地，開皇十年改文水，以文谷水名也。武后之故

里。天授中曾改武興縣。元符中遷縣治，故城在今縣東十里也。書凡十二卷，一天文志，二地利志，三民俗志，四分建志，五財賦志，六典禮志，七武備志，八選舉志，九人物志，十列女志，十一官政志，十二藝文志。

其專立民俗一志似頗有識，然檢其內容亦僅戶口坊墓風俗方言循例之作，至以封建志爲分建志，用意亦殊晦僻。

光緒崑嵐州志十一卷

光緒九年知縣馬汝良繼前任修成，奉巡撫曾國荃命也。

據所錄順治十八年郡人李文燦序，稱「自繼芳任先生著志於前而柱石廷馥二先達相繼修之，迄今七十禩。一任氏爲襄府長史，不曉其何時人也。康熙壬子知州何顯祖則繼李文燦而修矣。康熙志僅十餘日成卷，其率可想。本書雖成於數任之手，然凌

雜無體，正未必勝。即如卷首有圖說一篇，稱刺史馬汝良所作，竟不知其所謂圖說者何所指。

州爲後魏嵐州地，宋初置岢嵐軍，金大定中升爲州，明清隸太原府。古樓煩地也。水經注管涔之山汾水出焉，即在州境。故唐嘗置管州，地近朔邊，山障深阻，文獻無徵，亦其宜也。

凡十二卷，一疆域志，二形勝志，三衙署志，四祀典志，五賦役志，六職官志，七兵防志，八選舉志，九人物志，十風土志，十一十二藝文志。

雍正嵐縣志十六卷

雍正八年知縣沈繼賢修，奉修一統志之命也。

按舊序萬歷十六年知縣談應春始修，前乎此者無所考矣。今本大致仍談志之舊。

凡十六卷，一建置，二城垣，三衙署，四田賦，五戶口，六職官，七儒學，八壇廟，九山川，十疆里，十一選舉，十二孝節，十三仙釋，十四藝文，十五物產，十六災祥。

縣在隋爲靜樂縣地，隋末置嵐城縣，唐初置東會州治焉。後改嵐州，明初降縣。隸太原府。

乾隆興縣志十八卷

光緒庚辰重刊
附光緒續志二卷

乾隆二十八年知縣藍山修，繼雍正八年知縣程雲志而作也。

凡十八卷，一圖考，二星野，三建置，四疆域，五山川，六物產，七風俗，八職官，九戶口，十田賦倉儲，十一學校，十二典禮，十三祠祀，十四人物，十五營築，十六形勝，十七十八藝文。

程志有縣人孫文定嘉淦等同纂，應自不凡，然儉陋特甚。

北齊蔚汾縣也，隋改臨泉，唐改臨津，復改合河，金末升爲興州。洪武中降縣屬太原府。

末附光緒續志，光緒六年知縣張啓蘊修，續藍志而作，僅分二卷。

乾隆汾州府志三十四卷

乾隆辛卯知府孫和相修，戴震纂。

據例言，汾州自萬歷二十三年改府，及三十七年知府王道一始纂府志。

凡三十四卷，曰圖表沿革星野疆域山川城池官署倉廩學校壇壝關隘營汛驛鋪戶口田賦鹽稅職官宦績食封流寓人物義行科目仕實列女古蹟冢墓祠廟事考雜識藝文。

戴氏通儒，此志負一時盛名。今詳其體例，所未解者三焉。全書脉絡繫乎篇簡，今駢列名目，無所統攝，近於簿書之流，殊乖著作之雅。一也。山川一門業已兼敘古蹟冢墓祠廟，或泯然不分，或隔卷複出，失互相印證之益。二也。雜識一門，漫引諸書，涉及汾州之事。夫使其言爲可用，則何不分繫各門。使

其言爲不可用而姑以是備一格，則無所取矣。采宋人小說載文彥博事六七則尤爲不合。無論文事不止於此，且汾人事實能盡包於雜錄耶。若此又何必更有人物也。雜錄志餘等名，實出俗例，踵行賤慳，不得不以責賢者。三也。至其人物未載出處，引佚書未載所引書名等等，乖於著書體例者復難一二數。尙不止如章實齋所譏名僧事實歸之古蹟也。

乾隆汾陽縣志十四卷

乾隆三十七年知縣李文起主修，戴震稿也。

汾陽自北朝以來爲汾州，萬歷二十三年升府，倚郭設汾陽縣。蓋借汾水爲名，非卽故書所習見之汾陽也。

據例言，汾陽之有志始嘉靖三十三年甲寅知州陳秉忠州人王緯，是爲汾州志。越六年己未，冀南道彭範州人孔天胤增成之。

越二十五年，萬歷十一年癸未，知州白夏州人王緝又踵其事。越二十七年己酉，知縣尹覺民因州志增續，是爲汾陽縣志。順治十三年丙申知縣吳世英汾州府通判劉文德踵修縣志，康熙六十年辛丑知縣周超又踵其事。今所存志惟萬歷中府志暨劉志周志。其敘述舊志源流，可謂詳且明矣。然所載舊志諸序僅列人名，而將年月悉削去不載，使讀者何從辨其先後耶。

按其目次，卷一沿革疆域，卷二山川城地官署，卷三賦稅學校，卷四名宦，卷五職官食封流寓，卷六人物孝義，卷七科目，卷八文苑仕實，卷九古蹟壇廟，卷十事考雜識，卷十一至十四藝文。

綜觀全書，於地理沿革辨正舊志誤引西河汾陽以當縣境之非，甚當。故名宦人物等篇分別去取釐正不少。觀其所稱舊志誤以晉之王雅爲北周之王雅，及以張軌所鎮之西河爲汾州之西河，

皆顯然謬謬可笑者。戴氏之斤斤置辯，非得已矣。然於刁雙稱刁清穆雙，於張濟稱張成侯濟，何其又乖於書法至此耶。

又仕實一門，志所特創。然按其所錄，實不知與人物何殊。若謂人物必取賢者，仕實可兼不肖，則五代之相里金等何嘗史有貶辭。強分名目，是何理也。又據三國志鍾會傳注引會所爲母傳，則其母爲魏晉間賢婦人，而不入之列女，反入之雜錄。豈以列女僅須載民間節婦名冊爲限耶。（凡例云列女非專屬節烈而而賢婦僅偶及一二，此庸德之行，其事本無所表襮，加以閨門之內，雖美弗彰也。）甚矣習焉不察之弊例，足以惑人也。藝文載明帝勅諭諸王蓋自舊志轉錄，頗爲珍異之史料。

咸豐汾陽縣志十五卷

咸豐元年知縣周貽纓修。

其序曰，一缺者補，訛者正，未載者續，爲卷十有五，義例一仍其舊。一。是仿張漢續施氏會稽志之例也。又曰，一不數月而書成一則率爾之作矣。

目次依前故不繙錄。

乾隆孝義縣志

乾隆三十五年知縣鄧必安修。

按舊序，嘉靖三十二年縣人進士張冕始修，萬歷二十五年縣人進士趙訥繼之，名曰中陽近記。蓋張志曾付梓而趙志則未刊也。趙志雖未刊，迨三十五年知縣趙守安即取爲藍本，後此復有雍正四年知縣方士模一修。

本書於方志謂其除所續百十年官紳姓氏外有刪無增，故立例頗爲精慎。舉其兩條如次。一里甲村莊，趙志載村莊於里下而不

知里不能統村，方志載里名而不載村莊。其戶口數二志並缺。今先里甲，俾存籍貫，次村莊戶口，得考盛衰。二田賦積貯，舊志率摘賦役全書爲賦役志。致令反復數過尙不能悉實在數目。今首載地畝隨記科則上下以悉地肥磽，次載正雜徵收存解，本賦役書而特加簡要。

凡二十卷，曰縣沿革誌，城池疆域誌，山川渠堰誌，里甲村莊誌，田賦積貯誌，官司建置誌，學校典禮誌，物產民俗誌，官紳姓名誌，人物事蹟誌，勝蹟祥異誌，藝文參考誌。名目詭異，猶未祛俗見也。

孝義爲漢西河中陽縣地，後魏太和中析置永安縣，貞觀中改今名。以邑人鄭興有孝行聞於朝也。萬歷以後爲汾州府屬縣。

光緒續孝義縣志二卷

光緒六年知縣孔廣熙修，亦奉巡撫曾國荃檄也。

據任以重跋，一志創於明嘉靖邑進士張冕趙訥，然只采輯故事藏之於家。後隴西劉公蒞邑，取而增刪，始行於世。雍正初新安方公修之，乾隆豫章鄧公又修，卽今所遵守者。一按前志所錄舊序張爲嘉靖人，趙爲萬歷人，溷而一之已誤。蓋意在塞責，故寥寥兩冊，並門類而不分，非所以言志也。

光緒平遙縣志十二卷

光緒九年知縣徐秋修。據舊序前志修于康熙四十五年丙戌知縣王綬也。

據學部志目有康熙平遙志八卷二冊，知縣陳以恂修，康熙十二年刊。

平陶漢縣，元魏改今名，唐以來屬汾州，明升汾州爲府，以縣隸焉。

凡十二卷，一地輿志，二建置志，三食貨志，四學校志，五典禮志，六武備志，七職官志，八選舉志，九人物志，十古蹟志，十一藝文志，十二雜錄志。

其訂正銜名有楊篤楊深秀，皆晉之賢達也。地輿志中論風俗處頗有實錄，其他則亦泛常而已。

乾隆介休縣志十四卷

乾隆三十五年知縣王謀文修。

前有萬歷庚子史記事序，稱介志四十年來猶仍其舊。則志不始于萬歷矣。凡例稱史志以簡核具史裁，王志多所補述，今文加詳覈焉。

觀其所補，如冢墓中增宋曹玠墓，物產中增史令所教民種植之棉花紅花。則誠善於拾遺者也。

凡十四卷，一星野等，二山川，三學校等，四田賦，五職官，六七選舉，八封廕，九人物，十孝義等，十一至十三藝文，十四雜志。

嘉慶介休縣志十四卷

嘉慶二十四年知縣陸元鑣修。

據舊序，萬歷庚子知縣史記事一修，康熙三十五年知縣王埴再修，乾隆三十五年知縣王謀文三修。

書凡十四卷，一星野等，二山川，三學校等，四田賦等，五職官等，六選舉，七仕籍，八封廕，九人物，十忠節等，十一列女，十二十三藝文，十四雜志。

介休秦縣，以綿上得名也。晉始去田曰介。唐宋以來隸汾州，明以來爲汾州府屬縣。郭泰文彥博之故里故遺事流傳爲最多云。

康熙臨縣志八卷

康熙五十七年知縣楊飛熊修，候補內閣中書縣人崔鶴齡纂。凡八卷，無細目。

縣爲唐臨泉縣，元升臨州。而本書謂取地澤臨之義，未免穿鑿矣。

末附縣人曹席珍康熙初年官竹谿縣知縣陷賊題壁詞一篇，悲壯淋漓不忍卒讀，絕好史料也。道光二十年知縣趙輝璧自通志錄出補入卷尾，惜其已有刪節耳。

民國臨縣志二十卷

民國六年知事胡宗虞修，縣人前進士吳命新纂。

據例言「縣志創于萬歷二十四年知縣常時芳，續於天啓七年知

縣李度，明末書之，及順治十三年知縣朱紹鳳始購輯成書，康熙二十五年知縣莫友仁增成之，五十七年知縣楊飛熊復踵修之，光緒五年知縣左兆熊屬稿而未成書，今所存者惟楊志也。」凡二十卷，首圖之屬，曰疆域山川城市都里區所，次譜之屬，曰星度大事官師貢舉里族區所物產，次略之屬曰疆域山川財賦教育兵防風土，次考之屬，曰沿革營建古蹟著述，次錄之屬，曰名宦鄉賢列女。據其自述所有考據皆采王氏軒新通志戴氏震汾州志，體例一本胡氏延之絳縣志。故近於雅正也。

縣故漢西河離石縣地，後周置烏突縣，兼置烏突郡治焉。隋廢郡改縣曰太和，唐改爲臨泉縣，明初去泉字，屬太原府。萬歷二十三年汾州建府，以縣隸焉。自古爲征戰之地，崇禎流寇順治姜瓖同治回亂志皆紀之綦詳，而詩文泛語悉從刊落，是其卓識。

康熙山西永寧州志八卷

康熙四十年知州謝汝霖修。

學部志目有順治永寧州志一冊，順治十三年知縣胡賓修，本書未及此也。

凡八卷，分輿地建置食貨秩官秩祀選舉人物藝文八誌。

永寧爲漢西河離石縣，劉淵起兵之地。唐以後爲石州，隆慶中蒙古陷城，署州事李春芳以石失二字叶音不吉，請改今名，隸汾州府。本書於歷朝兵事殊無所紀錄。

康熙山西寧鄉縣志十卷

康熙壬午知縣呂履恒修。其序云舊志殘缺。然始終未述舊志爲何人所撰也。

凡十卷，一天文，二地理，三建置，四典禮等，五賦役等，六職官，七人物，八選舉，九十藝文。

藝文篇錄王瑋所作三節婦傳。直述其口語如覩其爲人。視他志臚列名氏泛語滿紙者高出多矣。

縣乃後周所置，屬離石郡，金改今名。本書沿革表云後周大象初析置甯鄉平彝二縣非矣。

乾隆潞安府志四十卷

乾隆三十五年知府姚學瑛繼前任修成。

按舊序略知志始於萬歷壬子，修於順治庚子知府楊峻，本書蓋無一語及舊志原流也。

凡四十卷，一星野，二疆域，三沿革，四山川，五城池，六形勢，七廟學，八風俗，九田賦，十古蹟，十一紀事，十二封建，十三節鎮，十四至十六職官，十七名宦，十八至二十選舉，二十一至二十四人物，二十五六列女，二十七至三十八藝文，三十九雜記，四十辨訛。

潞爲古上黨地，秦漢以來爲郡，後周始置潞州。大歷以後置昭義節度使。崇寧中升隆德府。嘉靖中定今名。領縣八，曰長治長子屯留襄垣潞城平順壺關黎城。平順繼裁併潞壺黎三縣，則

餘七矣。

自七國已來爲爭鬪之地，天下所注目，杜牧所謂澤潞肘京洛而履河津，倚太原而跨河朔，語其形勝不特甲於河東一道而已。本書卷十一紀事一篇，仿綱目體。一郡廢興存亡之故皎若列眉焉。

按光緒長治縣志藝文志輯錄上黨志乘頗詳，茲撮舉如左。

後趙程璣上黨國記

佚

太平寰宇記數引其文，益以水經注續漢書郡國志注所引，約得十餘條。

唐薛瑄聖應圖一卷

佚

張九齡有贊。

陳宏上黨十九瑞圖

唐書藝文志，宏永王府長史。

邱據相國涼公錄一卷 佚

唐書藝文志，記李抱玉事。

李德裕上黨記叛一卷 佚

唐書藝文志，記劉從諫事。

盧宏正昭義軍剩錄 佚

宋徐叔陽羊頭山記十卷

見宋史藝文志。

明栗應麟潞安府志十二卷

明史藝文志，近多散佚。

清楊駿潞安府志

楊志不著年代，據序云，自萬歷壬子迄今閱五十年，由斯以推，當在順治之末。又據姚學瑛序云，郡志修于順治庚子，百有餘年。庚子爲順治十七年，楊志之成，其在是歟。

。然此志以前，志凡數修，均不著明。此外惟列錢受祺序一篇，其以前舊志序文不知係楊志未載抑係姚志取削。錢序無所發明，楊序亦未著明纂修體例卷數，以其爲舊志所存者僅此，故錄之。

程之瑤滯志拾遺二十卷 存

乾隆長治縣志二十八卷

乾隆二十八年知縣吳九齡修。

凡二十八卷，一圖說，二星野，三沿革等，四疆域等，五山川等，六學校等，七賦役等，八風俗等，九封爵，十兵制等，十一職官等，十二名宦，十三選舉，十四人物等，十五列女，十六寓賢等，十七藝術，十八仙釋，十九壇廟等，二十陵墓，二十一祥異，二十二至二十六藝文，二十七事蹟，二十八雜志。

其蒐羅事實頗豐，然近於奪府志之席矣。

此書有一節最足法者，凡史傳人物必注明其爲上黨人潞州人是也。惟明以後不再注明。蓋前代轄境有廣狹之不同，不得概以今縣境統之。而俗手撰志往往忽於此事，便使後人不知所引用之人竟爲何邑之人。此史識不充之過也。不能一一糾舉，輒發其例於此。

光緒長治縣志八卷

光緒二十九年知縣馬鑑修，光緒五年巡撫曾國荃修通志飭各縣纂修縣志，至是始刊成也。

長治古上黨縣，嘉靖八年始置今縣，屬潞安府。志創於萬歷十六年，一修于康熙十二年，再修于乾隆二十八年，卷首未具撰人。其藝文志所錄前志原流如左。

姜恆長治縣志 未見

志成於康熙十二年，尙有衛周祚及邑人呂和鐘萬代尙三序
吳九齡長治縣志二十八卷 存

志成於乾隆二十八年，觀其後序則楚人蔡履豫實任秉筆。
體例遠出府志下，然撫拾頗詳，府志每采錄云。

凡八卷，圖之屬七，表之屬五，志之屬七，曰地理建置祠祀學校賦役藝文金石，傳之屬六，曰史傳集傳別傳循政傳列女傳，記之屬三，曰大事記風土記雜記。其曰史傳，則錄自正史者也。集傳，則集錄諸書者也。列傳，則錄自舊志者也。別傳，則藩邸幕佐之類也。固猶存雅正之體者。

光緒長子縣志十二卷

光緒八年知縣豫謙修，繁峙訓導楊篤纂。

據本書藝文志所錄縣志目如左。

明長子志 知縣何出圖著 佚

明長子續志 知縣崔爾進著 佚

清長子志 知縣王毓恂著 佚

康熙長子志 知縣郭守邦著 佚

康熙長子續志 知縣徐鸚廷著 佚

乾隆長子志 知縣紀在譜著 存

嘉慶長子志 知縣劉樾著 存

於何崔王三志皆不書年代，是其疎忽處。

本書十二卷，一地表晷度表歷代爵封表職官表，二選舉表，三地理志，四建置志，五祠祀志賦役志，六學校志藝文志，七金石志，八史傳集傳，九列傳，十列女傳，十一官續記僑寓記風土記，十二大事記雜記。

本書所長在能引史文以正舊志之空疏，其義例則與楊氏所修他志相類也。

長子自漢以來爲上黨治所，隋以後始爲潞州屬縣。唐十道圖，長子城丹朱所築，丹朱堯之長子，因名。亦作尙子。水經注竹書紀年曰梁惠成王十二年鄭取屯留尙子，卽長子之異名也。

光緒屯留縣志八卷

光緒六年知縣劉鍾麟等修，亦奉巡撫曾國荃命也。

按舊序，嘉靖乙未始修，康熙乙卯知縣屠直重修，雍正庚戌知縣甄爾節又修。

凡八卷，一星野等，二城地等，三田賦等，四職官等，五名賢等，六七八藝文等。倉卒成書，不遑言體例也。

屯留爲春秋余吾地。漢爲上黨縣，隋唐屬潞州，明以來爲潞安

府屬縣。

乾隆襄垣縣志八卷

乾隆四十七年知縣李廷芳修，前有三立書院院長盧文詔序。

據所錄舊序嘉靖壬戌修于縣人郝良臣，康熙四十五年知縣袁良再修。

凡八卷，一輿圖星野疆域沿革，二建置職官，三學校禮樂風俗，四古蹟賦稅恩賜，五選舉，六人物列女，七八藝文。不脫俗志窠臼。然據其凡例所糾前志，則已較爲雅正矣。

秦漢爲上黨縣，相傳邑城爲趙襄子所築也。後魏曾置襄垣郡，後周曾置韓州，貞觀以後州廢，縣屬潞州。嘉靖以來爲潞安府屬縣。晉虓祁銅鞮宮故址在是，然無所存矣。

光緒潞城縣志四卷

光緒甲申知縣程達夫修，繁峙縣教諭舉人楊篤纂。

據序，潞志重修于康熙四十五年知縣張士浩，據書籍記則萬歷志修于知縣馮惟賢，天啓志修于知縣王溥，萬歷平順縣志修于知縣趙完璧，康熙平順縣志修于知縣劉徵也。

潞城置縣始于隋，屬潞州，明升潞州爲潞安府，析縣之南境別置平順縣。乾隆二十九年裁去復故。

凡四卷，一曰疆域圖，山川圖，城池圖，鄉鎮圖，星度經緯譜，歷代地名譜，官師譜，貢舉譜。二曰建置沿革考，田賦考，學制考，祀典考。三曰山水記，風土記，大事記，書籍記，金石記。四曰名宦錄，鄉賢錄，忠義孝悌錄，耆舊錄，貞節錄，雜述。

楊氏屢修諸志，故文詞體例均近雅正。

乾隆壺關縣志十八卷

乾隆三十五年知縣秦之柄繼前任修成。

按舊序嘉靖四十年知縣何永慶屬縣人張鐸始修，順治十八年知縣朱輔續修，康熙二十年知縣章經又修，乾隆三十四年知縣楊宸又修。

凡十八卷，一沿革等，二山川等，三城池等，四公署等，五職官等，六七選舉，八九人物，十一列女，十二寓賢等，十三至十七藝文，十八遺事，其凡例自云一藝文間有刪潤一，夫濫載詩文已爲不可而况加以變易哉。

大體亦主簡潔之說者，故風俗物產之類幾不著一字，雖足矯舊志雷同之習，然未免疎略矣。又其書雕印甚精而誤字極多。

壺關爲漢上黨郡屬縣，隋析上黨，明復析置平順，乾隆二十七年省入本縣。

道光壺關縣志十卷

道光甲午知縣茹金修。

書凡十卷，一沿革志，二疆域志，三建置志，四食貨志，五官師志，六選舉志，七人物志，八列女志，九十藝文志。

力矯前志之簡，故多所補苴，如風俗紀事之類是。然不過循例補入而已，非有特見也。

康熙黎城縣志四卷

康熙二十一年知縣程大夏修，蓋取縣諸生李御李吉所輯稿而成之也。

其凡例云，一志與史不同，史兼褒誅重垂戒，志則志其佳景奇蹟名人勝事以彰一邑之盛。一于是又斤斤於八景之摹繪。議論如此，安望其下筆垂爲典則邪。宜乎光緒志之糾擷也。凡四卷，一地理志，二政事志，三人物志，四藝文志。

光緒黎城縣續志四卷

光緒庚辰知縣鄭灝修。

據序明中葉縣人靳惟精始輯爲志，康熙壬戌知縣程大夏再修。今僅以康熙以後事續輯而成也。

書凡四卷，一地理志，二人物志，三藝文志，四補遺糾誤。

縣本漢潞縣地，開皇中置今縣，以古黎侯國得名。明以來爲潞安府屬縣。壺口在縣境。舊志多以故書中壺關事闌入，本書雖簡短，而糾其濫補其遺頗不尠也。

雍正澤州府志五十二卷

雍正十三年知府朱樟修。

觀其凡例議論頗平庸，然叙次前志源流較康熙志詳盡多矣。凡五十卷，一星野志，二至十五方輿志，十六至二十一營建志，二十二至二十五貢賦志，二十六至三十二選舉志，三十三至三十五秩官志，三十六至四十人物志，四十一至五十二藝文志。雍正六年升府，增置附郭一縣曰鳳臺。餘仍舊貫。沿革非有難明也。而建置之復有沿革，復有分置，復有考同，紛紛徒亂人意。蓋專欲侈卷帙之豐耳。然亦終賴其矜奇炫博，猶能多存故實也。

康熙澤州志三十卷

康熙四十五年知州陶自悅撰，前有陳廷敬序。

按凡例，「舊志創于州守顧顯仁，本久失傳，續者傅公淑訓。穆宗以前事稍稍具。」顧爲隆慶間任，傅爲萬歷間任。據雍正志稱尙有知州鄭際明一志，無一語及之，不審何也。

凡三十卷，一圖考，二星野，三建置沿革，四形勝，五山川，六城池，七公署，八學宮，九祠祀，十貢賦，十一防禦，十二封爵，十三職官，十四名宦，十五選舉，十六恩賚，十七人物，十八孝義，十九列女，二十隱逸，二十一流寓，二十二方技，二十三仙釋，二十四風俗，二十五古蹟，二十六陵墓，二十七寺觀，二十八祥異，二十九雜編，三十藝文。

州在後魏爲建興郡，開皇中立澤州，蓋取濩澤爲名。自是廢爲重鎮，其時尙爲直隸州，領高平陽城陵川沁水四縣也。

乾隆鳳臺縣志二十卷

乾隆癸卯知縣林荔修。

隋開皇中於上黨建澤州，雍正六年升州爲府，倚郭設鳳臺縣。故志無沿革可言也。

凡二十卷，不分總目，其首冠以康熙御製賜陳廷敬詩。廷敬爲近代澤州聞人，故以之資誇耀也。

乾隆高平縣志二十二卷

乾隆三十九年知縣傅德宜等修。

按舊序，志始于嘉靖三十七年縣人工部右侍郎郭塋，及萬歷四十三年知縣劉文英續修，順治十五年知縣范繩祖又修。

凡二十二卷，一星野，二圖圖，三沿革，四疆域等，五山川等，六風俗等，七公署等，八學校等，九賦役等，十兵制等，十一職官等，十二選舉等，十三人物等，十四孝義等，十五列女，十六祥異，十七雜志，十八至二十二藝文。

志頗以前志之簡爲病，然所增者不過藝文中與縣事無關之詩文而已。

高平爲漢上黨汝氏縣，後魏永安中析置平高縣，北齊改今名。唐初置蓋州於此。清爲澤州府屬縣。縣西北長平城即白起破趙兵處。水經注長平城西有秦壘，秦坑趙卒收頭顱築臺於壘中，因山爲臺，崔巍傑起，今仍號白起臺，是也。

乾隆陽城縣志十六卷

乾隆二十年知縣楊善慶修。

按舊序萬歷間縣人栗魁始修，順治戊戌知縣陳國珍再修，康熙丁卯知縣項龍章三修。

凡十六卷，一分野等，二山川，三城池等，四田賦等，五職官，六七選舉等，八宦蹟，九人物，十忠節，十一列女，十二至

十五藝文，十六志餘。

其凡例力詆舊志之失。其言曰，一舊志分門別目頗多淆雜，如學校與文廟本爲一事，乃以學校附公署而別舉文廟列之祀典，尤爲失倫。又如里甲宜附田賦後，津梁宜附山川後，鋪遞宜附官署後。一殊不知此等分別由來已久，固非舊志獨創。嚴格繩之，學校與文廟實非一事。里甲不能附田賦後，津梁不能附山川後，鋪遞亦不能附官署後。若但圖併省，則可併省者殊不止此。若論體裁之得失，又豈在此區區門類之分合。此總由好索前人之癥故也。

陽城古濩澤地，自漢以來爲縣。唐初爲澤州刺史治所。天寶元年始更今名。雍正以後遂爲澤州府屬縣。

本書物產篇云，一唐六典縣貢石英及龍須席，寔字記析城山頂上有湯王池池四岸生龍須草，殆唐時所取爲席者。今縣人旣無

捆席，而此草亦絕不復聞。一是知物產之關於歷史者如是之不可忽也。

乾隆陵川縣志三十卷

乾隆四十四年知縣程德炯修。

按舊序，弘治戊午邑人都永思嘉靖壬子知縣趙孟乾萬歷辛亥知縣許自嚴順治戊戌知縣黃國燦康熙甲戌知縣孫必振乾隆庚申知縣雷正各一修。

都序云，「嘗覽舊志，見夫殘腐而陋，冗劇而紊，苟簡而齋，一是都志仍非創始也。」

凡三十卷，一星野，二沿革，三疆域，四山川，五關隘，六古蹟，七壇廟，八城池，九衙署，十戶籍，十一十二賦役，十三倉儲，十四學校，十五風俗，十六物產，十七官師，十八宦蹟

，十九選舉，二十武略，二十一至二十三人物，二十四列女，二十五至二十八藝文，二十九祥異，三十叢譚。縣爲漢涇氏縣地，隋初爲高平縣地，旋析置今縣，屬澤州。郝經元好問之里居也。陵川實賴兩人以傳，而志反於此兩人事實略而不詳。嘻其異矣。

光緒陵川縣志二十卷

光緒八年知縣李楨修，繼乾隆程志而作也。

其凡例云，一乾隆戊戌以前事多依程志舊本，由乾嘉至今九十余年事蹟缺如，徵實補遺，極費搜討，逐條增入，合付梨棗云云。一

今觀其所補，較程志已多。而不著出處，終於不合也。凡三十卷，一星野，二沿革，三疆域，四山川，五關隘，六古

蹟，七壇廟，八城池，九衙署，十戶籍，十一十二賦役，十三倉儲，十四學校，十五風俗，十六物產，十七官師，十八宦蹟，十九選舉，二十武略，二十一至二十三人物，二十四列女，二十五至二十八藝文，二十九祥異，三十叢譚。

光緒沁水縣志十一卷

光緒辛巳知縣秦丙燧修，奉巡撫曾國荃命也。

據歷修姓氏，明正德中兵部尙書邑人李瀚嘉靖間知縣扈文魁萬歷甲辰兵部尙書邑人張五典崇禎間都督同知邑人張道濬順治己亥知縣邱潞康熙丁丑知縣趙鳳詔嘉慶辛酉知縣徐品山各一修。書凡十二卷，一星野，二方輿，三營建，四風俗，五貢賦，六選舉，七職官，八人物，九祠祀，十祥異，十一藝文，十二志餘。

大致承明代諸志之舊。觀其凡例，謂「張志於山川一門按地形龍脉，總叙成文，立意甚超，邱志撮其大要，改易總論，復標山川名目，以景物附綴其下，而田賦一門舊志挈其要領以便觀覽。一則舊志之宗旨不過如此。而今志之鑒別亦不過如此而已。」

沁水爲漢河內縣，北齊改縣曰永寧，開皇中復故名，改屬澤州。王世充嘗置原州於此。雍正以後爲澤州府屬縣。

雍正遼州志八卷

雍正十一年知州徐三俊修。

按舊序，萬歷三十一年州人孫毓英康熙十二年知州楊天錫各一修。孫序云，遼志之纂自伊川楊君，則孫志亦非始創也。

凡八卷，一圖考等，二城池等，三公署等，四祠祀等，五戶口等，六職官等，七人物等，八藝文。簡率殊甚。

州唐武德中置，旋改箕州儀州，卒復故名。領榆社和順兩縣。

乾隆和順縣志八卷

乾隆戊子知縣黃玉衡修。

據序，志始于萬歷十一年知縣李繼元，重輯于順治十三年知縣李順昌，三修于康熙十四年知縣鄧憲璋也。

凡八卷，一地理志，二建置志，三祠祀志，四田賦志，五官師志，六選舉志，七風俗志，八藝文志。

按其凡例則仿武功志之體也。頗能摭拾前志遺闕，如馬克禮爲金大定時人誤爲元金進士，邑人嚴坦名見藝文而人物內失紀，是也。

縣相傳爲春秋時梁餘子國，漢爲上黨沾縣地。北齊爲梁榆縣，隋改今名，因境內有古和城故名也。唐以來屬遼州。盧諶征艱賦所謂訪梁榆之虛郭乃闕與之舊都也。水經注云榆水出此矣。本書不引酈注，是其疏也。

乾隆榆社縣志十一卷

乾隆八年知縣費映奎修。前志修于康熙十三年知縣佟國宏也。凡十二卷，一輿地志，二建置志，三賦役志，四學校志，五風

俗志，六職官志，七選舉志，八人才志，九列女志，十祀典志，十一藝文志，十二拾遺志。

縣爲春秋時晉箕邑，漢爲上黨涅氏縣，開皇中改今名。五代以後屬遼州。

其書在山西諸志中頗稱詳慎。然因箕邑之故遂於藝文志中摘錄史記宋世家關於箕子之事。諸如此類，仍不免於膚濫。

卷三有述匠價沿革一條云，一匠價始於前明。今天下各匠輪班赴京上工，其有願出價銀者免其赴京應役，各省遂有匠價之徵。前撫石因晉省各州縣雖有應徵銀兩之額數，並無實在輸納之花名。有向故匠子孫徵收者，有向各匠徵收者，更有故匠無後令戶族均攤各匠分賠者。完納維艱，滋累殊甚。具摺奏准將額徵匠價均入地糧之內。一此事他志殊未道及。



乾隆沁州志十卷

乾隆辛卯知州姚學瑛修。

按舊序，志始于萬歷壬寅知縣俞汝爲。俞序云，一正德間議創未成，而袁彙成書則自學憲榮甫楊公始。乃因舊文刪正云云。一則前此之志固未就也。其後康熙甲寅有知州汪宗魯一修，乾隆辛酉知州雷暢一修。雷志蓋即雍正辛亥知州葉士寬所修而未刊者也。

本書凡十卷，一星野等，二城池等，三貢賦等，四封爵等，五選舉等，六名宦等，七寓賢等，八古蹟等，九寺觀等，十藝文。其糾舊志之誤者，如云一職官條舊志載華溫琪周伯祿二人。按通鑑後梁開平四年以晉絳沁三州爲定昌軍，以華溫琪爲節度使。然歐陽五代史職方考不言沁爲梁有。蓋當時爭奪割據朝梁暮

晉故也。則溫琪無庸贅入。又金沁南軍卽今懷慶府也。伯祿本同知沁南，而舊志誤謂官於沁州。故削之。其他漏遺舛紊者，悉增補更正。至封廕條稱李存孝封沁州王似據殘唐小說。鄙俗可哂，豈可仍而不革。一誠可笑矣。

光緒沁州復續志四卷

光緒六年知州吳承恩修。

蓋緣前志所續未備，故復爲此編。於光緒初元之大變頗深致意也。

凡四卷，一曰公署學宮祠祀貢賦防禦牌坊橋梁村莊風俗塚墓，二曰職官選舉封贈名宦人物孝義，三曰忠烈文苑方技列女，四曰災異藝文卮言。

雍正沁源縣志十卷

附光緒續志四卷

雍正八年知縣王廷掄修。

按序，志蓋始于萬歷丁未知縣王純，康熙壬午知縣汪士鵬續而未成，癸巳韓瑛乃刊行之。

凡十卷，一封域，二建置，三田賦，四典禮，五職官，六選舉，七人物，八古蹟，九別錄，十藝文。

縣爲漢上黨穀遠縣地。晉省，後魏置沁源縣。開皇十六年置沁州治此。蓋至宋初始移治銅鞮也。州境綿山與介休接境，沁水所出，故名。

末附光緒續志四卷，光緒七年知縣董餘三修，奉巡撫曾國荃命也。略依前志例增入近事而已。

康熙武鄉縣志六卷

康熙三十一年知縣高銜修。

凡六卷，分目瑣細，不堪枚舉。據凡例蓋大致依順治乙酉李芳莎志也。然所訂之例，如云：「人物鄉賢舊志先錄大略後於藝文內又載全傳，紛紜重複。今於有全傳者卽錄全傳，無全傳者悉照舊志。」似較舊志稍高一籌。

但所云志書有增必有刪，若增而不刪但可謂之增志而不可謂之修志，因謂舊志陰陽學醫學二項無關重輕刪去其名。則謬妄之見矣。

乾隆武鄉縣志六卷

附光緒續志六卷

乾隆五十三年知縣白鶴修。


據例言，順治二年乙酉李芳莎康熙壬申高銜各一修。其在明代

則無考矣。

武鄉置郡始於後趙，隋開皇中州廢入縣，隸上黨，元以來屬沁鄉也。州，太行所峙而清漳所經，石勒之故鄉也。

書凡六卷，一建置等，二公署等，三封爵等，四人物等，五六藝文。大要頗爲明練，不失雅裁。

末附光緒續志，光緒五年知縣吳匡修，一依前志之體。中有采錄縣人著作者，如武鄉縣建置沿革考縣人魏鸞鵠撰也。



光緒平定州志十六卷

光緒八年知州張彬繼前任賴昌期修成，奉巡撫曾國荃命也。

按所錄舊序萬歷中知州宋沛州人按察副使延論始修，乾隆戊辰知州王祖庚乾隆乙丑知州陶易乾隆庚戌知州金明源各一修。庚戌志始於知州金廷弼，時戴衢亨任學政也。

凡十六卷，一御製星野，二輿地，三四建置，五食貨，六職官，七選舉，八九人物，十至十五藝文，十六雜志。

州本太原郡地，宋置平定軍，金以來爲州。雍正二年升直隸州，以樂平（今昔陽）孟縣壽陽隸焉。

民國昔陽縣志六卷

民國四年知事皇甫振清修。

據其序天啓丙寅知縣尙存義始修，康乾雍屢加修訂，自嘉慶迄清末僅於平定修志時附輯一次。今存康熙十一年知縣王祚永乾隆十八年知縣李榕丙申知縣李早榮癸未知縣陶鏞各序。蓋今所據者李榕一本而已。

凡六卷，曰圖考輿地建置民政秩官選舉人物藝文雜誌。仍平定州志例，而謬誤庸俗不可枚指。

昔陽故樂平縣也。漢爲上黨沾縣地，曹魏析置樂平縣，爲樂平郡治。隋唐曾置遼州，金曾置臯州。明清爲平定州屬縣，嘉慶初曾省爲鄉旋復故。縣東有昔陽城，左傳晉荀吳入昔陽滅肥是也。民國三年以避江西重名縣，改昔陽。

光緒孟縣志

光緒七年知縣張嵐奇修，奉巡撫曾國荃命也。

按舊序，嘉靖三十一年知縣萬鑑始修，縣人張淑譽稿也。康熙三十八年知縣蔡璜再修，乾隆四十九年知縣馬廷俊三修。

凡十八卷，一圖，二大政紀，三恩賞紀，四典禮紀，五天文考，六地輿考，七八建置考，九食貨考，十一職官表，十二至十四選舉表，十五政略，十六至十八列傳，雖變前志體例而乾隆以前事實多仍舊也。

孟爲漢太原縣，有仇猶亭，蓋古仇猶地。金興定中升爲州，明初降縣隸太原府。雍正二年來屬平定。

光緒壽陽縣志十三卷

光緒八年知縣白昶取前任馬家鼎稿刊之，奉巡撫曾國荃檄也。據所錄舊序知有康熙壬子知縣吳祚昌，乾隆三十四年知縣龔導江，兩次修本，康熙以前未之及也。

壽陽晉縣析榆次置，金曾隸平定州，元明隸太原，雍正二年復改隸平定州。

凡十三卷，一輿地志，二建置志，三賦役志，四學校志，五官政志，六武備志，七選舉志，八九人物志，十風土志，十一十二藝文志，十三雜志。

輿地志云，一攷舊志村莊不滿三百而不枚舉其村莊之名，今戶口日繁，統計所九十有二，村莊四百十一。民俗以某村屬某所，相沿已久。今仍其俗備列其名兼載其距城里數，而所謂某鄉某都者則略之，蓋某鄉某都之稱用以納正供，雖遷居而不改，故有家於西而尚稱東幾都家於北而尚稱南幾都者。某所某村則民居土著之實，可按籍而稽耳。一此北省鄉村所以不用都稱，固傳久之良法也。

乾隆平陽府志三十六卷

乾隆元年知府章廷珪修。

前志修於康熙四十七年知府劉棨，本志繼之而修也。

凡三十六卷，一圖考，二星野，三建置沿革，四疆域，五山川，六關津，七城池，八公署，九學校，十祠祀，十一戶口，十二田賦，十三水利，十四倉儲，十五鹽法，十六郵政，十七兵防，十八帝王，十九職官，二十宦蹟，二十一選舉，二十二封廕，二十三人物，二十四隱逸，二十五列女，二十六仙釋，二十七方技，二十八寓賢，二十九風俗，三十物產，三十一古蹟，三十二陵墓，三十三寺觀，三十四祥異，三十五雜志，三十六藝文。

末附憲綱一冊，其實所列各項悉可入志，無俟贅此也。

平陽堯都曹魏始分河東置平陽郡劉淵建國即都於此北朝以至唐宋皆曰晉州政和中升爲平陽府雍正二年升蒲解絳吉隰各爲直隸州於是府統州一曰吉縣十曰臨汾洪洞浮山鄉寧岳陽曲沃翼城太平襄陵汾西原有趙城一縣後割隸霍州也。

乾隆臨汾縣志十卷

乾隆四十四年知縣吳士淳繼前任修成。

士淳序云，一邑志肇修於萬歷辛卯安肅邢公，越八十餘年至康熙癸丑而莆田林公修之，又四十五年康熙戊戌瀛海宮公修之，又十二年雍正己酉而大興徐公修之。一邢名雲路林名宏化宮名懋言徐名三俊也。

凡十卷，一沿革志，二地理志，三田賦志，四祀典志，五學校志，六職官志，七選舉志，八人物志，九祥異志，十藝文志。

臨汾爲漢平陽縣，屬河東郡，曹魏置平陽郡治焉。隋改今名，近代遂爲平陽府附郭縣。

雍正洪洞縣志九卷

同治十一年知縣文紹謙修

雍正八年知縣金世傳修。

嘉靖三十三年知縣王業萬歷十三年知縣喬因羽順治十六年知縣趙三長康熙十二年知縣邵琳各一修。據王序云，一叨領邑務即有志斯舉，適見對霍李公舊所爲抄本。則嘉靖志亦有所本也。本書九卷，一輿地志，二田賦志，三官司志，四人文志，五秩祀志，六食貨志，七武備志，八雜撰志，九藝文志。縣爲春秋時楊國，漢爲河東楊縣，後魏以縣有洪洞鎮，乃改今名。縣在明代爲殷富之區，故縣人頗有奢靡之戒。本書風俗篇錄歲貢生晉淑京所撰禁奢侈條議，描叙當日常生活習慣至爲詳悉。

獨惜未著其年代耳。錄其一條如次。

行財即古納幣之禮，近俗竟有假粧奩爲餌以爭財禮者，即有用銅錫充數以誑視者，更有以好看爲名令男家借取首飾幣帛及賺物到手，或盡裁窮或竟當賣者。致使日後殘恨其婦詬詈其婿，究以兩姓之怨遂成仇讎。今議聘禮多者銀二十兩，幣十六端，裙挂裏絹各四件，綵線金綿各一幅，頭面止插一糕，金銀花不過十對。次者銀十二兩，幣十端，裙挂裏絹各二件，頭面金銀花八對。又次者銀八兩，幣六端，裙挂裏絹各一件，梭布二匹，頭面止用銀花六對，食盒至多不過六架。觀戶口篇所志萬歷間多至九萬八千餘口，而順治康熙雍正三次編審僅有三萬餘，則崇禎以前之殷庶可知。今河北各縣居民詢其祖貫多云自洪洞遷來，故洪洞之移民爲近代社會史一大案。然知者甚尠。本書僅云，「洪民自明隆萬間生齒浩繁，至崇禎

末遭兵燹之變，民多背井離鄉，而村落空虛，不能徵詢父老而詳紀之，爲可惜矣。

同治浮山縣志三十七卷

同治十年知縣慶鍾取乾隆十年知縣田有伊等所修本增補刊行之也。

據歷修姓氏，康熙十二年知縣潘廷欽重修，雍正十年知縣周毓正續修。

唐武德二年始析襄陵置浮山縣，明以來隸平陽府。

書凡三十七卷，一圖考，二星野，三建置沿革，四疆域，五城池，六山川，七關隘，八橋梁，九學校，十公署，十一戶口，十二田賦，十三運支，十四兵防，十五驛傳，十六封建，十七職官，十八官績，十九選舉，二十材武，二十一地封，二十二

人物，二十三孝義，二十四列女，二十五流寓，二十六仙釋，二十七風俗，二十八物產，二十九古蹟，三十園亭，三十一陵墓，三十二祠祀，三十三寺觀，三十四祥異，三十五兵氛，三十六雜志，三十七藝文。

卷帙雖多，或僅數紙，虛設門類，以資張大，猶世俗之見耳。

光緒浮山縣志三十四卷

光緒庚辰知縣裴允莊修，教諭武克明纂，實即重刊同治志。武序云，仍舊者十七，更訂者十二，增補者十一也。

凡三十四卷，一圖考，二星野，三建置，沿革，四疆域，五城池，六山川，七關隘，八橋梁，九公署，十學校，十一祀典，十二戶口，十三田賦，十四運支，十五驛傳，十六兵防，十七職官，十八宦績，十九選舉，二十封典，二十一人物，二十二

孝義，二十三列女，二十四流寓，二十五仙釋，二十六風俗，二十七物產，二十八古蹟，二十九祠宇，三十寺觀，三十一災祥，三十二兵氛，三十三雜志，三十四藝文。

乾隆鄉甯縣志十五卷

乾隆四十九年知縣葛清修。

據所錄歷修姓氏，縣志創於萬歷間知縣焦守己，重修於康熙十一年知縣張聯箕也。

縣在北魏爲昌寧縣，後唐改今名，金以後隸吉州，雍正二年升吉州爲直隸州以縣隸焉。乾隆三十七年改爲散州，以縣屬平陽府，當黃河之濱，固古來險要地也。

書凡十五卷，曰疆域山川城鎮田賦戶口官師人物仕進旌封積貯學校禮俗物產祥異藝文。雖儉逼已甚，而所載風土諸條猶非盡

空言。固小邑志乘中之卓然者也。

民國岳陽縣志十六卷

民國二年知事李鍾珩修。

據所錄舊序，康熙元年知縣李子實雍正十二年知縣趙溫光緒六年知縣唐廷愷各一修。前乎此者遂不可考矣。

凡十六卷，一圖考志，二輿地志，三建置志，四坊里志，五學校志，六典禮志，七賦役志，八職官志，九武備志，十選舉志，十一人物志，十二列女志，十三形勝志，十四祥異志，十五十六藝文志。

縣爲漢上黨穀遠縣地，後魏置安澤縣，大業中改岳陽，取既修太原至于岳陽語也。唐宋屬晉州，明清屬平陽府。民國三年以避湖南岳陽名改還安澤縣名。

本書自云屢奉檄催，以兩閱月成書，其舛陋可想。并星野八景之俗例亦未刊除也。

乾隆曲沃縣志四十卷

乾隆戊寅知縣張坊撰，前有王鳴盛序。

張氏自序略稱見儲大文所修山西通志於京邸而心折其辨證一門。及來曲沃，以形勢推度斷，新田不在曲沃，古曲沃不在聞喜，而當在今縣治西南數里之故城。然漢志聞喜故曲沃，武帝更名絳，晉自曲沃徙此，絳水出西南，續漢志晉志并同。其時未有曲沃也，北魏始有曲沃，與聞喜絳並立，析絳之新田置也。自隋以來皆因之。舊說之來已久，未可全然抹殺。又其凡例云，一舊志山川皆失其傳，今山爲考出太行絳山東陘峨嵎，川則汾澮天井，載籍昭然，千年若揭。其舊著紫金大尖合水鼓堆鄗

俚不堪，概行刪去。『不知考證乃一家之私言，稱名乃一時之通制。私言元可隨時樹立，而通制一經湮沒後此必將失傳。名雖鄙俚，固其時其地之人所公認，烏可以私言而變亂之哉。』

凡例又云，『八景之外增益二景，字義調叶，允諧風雅，一議論如此適見其不知大體而已。』

凡四十卷，一星野，二圖考，三沿革，四疆域，五形勝，六山川，七城池，八公署，九學校，十壇壝，十一祠廟，十二坊表，十三古蹟，十四陵墓，十五寺觀，十六關隘，十七戶口，十八田賦，十九水利，二十倉儲，二十一郵政，二十二武備，二十三風俗，二十四方產，二十五封爵，二十六職官，二十七師儒，二十八貢舉，二十九封廕，三十名宦，三十一人物，三十二鄉飲，三十三列女，三十四流寓，三十五藝術，三十六仙釋，三十七祥異，三十八九藝文，四十志餘。

王氏序稱張氏工詩歌古文詞，然志中所載其所撰詩文實多庸下。蓋章實齋所謂不可修志者。王氏之序亦多敷衍酌應泛詞，蓋亦知其不足恃矣。道光志云，「張志大致尙詳，而考證未精，過於附會。且妄立主名。如山有嗟子吧望夫山陟岵等名，以晉人多遠賈，意在勸諷，然爾雅山多草木曰岵無草木曰吧，詩亦泛言孝子行役不忘其親故登山以望父母。非父母之望子而作也。卽望夫山載在廣輿幽明錄諸書不翅三四，豈山徑小道隨處可名邪。爾雅沃泉縣出亦不必定指所在，而遂以景明之瀑布當之，未免果於自信。」其言誠是也。

道光曲沃縣志十一卷

道光二十二年知縣張兆衡修，糾乾隆張志而作也。

凡十二卷，曰天文地理山水大事編審職官學校人物世系風俗古

蹟藝文。較張志爲簡淨。然言編審不能概賦稅，言大事亦不能專指邑之沿革，皆不思之甚者。世系一門頗有意義，而於不能詳攷。

光緒曲沃縣志三十二卷

光緒六年知縣茅丕熙取前令張鴻達所修刊成之也。

按舊序，嘉靖三十年知縣劉魯生創修，萬歷四十年知縣趙至我重修，號曰沃史。康熙七年知縣張奇勛續之。康熙四十五年知縣潘錦以其言不雅馴而詮次紕繆重修焉。其後乾隆戊寅知縣張坊嘉慶丁巳知縣侯長燿道光壬寅知縣張兆衡並一修。

晉獻公使太子申生居曲沃是爲新城，及景公謀去故絳遷於新田，卽此是也。漢爲河東郡絳縣，後魏太和十一年改置曲沃於此。自是以後屬絳州，洪武二年改隸平陽府。

書凡三十二卷，一星野，二圖考，三疆域，四沿革，五山水，六城池，七公署，八學校，九壇壝，十祠廟，十一古蹟，十二關隘，十三戶口，十四田賦，十五倉儲，十六蠲賑，十七郵政，十八武備，十九風俗，二十方產，二十一封爵，二十二職官，二十三師儒，二十四貢舉，二十五封廕，二十六名宦，二十七人物，二十八列女，二十九流寓，三十三一藝文，三十二誌餘。

人物篇以程本公堅定入儒林，而順康間提倡修志之衛周祚賈漢復兩人及明之李建泰不爲列傳，殊不可解。

乾隆翼城縣志二十八卷

乾隆三十六年知縣許崇楷修。

按凡例，志創于前明嘉靖二十二年知縣鄔桂枝，增修于順治十

四年縣人御史上官鉉，然據鉉序稱前志之修終于萬歷戊申，則鄆志之後尙有一次也。嗣是康熙十二年知縣陳應富乾隆二年知縣李居頤各一修。

凡二十八卷，一圖考，二星野，三建置沿革，四疆域，五山川，六城池，七公署，八學校，九田賦，十封建，十一執秩，十二官績，十三選舉，十四封廕，十五人物，十六孝義，十七列女，十八隱逸，十九方技，二十寓賢，二十一風俗，二十二物產，二十三古蹟，二十四祠祀，二十五陵墓，二十六祥異，二十七紀事，二十八藝文。

翼城爲春秋時晉之絳邑，後更曰翼。漢爲絳縣地，後魏太和中置北絳縣，開皇中改今名，金曾升爲翼州，元復故清爲平陽府屬縣。

本書藝文篇錄左傳諸文及詩唐風，不脫古文選本習氣。古蹟篇

廉王避暑城金鈎店諸說，逞臆而談。它志雖陋，尙不至此也。

光緒翼城縣志

光緒七年知縣龔履坦修，奉巡撫曾國荃命也。

凡二十八卷，仍依前志之例，前志之失蓋絕未糾舉也。

雍正太平縣志八卷

雍正二年知縣劉崇元取康熙五十八年前任張學都修本刊之。乃徑題劉之姓名，已嫌攘奪。檢其第二卷所增御箴樓記，明明取已成之刻本竄入已作以自矜炫。陋矣。

據所錄舊序，嘉靖丙寅知縣羅潮取舊志增訂爲十卷，萬歷乙未縣人王體復再加修訂，康熙十二年知縣何煒然因奉檄又再修，康熙壬戌知縣吳軫又繼之。

書凡八卷，一經建志，二營築志，三賦則志，四官師志，五選舉志，六人物志，七世代志，八藝文志。以科第封廕等爲選造，以都邑古蹟等爲世代，詭異不衷，猶明人遺習。餘可知矣。太平立縣始於後魏太平真君中，分臨汾而設。明以後隸平陽府，雍正二年改屬絳州。

道光太平縣志

道光五年知縣李炳彥修。

凡十六卷，一輿地志，二建置志，三坊里志，四學校志，五秩祀志，六典禮志，七賦役志，八職官志，九武備志，十選舉志，十一人物志，十二列女志，十三藝文志，十四古蹟志，十五祥異志，十六雜記志。

凡例云，一舊志所載凡有關於一縣者，或稱太邑或稱平邑，查

太邑則與太原太谷等縣不分，平邑又與平遙平陸等縣相合，」均於義未晰，此論誠是。

光緒太平縣志十四卷

光緒八年知縣朱光綬修。

據所載歷修姓氏，嘉靖丙寅知縣羅潮萬歷乙未知縣劉民望康熙癸丑知縣何煒然康熙壬戌知縣吳軫康熙己亥知縣張學都雍正乙巳知縣劉崇元乾隆乙未知縣張鍾秀道光乙酉知縣李炳彥各有修本，其書并鈔存者。所稱康熙己亥張學都志雍正志漏未述也。北魏太平真君七年臨汾縣地於關南置泰平縣，北周避諱改爲太平，明以來屬平陽府。

凡四十卷，一輿地志，二建置志，三學校志，四秩祀志，五典禮志，六紀恩志，七賦役志，八職官志，九武備志，十選舉志

，十一人物志，十二列女志，十三藝文志，十四雜記志。

其秩祀志記求雨之法略如春秋繁露所說，而彌爲俚俗，不知何以獨太平有此秩祀也。

雍正襄陵縣志二十四卷

雍正壬子知縣趙懋本修。

按其舊序，成化丙午志修於知縣李咨，隆慶戊辰修于知縣宋之韓，康熙癸丑修於知縣謝國傑也。

凡二十四卷，自一至十七占首二冊，而第二十四卷藝文獨占末二冊，其煩瑣若此。（卷首無目次）

襄陵爲漢河東郡屬縣，應劭曰，縣西北有晉襄公陵，因名。自是以來未之或改，明清隸平陽府。

光緒襄陵縣志十四卷

光緒辛巳知縣錢塘修，奉巡撫曾國荃命也。

凡二十四卷，一圖式，二星野，三沿革，四山川，五城郭，六公署，七學校，八壇壝，九廟祠，十戶賦，十一差徭，十二土產，十三風俗，十四官師，十五人物，十六選舉，十七孝義，十八節烈，十九古蹟，二十仙釋，二十一方技，二十二祥異，二十三賑務，二十四藝文，大致依雍正趙志例也。

光緒吉州志八卷

寫本

光緒五年知州吳葵之修，奉巡撫曾國荃命也。

按歷修姓氏，康熙間修于知州南鵬，雍正七年則知州甘士瑛。其凡例云，一州志自明末兵燹之後灰燼無存，又同治六年賊匪

竄境，卷帙散遺至今。一

凡八卷，一星野沿革疆域山川關津城池鎮堡公署學校壇壝祀祠里社鄉約，二賦役鹽法，三職官營汛武職，四宦蹟人物，五選舉封贈頂戴老農列女，六風俗物產古蹟陵墓坊表寺觀，七特恩祥異歷代兵氛，八藝文。

吉州爲春秋晉屈邑，漢河東屈縣，後周爲汾州，唐爲慈州，以有慈烏成故也。金明昌中改今名，治吉鄉縣。雍正二年曾以鄉寧蒲縣置爲直隸州。乾隆三十七年改散州隸平陽府，龍門孟津之險在焉。志多穿鑿之語，如城池云晉公子夷吾築之類是，多貢諛語，如大荒碑記之類是。

乾隆蒲州府志

光緒癸卯知府楊樹補刊

乾隆甲戌知府周景柱修。

蒲州古河東郡，後周於此置蒲州，唐立河中府，雍正二年升直隸州，六年升府，領縣六，永濟臨晉萬泉猗氏榮河虞鄉。未升府以前之州志沿革未之及也。

據光緒永濟縣志錄楊廷和序，知成化丁未許鵬嘗修州志，嘉靖己未邊像再修，萬歷癸丑畢自嚴三修，康熙甲辰侯康民四修。其發凡有曰，一凡志郡國者其幅員疆理城郭宮室山川往跡必躬履目驗盡其形狀，能者從而筆記，可使如營新豐。故自三輔黃圖而下若戴延之郭緣生酈道元盛宏之以及陸氏入蜀記等數十百種，續者雖未至其地，第覽其書而東西高下之形曲折向背之勢可得之目中遇之紙上。若夫逸軌曩躅尤尙訪求，好事之徒資相

接語，又須廣羅籤軸使證逮足供今履。驗所施議，顧未及加。乃掌故無咨於博士，繙考絕少於陳編。一手齋居營成三月，會稽典錄，荆楚歲時，載筆恐踈，或慙作者，後之君子，詳其缺焉。一斯固具史識者，故其於沿革古蹟致力最深也。

光緒永濟縣志二十四卷

光緒十二年知縣劉鍾麟修。

據例言，一永濟自雍正六年設縣以來，百有餘歲，未經修志，文獻無徵，久而愈湮。茲取康熙三年之州志與乾隆十九年之府志參合考校。一

凡二十四卷，一星野等，二城池等，三六川等，四學校等，五田賦，六建官，七八人物，九十選舉，十一封廕，十二祀典等，十三忠節等，十四節孝，十五隱逸，十六至二十二藝文，二

十三事紀，二十四餘錄。

永濟蒲州府倚郭縣，以蒲州升府而置。

乾隆臨晉縣志

乾隆三十八年知縣王正茂修。

據其序，臨之志創于邑令張舜臣，蓋在嘉靖二十二年，高維固繼修於萬歷癸卯，齊以治修於康熙丙寅。

本書凡上下兩篇，上篇曰星野疆域山川城池坊里市肆物產田賦丁徭庫貯倉貯廨署學校水利驛傳舖舍，下篇曰風俗禮儀秩祀羣令尹師儒丞尉武備選舉封蔭古蹟沿革災祥方音。

其志議一篇，自云「書志體裁大矣，非敢僭也。因思古自爲子者類以篇名一家之私言。」其見解已近迂闊，其文設爲語錄問答之體，詭誕艱僻，猝難循讀，蓋明人餘風也。

其藝文篇有跋疆域篇後一文，大意謂前令劉某政令嚴酷激成民變，因啓分縣之議。此縣之一段重要故實，乃不爲直筆，僅以隱約之詞附錄數語於篇末，不知其意何居。

臨晉爲漢解縣地，開皇中置桑泉縣，天寶改今名，舊兼有虞鄉境也，故解城卽在縣東南十八里。

光緒虞鄉縣志十二卷

光緒十年知縣崔鑄善修。

縣本漢解縣地，唐初改北朝之虞鄉爲解縣，屬虞州，更於解縣西別置虞鄉縣，卽今縣治，屬蒲州，元省入臨晉，雍正八年復設，前志修于乾隆己酉知縣周大儒也。

凡十二卷，曰地輿志建置志職官志賦役志祀典志學校志選舉志人物志列女志方外志藝文志拾遺志。叙次頗詳，方言一門尤非

苟作，縣據中條之勝，王官谷所在，故篇什尤斐然焉。

光緒榮河縣志十四卷

光緒辛巳知縣王希濂修，奉巡撫曾國荃命也。

據序云，榮河有志實出前明賓岡周少參公手，公隆慶辛未進士也。康熙十二年修于邑侯遼陽李公，僅二冊，今現行之志。又邑侯霽都楊公續修于乾隆己丑。周名有光萬歷戊戌修，李名長庚，楊名令琢也。

前志凡例云，一舊志修于康熙十二年，迄今幾百載，中間文獻無徵者何可勝道，且當年舊志已屬草草急就，僅愈于無，茲則另立體例廣爲哀集，其在康熙十二年以前者補其缺略，後此者就通志府志及采訪所得考其異同。一是前志之修頗復具有卓識也。

凡十四卷，一沿革等，二城池等，三學校等，四封爵等，五選舉，六七八人物，九列女，十十一十二藝文，十三事紀，十四祥異識餘。

縣爲秦漢以後之河東汾陰縣，開皇中以地得寶鼎改名寶鼎，大中祥符中又以有榮光之瑞改爲榮河，置慶成軍，金曾置榮州，雍正六年以後爲蒲州府屬縣。漢書所謂汾睢，后土祠所在也。宋眞宗復祠后土於此，其廟貌蓋歷久而猶嚴，亦岱廟之亞也。據本志則其遺跡尙存，而宋時所鑄金人則於明季投諸河矣。又汾陰薛氏史跡綿長，志殊少所紀錄。

乾隆萬泉縣志八卷

乾隆二十三年知縣畢宿壽修。

按歷修姓氏，志始于萬歷十三年知縣符嘉訓，續修于順治十七

年知縣鄭章及康熙四十七年瞿亮邦，瞿前列丘園卜一名，而職官表卜作上。

凡八卷，一圖星野等，二城池等，三貢賦等，四職官，五名宦等，六人物等，七風俗等，八藝文，似猶明志之舊也。

武德二年割稷山安邑猗氏汾陰龍門五縣村庄於薛通故城置萬泉縣，由唐以來屬蒲州。

民國萬泉縣志八卷

民國三年知事何發修，卷首無刊修年月，據職官表補也。

凡八卷，一輿地志，二三政治志，四五人物志，六七八藝文志雜記。譌謬滿紙不可卒讀。

雍正猗氏縣志八卷

附同治續志四卷又光緒續志四卷

雍正七年知縣宋之樹繼前任潘鋹修成。

據潘樾序，一琦志輯於正德間，萬歷壬子續修，逮康熙癸丑邑先達本苑補葺屋使王君大參郭君復增修之。一萬歷志實知縣馬孔明修，康熙志實知縣陳一魁修也。知有正德志者，見於萬歷志序也。

凡八卷，一圖考星野沿革疆域城池坊鄉都堡公署學校典禮祠祀橋梁，二戶口田賦土產風俗郵傳兵防郵政，三職官循績，四選舉封廕，五人物忠烈孝義隱逸方技耆壽，六列女流寓古蹟邱墓寺觀仙釋祥異雜志，七八藝文。

據其凡例，蓋依前志體也。然凡例已多文理不通之處，書中敘事語亦多首尾不完。

末附同治續志，同治六年知縣周之楨修，蓋雍正志成後復有乾隆三十九年知縣毛圻所續，茲取而附益之，以列雍正志之後也。凡四卷。又附光緒續志，光緒六年知縣徐浩修。亦四卷，略

同前志。

縣爲古郟國，左傳所謂郟瑕之地，沃饒而近鹽，魯之猗頓移殖於此，遂以畜牧鹽利致富。漢因取以名河東縣。隋以後屬蒲州，雍正六年以後爲蒲州府屬縣，志於河東鹽政無一語及焉。

乾隆解州志十八卷

乾隆二十八年知州言如泗修。如泗常熟人，官晉有年，風土山川閱歷幾編，於解州創修全志，先本州，後所隸四縣，兼及運城。亦異乎俗吏之所爲矣。

按歷修姓氏，嘉靖四年知州林元叙，康熙十二年知州陳士性，五十六年知州陳時各一修，康熙十二年志號馬氏志，五十六年志號介氏志也。

凡十八卷，一星野等，二山川等，三城池等，四學校等，五職官等。六七選舉，八九人物，十列女，十一古蹟等，十二奏疏，十三至十七藝文，十八雜誌。

州爲春秋時之解梁城，漢置解縣屬河東郡，後漢乾祐中始置解州，宋隸永興軍路，金隸河東南路，故明因之，隸山西平陽府

。雍正元年升直隸州，轄安邑夏平陸芮城四縣。相傳爲關羽故里，歷代崇其廟貌，至附會以爲結義園，關氏子孫在乾隆二十三年傳至五十四代，幾與關里之在曲阜相埒。小說之力，亦云偉矣。據本書第三卷稱關廟志創自有元胡琦，至明呂柟趙欽湯清張鵬翮代有纂輯，乾隆二十一年知州張鎮同邑紳介玉濤喬壽愷重修，板藏廟庫。此志當富有近千年來歷史神話也，（羽於宋崇寧中始封忠惠公，大觀二年加封武安王，萬歷中始封關聖帝君，順治元年始封關聖大帝）

民國解縣志十四卷

民國九年知事徐嘉清修，縣人舉人曲迺銳纂。

按所載解州舊志歷修姓氏，乾隆言志以後有光緒六年知州馬丕瑤一修。

凡十四卷，其目曰疆域溝洫氏族生業丁役賦稅兵防方言禮俗九略，名宦名賢文儒孝義士女雜傳六傳，官師選舉學校三表，營建沿革古蹟金石著述舊聞叢考七考。

汎覽全書，視言志較爲核實，例如氏族生產諸篇皆言志所不及，然舛陋之語聯牘皆是。舉其尤可笑者，其方言略云，一日必曰日頭，以日爲太陽之精日午當頭熱之甚也，月必曰月涼，以月爲太陰之精月至秋涼乃明。一又古蹟考中載關羽先瑩俗說，誕妄百出，不加刊正，識趣何其淺也。

乾隆安邑縣志十六卷

乾隆二十八年知縣呂瀛修，言如泗所修解州全志之一也。

按歷修姓氏，萬歷四十六年知縣耿啓創修，康熙十一年知縣趙

增續修。

凡十六卷，一沿革等，二山川等，三城池等，四學校等，五職官等，六七選舉，八九人物，十列女，十一古蹟等，十二至十五藝文，十六雜志。

安邑爲夏都，戰國時魏復都此，漢爲河東郡治，五代以後隸解州，光緒續志序有云，一山川建置不殊伊昔，則無可續，政教人文或遜於前，則無能續。一其爲都會雖甚古而故實反不多誠有如所云者。然本書不立大事記，又鹽澤事已歸入運城志，宜其篇幅益短絀而無可觀矣。

光緒安邑縣續志六卷

光緒六年知縣趙輔堂修，續乾隆志而作也。

乾隆夏縣志十六卷

乾隆二十八年知縣李遵唐修，言如泗所修解州全志之一也。

縣本漢河東安邑縣，後魏始分其東境立夏縣，金貞祐以後隸解州，司馬光之故里也。本書凡十六卷，其人物古蹟藝文，幾全爲光一家而作也。

光緒夏縣志十卷

光緒六年知縣黃縉榮修。

據歷修姓氏，宏治間知縣姜洪，嘉靖間知縣鍾恕，萬歷間知縣高奎，康熙十一年知縣羅在公，四十七年知縣蔣起龍，乾隆二十七年知縣李遵唐，各有修本，康熙以前志皆無存也。

凡十卷，一輿地志，二建置志，三祠祀志，四賦役志，五災祥

志，六官師志，七八九人物志，十藝文志。

乾隆平陸縣志十六卷

乾隆二十八年知縣李友洙修，縣人編修杜若拙纂，言如泗所修解州全志之一也。

按歷修姓氏，嘉靖間知縣王發蒙創修，隆慶六年知縣丁一元，康熙九年知縣徐吳錦，十八年知縣柴應辰各一修。

凡十六卷，目次亦同他志也。

縣爲漢河東大陽縣，唐天寶三載太守李齊物開三門以利漕運，得古刃有篆文曰平陸，因改今名，屬陝州，金始改屬解州。底柱之險卽在縣東南大河中，左傳之顛軫亦在縣東北也。

乾隆芮城縣志十六卷

乾隆二十八年知縣莫溥修，言如泗所修解州全志之一也。

按歷修姓氏，嘉靖間縣人劉良臣始修，隆萬間知縣李斗等續修，康熙十一年知縣畢盛讚又修。

凡十六卷，目次與他志同。

縣爲古芮國，漢爲河東河北縣後周立今名，負中條而面大河，縣東南陌底渡爲古涇津路通河南靈寶，昔時行旅所必經矣。

乾隆安邑運城志十六卷

乾隆二十八年州判熊名相知縣呂瀛等修，言如泗所修解州全志之一也。

凡十六卷，一沿革等，二鹽池，三城池等，四學校，五職官，六七選舉，八九人物，十列女，十一古蹟等，十二至十五藝文，十六紀事雜志。

解州鹽池之利擅自古昔，左氏稱郇瑕氏沃饒而近鹽，漢鹽官以

河東安邑爲首，即此池矣。元始徙陝西都轉鹽運司於路村建城郭以爲固，因名運城，此書從鹽法志分輯而出也。

乾隆直隸絳州志二十卷

乾隆三十年知州張成德修。

凡二十卷，一星野等，二山川等，三城池等，四田賦等，五封爵，六職官，七宦績，八九選舉，十一人物，十二孝義等，十三列女，十四至十九藝文，二十雜志。

藝文中輯絳帖事頗詳，獨於歷代兵事無所紀。

光緒直隸絳州志二十卷

光緒五年知州李煥揚修，奉巡撫曾國荃命也。

按歷修姓氏始于正德辛巳知州李文潔，其後萬歷庚辰知州田子堅，萬歷己酉知州方立誠，康熙庚戌知州劉顯第，乾隆乙酉知州張成德各一修，舊序存本書藝文篇也。

凡二十卷，一星野沿革疆域，二山川古蹟風俗物產，三城池壇壝官署學校，四田賦紀恩戶口倉儲，五六封爵職官，七宦績，八九選舉，十十一人物，十二孝義殉義任恤寓賢隱逸藝術，十三列女貞烈，十四至十九藝文，二十雜志。皆前志例也。

州在秦漢爲河東郡地，後魏置東雍州及正平郡，隋唐以後爲絳州，雍正定制轄垣曲聞喜絳稷山河津五縣。

李序云，「粵逆捻匪之擾昔所未經，丁丑戊寅之荒民幾無遺，亟宜紀載以昭炯戒。」然細按其書，於此兩事實少所紀述也。

光緒垣曲縣志十四卷

光緒五年知縣薛元釗修，亦奉巡撫曾國荃命也。

據歷修姓氏嘉靖五年知縣王本忠始修，十四年知縣李袞，萬曆三十九年知縣呂恒，康熙十一年知縣紀宏謨，乾隆三十一年知

縣湯登泗各一修。

凡十四卷，一星野沿革疆域，二山川古蹟風俗物產，三城池壇廟廨署學校，四田賦戶口倉儲紀恩兵防，五職官，六七選舉宦績，八人物，九列女，十至十三藝文，十四雜志。

縣故漢河東郡垣縣地也，後周置邵州，貞觀初州廢，宋改爲垣曲縣。自是屬絳州。東據王屋，南臨大河。

本書兵防篇於明季闖賊嘉慶教匪咸同捻匪迭次兵革，紀之頗詳。較絳州志一字不及者爲勝矣。

乾隆聞喜縣志十一卷

乾隆乙酉知縣李遵唐修。

按舊序，正德十三年丁丑知縣王琳始爲志。萬歷二年知縣王象乾縣人李汝寬修，順治十二年知縣蘇本眉縣人王體言又修，康

熙十一年知縣沈光瑀又修。

凡十二卷，一星野等，二風俗等，三田賦等，四宦績等，五六七人物，八列女，九古蹟，十十一十二藝文祥異雜志。

漢武帝行經河東左邑之桐鄉聞破南粵而立聞喜。唐屬絳州，五代以後改屬解州，雍正七年復屬絳州直隸州。

聞喜裴氏魏晉以來代有聞人，其裴柏村環數里墓碑林立，名氏官爵可考者尙百餘人。然宋明以來裴氏不振何也。志無一語及之，其於氏族之變遷視之漠然矣。

光緒絳縣志二十一卷

光緒二十五年知縣胡延撰。

據序傳，一絳縣志始嘉慶靖己未，萬歷乙巳又續修之，順治己亥乾隆乙酉各有纂輯，光緒己卯知縣劉斌重爲增補。今惟與乾

隆志并存。餘但於劉志中存其序略。前後五志大要可睹矣。劉志詳載明以來鄉賢列女差稱實錄，餘則嘯咷無歸，疆域但繪一圖，不解開方，碁布鄉村，漫無邊廓，又摹繪景物，牒遺斯甚，山川不詳首尾，沿革不分郡縣，天文妄陳分野，藝文雜掇惡詩，職官人物則旁弋州郡，凡春秋左氏傳所紀悉載無遺，譎謬錯亂，悉數難終。昔劉總有言，羿氏舛射，東野敗駕，論文猶嫌其偶謬，指事彌患其多疎。若夫文士寄興之篇，何與指瑕，鄉曲流傳之諺，同於一喙，奚必斤斤剖其嚙否。至於縣志號爲方乘，體同圖經，地理山川人物風土之所繫，禮樂政令貢賦徭役之所從出，誼有難通，在所必辨。豈若秦誓之僞傳可以並存，南陔之逸詩無勞補作也。延職在守土，深思文獻無徵，受事以來，頗思改作。夫太沖之賦三都，時逾數載，君實之撰通鑑，成於衆人。縣志雖簡，豈一朝一夕之遽一手一足之烈所能較

遇事也。然欲招致通人從容纂述，而瘠土蕨田集賢匪易，又慮昧於政體者顧以典冊之重等於錐刀之末，轉相警警曰，政亦多術矣，奚亟於志乘爲哉。於是不揆窳陋，輒於治事之暇手自編纂。體例一本戴氏汾陽志段氏富順志章氏天門志孫氏三水志王氏桂陽志，匯衆擷精，歸於法度。舊志於鄉賢列女外一無所取，時證以新成通志。是書爲鄉宰楊氏篤所譔，其攷證多有可據，而於絳縣山川沿革亦時有舛誤。又其自序謂志宜仿圖經不可僭史。所分六門皆不襲乎史稱。而其志沿革也旁行表上非表而何，其志人物也屬辭比事非傳而何，而必名之曰譜曰略，揜耳盜鐘於義無取。竊謂史也志也，但求體例之善叙述之詳，不在稱名之同異。春秋史也，檇杙亦史，將謂春秋是而檇杙非歟。然其精詣所萃則星度金石二類可據者多。引而申之，理而董之，以證縣志，不無裨益，規昔賢明述之恪，納魯論擇善之義，

鉤核整比，四閱月而告成。凡爲門四，曰圖曰表曰志曰傳，都二十有一卷。

據藝文志所載，凡五種，嘉靖志無卷數，明吉大來撰，萬歷志六卷，明黃維翰撰，順治志五卷，清趙士宏撰，乾隆志十四卷，拉昌阿撰，光緒志十四卷，劉斌撰。

本書凡爲圖四，曰疆域山川城關鄉鎮，爲表四曰晷度大事職官選舉，爲志九，曰沿革山川土地田賦壇廟學校衙署古蹟藝文，爲傳四，曰循吏鄉賢列女叙傳，總二十一卷。

其刊除俗例若星野詩文之屬固不俟言矣。其特創之例足以資後人之法者，若山川圖分列今山川圖及水經注山川與各史志山川圖足資對照。其善一也。大事表以年爲經，以紀事及統部州縣沿革爲緯，不煩博引而綱舉目張。其善二也。

今絳縣爲晉曲沃漢聞喜地，與故絳新田去相近而名易濶，置絳

縣以屬絳州實始於北魏，雍正七年升絳州爲直隸州遂以縣隸焉。核準地望，討論沿革，是本志之所長也。

同治稷山縣志十卷

附光緒續志二卷

同治四年知縣沈鳳翔修。

按所錄有正德甲戌秦府長史強晟序，蓋縣人共同官梁宏濟始修也。嘉靖丙寅知縣賈憲梓行之，萬歷庚申知縣劉三錫，康熙癸丑知縣顧涑初，乾隆癸未知縣韋之琰，嘉慶乙亥知縣張應辰各一修。凡例云，一稷志永樂間訓導范昇所編者不傳，必別有所本也。

凡十卷，一圖考星野沿革疆域山川風土，二建置城池祀典學校田賦兵防，三職官宦績，四選舉，五人物，六孝義隱逸寓賢藝術仙釋列女，七古蹟祥異，八九十藝文。

縣卽西魏所築玉璧城，韋孝寬所守，其後升爲勳州者也。後改絳州。開皇初絳州移正平，改置稷山縣，唐以來爲絳州屬縣。本書藝文篇有古禹迹圖石志云，在保真觀，石橫二尺五，爲方七十一，豎三尺，爲方八十一，共方五千七百五十一，每方折地百里，志禹貢山川名，古今州郡名，山水地名，刊刻極精，今移砌關帝廟。惜未能攷爲何代物也。

末附光緒續志，光緒十一年知縣馬家鼎修，僅兩卷，而列女占其一，又譌列爲烈，俗莫甚焉。

光緒河津縣志十四卷

光緒庚辰知縣楊漢章繼前任修成。

按舊序，萬歷癸酉知縣張汝乾始修，崇禎壬申知縣郭景昌康熙壬子知縣馬光遠各一修，乾隆癸未知縣黃鶴齡修而未刊，癸卯

知縣張其昺續而刊之。嘉慶甲戌同治丙寅知縣沈千鑑汪和復各一修，郭序稱邑自隆慶四年修志，而萬歷志序未之及也。

凡十四卷，一星野等，二山川等，三城池等，四學校等，五職官等，六選舉等，七人物，八孝義，九列女，十賢媛等，十一至十三藝文，十四著述雜志。

縣爲漢河東皮氏縣，後魏曰龍門，唐初曾置泰州，旋廢，宣和中改今名。孟門之險古今所稱，龍門王氏之文學傳家亦縣之典實，志不爲立專傳，且將王勳之勳誤爲劇字。

光緒大甯縣志

光緒七年知縣崔同紱修。

據縣人劉而介舊序，一萬歷初紹溪吳公以郡倅督餉行部至邑，因愛山水之奇風煙之美，撰爲七記。雖非完書，而邑之有志自

此始。天啓間環海王公命前孝廉海若安先生勒成一家言，則竊之有成書又自此始。迨其季也，遭櫓槍之亂，付之一炬。一是明志已無存矣。（其名字亦不見于本書名宦篇）康熙壬子知縣馮應太雍正八年知縣杜瑾道光二十四年知縣周曾毓各一修。本書僅雜存舊序，而於歷修年月姓氏概不之及，使後人考索爲艱。眞不知著述之法者也。

凡八卷，一方輿集，二建置集，三官秩集，四賦役集，五選舉集，六人物集，七災祥集，八藝文集。

大審爲漢河東北屈縣地，後魏爲五城縣地，後周析置今縣，屬汾州。唐以後屬隰州。雍正二年以後爲隰州直隸州屬縣。西接陝西延長縣界，濱河爲境。高齊曾置浮圖鎮，隋曾以縣治焉。

道光霍州志二十五卷

道光六年知州崔允昭修。

按舊序，嘉靖三十六年知州褚相始修志，康熙十二年知州黃復生繼之。

州故漢蕪縣地，隋置霍山郡，其後爲呂州，金貞祐三年置霍州，明以州隸平陽府，乾隆三十七年升直隸州，轄趙城靈石二縣。自改建以來，此爲第一修矣。

凡二十五卷，一沿革，二星野，三疆域，四山川，五城池，六官署，七驛站，八關隘，九水利，十物產，十一倉儲，十二賦役，十三學校，十四祠廟，十五風俗，十六禮祥，十七古蹟，十八封爵，十九秩官，二十宦績，二十一科目，二十二仕籍，二十三人物，二十四列女，二十五藝文。

本書於風俗之第抄舊說不以爲然，故增入補遺一篇，稍存其真。然即此一端知其大體不過襲舊志之文而已。

道光趙城縣志三十卷

道光七年知縣楊延亮修。

按舊序志始修于嘉靖四十五年知縣賀國定，順治二年知縣秦嘉兆，十六年安錫祚，乾隆二十五年知縣李升階各一修。賀序有云「壬戌歲予尹是邑，詢及志皆曰已爲斷簡，一則嘉靖志亦非創始者矣。」

凡三十卷，一疆域，二沿革，三星野，四山川，五城池，六坊里，七署廨，八驛舖，九營汛，十津梁，十一水利，十二倉儲，十三賦役，十四至十七學校，十八風俗，十九物產，二十二十一職官，二十二至二十三科目，二十四二十五仕籍，二十六

封廕，二十七壇廟，二十八古蹟，二十九陵墓，三十至三十二列傳，三十三至三十五藝文，三十六七雜記。

其人物以事相屬，不限時代，不加標題，舉山川而包關隘，存宦績而黜名宦。皆卓然有識，異於流俗之所爲。其志議自云取則於王茂正臨晉志孫嘉謨汾州志也。

縣爲趙始封之地，漢爲彘縣，隋爲霍邑縣，義寧初始析置今縣。元自晉州改屬霍州，自是以來因之。

嘉慶靈石縣志十一卷

嘉慶丁丑知縣王志澍修，候補知縣舉人南海黃憲臣纂。

據舊序，志一修於萬歷辛丑知縣路一麟，續於康熙壬子知縣侯榮奎。路序則云前志乃潁川白公所輯，幾三十春秋，是亦在萬歷中也。

隋開皇十年始割介休西南地置靈石縣，以傍汾水開道得瑞石而名也。金以來隸霍州，清初隸平陽府，乾隆三十七年升霍州爲直隸州，以趙城及靈石隸焉。據學使黃鉞所作詩則隋所獲石文大道永吉四字已不可見矣。

凡十二卷，一地輿志，二建置志，三食貨志，四學校志，五典禮志，六武備志，七職官志，八選舉志，九人物志，十古蹟志，十一藝文志，十二雜錄志。

乾隆大同府志三十二卷

乾隆四十六年知府文光取前任吳輔宏本刊成。

府志始于明萬歷三十八年知府汪承爵，順治壬辰知府胡文燁續修。（學部志目作文燁誤）

本志於胡志之稱雲中郡而不稱大同府力加抨擊，甚當。至其人物舛誤若以段楚爲段文昌，唐鑑爲朱唐鑑，宋平城縣爲漢平城縣等類，亦頗賴其糾摘，乃至八景列名，八卦紀篇，陋習相沿，一掃而空，不可謂無功也。

凡三十二卷，一沿革，二星野，三疆域，四山川，五形勝，六古蹟，七風土，八巡幸，九封爵，十一職官，十二建置，十三賦役，十四學校，十五祠祀，十六兵防，十七十八宦蹟，十九二十選舉，二十一至二十三人物，二十四列女，二十五祥異

，二十六至三十一藝文，三十二雜志。

大同爲北魏之代都遼金之西京，唐宋以來爲朔邊重鎮，有明置行都指揮使司於此，清制領州四，曰朔應渾源蔚州，縣七，曰大同懷仁馬邑山陰廣靈廣昌靈邱。規制崇閎，甲於列郡，至今崇墉傑塞猶令人想見其遺風。本書古蹟等篇紀載翔確，於康熙中姜瓖之變雖無專篇之述，而涉筆所及，可知其摧毀前朝遺迹不少也。

乾隆揚州府志有宋城圖，此書惜不能據水經注遼金史等書作代遼二京城圖耳。

道光大同縣志二十卷

道光十年知縣黎中輔撰。

據其序曰，一大同立縣最古，索其圖經縣志，則向未有焉。於是公役之下，不憚周歷旁覽五百八十村，其距城之道里，其村

落之方位，其山間水曲向背脉絡之情，流衍分合之勢，無不筆而記之。洎茲七年，從容諮訪，援昔證今，觀其得失而達其源流。一是其苦心孤懷已異庸俗。

更觀其凡例，有殊乎俗見亟可稱者兩事焉。錄其語於左。

一唐俗勤儉一語，晉人作志者皆引之。不知居今日而猶上溯十五國之風，何異言山者必曰導自崑崙也乎。府志以史記代北之民任俠爲奸不事農桑登之風俗。不知言各有爲，貨殖一傳太史公發憤之所爲作也。今於歷代地理志等書不鈔錄一字，而以今日之閭閻習尙質言之，物產亦不侈陳，其常有者無足志，希有者罕得而志。氣寒霜早之區而誇言豐饒，是誣也。茲風土一册藉免雷同。

一人物之見於史傳者必備錄全文，而其人之本末始見。若刪節其事實，則絀漏殊多，改竄其字句，則文義不古。卽寓賢

如朱弁洪皓，古之不辱君命者也。若舍宋史不錄，另撰數行，而謂足以抒其忠義之氣耿日月而薄雲霄，竊恐未必有此筆力耳。再四籌之，以直錄史傳爲是。

以上兩節皆足破俗志膚溢之習。雖其文義不甚明順，其識固有足取者矣。

凡二十卷，一圖考，二星野，三沿革，四疆域，五營建，六關隘，七都會，八風土，九賦役，十學校，十一官師，十二選舉，十三宦績，十四營伍，十五武事，十六至十八列女，十九二十藝文。

縣故漢平城地，後魏道武自雲中徙都此。初爲代尹治，遷洛後爲恒州治。唐初遭默覈之患，州縣廢者數十年。開元二十年復置雲州，改置雲中縣，遼析置今縣。明以來爲大同府附郭縣。本書沿革篇辨盛樂與大同川不當混入大同頗精當，足正舊志之

失。

萬歷懷仁縣志二卷

萬歷二十七年知縣王植繼前任修成。

分兩卷，上卷建置沿革等約四十條，每條少者不過數語，下卷載封贈制敕古今文章。蓋明人習氣如是。中有康熙中增補數葉。懷仁乃契丹析雲中縣置，金曾升爲雲州，元復爲縣。縣西南有西安堡。嘉靖中寇由宣府膳房堡入犯應州懷仁，此地被掠最甚，故設堡於此。

乾隆渾源州志十卷

後附同治九年知州孔廣培增補

乾隆癸未知州桂敬順修。

據所錄舊序，宏治乙酉知州董錫，嘉靖癸亥知州顏守賢，順治

戊戌知州張崇德各修一次。其凡例力詆舊志門類混雜，重見錯出，瑣碎支離，今分門爲三十一，卷區爲十。一圖，二分野，三學校等，四兵制等，五科目等，六人物等，七寓賢等，八祠廟等，九十藝文。亦未見其能不瑣碎支離也。

渾源置縣始於唐，金貞祐間升爲州，明以來隸大同府。卷七藝術門頗有異聞。

據學部志目有萬歷渾源州志，知州趙之韓修，萬歷刊本，存卷一一册。

光緒渾源州續志十卷

光緒六年知州賀澍恩修，奉巡撫曾國荃命，繼乾隆志而成也。凡十卷，其目曰星野學校祠祀田賦兵制人物職官科目古蹟藝文。據其序自云，於舊志仍十之七，於新修增十之五，間有誤當

糾正及補前志所未備者悉附列於編末。其實鮮所糾正也。

乾隆天鎮縣志八卷

乾隆十八年知縣張坊取前任陳際熙胡元朗稿而成之也。

天鎮故遼西京天成縣，明爲天城衛，清初爲天鎮衛，雍正三年改縣。故前此無志。張氏曾修曲沃縣志，蓋以著述自矜者。本書前序云，「有元改屬興和，明初制設兩衛，兵燹頻仍，羽檄飛馳，戎馬所經過，謫戍所流寓，衣冠無土著之戶，氏族盡抽撥之遺，縱有好古之士又皆家鮮藏書駕絕名賢，指姓以爲村，象形以稱山，計里以名川，貿貿相傳，誰爲稽其實者。」蓋創始之難如此。雖體例多疵，亦當曲諒矣。

但其山川篇文筆峯下云，「縣令張坊倡築文筆塔於是山，高峰挺秀，文筆特朝，一鄙俗至此，公然登諸簡冊。則又不僅體例

之乖也。

凡八卷，一圖表等，二疆域等，三水利等，四風俗等，五科目等，六名宦等，七八藝文。

乾隆廣靈縣志十卷

附光緒補志十卷

乾隆十九年知縣郭磊修，前志蓋修于康熙乙丑知縣李煥斗也。凡十卷，一方域，二營建，三山川，四風土，五賦役，六政令，七秩宦，八選舉，九人物，十藝文。其政令篇綜載案牘之關於一邑廢興者，固勝於他志之徒侈空言也。

廣靈爲漢代郡延陵平舒縣地，東魏置北靈邱郡，後唐同光中始置廣陵縣。金改今名，明以來隸大同府。本書方域篇云元改廣陵恐誤。

卷末雜錄一篇云，一余足跡所至雖不過六七省，從無終年無竊

案者。余宰廣七年竊案不過三次。又皆他處流民。廣邑山多無材木，水多無魚蝦，產值千金者即推巨富，故素有窮山窮水窮財主之嘲。一邊邑荒涼之狀如繪。

末附光緒補志十卷，光緒六年知縣楊亦銘修，仍前志之名目而補以近事。

錄所載光緒五年曾國荃修志檄如左，以志山西文獻。

光緒五年五月二十九日蒙巡撫爵部院曾札開，照得本爵部院於光緒五年三月初九日會同閩部堂恭摺具奏，晉省設立書局，先刊善本四書六經以便士民，次議重修省志以存文獻一摺，欽奉諭旨允准，當經分別咨行在案。查山西志書自康熙雍正年間修輯後，至今未及重修。事關文獻，豈可任其湮沒。況咸豐初年髮逆滋擾，同治六年捻匪澆河，地方被蹂躪者十數屬，男女殉節義者若而人，禦寇防邊兼籌水陸，依山設險

添建砌牆，鹽務之官運官銷，營制之移兵移餉，有關政體，各有變更。繼以七載之歉收，三年之大祲，戶口流亡過半，賦稅蠲緩頻仍，倉儲則悉數皆空，善後則百廢未舉，正宜登諸記載，昭示方來。此志書之所以亟宜重修者也。現已由省聘請博通淹雅多識能文之儒，纂修全省通志。所有各州縣志書亦須一律修輯以備採擇攷證之資，藉免舛誤遺漏之患。惟當經費支絀，不得不設法變通。應將府志暫緩興修，州縣原有志書亦毋庸更動。先令各牧令查明原修志書以後應載各事實另修補志一冊，即照原分門類挨次編纂，其有原修志書以前事實前志未載應行添入者另列補遺一門，或前志已載尙須辯正者，另列糾誤一門，以期簡便。所需經費，准各就地方設法勸捐，藉資應用。一面訪請淵博之士總司修纂，庶免貽譏通識。資觀摩於往事，垂文獻於來茲。實於三晉吏治民風

兩有神益。

康熙靈邱縣志四卷

附光緒補志

康熙二十三年知縣岳宏譽修。

前志修于順治庚子知縣宋起鳳，本書興修時其板已失，僅存抄本兩冊。

凡四卷爲四冊，不分目次。

靈邱爲漢代郡縣，相傳以趙武靈王葬此而名，後周置蔚州治焉。明隨州屬大同府，雍正中蔚州移屬直隸宣化，而靈邱仍爲大同府屬縣也。

末附光緒七年知縣雷棣榮所修補志，僅分元亨利貞四集。

雍正朔平府志十二卷

雍正十一年知府劉士銘修。

凡十二卷，一圖考志，二星野志，三方輿志，四建置志，五職官志，六名宦志，七賦役志，八武備志，九選舉志，十人物志，十一外志，十二藝文。

北朝懷朔鎮地，唐置朔州豐州，五代置振武軍於朔州，遼金以來爲重屯，明爲大同右衛。雍正三年升右玉林衛爲朔平府，設右玉縣附郭，改左雲川衛爲左雲縣，改平魯衛爲平魯縣，割朔州馬邑來屬，遂領一州四縣，以將軍鎮此，其時歸化城猶隸府也。

光緒豐鎮縣志八卷

民國五年與利道尹單晉蘇重印

光緒七年同知德溥修。

據凡例，一職官設自雍正初年，建立城垣則自乾隆二年始，或歸直隸張理廳管轄，或陽高大朔理事通判移駐管理，或豐川鎮審武武職兼理，以徵收賦稅而已。後並衛所爲一官，改爲廳。

一今按其時尙爲廳而書名題豐鎮縣志，亦不可解也。

凡八卷，一星野等，二山川等，三營建等，四巡幸等，五兵防等，六風土等，七人物等，八藝文。

豐鎮東北卽察哈爾正黃旗游牧地，其南毗連民地者爲太僕寺牧廠，自乾隆以來陸續開墾升科。以迄於今，遂成雄邑。讀本書令人慨想時勢之變。志旣前無依傍，其難自倍於他邑。故去取之間多未審慎。職官門并前代雲中定襄長官亦多列入，卽其疏舛處也。然朔邊文化荒冷之區，得此整贍可觀之作，亦云匪易矣。

乾隆寧武府志十二卷

附咸豐續志

乾隆十二年知府魏元樞修，十五年知府周景柱刊成。

凡十二卷，一星野等，二山川，三城池等，四學校等，五武備，六職官，七科目，八名宦等，九壇廟等，十事考，十一餘錄，十二藝文。

寧武爲漢雁門郡地，在北朝爲恒肆諸州，唐宋爲嵐憲諸州，明設太原五衛，不立州縣，雍正三年始改衛所置寧武府。領縣四，曰寧武偏頭神池五寨。故前此無志。本書深注意於牆堡之設置山川之險阨及歷代之兵事，非漫然奉行故事之作也。

末附咸豐續志，咸豐丁巳知府常文述修，僅增補乾隆以來人名而已。

民國偏關志二卷

民國四年知事林端修。

按舊序，志蓋始於萬歷癸卯關人盧承業，而康熙甲寅關人劉炎增修之，道光間知縣馬振文又增修之。不曰縣志者，以雍正三年始改衛爲縣，其間掌故屬明者十之七，屬清者十之三，故仍名偏關志也。

五代史北漢天會元年城偏頭砦，卽今縣地也。明初設太原五衛，鎮西衛置偏頭關。雍正三年升寧武爲府，乃改縣，與神池五寨并隸焉。

本書分地理學校田賦兵馬職官名宦人物藝文八志，區爲上下二卷，邊關故實，賴以略存而已。

乾隆忻州志六卷

乾隆十二年知州豐容遂修。

凡例云，舊志修于萬歷中葉，蓋萬歷二十九年知縣楊維嶽也。然學部志目有嘉靖四十年知縣崞宗元志殘本四卷，本書既未及其事，名宦篇亦竟無其名，豈乾隆初年已難得見其書邪。是知其採訪之多疏也。

凡六卷，一沿革等，二祀典等，三職官等，四人物等，五六藝文。

忻州在漢末爲新興郡地，開皇十八年置州，以忻口爲名也。雍正二年升直隸州，轄定襄靜樂二縣。

光緒忻州志四十一卷

光緒六年知州方戊昌修，奉巡撫檄也。

凡四十一卷，分輿地建置食貨典禮官司人物藝文雜志八門。

光緒定襄縣補志八卷

光緒六年知縣王仲燾繼前任鄭繼修修成，奉巡撫曾國荃命也。鄭序云，明安無極有定襄志七卷，王南康又增爲八卷，我朝王珠崖王益津仍續爲八卷，檢本書名宦篇，知安名嘉士萬歷五年任，王名立愛萬歷四十年任，王珠崖者康熙四十六年王時炯，王益津者雍正二年王會隆也。

凡八卷，曰星野志，曰方輿志，曰建置志，曰田賦志，曰秩官志，曰名宦志，曰選舉志，曰人物志，曰列女志，曰雜記志，曰藝文志。

定襄爲漢郡，然今之定襄，古陽曲也。說見儲大文定襄辨。建安中置，晉改晉昌，隋省入秀容，武德中再置，隸忻州，其後

因之。

凡例自云，「是志句簡理得，不但羽翼國史，尤當表裏春秋，深信旁通者當目了了。」可謂荒謬。

同治靜樂縣志二卷

同治五年知縣張朝瑋修。

據其序「明季邑紳李穉草創，迨康熙三十九年暨雍正八年黃公梅公先後纂修，」據學部志目知黃名圖昌，梅未詳。

蓋其書僅續雍正以後事而未變舊例，凡十卷。而疆域山川建置無庸複贅，故止賦役學校職官選舉人物藝文，雜分爲上下兩卷也。

乾隆代州志六卷

乾隆四十九年知州吳重光修，據舊序，前志修于萬歷十三年州判周鴻禴，而職官志作宏禴，明史藝文志亦作宏禴，鴻字必偶誤也。宏禴麻城人，以建言降調邊方，其繼室董少玉能詩，見本志祥異志。

凡六卷，一輿地志，二田賦志職官志，三武備志科目志，四人物志，五六藝文志祥異志。

代州爲漢雁門郡，開皇中改州名，雍正二年升直隸州，轄五臺繁峙崞三縣。雁門關在州治北四十里，古之勾注也。故爲歷來用兵之地。本書田賦志紀物產頗有異聞，藝文志所載則多關五台之篇什。

本書所采周志蓋不多，光緒志廣蔭序云，一周志史采入藝文，

稱名筆，而失之太簡。於代雁門之辨茫然。吳書取材通志，知古代在蔚州，而語焉不詳。於雁門爲郡爲關之所自亦茫然。此猶未若其以吾彥爲吳彥范方爲范嵩鄭雲爲鄭尙外誤尤爲顯著也。

光緒代州志十二卷

光緒庚辰知州俞廉三修，繁時教諭舉人楊篤參訂。

其例言云，志規仿史體，以表志傳記標名冠圖於首，用武虛谷志魯山例。敘述之法，分列綱目，以綱爲斷，以目爲案，用戴東原志汾州例。詩文卽散注於各條之下，不別彙爲篇，用康對山志武功例。援引書籍，皆一一注明所出，以示徵信，用吳東壁志宣化例。是知所取法者也。

凡十二卷，一地表歷代封爵表職官表，二選舉表，三地理志，

四建置志祠祀志，五賦役志學校志兵志，六金石志，七藝文志，八史傳，九集傳，十列傳列女傳，十一宦績記僑居記，十二大事記雜記。其史傳直錄史文，集傳采諸家文集，列傳則襲舊志或得自采訪，而金石大事兩卷蒐討精詳，尤爲志中上乘。

光緒五臺新志四卷

光緒六年知縣孫汝明取縣人前福建巡撫徐繼畬所撰稿補成，九年知縣王步墀刊成之也。繼畬卽撰瀛寰志略者，固留心鉛槧之士也。志前有巡撫曾國荃序，蓋特取此志首刊行之以資提倡，然全書始終僅舉徐之字松龕而不及其名，此則承刊者之過矣。書凡四卷，一分野等，二山水等，三名宦等，四人物等，而冠以巡幸及疆域圖。前三卷爲原輯，第四卷爲續輯也。

五台爲康乾嘉三朝迭幸之地，以清涼山佛蹟增重。雖別有清涼

山志以紀之，然縣志以巡幸爲專篇，亦固其宜。與他志泛以皇言恩澤弁冕簡端者不侔矣。

全書無論新纂舊輯，皆以流暢之叙事體行之，例如叙治所則歷數街衢，叙山川則兼及物產，使讀者循其文如歷其境，欣然唯恐其詞之窮。以視俗志之但知逡寫簿錄，使人倦而思臥者，其工拙之效相去何遠哉。本書之所以能爾者，蓋亦緣具稿於里人，聞見精熟，言之乃倍親切。故雖以實齋之史識，而所撰諸志亦僅顯其長於體例，而不能盡其美於文詞。本書雖簡短，若論行文暢活，合於方志所需，實鮮有能及者也。

其新定之體例，若人物但分出仕未仕而納其餘於鄉賢，此在僻邑人物無多，自爲良法。又若生計一篇以詳農工商賈之生活狀況而不泛舉物產，皆深合於理。

至涉於五臺山清涼寺之事，雜錄中略及一二，則以別有專書也

。藝文篇所紀有左列各書。

欽定清涼山十卷

順治辛丑喇嘛阿王老藏輯。

西巡盛典二十四卷

嘉慶十八年董誥等奏請纂輯。

五臺山志一卷

明史藝文志喬世寧撰。未見傳本。

康熙五臺縣志八卷

康熙二十六年知縣周之進修。

乾隆五臺縣志八卷

乾隆四十二年知縣王秉翰修。

五臺故漢太原盧虜縣，魏書地形志作驢夷。大業初改今名，以五臺山故也。清爲代州屬縣。

乾隆崞縣志八卷

乾隆二十一年知縣邵豐鏞等修。

蓋自萬歷三十四年知縣陸壽光始修，至是百有餘年而後復修也。壽光輯縣志，事見本書卷八宦蹟中。

凡八卷。一輿圖等，二公著等，三選舉等，四田賦等，五物產等，六七藝文，八宦蹟傳人物傳列女傳，其第二卷中已有職官並附名宦矣。第八卷復爲宦蹟傳。幾令人疑爲重複，蓋名宦僅列其名而宦蹟傳始載其事實也。然皆無多語，實不必多此分析也。

崞爲漢雁門縣，後魏永興二年析置石城縣，屬秀容郡，東魏置廓州，後周州廢，隋開皇中改曰平寇，屬代州，大業初復今名，元曰崞州，明復爲縣，屬代州。縣有崞山，因得名。其西北

與寧武關接，前代要塞也。

道光繁峙縣志六卷

道光十六年知縣吳其均修。

據舊序，萬歷十五年知縣塗雲路始修，康熙十一年四十五年知縣郭傑嚴元疇各擬修而未果。塗序云，「偶得縣志一帙，乃前令關中小山王公纂者，一則塗志亦有所本也。」

凡六卷，天文志曰星野門，輿地志曰井疆門山川門水利門建置門壇廟門邱墓門古蹟門景致門風俗門，食貨志曰田賦門物產門，禮儀志曰典禮門，武備志曰武事門，職官志曰官制門，選舉志曰科目門，人物志曰鄉賢門倫紀門仙釋門，藝文志曰藝文門，祥異志曰祥異門，觀其列目，真兔園冊之流。然事實頗豐。繁峙爲漢雁門郡屬縣，拓跋珪曾於此築宮，曰繁峙宮。金貞祐

中升爲聖州，明初復舊，其訛時爲峙蓋在此時。州治自唐聖歷中建於溲沱河南，萬歷十三年移河北，雍正二年以後爲代州直隸州屬縣。縣東有平刑嶺，關路通靈邱縣，爲戍守重鎮。金志作瓶形。

康熙保德州志十二卷

康熙五十三年知州馮國泰繼前任王克昌修成，奉修一統志之檄也。

按凡例，一弘治間刻城周公取胡公廷慎通志原本輯成州志，至萬歷間一修于膚施韓公，再修於洵陽胡公，始稱大備。周韓二志未見，胡志極詳洽，而間多繁冗。三韓張公未刻本又芟削太甚。一今按周名山，弘治十八年修，韓名朝貢，萬歷二十九年修，胡名枏，萬歷四十二年修，張名光岳，康熙十二年修也。胡志有苗朝陽序，即曾修河曲縣志者也。

凡十二卷，一因革，二形勝，三風土，四田賦，五聖澤，六官師，七選舉，八人物，九附紀，十至十二藝文。

隋唐本嵐縣地，淳化四年置定羌軍，景德初改今名，大定二十

二年升州，明屬太原府，雍正中升爲直隸州，以河曲縣屬焉。此本志修成以後事，然以前建置原委亦未之及也。

同治河曲縣志八卷

中有光緒十六年知縣陳日稔增補者

同治十一年知縣金福增修。

據序，河曲縣志自嘉靖萬歷間南坡王鏞編輯於前，苗朝陽續修於後。崇禎三年遭流寇王加應之變板燬。嗣經知縣錢永守修復成編，順治四年至道光十年歷經知縣馬雲舉楊廷標曹春曉以次踵修。此志蓋就曹本而輯者也。

縣爲宋火山軍地，金貞元中置今縣，雍正二年隸保德直隸州。縣爲濱河巖邑，正當邊牆之曲，宋以來兵事要衝。田地僅六百餘頃，而總計徵解達四千餘兩。蓋地雖瘠而轄境廣也。志於人民生計物產風俗及與蒙旗往來情形叙述尙備。

藝文篇有保德知州莫兆文漢瓦考云，一距河保營十數里有灘名太子娘娘者，土人每鋤地得瓦當上有萬歲富貴四篆文，據縣志指爲薄太后及文帝所居，或曰明忠順夫人三娘子也。一今按前說必非，復說稍近。其瓦則必漢定襄郡治之所遺也。

凡八卷，一宸章，二典禮，三星野，四職官等，五選舉等，六七八藝文。

光緒綏遠旗志十卷

光緒三十四年綏遠城將軍貽穀修，太常寺少卿寧河高慶恩纂。凡十卷，一疆界公所圖疆域沿革表，二山水城垣，三故城郡縣考，四官制考職官表官制兵制表世職表俸餉表，五經政略，六學制選舉表仕宦表學堂各表，七宦績，八人物，九烈女，十方言。

序例曰，一綏遠歸化向無志乘，山西通志作於康熙二十一年，其時尚無歸綏各屬，惟右衛官兵略一及之。雍正十一年朔平志出始有歸綏一境，新通志成於光緒十七年，乃著綏遠旗事而並及一道七廳，然第述大端，鮮列條目，今綏遠將軍轄境愈廣，歸屬又新增五廳，乃議剏修綏遠暨道廳並土默特各志。

綏遠爲魏盛樂城所在，隋唐淪於蒙古，爲土默特

方志考稿甲集第六編

江蘇

乾隆江南通志二百卷

乾隆元年總督趙弘恩修成表進，中允黃之雋等纂。蓋前志修于康熙二十二年，雍正七年後勅下各省督撫各修省志，江南於九年冬開局，及是始告成也。

凡二百卷，首錄詔諭爲四卷別行。第一至四十八卷爲輿地志，第四十九至六十六爲河渠志，第六十七至八十六爲食貨志，第八十七至九十八爲學校志，第九十九至一百十八爲職官志，第一百十九至一百三十七爲選舉志，第一百三十八至一百八十九爲人物志，第一百九十至一百九十四爲藝文志，第一百九十五至二百卷爲雜類志。計視前志之七十七卷幾於再倍矣。

科貢表，十三兵事表，十四人物，十五拾補。專以續補爲事，故前志所已具者不及也。其拾補一篇有錄存金熬待徵錄及述江寧機房事，均掌故之難得者。

同治上江兩縣志二十八卷

同治十三年知縣莫祥芝甘紹盤合纂。

其叙錄曰，一聞諸父老曰，建康金陵間有藏者，正德萬歷諸志蕩焉無跡，入我朝府志修於康熙七年，（陳開虞撰）江甯志修於康熙二十二年，（佟世燕撰）再修於乾隆十三年，（袁枚撰）上元志修於乾隆十六年，（藍應襲撰）至嘉慶十七年復修府志，（呂燕昭撰）道光初上元復有武志，（武念祖撰）迄今去武志踰五十年，去袁志幾百三十年，而諸志亦存世者寥寥，惟呂志尙夥。得非以其修於惜抱義法謹嚴故耶。（呂志姚鼐秉筆詳於乾隆

嘉慶江寧府志五十六卷 光緒六年重刊

嘉慶十六年知府呂燕昭修，姚鼎等纂。

按本書藝文所錄府志，約得左列諸種。

宋史正志乾道建康志 見宋史志今佚

吳琚慶元建康志 目見舊志今佚

周應合景定建康志五十卷

朱舜康建康續志十卷 目見江南通志書佚

元張鉉至大金陵新志十五卷

戚光集慶路續志 見上元倪燦所著補元史藝文志今佚

明王一化萬歷應天府志三十二卷

陳沂南畿志六十四卷

清陳開虞江寧府志三十卷

觀其凡例所糾前志之遺失，如兵制祇列官名，職官載至郡守，今悉擴而充之，宜其淹富至此。若所增河渠志以紀三吳水利，雜類志以紀佚聞，及藝文志刊落詩文專載著述，皆非前志所能及。獨惜所引書未載出處，實乖著述之法，不止四庫提要所云刻本與原纂之外互也。

其體例疏失處甚多。如紀年事表據凡例力詆景定志之繁碎今以史記年志爲法云云。不知表之爲用全在旁行斜上年經事緯。今但撮舉史事，以一帝爲一行，初無表格，復何取於表哉。又由康熙以至乾隆豈除南巡恩澤以外別無一事可紀，乃唯載蠲免錢糧事，又何陋也。

又沿革篇敘至南朝截然而止，若乾元中之置昇州楊吳之置江寧府等皆無一語，亦不可解。

光緒續纂江寧府志十五卷

光緒辛巳知府趙佑宸繼前任修成，舉人郡人汪士鐸纂。續道光志而作也。

凡十五卷，一圖說，二田賦，三軍制，四祠祀，五學校，六實政，七建置，八名蹟，九藝文，十大事表，十一秩官表，十二

然陳志成於康熙七年，乃都無一語及之。三十卷又爲二十四卷之誤，是其缺略也。

光緒續志力推是書爲姚氏手筆，云或筆或削微指罔有異詞。然姚氏序文但頌知府之治蹟，絕未述其所以成一家言之旨。呂氏序亦初無授簡姚氏之語。更觀其凡例所矜張，多屬毛舉細故。行文冗沓，多濫用助詞。古文大家似不至出此。恐姚氏不過以鍾山書院主講挈銜而已，非真躬與簡牘之役。

凡五十六卷，一、二天章，三輿圖疆域分野，四沿革，五古今紀年事表，六、七山水，八、九古蹟，十一風俗物產，十二建置，十三祠廟，十四、十五賦役，十六學校，十七武備，十八驛遞，十九至二十四秩官，二十五至二十八名宦，二十九至三十三科貢，三十四至五十一人物，五十二、五十三金石，五十四至五十六藝文。

四十年賦役全書而略於人物盡刪秦淮游晏及無益詩文志中義例最佳者）思重修之以存今式。：是年之冬，其書告成，凡爲卷者二十有八。吾二人者同商訂之。作而歎曰，一實錄尙矣，繼之者宋之事蹟類編，其後作者十餘，而或傳或不傳殆有幸不幸也。（按以志名者，自史正志之乾道吳瑄之慶元惜皆不存。惟周應合爲馬光祖所修之景定建康，張用鼎所修之至正金陵二志僅存。其張志前戚光所續及明正德十三年管景爲白思齊劉雨爲王誥所修上元江甯志，萬歷十六年李登次第爲程三省周詩分修兩縣志，山川屬之盛敏畊，人物屬之顧起元，可謂得人，而亦不傳。其後汪宗伊有應天府志，陳沂有金陵世紀，南畿志，金陵圖，陳鏞有人物志，今亦佚。國朝知府林天擎改汪志爲江甯府志，康熙七年張怡爲陳開虞修府志，廿二年戴本孝爲佟世燕修江甯志，六十年唐開陶有上元志，乾隆十六年何夢篆爲藍應

襲王孟亭爲袁枚分修二縣志，嘉慶十七年姚鼐爲呂燕昭修府志，道光四年陳棫爲武念祖修上元志，今藏書家無多，惟陳呂二府志修藍袁武四縣志特存，餘俱佚矣。——

其編類立名，殊異他志。凡二十九卷，曰聖澤，曰大事記，曰山考，曰水考，曰城廂考，曰田賦考，曰食貨考，曰學校考，曰兵考，曰祠祀考，曰建置考，曰藝文考，曰秩官譜，曰科貢譜，曰列女譜，曰古今人譜，曰古迹譜，曰咸豐三年以來兵事譜，曰忠義譜，曰貞烈譜，曰名宦錄，曰鄉賢錄，曰忠義孝悌錄，曰耆舊錄，曰方技錄，曰方外錄，曰圖說，曰摭佚，曰序錄商例。

其優劣有得論焉。他志狃於積習，動以紀恩澤之言冠於編簡。本志已於俗例刊汰殆盡，而獨留此何也。是不如取其事實按其門類各附而從之也。此其一。既以大事名，則所記者宜以兩縣

大事爲限，而人疴物異之瑣不當入焉。既以記爲名，則行文宜作記述之體，而分條繫年譜錄之式不宜采焉。且建置沿革志之基礎，不立專編而統以大事記，抑非法也。此其二。自東晉以來城市建置，詳於城廂一篇，有兩京坊巷志之風。然分門類而不分時代，無以見其變遷之迹。此其三。咸同兵亂以後，重興之建築別爲建置一篇，斯亦善矣。而洪楊踞城之日改革諸端，當時見聞較近，乃悉從祛削，終爲遺憾。此其四。

至其特創之例，若古今人譜，若咸豐三年以來兵事月日譜，固見特識。第二十七卷之六朝宮城以下諸圖，並鈎稽精審。文字雅馴猶其餘事，終爲近代良志也。

乾隆句容縣志十卷

光緒庚子縣人楊世沅重刊

乾隆十五年知縣曹襲先修。

據舊序所存有萬歷癸卯知縣茅一桂順治丙申知縣葛翊宸叢大爲二本。其不存于舊序者則弘治間知縣王儔所修也。

句容漢縣，唐初曾置茅州，茅山所在也。宋以來屬江寧府。凡十卷，一輿地，二建置，三山，四古蹟，五民賦，六學校，七秩官，八選舉，九人物，十藝文。其山川古蹟藝文大致皆仙靈之事也。

據楊士沅重刻序謂其家故有乾隆志，嗣毀於火。聞浙江文瀾閣有藏本，假而棄之。棄成譌誤頗多，而原本已送還，僅能據他書撰校勘記略也。

光緒溧水縣志二十一卷

光緒七年知縣傅觀光等修。

其敘曰溧邑志凡六修，前志無傳本，惟乾隆四十二年凌志輯有

成書。攷其餘則嘉靖四年知縣王從善，萬歷七年知縣吳仕銓，順治十二年知縣閔派魯，康熙十五年知縣劉登科，乾隆四十二年知縣凌世御也。

溧水於開皇十一年析溧陽地置。初屬蔣州，唐改屬宣州，嗣復以屬昇州，故明以來隸江寧府。

凡二十二卷，一天文，二輿地，三建置，四封爵，五官師，六賦役，七學校，八典禮，九選舉，十武備，十一至十三人物，十四十五列女，十六至十八藝文，十九名勝，二十二氏，二十一軼事，二十二舊序跋。

中如武備志於兵制以外兼述歷代兵事，實俗例之不可爲訓者。又稱近人多以官而不以名，亦非史法也。

光緒六合縣志八卷

光緒甲申知縣呂憲秋修，卽前任謝延庚稿增訂之也。

按凡例，一縣志一修於宋嘉定中知縣劉昌詩，此其權輿也。其後一修于永樂十七年，一修于成化十二年知縣唐詔，一修于正德十六年知縣林幹，一修于嘉靖三十二年知縣董邦政，一修于萬歷二年知縣李箴，一修于萬歷四十三年知縣張啓宗，一修于順治三年知縣劉慶運，一修于康熙二十三年知縣洪煒，一修于雍正十三年知縣蘇作容，一修于乾隆五十年知縣廖掄升，一修于嘉慶年間。（聞之耆老云）嘉定本久佚，明人本暨劉本洪本嘉慶本皆不傳。今所見者蘇本廖本而已。」

本書凡八卷，一地理志，二田賦志，三建置志，四官師志，五人物志，六選舉表，七藝文志，八兵事考，而以禮俗方技仙釋雜事爲附錄終焉。

本書每篇皆有分纂人姓名，足徵其不苟。兵事考記咸豐二年以來粵寇犯城事，繫年掣目，一覽較然。皆其長處。然方技不入

人物，藝文漫錄陸隴其詩，抑不可解也。

六合爲春秋時棠邑，漢爲臨淮郡堂邑縣，吳志赤烏十三年遣軍十五萬作棠邑涂塘以淹北道，涂卽縣境滁水。蓋南北交爭中重鎮。晉安帝時改堂邑爲秦郡，治秦縣，以秦民所寄也。嗣至開皇中改尉氏爲六合，遂爲定名。初屬揚州，洪武中以隸應天，清代相沿以爲江寧府屬縣焉。

光緒高淳縣志二十八卷

光緒七年知縣楊福鼎屬張裕釗纂。

據前志名氏，正德甲戌知縣頓銳創修，嘉靖丙戌知縣劉啓東，萬歷丙午知縣項維聰，順治丙申知縣紀聖訓，康熙癸亥知縣李斯佺，乾隆辛未知縣朱紹文，先後續修。

高淳在宏治四年始自溧水析置。

書凡二十八卷，一沿革，二建置，三山川，四疆域，五學校，六禮典，七八九賦役，十官師，十一選舉，十二卹典祥異，十三祠廟，十四寺觀，十五古蹟，十六至二十八皆列傳，詩文則已分入諸門。

綜觀全書似鈔輯案牘而成，於賦役志所載諸案宗可見。列傳龐然占全書逾半，名字雜陳，蕪濫極矣。

乾隆蘇州府志八十卷

乾隆七年知府覺羅雅爾哈善等修。

雍正中太倉升直隸州，府所轄者吳長洲元和崑山新陽常熟昭文吳江震澤新舊九縣。今志專載本屬之事。以吳郡姑蘇二志及洪武志爲依據，兼採崇禎初崑山王志堅所纂宦績人物彙，其時蓋擬修志而未就也。

凡八十卷，一分野等，二風俗，三城池，四山，五水，六七水利，八至十一戶口田賦，十二物產，十三至十五公署，十六十七學校，十八軍制，十九鄉部，二十津梁，二十一至二十三壇廟，二十四二十五寺觀，二十六古蹟，二十七至二十九第宅園林，三十三十一冢墓，三十二至三十五職官，三十六至四十選舉，四十至四十六名宦，四十七至六十五人物，六十六藝術，

六十七流寓，六十八至七十二列女，七十三釋，七十四道，七十五七十六藝文，七十七祥異記兵，七十八至八十雜記。其雜記復分類事類典類行類異類瑣類證六門，則殊牽強也。

同治蘇州府志一百五十卷

同治八年知府李銘皖始修，成於光緒七年知府畢保釐。

按王鏊姑蘇志序云，子貢之越絕書，趙煜之春秋，張勃之錄，陸廣微之記，羅處約朱長文之圖經，龔明之輦紀聞記事，則備矣。彙而成書則有范成大盧熊二志。由今而觀，范志峻而整，盧志詳而瞻，而其間亦不能無異同焉。一明以前尙矣，明志見於本志所錄諸序中者，則有洪武十一年知府李亨嘉之蘇州府志，成化十年劉昌之姑蘇郡邑志，正德元年王鏊之姑蘇志，及康熙三十年知府盧騰龍乾隆十三年知府覺羅雅爾哈善道光三年

知府宋如林之各志。

據銘皖自序稱請中允馮桂芬司總纂之任。馮氏於學無所不貫，及門多淹雅之士，因是彙萃羣賢，采訪修輯，殫心竭慮，各盡所長。於同治年開局，至十三年夏將及成書而馮氏遽歸道山。其歷事之難如此。觀其所訂凡例，於康乾道三志頗能擇善而從折衷至當。如所舉人物不強判標題而統爲分縣序代，各傳必以正史爲主而旁參他書，田賦科則統排爲表而使閱者一目瞭然，誠爲精蘊。其舉前志之失，如道光志於藝文之外別立集文集詩二門，又其按語全襲舊志原文，亦皆篤論也。

全書一百五十卷，一星野，二疆域，三風俗，四城池，五坊巷，六七山，八水，九至十一水利，十二至十九田賦，二十物產，二十一至二十四公署，二十五至二十七學校，二十八軍制，二十九至三十二鄉都，三十三四津梁，三十五古蹟，三十六至

三十八壇廟，三十九至四十四寺觀，四十五至四十八第宅園林，四十九至五十一冢墓，五十二至五十八職官，五十九至六十七選舉，六十八至七十三名宦，七十四至一百八人物，一百九一百十藝術，一百十一一百十二流寓，一百十三至一百三十三列女，一百三十四三十五釋道，一百三十六至一百三十九藝文，一百四十至一百四十二金石，一百四十三祥異，一百四十四至一百四十九雜記，一百五十舊序。凡爲類三十三，皆分屬名手爲之，如順天府志之例也。

其中稍有泥古而不知變之處，如風俗篇云吳謂善伊爲稻緩，謂來爲釐，相謂曰儂，謂中州人曰儉，此直以上古至六朝之方言并爲一談。又如坊巷篇亦以坊巷之坊與坊表之坊并爲一談。皆乖於名實。沿訛襲謬不知通變，要之全書警策在雜記六卷。所采吳中事實既較舊志爲富，尤可當地方史之目而無媿也。錄其

兩事以概其餘。

太湖中六桅漁船之製不知其所自始，或云是范大夫移家具。船身長八丈四五尺，而梁寬一丈五六尺，落艙深丈許，中立三大桅，五丈者一，四丈五尺者二，提頭一桅三丈許，梢桅二皆二丈許，以四船相聯爲一帶，而以梢桅分左右爲雌雄。其造船在胥口之下場灣西山之東村五龍橋之蠡墅光福之銅坑，其造篋篷簷纜在衝山。其人以水面作田地，以網罟代耰鋤，以魚鱉爲衣食。其父子兄弟食粗衣惡，無膏梁紈綺之費，其母妻子女椎髻操作，無金珠首飾之費。其冠婚喪祭無繁文。一年十二月候風暴行船，其禱神之詞有大樹連根起小樹著天飛之句……。

蘇城閭門有孫春陽南貨鋪，天下聞名，鋪中之物，亦貢上用，案春陽甯波人，明萬歷中年甫冠，應童子試不售，棄舉子

業來吳門，開一小舖，在今吳趨坊北口。其地爲唐六如讀書處，有梓樹一株，其大合抱，僅存皮骨，尙舊物也。其舖如州縣署有六房，曰南北貨房，海貨房，醃臘房，醬貨房，蜜餞房，蠟燭房。售者由櫃上給錢，取一票自往各房發貨。而總管者掌其綱。一日一小結，一年一大結，自明至今已二三百四十年。子孫尙食其利，無他姓頂代者。吳中五方雜處，爲東南一大都會，百貨雲集，何啻數十萬家。惟孫春陽爲前明舊業，其店規之嚴，選製之精，閩郡無有也。

乾隆吳縣志一百十二卷

乾隆十年知縣姜順蛟修，海寧施謙纂。

前有知府雅爾哈善序曰，一明嘉靖間邑人楊儀部循吉與宰蘇祐創稿八萬餘言，凡十六卷。文雖簡易，其於尊賢訂古亦有所長

。歷一百十四稔而至崇禎壬午，舊令牛若麟孝廉楊維斗廣爲五十四卷。較前稍備，然時值喪亂未經潤色。又載筆者爲邑諸生王煥如，蒐羅雖富，惜失之雜。又五十餘年而至康熙辛未山陰張令某重爲纂輯，（按所錄舊序則是年有縣諸生孫珮所纂也）歷十有六年始增六卷，視牛志較簡，又失之誣。一蓋垂六十年而有是志。又自云一凡披閱羣書三百餘種，冗者汰十之三，闕者補十之五，不半載而脫稿一百十有二卷也。一其目略爲一建置沿革，二分野，三疆域，四五山，六水，七城池鄉都，八市鎮橋梁，九坊巷，十戶口徭役，十一至十五田賦，十六至二十一水利，二十二古蹟，二十三物產，二十四風俗，二十五六祥異，二十七吳世家封爵，二十八世族，二十九官署，三十學宮，三十一書院義學，三十二倉庾郵舖驛站，三十三至三十六職官，三十七八宦蹟，三十九師儒，四十兵防，四十一弭變，四十

二至四十七選舉，四十八武科，四十九封蔭，五十人物（先賢），五十一至五十四人物（名臣），五十五六人物（忠節），五十七八人物（循良），五十九人物（能吏），六十人物（儒林），六十一至六十三人物（文苑），六十四人物（武略），六十五人物（孝友），六十六七人物（卓行），六十八人物（隱逸），六十九人物（流寓），七十人物（好義），七十一人物（游俠），七十二至七十四人物（列女），七十五人物（藝苑），七十六人物（方術），七十七人物（釋氏），七十八人物（老氏），七十九人物（工役）八十壇壝，八十一二祠廟，八十三第宅，八十四園林，八十五塚墓，八十六至八十八僧坊，八十九道觀，九十至九十二雜記，九十三至一百十二藝文。

吳中故事之尤要者，曰水利，曰田賦。志於水利則備錄前代章奏文移，於田賦則備錄前代歷年詳定會計經賦等冊，皆使讀者

能自尋其脈絡。其於明代重賦之原述之如下。

一按官田者皇莊也，國家取之於佃戶，佃戶輸之於王府者也。此租也，非稅也。後乃編於額征以爲取民之制，其端作俑於宋徽，效尤於元季，開登於張士誠，而洪武永樂遂定爲常制也。宋宣和元年，浙西平江諸州積水新退，募民耕種，官收其租，故名曰官田。既而高寧理宗相繼效之，凡籍沒蔡京王黼韓侂胄等權貴之田盡減其額募民耕種，此官田之所自始也。元朝賦額其始亦輕，因有籍沒宋室官田，未曾革除其弊，亦募民耕種，故延祐間定賦以蘇之三十六萬者變而爲八十八萬也。及張士誠據吳，志在良田美宅，征賦無度，一時所置田產徧於蘇松。明祖并天下，用兵於張士誠者獨多，故因恨士誠而移恨蘇松。乃以籍沒士誠部下之產并前此所籍沒宋元與後此所籍沒富民沈萬三輩之產概名之曰官田，悉照租額

定稅。於是蘇州賦額向增至八十八萬者忽加至二百八十餘萬。建文卽位，詔除其罰，永樂盡反建文之政，浮糧之豁免者亦在所反之中。而吳民之困於重賦至此愈烈矣。一

又吳中地志之書有不得不記載繁縷者，曰水名曰鄉制，大抵吳中以某鄉某里管都若干某都領團若干。此其異於北方者也。自餘市鎮坊巷亦無不繁於北方，故讀志者動感如閱簿籍之苦。

至其體例有可商榷者，卷二十七有吳世家，誠是也。然孫策楊行密錢鏐張士誠之流皆於吳地關係深切，尤不得略也。卷二十八有氏族志，亦誠是也。然詳其受姓之由，詳其著稱之人，尤當著其聚居之地與夫去來遷徙之故也。卷二十三有物產志兼及工藝亦誠是也。然工藝宜舉其特殊者而一一記其業務狀況，不得徒列名目也。

具區志十六卷

康熙己巳翁澍撰。其凡例云，蔡景本編集太湖志十卷，王文恪節取其十七，釐爲八卷，名震澤編。今合二書參酌增損而成也。其所列引用書目，或舉篇名而不舉全集，或舉書名而不舉撰人。蓋翁氏本文人，非作意著述者也。

太湖備考十七卷

乾隆庚午金友理撰。

其凡例以爲太湖古無專書，有之自蔡景東太湖志始，繼之以王守谿震澤編，又繼之以翁季霖具區志，大抵詳於名勝而略於經濟，詳於湖中而不及湖外之地。自云非履地細核，徒以舊志爲據，不能無誤。爰乃泛舟於湖沿三府十邑之境一一訪求。既履

其地，復參以書。爲卷十有七，爲類三十，一太湖，二沿湖水口濱湖山，三水治水議，四兵防湖防論說記兵職官，五湖中山泉港濱都圖田賦，六坊表祠廟寺觀古蹟第宅園亭塚墓風俗物產，七選舉鄉飲，八人物，九列女，十十一集詩，十二十三集文，十四書目災異，十五補遺，十六雜記，而附以湖程紀略。

太湖跨蘇常湖三府之地，分隸兩省。其沿湖郡縣各自爲志不能觀其會通。故必以湖爲主幹，而形勢大綱可挈也。志先疏太湖及諸水之名，次記水口，次記濱湖之山，次記治水之政及諸論議，次記兵防兵事，次第殊爲清晰。惟職官以後忽又述及湖中山及都圖地名等，頗覺凌雜耳。然綜觀全體，語必徵實，抉擇精當，要爲地志之良。

末附吳曾湖程記略，則吳氏與金氏同游之日記也。

玉峯志三卷

光緒壬寅東倉書庫刊

宋淳祐壬子知崑山縣項公澤修，陽羨凌萬頃陳留邊實纂。

是書曾見阮元擘經室外集四庫未收書目提要。其言曰，一玉峯志三卷玉峯續志一卷宋凌萬頃邊實同撰。萬頃字叔度，景定三年進士。本陽羨人，因其父壻於崑山顏氏因家焉。邊實陳留人。其高祖始遷崑山，詳前志邊淳德傳，而續志又復爲自序一篇誇其家世。玉峯本崑山地，宋南渡時始析爲縣，卽今之嘉定是也。志中所載沿革風俗以及人物古蹟甚悉。宋元時崑山志乘世多不得，是冊足備一方之文獻也。一

今按書凡三卷，上曰起例縣境圖縣郭圖馬鞍山圖沿革縣境地理四至八道鄉鎮城社山岡墩墟水風俗戶口學校坊陌橋梁營寨，中曰公宇稅賦課利官租縣令題名名宦進士題名人物世族，下曰古

蹟古事土產封爵寺觀祠廟園亭異聞。

觀其次第凌瑣，想見筭路經營但爲劄記之體，非著作也。又所叙列多以古傳說與今實事參並，亦其違失。然所載全境塘浦溼港之名，戶口比較之數，學校之租額，酒課及役錢坊名錢之支配，以及風俗物產之殊異，皆非架空之談。頗足使南宋人生活狀況儼如目接。眞宋志之可珍者也。

續志爲邊實所撰，自云將以釐前誤而紀新聞，其亦實事求是之意也。

至正崑山郡志六卷

光緒壬寅東倉書庫刊

元至正四年楊維禎序，州人楊謙撰。

元貞二年升縣爲州，故名郡志。楊序稱二十二卷，今止六卷。此本爲錢大昕手校加跋者。

其第一卷曰風俗山坊園亭冢墓古蹟，第二卷曰名宦封爵，第三卷曰進士，第四卷曰人物，第五卷曰人物釋老，第六卷曰土貢土產雜記異事。

迹其文字似即以玉峯志爲藍本而加詳，然條理整齊彌不如玉峯志，意者楊廉夫所見之二十二卷爲完本，今則其碎金歟。崑山慧聚寺塑像相傳爲楊惠之筆，自龔明之中吳紀聞已有記載，本志記之尤詳。

光緒崑新續修今志五十二卷

光緒六年崑山知縣金吳瀾等修。

按所錄舊序，宋凌萬頃邊實有玉峯志，玉峯續志。元楊譔有崑山州志。明初范能季篋等有崑山志。景泰中縣人蔣明復有新志，曰蔣志。其後監察御史顧孔昭輯者曰顧志。本志於前志源流

皆未暇考。蓋兵燹之後遺籍散亡故也。

雍正二年分縣立新陽，於是乾隆十五年知縣鄒召南張予介等修合志，道光元年國子監典簿王學浩繼修之。

凡五十二卷，一星野等，二山水，三官署等，四學校，五水利，六七戶口田賦等，八物產等，九橋梁，十壇廟，十一寺觀，十二十三古蹟等，十四十五冢墓，十六職官，十七至二十選舉，二十一名宦，二十二至三十五人物，三十六至四十五列女，四十二耆壽，四十三至四十八藝文，四十九五十著述，五十一祥異，五十二雜記。

康熙常熟縣志二十五卷

康熙丁卯知縣楊振藻修，縣人錢陸燦纂。

據凡例，一舊志自宋令鮑廉撰於寶祐間，分類爲十，成十五卷

。元盧知州鎮修之，即今琴川志是也。其所紀止於宋代而有元百年間人物掌故盧復編有續志。明初張修撰洪更輯新志八卷。惜皆不傳。自後桑通府瑜任著述於弘治之世，鄧孝廉韜管孝廉一德遞載筆於嘉萬之間。茲者因桑志者十五，因鄧管志者十三云云。一

今盧鎮序云，一琴川志自宋南渡後版籍無存，其後慶元縣令孫應時嘗粗修集，迨嘉定庚午縣令葉凱始廣其傳，至淳祐辛丑鮑廉又加飾之。一而盧鎮之書有金華戴良序，此皆可記者也。

凡二十五卷，一建置沿革分野疆域，二山水，三城池官署，四學校祠祀，五鄉鄙市鎮坊巷橋梁，六水利戶口，七八田賦，九徭役稅課風俗物產，十官師年表，十一選舉年表，十二封贈恩蔭監仕椽仕兵防，十三壇廟寺觀，十四古蹟第宅陵墓，十五宦績，十六至二十二人物，二十三至二十五藝文。

本志之作蓋以應當時修一統志之徵集，自云遵奉頒通志之式，故體裁歸於雅正。然如祥異列於疆域之前，古蹟別於山川名勝第宅園林之外，人物既有邑人總目，復分忠節循吏等門，皆不思之甚者。

常熟在晉爲晉陵南沙縣，梁大同六年改今名，唐初隸潤州，後改隸蘇州，明以來因爲蘇州府屬縣。

雍正昭文縣志十卷

雍正九年知縣勞必達修。

昭文自雍正二年析常熟置縣，爲期甚短，故可紀之事無多。大抵秩官選舉二表斷自立縣以後，其他則常昭並載，詳略互見。凡十卷，一沿革等，二官署等，三水利，四田賦等，五至十列傳。

縣名昭文者，蓋取言子鄉里昭明讀書處也。

嘉慶常昭合志

光緒二十四年縣人季亮時丁祖蔭刊

嘉慶二年知縣王錦等修，言如泗等編纂，邵齊燾孫原湘亦與同纂之役。

雍正四年分常熟立昭文，故從來惟有常熟縣志。其歷修姓氏彙錄如左。

宋慶元丙辰

知縣孫應時

嘉定庚午

知縣葉凱

淳祐

知縣鮑廉

元至正癸卯

知縣盧遠

明宣德甲寅

知縣郭南

宏治丙辰

知縣楊子器

嘉靖己亥

知縣馮汝弼

萬歷天啓間

知縣管一德

有文獻志十六卷

知縣龔立本

有志十五卷

知縣姚宗儀

有志二十八卷

知縣陳三恪

有海虞別乘十卷

清康熙癸亥

知縣高士鶴

康熙壬辰

知縣章曾邱

雍正辛卯修常熟縣志

知縣李惟一

是年並修昭文縣志

知縣勞必達

凡十二卷，一各圖等，二水利，三戶口等，四公署等，五壇廟等，六職官等，七選舉，八九十人物，十一十二藝文等。

卷首載乾隆四十四年依閔鶚元奏剗削錢謙益屈大均金堡等詩文事蹟諭旨一道，及三十一年傅康安等奏嚴禁私修志書一摺稱「

今據浙江巡撫熊學鵬具奏以遂安縣志侈陳毛一鷺政蹟嘉興府志曲諱虞廷陞附黨，是非倒置。又蕭山縣志極詆嘉靖問學道陳大綬貪酷種種，而大綬督學以清節著聞，所載悉屬顛倒。已飭地方官分別核實刪除等因。查毛一鷺虞廷陞俱名麗闈黨，載在欽定明史，人所共知。陳大綬名不著於史傳，考國監題名碑大綬係萬歷乙未科進士江西浮梁縣人，是該縣志所稱嘉靖時事顯係誕妄無稽。該志當即爲改正刪除以期核實。但據奏請責成學臣於按臨各郡後取該處志書與地方官論辨考核，將刪除條目若干咨明督撫會同奏聞之處，臣等竊思學臣按臨考試情形不同，有因地方遼闊考畢逾行者，有因試卷繁多日不暇給者，若必責令於按臨後考核勢必是處逗留，公事轉多遲悞。查各省向例原有於學臣蒞任時呈送志書之事。應令學臣不拘時日，悉心考核，遇有實在是非倒置者，即飭令地方官刪改，仍咨明督撫會同辦

理。其有現在修輯之志書亦令學政查核再行刊刻。至該撫又請地方官有欲重修志書及添造者悉令預爲詳報，仍將所修之書申送學臣會同督撫核明具奏，候旨發回然後准其刊佈等語。查鄉曲之書，多有見聞固陋紀載疏蕪，無論不足進呈御覽，且一統志現在奉旨增修而各省通志俱經奏定，已足奉爲傳信。不必於偏隅小邑另立條教，轉致紛繁。至該撫又稱纂修志書向係地方官捐資辦理，不得借端派費有累士民之處。查有司養廉所以辦公，若責令捐賞，勢必掣肘。至修書原係地方公事，如或紳士自行經理編纂付梓，亦所弗禁。但不得勒派，致滋擾累。倘有官吏借端苛派，應令該管上司嚴查參究可也。乾隆三十年二月十八日題，十九日奉旨依議。一此二事皆有關志乘之掌故也。

光緒常昭合志稿四十八卷

光緒甲辰知縣鄭鍾祥等修，編修常熟龐鴻文等纂。其日志稿者

，以定例各州縣志書須由地方官轉呈學政查核方准刊行，故暫用活字排印以代寫官也。

據其所引纂修人名之多，足知全出鄉紳之手。其凡例云，「采訪事蹟不能執塗人而問，是以辛丑春夏之交即在海虞試院邀集同人設局廣發告白，原冀各抒聞見博采兼收，四五年中來告者殊尠。」以本地之人輯本地之史，尙不肯合羣力以赴之。常熟文獻之邦如此，他處彌復可知。修志之難有如是矣。然以較嘉慶志，則擴充彌富也。

凡四十八卷，一疆域，二山形，水道，四城垣，五市鎮，六風俗，七戶口，八都圖，九水利，十田賦，十一錢糧，十二蠲賑，十三官廨，十四學校，十五壇廟，十六寺觀，十七義舉，十八兵制，十九職官，二十選舉，二十一名宦，二十二至三十三人物，三十四至三十九列女，四十游寓，四十一方外，四十二

第宅，四十三冢墓，四十四藝文，四十五金石，四十六物產，四十七祥異，四十八軼聞。

其中人物類復具載藏書彈琴家兩種，可謂得因地制宜之善。末附總叙一篇，於前志源流述之極詳，精心之作也。

光緒吳江縣續志

光緒五年知縣金福曾等修。

據凡例，「前沈彤志修于乾隆十一年，今志續沈彤之後，斷自十二年始。」又云，「續志體例一遵沈志，然如前志界域山水形勝鄉都圖圩鎮市村田蕩之類無可續，風俗亦然。」又云，「燈捐爲軍興以來一大政，本擬別纂爲篇，一時權宜非經常之政。」識斷凡近，專以輯補爲事，非所語於著述矣。

乾隆震澤縣志三十八卷

乾隆十一年知縣陳和志屬編修縣人倪師孟撰。

震澤自雍正三年分吳江之半而設，故無沿革可言，然本書通例中所載舊志名目可資考証也。其言略曰，舊吳江諸志之典核可信者有四。一莫志，明成化中莫旦所纂也。一徐志，嘉靖中徐師曾所修也。一葉志，康熙中葉燮所修也。皆有刊本通行至今。一史志，成化中史鑑所輯也。僅有寫本。四志之外有不甚典核而稍可采者亦四。一董志，董爾基續徐志者也。爾基又有儒學志，并纂於順治中。一屈志，屈運隆所修與葉志同時刊。一錢志，錢霑續葉志者也，修于康熙之末。今所纂以莫徐葉三志爲基本而史董屈錢五志輔之。諸志之外，有周永年之松陵別乘潘檉章之松陵文獻集朱鶴齡之松陵文徵。益以周廷諤之吳江詩

粹小傳錢雲之江震人物志，亦有被采者焉。

本書唯列子目而無志表傳之分，其通例所謂有定例而無定體也。然卽以類相從亦終嫌凌碎。大致卷一爲沿革，二爲水，三以下爲疆域建置，十一爲田賦，十二爲官制，十三十四爲選舉表，十五十六以下爲名臣等傳，二十四爲別錄，二十五爲崇尚禮儀生業，二十六爲節序語音，二十七爲禎祥災變，二十八至三十爲治水，三十一爲書目，三十二以下爲詩文，三十七三十八爲古蹟舊事異聞。

大抵采用舊志，擷長去短，下筆不苟，其苦心殊不可沒。然有叙述稍略者，如吳江震澤二縣同城此語未見於界域篇中，是也。有分析未當者，如建置諸篇業已備詳古有而今廢之一切建置，復於篇末重出古蹟一門，僅得寥寥數條，是也。然其中有一例爲急宜表彰者，則所創之生業一門也。歷述農蠶漁業之概況，

上稽史乘，旁及詩詞，原原本本，語皆徵實，可當地方社會史之目。章氏永清志而外未能多見也。錄其言絲價一條如左以見一斑。

按史冊黃溪志，明嘉靖中綾紬價每兩八九分，絲每兩二分，康熙中紬價每兩一錢，絲價尙止三四分，今紬價視康熙間止增三之一，而絲價乃倍之，此業織紬者所以生計日微也。據江蘇詩徵小傳，師孟原籍歸安，雍正元年進士，曾典蜀試，性恬淡不務馳逐云云，則固鄉里負時望者也。

盛湖志十六卷補四卷

里人仲廷機撰，蓋同治末葉所成也。其志補則其子虎騰光緒庚子所輯。

盛湖者，謂吳江縣治東南六十里之盛洋鎮，與烏程相接，吳越

間之秀區也。據凡例，盛湖志始於明卜夢熊，久佚。順康熙三朝，支氏之祖沈洙樞周需相繼修之。

嘉慶黎里志六卷

嘉慶乙丑里人徐達源撰。

黎里在江蘇吳江縣之西南四十五里，唐陸龜蒙築別業其間。其後宋魏憲趙礪老元楊嵐明尹寬莘名人接踵，故雖小而故實則豐。東南大鎮，土壤富而民居稠。本書洪亮吉序云，一於西北可比大縣，於東南則中下縣或有不及焉。民居戶籍既繁則風氣亦日開，文采亦日盛，人物軒冕，亦遂擅於東南。推之而園亭祠宇藝文金石皆可各立一門。此而不及今條記之，則後此者將何所考焉。一誠哉是言也。

徐氏之撰是志也，自言少時卽喜人談里中往事，間有所聞輒筆

於書，及長閱新舊縣志，與黎里有關涉者，不滿三數頁，心竊陋之，因錄舊聞博采掌故，閱歲成書，十有六卷。一沿革等，二形勝等，三祠廟等，四古蹟等，五寺院，六墓域等，七八九人物，十十一列女，十二雜錄，十三至十六藝文。

鄉里之志人物，宜不復強爲品目矣。本志於人物之外別出雜錄一門，兼載里巷善人畸行。其出彼入此之故安在。適以見其體例替亂而已。

光緒黎里志十六卷

光緒二十三年里人蔡丙圻撰。其體例蓋一依前志，不稍踰越。惟第三卷增紀兵一篇，略存咸同間兵事，爲可取耳。

光緒周莊鎮志六卷

光緒八年鎮人陶煦撰。

周莊鎮者，或曰貞豐里，西北去蘇州六十里，隸江蘇元和縣，其西偏兼隸吳江。相傳爲宋迪功郎周君收穫設莊之所，故名。初係村落，自金二十相公和隨宋高宗南渡，僑居於此，人煙漸密。元季沈萬三秀之父裕田由湖州南潯鎮徙居東坨，始闢爲鎮。前明遷肆於後港，鎮西多墳墓，鮮民居，康熙間東西二柵俱成闌圍，而後港寥落矣。

據其凡例，向有章騰龍貞豐擬乘成於乾隆癸酉，至嘉慶戊辰始得陳總增輯付梓。陶金梭撰周莊志亦止於乾隆甲申，且未脫稿，吳中區區一鎮，其沿革之長有如是者。

凡六卷，卷一界域水道勝跡物產，卷二公署第宅橋梁，卷三祠廟冢墓，卷四風俗人物，卷五列女流寓釋道，卷六雜記。

鄉鎮之志，耳目易周，故擿擻敷衍之弊較少。本書各門惟物產風俗仍不免以恒言鋪砌成篇，又勝跡門仍繪八景，皆未全脫方

志銅習。餘皆翔實可誦。尤以第宅一門足紀故家喬木之迹彌可爲修志取法之資。歷來諸志於公署學校等齟纴不休，而私家建築多不措意，固是一病也。

周莊爲沈萬三故里，萬三固元明間吳中一奇人，亦吾國經濟史上一段重要公案也。本書第宅門云，「當時人烟所萃，惟嚴字一圩。其東南隅曰東垞，萬三住宅在焉。西北半里許卽東莊地及銀子浜倉庫園亭與住宅互相聯絡，其巨富氣象猶可想見，然亦僅中人制耳。楊循吉蘇談載萬三家在周莊，破屋猶存，不甚宏大，可知萬三里居並無豪侈之蹟。」人物門於萬三傳引吳江青浦兩縣志及挑鐙集異近峯聞略七修類彙，雜記門又引吳江縣志湧幢小品諸書，固可視爲萬三集傳也。

嘉慶松江府志八十四卷

嘉慶二十三年知府宋如林修，倉場侍郎會稽莫晉山東督糧道陽湖孫星衍臨江府知府山陰朱濂同總纂。

按卷末舊志考得左列各種。

雲間志三卷

宋紹熙四年知華亭縣事楊潛等纂

嘉禾志三十二卷

宋嘉定間嘉興府知府岳珂修
慶等重修

元至元戊子秀州經歷覃

松江郡志八卷

元大德己亥松江府知府張之翰修

續松江志十六卷

元至正十七年華亭錢全孫修

新志三卷

明永樂間松江府學訓導魏驥修
正統間教授孫鼎增刊

雲間通志十八卷

明成化九年郡化人錢岡修

松江府志三十二卷

明正德壬申郡人顧清修

松江府志九十四卷

明崇禎辛未知府方岳貢修

松江府志五十四卷

清康熙二年知府郭廷弼修

松江府續志稿

清康熙二十年知府魯超修

自郭志後一百五十年而始有是作也。

凡八十四卷，一至六爲疆域志，七至十二爲山川志，十三至十九爲建置志，二十至二十九爲田賦志，三十至三十二爲學校志，三十三至三十五爲武備志，三十六至三十九爲職官表，四十至四十三爲名宦傳，四十四至四十八爲選舉表，四十九至六十爲古今人傳，六十一爲藝術傳，六十二爲寓賢傳，六十三爲方外傳，六十四至七十一爲列女表，七十二三爲藝文志，七十四至七十九爲名蹟志，八十爲祥異志，八十一至八十四爲拾遺志。

其名宦傳及古今人傳依時代而分，列女傳則於時代縣屬之外兼分完節義烈貞孝賢淑才女五類，斯固具區別之微指。若名蹟志

於寺觀第宅園林冢墓以外復有古蹟，則仍乎疊牀架屋之弊習而已。然其整贖固有餘也。

唐天寶中始置華亭縣，初屬蘇州，繼屬秀州，元至元中始升爲府，明洪武改屬南直隸。大抵自朱清張瑄張士誠以來，始爲東南財賦隩區矣。

光緒松江府府續志四十卷

光緒九年知府博潤修。

咸豐之亂，松滬一隅支拒最久，被禍最烈。鄉區之變置，財賦之蠲省，人物之耗亡，名蹟之毀滅，端宜有以繼前作也。凡四十卷，門類並如前。宋志所已有者不踵列也。

光緒華亭縣志二十四卷

光緒四年知縣楊開第撰。

縣志最古者曰紹熙雲間志，紹熙癸丑知縣楊潛所修也。正德庚辰有知縣聶豹志，縣人孫文簡公承恩爲序。（凡例云創自孫文簡公，蓋未考孫序也。）及乾隆辛亥而有知縣鄭濂志，據凡例云，一正德志已佚，乾隆志亦僅有存者。而乾隆志記載謹嚴，或議其略。今據明顧文僖公府志國朝郭太守廷弼府志魯太守超府志稿及邑人王廷和縣志殘稿以補之。至乾隆後事蹟則據宋太守如林府志以增之。一

然檢其凡例所列更定前志體例，殊不盡當。如前志紀行宮於宮室類之首，以第宅園林次之，而又附以寺觀古蹟。今別出寺觀列入方外，而改宮室爲名蹟類。其實寺觀多屬名蹟，與其畫爲方外，轉不如統於宮室之爲愈。又如前志兵燹祥異軼事各爲一類，今並改入雜志，其實兵燹關於一邑廢興之故甚巨。漫云雜志，固非法也。

凡二十四卷，一疆域，二建置，三水利，四海塘，五學校，六祠祀，七八田賦，九鹽法，十兵防，十一職官，十二至十九人物，二十藝文，二十一名蹟，二十二方外，二十三四雜志。

乾隆婁縣新志三十卷

乾隆五十三年知縣謝庭薰修，上海陸錫熊纂。

順治十三年始分華亭之西南境置縣，取漢婁縣名名之。謂之新志，明創始也。自來同城新立之縣斷限最難。本志凡例云，一切紀載皆覈其繫於婁地者書之，以明斷限。至科第人物尤多錯互。今用土斷之法，一以婁產爲據。一又云，一凡地志多因襲增修，而婁獨創始，故用力較艱。華亭既未有新志，明代舊本尤極蕪陋，今所據者惟顧陳郭三府志，而自康熙改元以來又及百年，久未修輯，文獻無徵，莫此爲甚。一其成書之難蓋如

是也。

書凡三十卷，一沿革志，二建置志，三疆域志，四五山川志，六七民賦志，八學校志，九軍政志，十祠祀志，十一食貨志，十二藝文志，十三四名蹟志，十五祥異志，十六官師表，十七八選舉表，十九名宦傳，二十至二十六人物傳，二十七藝術傳，二十八九列女傳，三十流寓傳。

綜觀全書，於星野一門祛而不立，詩文浮詞多從刊汰，人物不分門目，圖繪分繫各篇，皆勇於攻俗之舉。陸氏豫聞四庫編纂，宜其具卓識也。

光緒婁縣續志二十卷

光緒戊寅知縣程其珏修，踵乾隆謝志而作也。據凡例云，「其體例悉依前志，經前志編入者不贅，間有所遺，量爲補纂。」

故其目次略殊于前志。曰宸翰建置疆域水利民賦學校軍政祠祀藝文名蹟祥異兵事官師選舉人物藝術列女流寓方外，凡二十卷。

光緒奉賢縣志二十卷

光緒四年知縣韓佩金修，卽選訓導南匯張文虎纂，以奉巡撫吳元炳令修省志而作也。

縣舊隸華亭，嘉靖開築城備倭，名青邨堡，雍正四年析華亭地建縣。相傳言偃嘗至其地，故曰奉賢。乾隆二十年知縣涂擴因華亭舊志而成書，其書有陳祖范序，今附本書卷尾也。

書凡二十卷，一疆域志，二建置志，三賦役志，四水利志，五學校志，六祠祀志，七官司志，八營汛志，九選舉志，十至十三人物志，十四至十六列女志，十七藝文志，十八遺蹟志，十

九風土志，二十雜志。

其時風氣尙未大開，本書居然闢分野之謬而削去之，此蓋文虎通西學之故也。其他賦役水利等篇亦極精詳，而雜志篇錄存故實尤夥。

光緒金山縣志三十卷

光緒四年知縣崔廷鏞繼前任龔寶琦修。緣有續修江南通志之舉也。崔氏序云，金山舊未有志，乾隆十六年知縣常琬始修，道光間縣人姚訥錢照泰又續修之。

其凡例云，舊志之類三十，姚訥續修稿仍因之，錢照泰重印稿，爲表四爲志八爲傳十二，茲仿其例稍加增損分合乎其間。凡表之屬四，曰沿革疆域職官選舉，志之屬八，曰山川建置賦役名蹟學校藝文武備志餘，傳之屬十二，曰名宦仕績儒林文苑孝

友忠節義行隱逸藝術游寓方外列女。較之俗例似爲整鍊。然兵事謂之武備志亦未允協。又志餘遺事頗多重要故實有宜入各傳者，名曰志餘亦非是也。雍正二年始分數縣南境立金山縣，卽明金山衛，沿海五十九衛之一也。乾隆二十四年以衛城地僻，改建朱涇鎮，故縣遂無城。

道光川沙廳志十二卷

道光十六年同知何士祁修。

川沙之築城堡自嘉靖三十二年始，其以清江董漕同知海防清軍同知移駐於川沙也，在乾隆二十四年，割上海南匯兩縣地爲撫民同知在嘉慶十年，劃界分轄在十五年，士祁始詳考上南兩志草創爲十二卷。

凡十二卷，一疆域志，二三建置志，四田賦志，五水利志，六

武備志，七官司志，八九十人物志，十一十二雜志。
卷末附分隸原案，蓋自明中葉倭患熾時已爲海防要地，讀所輯之舊事，猶想見血戰之苦也。

光緒川沙廳志十四卷

光緒五年己卯同知陳方瀛修。

嘉慶十五年始析上海東境南匯北境置，故無史蹟之可言。

凡十四卷，一疆域，二建置，三水道，四民賦，五祠祀，六兵防，七職官，八名宦，九選舉，十人物，十一列女，十二藝文，十三名蹟，十四雜誌。

乾隆上海縣志十一卷

乾隆四十九年知縣范廷杰屬桐鄉皇甫樞編纂。

按歷修姓氏洪武間縣人戶部侍郎顧棻草創志稿，宏治十七年知縣郭經嘉靖三年知縣鄭洛書萬歷十六年知縣顧洪範三次修。康熙二十二年知縣史彩葉映榴乾隆十五年知縣李文耀二次修，以至于今。

據其凡例則體例一仍康熙志而補其缺。凡十二卷。一分野疆域等，二水利，三四田賦鹽法，五徭役戶口等，六城池兵防，七官署等，八歷官表宦績，九科貢表等，十名臣等，十一藝文兵燹，十二祥異遺事。

宋末置上海鎮立市舶提舉司，至元四十九年割華亭立縣。嘉靖二十一年割西鄉設青浦縣。雍正三年仍以過大割浦以東爲南匯縣。

縣自宋以來已爲通商要地。自海關設立，（康熙二十四年）凡遠物質遷皆由吳淞口進舶黃浦城東門外。舳舻相銜，帆檣櫛比，

不減儀徵漢口。(卷一)雍正三年蘇松太道監收海關，且移駐於此。然康熙二十九年題定每年徵解銀二萬餘兩，乾隆十四年奉旨海關正額盈餘悉照雍正十三年例額解銀六萬兩。其始也不過如此，道光二十三年五口通商設新關而後規模巨矣。

嘉靖以後爲防倭要塞，兵防兵燹兩篇詳焉。水利篇備錄宋明以來治水之策，田賦篇備錄明代賦額名目及均徭項下官署供應名目及順治九年以後奉裁情形，皆難得之史料。惟風俗列疆域之後，兵燹列藝文之後，似稍失次。

同治上海縣志三十二卷

同治十年蘇松太道應寶時屬俞樾方宗誠撰。書成之後，復屬馮桂芬稍加釐訂。

據應序，縣志創于明洪武間顧暄，宏治間郭經成之。其後鄭洛

書顏洪範史彩李文耀范廷杰重修者五，而嘉慶十七年李林松復爲編輯，是爲嘉慶志。既成，縣人陸慶循著嘉慶志脩例一卷以訂其失。

本書蓋以嘉慶志爲主。凡云前志卽嘉慶志也。又咸豐十年知縣劉邵膏得鄭志，延寶山蔣敦復作沿革及列傳若干卷。本書之沿革表卽以蔣本爲之。皆見凡例。

其體例則略取嘉慶志而調停陸氏之說。分門二十，首圖說，次疆域，次建置，次水道，次田賦，次物產，次學校，次祠祀，次兵防，次職官，次選舉，次人物，次藝術，次游寓，次列女，次藝文，次名蹟，次雜記，而以舊序終焉。

詳觀是書，語皆核實，較勝舊志多矣。就中如風俗一門論前明習尚，而引史志云，「明季搢紳多收奴僕，世隸之邑，幾無王民。然主勢一衰，甚有占主田產抗主貨財轉獻新貴因而興訟者

。有司亦惟力是視而已，復奉功令紳士自好積弊已清，而子孫世隸者未之改也。一此種蓄奴之風，亦明季南方社會一異象，散見私乘者頗多。本志能注意及此，可云精識矣。

董家渡徐家匯教堂附載寺觀之後，自云仿日下舊聞考之例，此已勝於舊志之疏略。然租界之建竟無一語及焉。其教堂條下按語云各國租地造房界址附見闕權下，檢之亦殊不見。

雜記篇中之遺事一門，實有應分入各門者。例如所引農政全書諸條應入物產，所引尊鄉漫筆諸條應入風俗之類，是。

本書成後，縣諸生秦榮光復仿陸慶循修例之舉作同治上海縣志札記。博摭羣書，鉤稽字句，補遺訂誤，至六卷之多。其糾本書之失最顯者，厥惟沿革中誤讀新唐書蘇州爲雄州句而云大歷十三年更名雄州一事。夫雄爲州之等第，非州之名。稍諳史學者宜無不知。當時簪豪之彥如林，不解何竟貽此笑柄。至所增

遺闕尤美不勝收。略舉一二，如據五茸志而知邑有棉布之始，據戴有祺尋樂齋集而知顧繡始於繆氏。此其關於掌故，豈淺鮮哉。

葉昌熾爲秦氏作序云，一文章者天下之公器。况夫方志之學出於古史官，觀政者將於此咨故實擘風俗。作者非一手，成之非一時，本非一家一人之學。山川道里之遠近，田賦壤則之高下，建置形勢之大略，職官氏族之舊聞，關於民生之利病，禮樂之舉墜，差以豪釐，謬以千里。前賢草創之，後賢討論而潤色之，又從而缺者補之，訛者訂之，庶幾文獻有徵而可以傳信於將來。不其美歟。一善哉斯言，足爲黨同伐異者之棒喝矣。今茲撰方志考，於前人之所未及亦嚴以繩之不少廻護。正以文章爲公器之旨。庶幾識者諒此衷也。

民國上海縣續志三十二卷

民國元年知事吳馨請縣人姚文枬編纂，王慶平點定。七年刊成。據其例言引孫星衍沈刻雲間志序曰，一余病今世修志無善作好手，不如刻古志於前以後來事跡續之，或舊有遺漏舛誤不妨別爲考證一卷。一是書專爲同治志之續，蓋宗斯旨。然則不肯輕於變革，其慎有如此也。至其時代之斷限則起同治十年訖宣統三年，其繁簡之準則願以長編自居，而以裁擇簡練俟後。姚氏自跋亦極謙摛。

是書之善蓋有三焉。圖繪詳明並據舊志補沿革圖，蓋姚氏兒子明輝長於輿地之學故。一也。雖一以同治志爲依歸，而仍不乏訂證之處，是仿松江府續志之例。二也。卷末敘錄載修志始末甚詳。三也。

惟卷三十引姚氏紀事編歷年物價而不能詳列一表爲可惜。其他

應增之事皆因舊例所無不克備載，亦勢所必至也。

光緒南匯縣志二十一卷

光緒四年知縣顧思賢修。

南匯以雍正二年割上海分建。勒方錡序曰，一長興欽公連首宰是邑，因據上海志鶴沙志成縣志十六卷。旋有陸公學淵著副志以補苴罅漏，考證譌謬。厥後乾隆五十九年孝感胡公志熊宰是邑，因欽志之舊而續修之，成新志十五卷。距今八十年矣。一又據劉世芬序，稱同治十三年金福曾權是縣時曾請於大府請縣人張文虎司其事，未幾金君去而顧君來綜其成也。

凡爲二十一卷，一疆域志，二水利志，三建置志，四五田賦志，六戶口志，七學校志，八祠祀志，九兵防志，十官司志，十一選舉志，十二藝文志，十三至十八人物志，十九名蹟志，二

十風俗志，二十一方外志。

中如風俗志所載皆本邑特殊情狀，引物價以爲佐證，有章氏永清志之風。附載物產亦以本邑特產爲限。皆能矯俗者也。然寺觀僧道概入方外志已屬不倫。乃並天主教堂亦列於此，何其名實相去之遠耶。

其凡例末條云，一凡載筆之事必先不私於己而後能不私於人，一有偏徇，反唇立至。錢少詹言近代士大夫一入志局必欲使其祖父族黨一一廁名卷中，於是儒林文苑車載斗量，徒爲後人覆瓿之用。竊嘗以此自律。一斯則猶存古之道者矣。

光緒青浦縣志三十卷

光緒五年丙子知縣吳康壽刊成，前任陳其元等修。

前有勒方鐳序曰，「先是未建縣時青龍爲重鎮，海舶商賈之所叢集。鹽場酒務，宋時極盛。故梅聖俞林鑑皆嘗撰述青龍鎮志

。此則志之最古者。至前明嘉靖間始置縣，猶以青龍鎮爲縣治。尋廢復置，則在萬歷元年，乃築城遷治唐行。即今縣治是也。於是王圻始作青浦縣志。康熙時知縣魏球修之，秉筆者邑進士諸嗣郢也。文字簡核有法度。後刻本爲縣賓客所屨亂，嗣郢深以爲憾。至乾隆四十六年王述庵司寇重修之，欲汰前所屨者而未能竟也。今梅林二志既不傳，而圻志原本亦求之不可得。加以烽燹之後，典籍散佚，文獻凋落，歷時愈久，蒐採愈難。此志彙本始自同治九年，歷任不一，類能精心考訂，而卷帙浩繁編纂濡滯，越十年而成於馮君少渠之手。」

凡例云，一王志例載王西亭先生文獻私議云，「康熙初建安魏令球延諸乾一重修邑志。秉筆者及山夫葉岳心也，稿成魏令解任，索稿於退署中，與二三不學之人竄易增加，遂成穢史。此二三人者任意私於其親厚，事不核實，言乖體例，乾一大悞恨

而不能止也。魏本廉吏，輕信眩聽，爲人所賣，比雕板又爲有力者收板於家，刊落舊文，竄入祖父之傳，愈失其初。其後又有私增私減，大抵假公事嵌入祖父親戚之姓名，事實尤爲猥冗。後之修志者欲因之斷不可，欲大正之又疑於刻，且叢怨謗，甚不易也。存此說俟百年之久，有賢者因吾說而考正刊削之，庶乎其可也。一蓋前賢之矜慎如此，足以垂戒來茲。一斯亦鄉里修志之苦心，不獨爲青浦言也。

名蹟志有漢太子少傅孔潛避地所遺之宅，謂之孔宅，相傳有至聖衣冠環壁葬於此。卷首有圖，以第宅列圖繪，他志所無矣。凡三十卷，一二疆域，三建置，四五山川，六七八田賦，九學校，十兵防，十一十二名蹟，十三十四職官，十五十六選舉，十七至二十二人物，二十三至二十六列女，二十七八藝文，二十九三十藝文。

康熙常州府志三十四卷

康熙二十三年中書陳玉璣撰。

據光緒武陽志餘經籍篇云，一案是志體例頗合史裁，緜簡得中可爲師法。惟卷首列咸淳志史能之原序云常州府志原序，是直改其書名矣。名宦陳剛中判江陰軍，職官表縣令內無其人，是剛中未嘗爲江陰令明矣。志於通判縣令並爲立傳，傳語亦無他異。曹廷慧由歲貢任江陰主簿在明萬歷間，志誤以爲宋時人，列劉孜之上。人物傳不分門類，後人撰志各立子目多所芟削。故有府志有傳而邑志反無者。藝文不免有芟改之病。皆由是志成書太促，校刊譌舛尤多，後人訾議太過，亦不免存私見耳。近時翻印是志有校勘記一卷，頗有糾正焉。

乾隆陽湖縣志十一卷

乾隆乙酉知縣陳廷柱修，吏部郎中虞鳴球庶吉士董潮編纂。

凡十二卷，一疆域，二營建，三食貨，四學校，五禮祀，六官師，七選舉，八人物，九列女，十十一藝文，十二撫遺。

陽湖古晉陵地，唐以後晉陵武進均爲常州附郭縣，明初合晉陵於武進，雍正二年復析縣。雖析縣而營建等類仍難劃分，則亦徒具空名之縣志而已。

道光武陽合志三十六卷

光緒十二年重刻本

道光二十二年知縣孫琬屬李兆洛編纂。

萬歷乙巳縣人唐鶴徵始爲武進縣志。入清以後一修于康熙癸亥，再修于壬申，雍正四年析縣境設陽湖兩邑，各自爲志。及是

始爲合志焉。本書所依據則大抵爲乾隆三十年知縣王祖肅所修武進縣志及陳廷柱所修陽湖縣志。

綜爲三十六卷，一至三輿地，四五行，五營建，六兵防，七至十賦役，十一食貨，十二學校，十三十四壇廟，十五十六官師，十七十八選舉，十九至二十一旌表，二十二至三十一人物，三十二三十三藝文，三十四金石，三十五事略，三十六摭遺。李氏屬稿未竟而卒。今書人物志文學傳中已有李名，則固不得稱爲李撰。又事略叙述南北朝兵事殊簡略，摭遺志漫錄零聞不知所自，似亦非李氏筆法。惟是武陽大邑，前志完備，故故實羅陳頗豐，終爲詳覈之志耳。

據光緒武陽志餘經籍篇云，一是志兆洛僅手定條例，尋嬰疾卒，分纂洪麟孫陽成烈薛子衡蔣彤等踵成之。體例大半循董志之舊，而事文則擴而詳著之。原定凡例有藝文，而是志以時久費

純，亟於告成，遂置不錄。論者頗以爲憾。（案光緒志餘經籍篇網羅賅遍，雖李氏復生亦當首肯，可無憾矣。）又病其繁冗。顧兵後猶賴有是志之存得以考鏡。迨光緒新志出，一主於簡，始僉謂是志之善。遂有翻印之舉。一
據翻印凡例，山川古蹟有訛誤及太簡者，今遵莊氏許氏校本附注，其他亦類此。是光緒翻印之有功於李氏原志，頗爲不淺。

光緒武陽合志三十卷

光緒二年知縣王其淦主修，蓋道光二十二年李兆洛始爲武陽合志，未竟而卒，邑人踵成三十六卷行世。咸豐庚申粵寇之難被毀，於是始有重修合志之舉。閱三載告成，增損爲三十卷。（據光緒重刻道光合志金吳瀾序）
書爲卷三十，爲類十二，一輿地，二賦役，三營建，四禮祀，

五學校，六兵防，七旌卹，八官師，九選舉，十人物，十一藝文，十二雜事。

詳其凡例所自矜創獲者俱不甚愜當，如云，一近世爲縣志者每多勞擬史裁爲表志傳各名類，并僭竊史稱。志有食貨五行，傳立儒林循史，竊謂大非志體，今故盡避諸稱。一殊不知表傳諸稱自屬因體立名，何得以僭竊爲嫌而強一之。又云，一賦役類於停止編審之後不再贅詳丁數，以示盛世滋生日廣寬大逾常，一殊不知志以紀實，非以紀恩。且即贅詳丁數，與寬大之政何害。又云，一地方官告示及聽鞠之詞有因一時一事之公允傳頌不置者，究未足垂爲後法。今概從刪。一殊不知史者積一時一事而成，苟以爲此一時一事不足紀，則當紀者何在耶。又云，一縣之利弊與民俗急公之舉，非奏請興革及實有裨於鄉里者，不得詳於志乘。如兩縣各鄉定期完納錢漕逾限議罰，名曰

議圖。顧事非奏聞，志乘例難搜輯。今故刪其事於志中，存其說於例後。一殊不知事必奏聞而後可紀，則國史之書盡可當方志之用，更何必勞此修志之舉哉。凡此皆一意求簡而不達體例之過。故觀其志直如簿書之目，無可究尋。宜乎金吳澗之序重刊道光合志頗有不滿斯編之意。至於舛繆疏漏之處，爲光緒武陽志餘所摘，更屬其細焉者也。

人物篇中趙中喬傳附子鳳詔名，云官山西太原府知府有政聲。案鳳詔因案獲重典，卽令罰非其罪，亦應列舉實證以明其冤。僅以有政聲三字囿圖包括，其爲秉筆者之徇曲可知。雖曰隱惡揚善，終乖史法。無怪光緒武陽志餘譏其自詡謂如新唐書事增文減，而其新輯宦績諸傳則又詳敘履歷，虛譽顯要，以此取媚搢紳矣。

大抵以邑人而當史職，難期予奪之公，尤以名邦世族爲甚。光

緒武陽志餘評董潮武進陽湖縣志云，「陳睿謨及子咨稷卓有政績，並祀鄉賢，是時郡紳以錢人麟爲首，主志局事，以張承恩後裔上踞先賢祠產事追憾于椒峯，削去其祖父舊志之傳，其舍公論而逞私忿此陳志之所無云云。」正同一例。此非其邑人自道之，又孰從而舉發之哉。

光緒武陽志餘十卷

光緒十二年知縣金吳瀾重刊。道光合志時邑人莊毓鏞薛紹元等鑒於光緒新志之簡略，增輯是編。據薛氏序稱，一國朝自乾嘉以來府廳州縣志爲海內達人所稱誦者，如洪穉存先生涇縣志，孫淵如先生三水志，陸祁生先生郟城志，董晉卿先生懷遠志，董方立先生長安志，李申耆先生鳳臺志，皆雅瞻有法，皆武進陽湖人也。紹元嘗怪諸先生著述擅一時，而獨於敬梓之鄉，未

能哀集舊聞蔚爲絕作，非憾事歟。乾隆間餘姚盧抱經先生主講龍城書院，嘗修府志矣。藁成爲衆口所排，不授刻。所刻八邑藝文志即藁中文徵一類，其體例謹嚴固足法也。申耆先生修道光志，凡例甫創，遽歸道山。今武陽合志成於衆手，而先生原定目錄紹元嘗於先君子文集見之。固與鳳臺縣志同一精密者也。夫二志之作，或得其人而不及成，或成而不諧俗，書以不傳，豈非天事哉。光緒五年修新志，操翰者莫不攻合志之失。及成，讀新志者又皆謳歌舊志。迄今八年，俊甫莊先生從輿論以次印行陳氏舊府志李氏合志若干卷，復以其暇與陸君彥和輯志餘十二卷以補新志所闕。昔西河毛氏撰蕭山縣志刊誤，僅八十條，四庫提要稱之，與明康對山武功志韓五泉朝邑志皆以精簡著錄文淵閣。是書雖不爲糾謬而作，而網羅散佚，其慎其難，當亦後來修邑志者所不能廢也。一

蓋本書不獨以補新志之略，亦且有功於舊志之發明，據其凡例，爲類凡四十有二。其沿革風俗物產賦役已詳新舊志者，率不著錄。新志成於光緒五年，迄于今應增者續之。不列總目，避正志體也。

兩邑近代大事端惟咸豐庚申之變，本編采私家記載之可信者附之大事，別錄庚申團練紀實二卷附于書後。是良史法也。

康熙無錫縣志四十二卷

康熙二十九年知縣徐永言修，嚴繩孫秦松齡纂。

據凡例一舊志今所有者始於元處士王仁輔及明景泰中學博馮善弘治中儒者吳鳳祥李庶及萬歷中秦布政梁諸所撰輯，兼張運使愷唐太常鶴徵前後府志。餘若釋至迪惠山志顧提舉起經勾吳佚典之類不可得見，翟隱士厚錫山遺響莫工部息續之，不皆錫事

後唯尤州判鏗無錫山水志近推博雅，吳制府檄修時已多採入，而茲所聞爲叅訂者有黃知縣廣之史逸，王職方永積之景物略，皆頗源本於尤。又尤處士晉之勾吳聞見錄談文學修之縣學筆記惠山古今考及其孫高祐之錫山別考近則孫文學秉禾之邑志辨訛……。」本書繼萬歷秦志而作也。

凡四十二卷，一圖建置表分野疆域，二山，三水，四城郭鄉都，五坊巷橋梁，六廨署學校兵防，七古蹟園亭，八壇壝祠廟，九寺觀，十塚墓風俗土產，十一令佐表教職表，十二進士表舉人表，十三貢生表舉辟表武科表，十四封贈蔭敘鄉飲賜諡，十五吳太伯世家，十六十七十八遺愛宦望，十九儒林，二十文苑，二十一忠節孝友，二十二行義隱逸方技，二十三貞烈，二十四流寓仙釋祥異，二十五雜識，二十六著述，二十七至三十戶口賦役，三十一南巡聖製詩古歌，三十二五言古詩，三十三七

言古詩，三十四五言律詩，三十五六七言律詩，三十七五言七言絕句，三十八至四十一碑記，四十二序書頌說引辭題跋。其凡例自云「舊志先立爲輿地食貨宮室等名，乃復以諸類屬之，然按其分部繁而未該，今但列一切記載於前，因已各有條目。而列傳詩文一例類分以次其後，不復更立總名，似徑直而不煩。」其實依其所列，前後凌雜，毫無倫理，其失正同。至據王志錄史記吳太伯世家附以春申君列傳獨爲一卷，謂爲落落大雅，殊不脫明人陋習。惟云，「舊志土產凡邑所得之物一切並載，則東南郡縣日用所同亦不勝書矣。茲唯取邑所獨產與其異於他邑之產者書之，土宜人力各有所至不必以爲富也。」此則足破歷來銅蔽。然綜觀諸條，識多凡近，蓋亦以成於衆手之故與。

至徭役一篇述役法沿革利弊頗詳盡，非他書能及。蓋承明季弊

政之後，亟於呼籲痛苦也。

光緒無錫金匱縣志四十卷

光緒七年浙江候補道無錫秦緇業纂。

其序曰：一吾錫之志昉於有宋其書佚之已久，而元王仁輔志四卷則往時藏書家多有之，其後明凡三脩，我朝康熙乾隆兩志均脩於庚午，雍正初析無錫地爲金匱縣，華徵君希閔別爲金匱志，然錫金既同城，山川人物未可分屬，故先侍郎重修嘉慶志合無錫金匱而名之允矣。道光中未及統修，有續志之刻，閱今又四十餘年。一乾隆志者乾隆庚午王鏞延華希閔顧棟高浦起龍等修，嘉慶兩縣志者，嘉慶十八年刑部右侍郎秦瀛纂，道光志者，道光二十年太常寺少卿侯桐等纂也。據本書凡例云，宋時有無錫縣志久佚不傳，而咸淳毘陵志兩引其說，今所見者惟咸淳志

康熙乾隆兩庚午志嘉慶志道光續志而已，外此之可資參討者，則有黃印識小錄華湛恩錫金志外周有壬錫金考乘三家之書也。凡四十卷，一建置沿革表疆域，二山，三水水利，四城郭鄉都，五街坊橋梁。六廨署學校，七兵防兵事，八至十一賦役，十二祠祀冢墓，十三寺觀，十四古蹟，十五職官表，十六十七選舉表，十八世家名宦，十九二十宦望，二十一儒林，二十二文苑，二十三忠節，二十四孝友，二十五行義耆碩，二十六隱逸藝術，二十七二十八列女，二十九流寓釋道，三十風俗善舉，三十一物產祥異，三十二至三十九藝文，四十雜識。

道光江陰縣志二十八卷

道光二十年知縣陳延恩修，李兆洛等纂。

江陰志始於宋紹熙五年，知軍事施邁主修教授鄭應甲纂，曰施

志，紹定三年知軍事顏耆仲教授郭庭堅再修，曰顏志，其後至元二十三年洪武九年兩次重刊。洪武二十四年縣丞賀子徽又修，曰賀志。永樂十六年訓導陳贊又修。曰陳志。宏治十一年知縣黃傳又修，曰黃志。正德十五年知縣王泮又修，曰王志。嘉靖二十七年知縣趙錦又修，曰趙志。其後萬歷四十七年重刊。崇禎十三年知縣馮士仁又修，曰馮志。康熙二十二年知縣沈清世又修，曰沈志。乾隆九年知縣蔡澍又修，曰蔡志。其後五十四年知縣牛兆奎修而未竟。可謂富矣。然舊志已多散佚，存者惟黃趙馮沈蔡五志而已。（據凡例）

江陰之爲縣在蕭梁。實吳暨陽縣地也。唐武德中曾置暨州，旋廢。五代迄宋建江陰軍，元且升爲江陰路總管府，其雄重可知。明以來始降爲縣，又析設靖江屬常州府。然江蘇學政自萬歷以後猶循例駐節於此。（原駐宜興）故本志官署以學政署列首。

其時任學政者爲祁澹藻，澹藻爲撰序以張之。陳氏仲父希曾於乾隆十八年以兵部侍郎來使，亦陳氏所引爲光寵者也。

書凡二十八卷，一建置，二疆域，三山川，四民賦，五學校，六武備，七秩祀，八祥異，九風俗，十物產，十一十二職官，十三十四選舉，十五名宦，十六至十八人物，十九二十列女，二十一方外，二十二古蹟，二十三寺觀，二十四至二十七藝文，二十八識餘。

明以前諸志雖已不存，而舊志輾轉徵引尙多，故展卷之餘猶恍然復見宋志風格，其馴雅鮮可幾及也。就中風俗一篇所載農工商婦女二氏狀況，多實事，絕非餽釘空言可比。而縣署學署諸圖精美詳悉，亦其餘事之勝人者。

光緒江陰縣志三十卷

光緒戊寅知縣盧思誠等修，編修縣人季念詒等纂。

前志源流已見陳志條下。據本志凡例，今所存者陳金兩志。蔡志間有全帙，餘均散佚也。體例則一仍前規，惟增入忠義總綱及寇變紀略。

中有補充前志之語，如云「學署割季科清機園爲之，署中荷花池卽雪浪湖，池邊有屋五楹，卽賜閒堂，」前志失載也。

凡三十卷，一建置，二疆域，三山川，四民賦，五學校，六武備，七秩祀，八祥異，九風俗，十物產，十一十二職官，十三十四選舉，十五名宦，十六至十八人物，十九二十列女，二十一方外，二十二古蹟，二十三冢墓，二十四寺觀，二十五至二十八藝文，二十九忠義總綱，三十識餘。

嘉慶宜興縣志十卷

附新志四卷

嘉慶二年知縣阮升基等撰。

按萬歷徐顯卿志序云，「自晉周孝侯有風土記，宋單氏續之，正統間鄒令且以屬訓導危山，因舊編而節之，成縣志。更七十年，正德之季，韓令儒以屬教諭林文聰重修。又七十年爲萬歷初，韓令容延楊別駕阜李學謙延譚暨諸文學分任參考，垂成而韓以制去，今陳侯造王別駕升周學謙國賓而屬之重訂輯成新志十卷云云。」陳侯陳達璋也。其後康熙間知縣李翼聞又屬邑人徐階鳳重修，卽今志所據也。

雍正三年分宜興爲荆溪，本志乃以是年以前爲宜興舊志，四年以後爲新宜興縣志新修荆溪縣志，此變例也。

宜興爲漢陽羨縣，晉惠帝時以周玘三興義兵討賊有功，立義興郡，隋廢郡存縣，屬常州，宋太平興國中以避諱改今名。

舊志新志體例略同，舊志凡十卷，一疆域志，二營建志，三田賦志，四學校志，五職官志，六武備志，七選舉志，八人物志

九古蹟志，十藝文志。

新志凡四卷，一疆域志營建志田賦志，二學校志職官志選舉志，三人物志，四古蹟志藝文志雜志。

本書營建志有廢署亭館與古蹟複出。古蹟一志多載前人詩文與藝文複出。至藝文志強分細目若五排五截六截七截，皆乖大雅。若夫人物必分忠義治蹟等目，則不能爲周延儒立專傳，工藝無所附屬，則不能爲陶業立專篇。又乖於紀實也。

嘉慶荆溪縣志四卷

附道光續宜荆志十一卷

嘉慶二年知縣唐仲冕修。

其例一如宜興志，以分境故，彌窘於言矣。後附道光續宜荆志十一卷，道光二十年知縣龔潤森修縣人吳德旋撰，其目曰營建志田賦志學校志職官志名宦志選舉志人物志古蹟志藝文志雜志

。然謹守繩尺，但續前志，無所發明。其序自云本無學術年老遺忘兩邑侯遂以總纂之名見屬。蓋德旋徒以文望典其名，固無意於著述歟。

光緒宜興荆溪新志十卷

光緒八年知縣周鍾錢志澄等修，候選教諭吳景牆纂，繼道光志而作也。

書仍十卷而次序離合大改舊觀。前志未安者悉加整正。一疆土，曰星野記建置沿革記區圖記山記水記要隘記水利記風俗記物產記，二營建，曰城池解署記壇廟記坊表記倉儲記津梁記善堂記義阡記，三賦役，曰戶口記田畝記科則記解支記漕運記蠲振記，四文教，曰學宮記學額記禮樂器記書院記義學記，五武事，曰營汛記咸豐同治年間粵寇記殉難紳民記殉難婦女記，六職

官，曰縣令表學秩表宜興僚屬表荊谿僚屬表城守營表水師營表，七選舉，曰科貢表武科表例仕表武職表封贈表蔭襲表恩叙表榮壽表，八人物，曰名宦錄忠節錄治績錄儒林錄孝友錄文學錄義行錄隱逸錄藝術錄寓賢錄方外錄列女錄補錄，九古蹟，曰遺址考名勝考邱墓考寺觀考。十藝文，曰載籍考金石考。

其文字之雅，搜輯之宏，誠爲後來居上。然殉難紳民婦女及列女三項已占全書篇幅之半，未免脛大於股。物產一篇斤斤名物訓故之考據，抑末矣。

光宣宜荆續志十二卷

民國九年知事陳善謨等修。斷代爲書，故號光宣志，其民國以後事亦附入焉。

凡十二卷，一地理志，二建置志，三經政志，四武備志，五新

政志，六社事志，七官職志，八選舉志，九十人物志，十一藝文志，十二雜志。

光緒靖江縣志十六卷

光緒五年知縣葉滋森修。

據舊序，宏治十八年知縣周奇健創志。正德七年知縣殷雲霄，嘉靖四十三年知縣王叔杲，隆慶三年知縣張秉鐸，萬歷四十七年知縣趙應旗，崇禎十四年知縣陳函輝，康熙十一年知縣鄭重，乾隆五十六年知縣畢取密，五十七年知縣牛兆奎各一修，其萬歷二十年縣人朱正初修者曰馬馱沙小志，蓋靖江本馬馱沙，成化七年始置縣，屬常州府。

書凡十六卷，一皇仁恭紀，二營建志，三輿地志，四賦役志，五食貨志，六學校志，七兵防志，八禮祥志，九藝文志，十職

官志，十一選舉志，十二良吏志，十三至十五人物志，十六古蹟考。

其摭餘篇有兩條事實相同而重見者則疏於編摩可知。

乾隆鎮江府志五十五卷

乾隆庚午知府朱霖修，前志修于康熙二十四年知府高龍光也。按序，舊志修于正德六年，主之者楊一清，再修于萬歷二十二年王樵，二人皆郡之聞人，若上溯其源，則有方逢辰之咸淳志，丁元吉之成化志。

本書五十五卷，一建置沿革等，二三山川，四形勝等，五戶口，六至十三賦役，十四郵政，十五學校，十六公署等，十七秩壇等，十八津梁等，十九宮室，二十寺觀，二十一陵墓，二十二古蹟，二十三刺守，二十四參佐，二十五宰貳，二十六師儒，二十七軍鎮，二十八封爵等，二十九進士，三十鄉貢，三十一貢士，三十二武科等，三十三四名宦，三十五六名臣，三十七儒林，三十八孝義，三十九高隱，四十仙釋，四十一列女，

四十二物產，四十三祥異，四十四至五十三藝文，五十四遺事，五十五河工疏稿。

本書叙云，一初丹徒邑令馮夔殿曾以郡志殘缺，補刻數萬字，復入桐村藝文一卷，中有續丹徒隱逸志續丹徒節孝志，閱今且二十五年矣。斯志也，耗蠹爲災，梨棗亦磨滅，多不可識。溧陽縣志修於乾隆八年，已有成書，是宜以郡志例類入之。茲以原板之磨滅不可復識與夫溧邑之所應入者纂序編輯，彙成一書，付之剞劂。一然則其書實卽高志原本，而以乾隆溧陽志增入而矣。

郡爲南朝之京口，隋唐之潤州，唐以爲浙江西道理所，軍號鎮海，宋初改鎮江，嗣以徽宗潛邸升府。清制領丹徒丹陽金壇溧陽四縣。

光緒丹徒縣志六十卷

光緒五年知縣何紹章等修，編修陽湖呂耀斗纂，以奉修通志之命也。

據凡例引嘉慶志云，一丹徒古稱名地，紀載甚多，如南徐州記京口記丹徒書大觀祥符諸圖經俱不傳，其後則潤州類集京口集續集潤州先賢傳耆舊傳之類，存者亦復寥寥。郡志自宋元以來屢經修輯，明永樂後諸刻尙有傳本，至縣志則正德間知縣事李東集舉人楊琬諸生潘浩毛文彙纂成書四卷，楊文襄一清序之，雖體裁謹嚴未免太簡。崇禎七年知縣事張文光僅據舊板增入選舉題名。餘如故。國朝康熙二十二年知縣事鮑天鍾與邑諸生何梨程世英重修爲十卷，卷帙較加繁富，事蹟雖增，未盡典雅，且引書不載書名，無從核實。今博考前聞，重加釐定，缺者補

之，訛者正之，搜討之艱，同於創始云云。一嘉慶志修于嘉慶甲子，知縣貴中孚等也。詳其意蓋康熙志主詳而嘉慶志主簡，本志又自命矯嘉慶志之失也。

書凡六十卷，一至十爲輿地志，十一爲河渠志，十二至十八爲食貨志，十九爲學校志，二十爲武備志，二十一爲職官志，二十二至二十四爲選舉志，二十五至四十五爲人物志，四十六至五十六爲藝文志，五十七至六十爲雜綴志。

其輿地志中以寺觀宮室陵墓與古蹟對列，固屬非是。然觀其叙列之法，凡有關之文字悉次逐條之後，使讀者展卷而得其全豹。實較他志分繫藝文雜志者爲良。

末附京口八旗志二卷，舉人春元纂。自乾隆間定京口駐防制額設兵一千六百餘名，老幼丁口至六千餘，道咸兩次之亂殉節者至多，不可無以紀之也。

丹徒爲秦會稽郡屬縣，後漢屬吳郡，孫吳以來，京口之名始著。南朝置南徐州於此，蓋北人移殖之區，所以至今語音猶近於北也。唐置潤州爲浙江西道理所。地望之崇如此。道光二十三年咸豐三年兩次被兵，精華竭矣。本書於興廢之迹言之若有餘慨也。

光緒丹陽縣志三十六卷

光緒十一年知縣凌焯繼前任修成。

據舊序，正德十四年知縣朱方始修，隆慶三年知縣馬豸重修，康熙三十二年知縣吳之彥乾隆十五年知縣鄒廷模各一修。但據正德志序實依據邑人朱密所編志稿也。

凡三十六卷，一建置沿革，二山水，三水利，四城郭鄉都，五至九賦役，十學校，十一祠祀寺觀，十二陵墓古蹟，十三職官

表學職表，十四選舉表，十五封爵，十六名宦，十七名臣，十八十九仕進，二十儒林，二十一忠節，二十二孝友，二十三隱逸方技，二十四方外流寓，二十五義舉，二十六列女，二十七殉難紳民表，二十八殉難列女表，二十九風俗土產，三十祥異，三十一至三十四藝文，三十五書籍，三十六摭遺。

丹陽漢曲阿，自宋以來爲鎮江府轄縣無改，有運河之利與練湖之勝。舊志分山川練湖漕渠爲三篇，亦未始無深意。今以水利隱括之，自是從簡之法。然仕進傳與殉難兩表已復冗長也。

光緒金壇縣志十六卷

光緒十一年知縣夏宗彝修，禮部主事汪國鳳纂。

據舊序，正德丙子知縣劉天和萬歷庚辰知縣劉美康熙癸亥知縣郭毓秀乾隆庚午知縣楊景曾各修一次。

其凡例云，一體例目次悉沿舊志，惟新增忠義節烈二門俱係就聞見所及采輯補增而已。一然其實人物諸傳多仍舊志之稿也。末附咸豐丙辰庚申守城日記。

書凡十六卷，一輿地志，二三四賦役志，五職官志，六典禮志，七學校志，八選舉志，九至十二人物志，十三十四藝文志，十五十六雜志。

嘉慶溧陽縣志十六卷

嘉慶十八年知縣陳鴻壽屬縣人舉人史炳纂。

據舊志序溧陽有志自宋乾道始，萬歷甲戌知縣帥蘭曾修，今存浚儀邢一鳳序，蓋原書久佚矣，據本志云，一其時纂輯者邑人陳邦治宋臣熙滕養志彭履常。又有六居野志，邑人狄斯彬撰。一然據康熙丁未邑人吳穎序云，一江陵徐公履常治溧，予迺舉

所藏前侯符帥二公志并鄉先生狄公野志共三帙及予所自輯閩史合而是正於公。一是帥志以前尚有符志，益以野志閩史凡爲四矣。及康熙間則丁未有知縣徐一經，癸丑有知縣王錫瑄，甲子有知縣成懋勛三次之修本。

凡十六卷，一至四輿地志，五河渠志，六食貨志，七學校志，八武備志，九職官志，十選舉志，十一至十四人物志，十五藝文，十六雜類志。

據其卷首圖說云，縣東西百里南北百五十里。乃舊圖東西反三倍。是其一善也。風俗門廣徵舊記，雖偏古略今，而語無泛設。其二善也。湖瀋河渠分別存廢。山川之名亦先據採訪後錄舊志。其三善也。凡有紀述皆注明所據來歷。其四善也。人物志中闢始遷與外徙諸門，志族姓之離合。其五善也。

史之自跋云，一溧陽自宋乾道時趙廓夫有志，世久失傳。傳者

明宏治萬歷間符帥二志，康乾間徐王成吳諸志，二百六十年之中，修凡六次。班班乎宜其足徵矣。顧志書之患在于始作之不精。趙志今不可見，宋周應合景定建康志元張鉉至正金陵志較爲近古。然以溧陽事跡徵之，其建置沿革不考正史而每括偏記，又如古之令長自吳淩操至齊樂預凡十餘人，皆見於正史而不爲題名。皆疏漏之大者。：一是則然矣。然梁溧陽公主嫁侯景者不見於人物志中之古爵。何也。

溧陽爲縣始於兩漢，中經分合升降。雍正八年自江寧府割隸鎮江。

光緒溧陽縣志十六卷

光緒十九年知縣楊家驥先請知府王仁堪繼請金壇馮煦編纂。

據其凡例，體例悉仍前志，惟增忠義節烈二卷而已。是其意僅

在續編，以與前志銜接。然建置沿革仍復歷溯，何也。

宏治太倉州志十卷

光緒壬寅東倉書庫重刊

宏治庚申知州李端修，柳州通判州人桑悅纂。

本書刊本久佚，從常熟瞿氏所藏寫本校刻也。

書凡十卷，一曰沿革分野里至疆域形勝風俗山川土產市鎮，二曰城池坊巷鄉都橋梁牌坊官廨衙院倉場鋪舍壇壝軍衛，三曰學校戶口田畝稅糧課程賦役，四曰寺觀祠廟宅墓古蹟，五曰科貢，六曰名宦仕宦儒林，七曰隱逸藝文孝友義行，八曰列女雜傳藝術，九曰封贈游寓釋道雜誌考證，十曰詩文。

其規模已近整齊，然官師名氏卽附於官廨學校之後，亦尙未嚴其限制也。風俗土產二門最爲能紀實者，此在明代諸志中大爲傑出者矣。

太倉爲元以來重要海口，故有慶元等處市舶提舉司，有抽分竹

木場，有海運總兵公館，有船塢，有太倉。本志備述其地，令人想見當時海市之盛。

民國太倉州志二十八卷鎮洋縣志十二卷

民國己未邑人王祖畚等修。

據邑人洪錫範序曰，一有明中葉建州以後，桑氏悅始創爲州志

。繼之者爲都氏程

龔氏持憲

而張氏寅張氏采

又從而增修之。洎

入有清，黃氏興堅

朱氏汝頌

各著有州志稿藏於家。雍正間太鎮

州縣分治，越十餘年而有鎮洋縣志，迨嘉慶初年而太倉直隸州

志成，萃一州四邑之事蹟勒爲一書，集邑志之大成焉。自是厥

後，茲事垂絕。咸豐壬戌癸亥間中丞錢公杏琛

謝病歸里，曾事

續修，僅成人物一門而中輟，今所傳壬癸志稿是也。光緒紀元

而後，州牧吳公承澍

設立志局，延聘名流，從事修纂，格於嘉

慶志先例，擬徵屬邑志稿彙編成書，屬有草稿，存之州署，遷延者三十年，光緒之季，復議補輯，人物有壬癸志可據，續成封域水利學校祥異若干門，又以國變未竟。竊嘗屈指計之，自明嘉靖迄清嘉慶初二百四五十年，桑志以外而都而龔而二張而黃而朱而乾隆之縣志而嘉慶之直隸州志，賡續編纂者八九。自嘉慶初以迄民國，百二十年，一修於咸豐時，祇成人物。再修於光緒初年，草創未就，三修於光緒季年，功未及半。一此州志之源流也。今茲纂修雖在民國，而事實以宣統爲斷。故州雖廢而仍冠州名也。

太倉之建州在宏治十年，割崑山常熟地而置。領崇明縣隸蘇州府。雍正三年增屬鎮洋崇明嘉定寶山四縣。本書獨以鎮洋志附後者，以鎮洋同城而治也。

本書封域篇云，至元十九年朱清張瑄自崇明徙居太倉，建海漕

議，先是劉家港漸西勢日深廣，清瑄因導以入海，通海外番舶，蠻商夷賈，雲集鱗萃，當時謂之六國碼頭。此語蓋本之桑氏宏治志。鄭和出使海外卽自劉家港出口。（見費信星槎勝覽，）太倉之關於中外交通者如此。孰料易世而後上海興而太倉遂廢也。

凡二十卷，一二封域，三風土，四營建，五六水利，七賦役，八九學校，十選舉，十一職官，十二名宦，十三至十五兵防，十六兩衛，十七至二十四人物，二十五藝文，二十六祥異，二十七八雜記。

究其體例得失有可言焉。封域下篇分古蹟第宅園林墳墓寺觀五項。夫古蹟云者，前人所留遺，今人所憑弔。固已包第宅園林諸項而并有之。非能於諸項之外別覓古蹟，更非謂諸項之中遂無古蹟也。法宜與營建篇酌併，分列衙署鎮戍坊巷市肆第宅園

林墳墓寺觀諸端，以現存者居前，以今廢者列後，則存當今之制，發思古之情，斯爲兩得。此其一。營建篇有學堂兩處，而學校篇專以紀廟學書院社學義塾等。夫本志旣以宣統年中事實爲斷，自當以時制爲重。僅記學堂兩處，不足以盡教育狀況。離學校而別行，尤難免駢枝之誦。此其二。有明衛制，清代早已廢止。即使溯其遺跡，止能分入職官兵防等篇，不宜獨成一目。此其三。方志人物宜較史傳爲詳，昔賢論之孰矣。本書古今人傳率多略述數語，存其虛評而刊其實事，又不載出處使後人無所覆按，皆非良法。太倉王氏之倫，緒胤綿遠，最爲一邑文獻所存。其他各姓亦絨冤代興。不能仿新唐書宰相世系表爲之揚闡，亦憾事也。此其四。雜記篇搜羅不爲不富，而無一條載明出處者。此其五。要而言之，當劇變之世，必有通變之才，然後因應咸宜。若拘拘於一成不變之法，未有不扞格者也。

本志從容掇拾於易世之後，材豐而力備。而所就不過如此。非舊例之拘束使然哉。

鎮洋縣志凡十二卷，體例一仍州志。末有附錄一冊，則紀州縣自治事也。

光緒崇明縣志十八卷

光緒六年知縣林達泉等相繼修，大理寺卿李聯琇纂。

按其志原錄舊志源流如左。

至元州志

據至正志張序所稱未詳何年何人作

至正州志

至正十一年辛卯知州程世昌延州人朱謙朱禎修黃虞稷千頃堂書目有秦約洪武縣志即此志也

正統縣志十卷

正統九年甲子知縣張潮等修見千頃堂書目

正德縣志稿

正德十五年庚辰知縣陳文修見千頃堂書目

嘉靖縣志十二卷

嘉靖四十年辛酉知縣范性修

萬歷縣志十卷 萬歷三十年甲辰知縣張世臣修

順治縣志稿 順治七年庚寅知縣劉緯修

康熙縣志稿 見下朱志序

康熙縣志

康熙二十年辛酉知縣朱衣點修按衣點修志之初樊耀邦獨肩其任業成焉板既以有所觸犯毀板重修然於樊業猶十存八九焉

雍正縣志二十卷 雍正五年丁未知縣張文英修

雍正縣志略附張志辨誤一卷 邑諸生宋孔傳撰

乾隆縣志二十卷 乾隆二十五年庚辰知縣趙廷健修

崇明田賦考一卷邑乘補正二卷 邑徵士張詒撰

其凡例云，當乾隆時已不覩元明諸志，第本朱衣點張文英兩志及宋孔傳志略爲之，今踵趙志續修，旁徵羣書凡數百種，數年始克成書。

崇明鎮之置在唐神龍中，就海中所湧之沙而立。至宋時魚鹽之利益饒，嘉定十五年始置天賜鹽場，至元十四年遂升爲州，洪

武中以地切戶減改州爲縣，雍正二年定隸太倉州。本書風土志云，一其隸屬自通而揚而蘇而太倉，民情隨所轄而轉移，故邑人雜有江南北風氣，乾隆三十三年初置海門廳撥縣境十一沙屬之，邑人居海門之半，又自此始也。一

書凡十八卷，一圖，二輿地志，三建置志，四風土志，五禮祥志，六賦役志，七武備志，八職官志，九名宦志，十選舉志，十一人物志，十二至十五列女志，十六藝文志，十七雜志，十八志原。

光緒嘉定縣志三十二卷

光緒辛巳知縣程其珪修，其前任奉同治九年檄修也。

嘉定舊爲吳郡屬邑，宋嘉定十年析崑山東五鄉，因年以紀名，即練祁鎮以爲治。

據程氏序，萬歷中有韓志，錢大昕曾摘其譌。康熙中有趙志，乾隆初有知縣程國棟志，錢氏復譏其漏。嘉慶中知縣吳桓修輯迄未成書。

凡三十二卷，一疆域志，二營建志，三四五賦役志，六七水利志，八風土志，九學校志，十兵防志，十一至十三職官志，十四十五選舉志，十六至二十三人物志，二十四至二十八藝文志，二十九金石志，三十名蹟志，三十一三十二雜志。全書包舉宏富，卽藝文一志已占兩冊之多。非人文豐美之邦，無以及此。

乾隆寶山縣志十卷

乾隆十年知縣趙酉修，雍正三年始分嘉定東偏四鄉爲縣，并隸太倉直隸州。其嘉定舊志則據本書凡例稱修于萬歷三十三年者

知縣韓浚，修于康熙十二年者知縣趙昕，又經知縣聞在于二十三年續修，分縣後知縣程國棟分修竣事於乾隆二年。凡十卷，一地理志，二建置志，三禮祥志，四物產志，五田賦志，六職官志，七人物志，八選舉志，九藝文志，十雜識志。地理志中之開濬水利及方音，田賦志中之永折漕糧始末扇差沿革等篇，皆至有關係之文字。

光緒寶山縣志十四卷

光緒八年知縣王樹棻繼前任吳康壽修。

雍正三年析嘉定置寶山，逾二十年知縣趙酉始修縣志，至是百三十餘年矣。縣名寶山者，以永樂十年新築土山錫名寶山也。

（本書沿革表漏列此語民國志據永樂碑文補）

凡十四卷，一輿地志，二營建志，三賦役志，四水利志，五學

校志，六兵防志，七職官志，八選舉志，九至十一人物志，十二藝文志，十三名勝志，十四志餘。

輿地志中引李輝祖胡家莊考略，一胡家莊者胡氏之莊也，胡氏先居於茲土而後我李氏因之。我李氏不始於胡莊，始於莊之東北紫藤樹下也。紫藤在菱涇之西，大可合抱，故宅亦以紫藤樹下名也。胡莊之先有郭氏居之，故東園溝名郭家溝，莊西黃泥溝上現有郭家墳。時代已不可考矣。東園溝出蘆藻浜，南有石橋，橋之東有瓦房幾座，張姓居之，名曰張家宅。傍橋有柵，其朝南瓦房則姚氏居之。迤西一帶則胡氏居之。後河亦出蘆藻浜，南有大石條爲橋，傍橋亦有柵，橋西則俞氏居之。共四姓而胡氏居多。柵內開張店肆貿易往來，故曰胡莊。自我南山公創立，莊中四姓凋零，而李氏浸盛。向有江灣李浦北李殷行李真如李之稱。茲則曰胡莊李。著而明之，庶知胡莊之有自來也。

。此篇於居宅之源流辯之至析，撰志者倘能推此意以列表，則一邑故家之興廢，人物之降替，村居之分合，地名之變遷，胥如指掌矣。惜乎以章氏之閎識尙止爲士族表而不爲里居表也。又賦役志中引明嘉定知縣趙昕官布考及乾隆二十四年總督尹繼善巡撫陳宏謀定徵收條銀章程，皆可考見當時物價。

民國寶山縣志十七卷

民國十年縣人錢淦等撰，繼吳志而作也。

寶山與上海接壤，其江灣彭浦兩鄉已於民國二年劃歸閘北。故於縣治以外須兼及商埠。志於前志所已詳者皆不贅述，而於民國以來變革諸端臚舉無遺，可謂知所先後矣。

凡十七卷，一輿地志，二水利志，三營繕志，四財賦志，五禮俗志，六實業志，七教育志，八交通志，九兵防志，十警務志

，十一救恤志，十二職官志，十三選舉志，十四人物志，十五藝文志，十六名勝志，十七雜志，除實業教育交通警務等志純屬新增外，大致仍舊例而稍加以增併。

就中如輿地志中之增經緯度面積氣候，營繕志之增路街，財賦志之增公款公產，禮俗志之增教會，皆因時立制者也。

乾隆通州直隸州志二十二卷

乾隆乙亥知州王繼祖修，檢討高郵夏之蓉纂。

據所列舊序，嘉靖三十三年通州志四卷，兩淮巡鹽御史黃國用揚州府知府吳桂芳修，三十八年通州志八卷，知州喻南岳李汝杜修，萬歷五年通州志八卷，知州林雲程修，康熙十一年通州志十五卷，知州王宜亨修，其屬於海門縣者嘉靖十五年海門縣志十卷，知縣吳宗元修，順治十三年海門縣志八卷，知縣莊泰弘修。其所考訂不如光緒志之詳也。

通州在漢爲海陵地，其建州始於周顯德五年，康熙十一年海門縣併入通州隸揚州府，雍正二年升直隸州，以泰興如皋屬焉。故今志以舊海門縣及泰如兩縣事實附列也。

凡二十二卷，一輿圖，二疆域志，三山川志，四建置志，五民

賦志，六學校志，七禮儀志，八祠祀志，九十秩官志，十一宦蹟志，十二軍政志，十三選舉志，十四十五人物志，十六列女志，十七風土志，十八古蹟志，十九至二十一藝文志，二十二雜志。

通州雖無悠久之歷史，然自周世宗得此以通吳越之路，漸爲軍事必爭之地。州南之狼山在唐末已有名，吳越淮南嘗交兵於此。故明以來設總兵兼防陸海。嘉靖間倭禍烈焉。志不爲紀事，而但以歷代軍事附軍政志，名實稍不符矣。

光緒志糾其繪圖無說，橫縱寬窄不以里計，讀者茫然。疆域志星野一今之六安臨淮郡一句本漢書，誤稱舊志云六安誤六合。如皋在唐曰場，沿革表概稱縣誠爲疏舛。其他摘舉誤字，則未免吹求矣。

光緒通州直隸州志十六卷

光緒元年知州莫祥芝繼前任梁悅馨修，編修江陰季念詒等纂，念詒曾纂江陰志也。

其志原一篇所載嘉靖以前志如左。

宋通州志十卷孫昭先修

明永樂十六年通州志一卷知州嚴敦大修

景泰五年通州志一卷知州孫徽修

宏治四年通州志二卷訓導施紀修

嘉靖九年通州志六卷知州鍾汪修

其凡例云，一乾隆甲戌志併隸泰如兩屬邑，例準府志，編纂實繁。高沙夏檢討主裁斯役，纂輯非出一手，舛誤冗複，未爲完書。道光時郡中銳意興修，將成忽敗，止存例稿七冊。今詳加

蒐討，條分件繫，徵信闕疑，成功緩而立體較嚴。一然所糾前志之失多涉吹求。

凡十六卷，一疆域志，二山川志，三建置志，四民賦志，五學校志，六儀典志，七軍政志，八九秩官志，十一選舉志，十二十三人物志，十四十五列女志，十六藝文志。

嘉慶如皋縣志二十四卷

附道光續志十卷

嘉慶九年知縣楊受廷修，十三年知縣左元鎮刊成。

楊氏序，縣志始於天順八年，不知其何所據。檢所錄舊序，則先後所修如左。

嘉靖十五年縣志六卷教諭陳源清修。

嘉靖三十九年縣志十卷知縣童蒙吉教諭謝紹祖修。

萬曆二十八年縣志十四卷張星修。

萬歷四十六年如皋縣志十卷教諭呂克孝修。

康熙二十二年縣志十六卷知縣盧繩修。

乾隆十五年縣志三十二卷知縣鄭見龍修。

如皋東晉時立，屬海陵郡。五代以後隸泰州，雍正二年改隸通州。據江海之會，鹽竈海防其要政也。

凡二十四卷，一星野志，二疆域志，三建置志，四五賦役志，六物產志，七鹽法志，八方俗志，九學校志，十禮典志，十一軍政志，十二秩官志，十三十四選舉志，十五名宦傳，十六至十九列女傳，二十二十一藝文志，二十二古蹟志，二十三祥禳志，二十四別錄志。

其疆域篇引劉氏十五世明經記略，「宋理宗朝劉氏基以明經令揚子，揚子介六合江陽之間，基之子孫遂家如皋治北之水竹園。自基以下曰傑曰鉅曰鑑曰永曰林曰昂曰瑗曰謨曰詡曰科曰應

祥曰夢星曰震曰學賢曰沾曰滋曰灝曰昌運曰愈炤愈熾曰玠曰之
彥曰之彪曰增熾曰行健曰鍾悅，凡二十七人，歷世十五，皆以
明經起家。先是洪武初鉅舉經明行修科任本縣訓導，講學於治
東五十里。皋人呼其地曰劉師舖。一於其卜居之所記其聚族之
由，此自良法，可爲撰志之式。然如皋冒氏風雅夙振，其水繪
園僅略述於古蹟篇中，時人題詠則又別入藝文，而主人事跡又
分爲列傳。何又不循此例耶。大抵一邑名家世系繁衍者，宜用
魏收書例，集爲一傳，凡有關涉其家之掌故并附列焉，雖冗長
無嫌，而別於疆域志中明識所卜居之處，如是則人地益彰而方
志之用乃盡也。

然其列傳中分別子曰曰人物曰儒林曰孝友等。夫儒林孝友非人
物乎，宜其爲光緒續志所糾也。

後附道光續志十卷，道光十七年知縣范仕義修，儀徵舉人吳鎧

撰。一如前志，補入三十餘年事實而已。

同治如皋縣志十六卷

同治癸酉知縣周際霖等修。

例略如嘉慶志，而嘉慶志中最荒陋之例如列傳分列人物孝友等名，則已改正。冒襄姬人蔡女蘿文采可稱，而舊志屏不書名，今爲補入。皆徵卓識。

凡十六卷，一建置志，二賦役志，三學校志，四軍政志，五秩官志，六選舉志，七名宦志，八九列傳，十一十二列女傳，十三藝文志，十四名蹟志，十五祥禳志，十六補遺。

光緒泰興縣志二十八卷

光緒十二年知縣楊激雲修。

據卷首志原一篇，稱嘉靖十三年縣志四卷，知縣朱僉修，萬歷九年縣志十卷，知縣高桂修，（萬歷二十五年知縣陳繼疇又修一次見康熙志序）康熙十三年縣志四卷，知縣李蜚英修，書未竟，二十二年知縣錢見龍二十七年知縣吳樸先後重修，五十五年縣志六卷，知縣宋生修，嘉慶十八年縣志八卷，知縣凌培張先甲修。

凡二十八卷，曰區域志，建置志，經制志，秩官志，人物志，列女志，志餘。區域曰沿革準望分率鄉聚河渠，建置曰城垣公署義宇名蹟，經制曰賦役學校典禮營伍，秩官曰古今官屬年表仕績列傳，人物曰選舉表宋元明人列傳，國初以來見舊志者列傳，嘉慶以來列傳，列女曰節婦前錄節婦續錄節婦今錄貞孝義烈合錄，志餘曰述異談逸。其分析門類，似甚犖然。然風俗方言物產皆隸於區域分率之下，而名蹟門中兼列山川，概歸建置

。皆有未當也。

泰興本海陵縣濟川鎮，南唐升鎮爲縣，宋以來因之。雍正二年升通州爲直隸州，遂爲通州屬縣。

光緒海門廳圖志二十卷

光緒二十六年同知王賓繼前任修成，前江浦縣訓導廳人周家祿纂。

其沿革志曰，一海門自五代周始置縣屬通州，國朝康熙間縣圯於海併入州，乾隆三十三年割通州十九沙崇明縣十一沙復置海門直隸廳，而改併州僑置之海門鄉爲靜海鄉以別於海門廳。自五代以來海門之事絜於縣者鄉志之，乾隆以來海門之事絜於廳者廳志之。一故前無已行之志乘，惟有董曰申志稿四篇也。（據叙傳）

凡二十卷，一地圖，二沿革表，三官師表，四科舉表，五仕宦封贈表，六旌禮表，七八列女表，九地志，十物志，十一賦役志，十二建置志，十三學校志，十四祠祀志，十五藝文志，十

六名宦列傳，十七十八耆舊列傳，十九寓賢列傳，二十叙傳。
其叙傳一篇仿馬班例自述家世，以縣人而爲縣志，苟不自述將
成湮沒，不得以其襲古而少之也。但臚引自著各書，不免矜張
之嫌耳。

乾隆淮安府志三十二卷

乾隆十三年知府衛哲治修。

淮安自南朝以來爲山陽郡，唐以來爲楚州，明以來爲淮安府，雍正以後定轄山陽鹽城阜甯清河安東桃源六縣。

書凡三十二卷，一輿圖，二建置沿革，三疆域，四山川，五城池，六河防，七海防，八水利，九漕運，十學校，十一公署，十二賦役，十三鹽法，十四關稅，十五風俗，十六兵戎，十七營制，十八職官，十九名宦，二十選舉勳爵，二十一封建，二十二人物，二十三列女，二十四物產，二十五五行，二十六壇廟，二十七驛傳，二十八古蹟，二十九三十藝文，三十一辨譌，三十二雜紀。

按其纂修中有顧棟高名，然其全體必非棟高所手定，蓋其失有

甚者焉，全書不著前志源流是也。其辨訛篇云，舊志創于成化，其本不傳，增修于正德隆慶，體制謹嚴，訛錯尙少，天啓志遂多紕繆，康熙志因之又加甚。其所糾訂如云，一同一山陽不同其爲兗州爲河內而槩以爲晉義熙中所立之山陽。同一淮安不同其爲東平爲泌陽而槩以爲宋開寶中所改之淮安。兗州則南兗北兗之不分，楚州則東楚西楚之不別。以光武子爲分封于此，據酈道元水經注，是未嘗讀范史也。列曹竟爲忠烈之首，據歷代忠義傳，是未嘗讀鮑宣傳也。梁適知淮陽軍未嘗知淮安軍也。張吉守懷安鎮未嘗守淮安鎮也。以至因交陵之名遂遷楚元王墓於此，因元王王楚遂移申公穆生于此。一誠爲精當。然舊志撰自何人，體例因革何似，烏可無一語及之也。

光緒淮安府志四十卷

光緒六年知府孫雲錦修。

凡四十卷，一郡縣建置沿革表，二疆域，三四城池，五六七河防，八漕運，九至十四職官表，十五至二十民賦，二十一學校，二十二至二十五貢舉表，二十六軍政，二十七仕蹟，二十八至三十四人物，三十五三十六列女，三十七古蹟，三十八藝文，三十九四十雜記。

其古蹟不注存廢，藝文書目不注存佚，一蹈乾隆志之覆轍。

同治山陽縣志二十一卷

同治十二年知府存葆知縣孫雲修，編修何紹基內閣中書丁晏同纂。

前志康熙四十七年縣人張鴻烈乾隆十四年知縣金秉祚兩次修，張氏曾置局杭州，得毛大可邵戒三之助，然書未付梓，金氏就其遺編輯成之也。本書凡例云，一邑舊有宋嘉定志郡國利病書

多采其說，蓋當時猶有傳本，久而佚去。一是數百年中僅有金氏一本，可爲憑藉也。

凡例云，一原志前列沿革等三表，次爲三十二志，又次爲十六列傳，而以上諭御製詩文冠之編首，云擬本紀，將以規撫全史。夫詳沿革之殊異始可見疆域之離合，覽物產之登耗即可覘風土之盛衰，事雖多端，義原一貫，本無煩於分析。至於天文聖製久已登諸冊府，非下邑志乘所得編次，從古史家亦無僅錄詔令詩文卽稱本紀者。謹按欽定四庫全書總目論地志云，傳記輿圖各有本例，以志爲名而用史體，文雖剏義則乖矣。今遵往式合疆域沿革爲一篇列之卷首，次以建寘水利漕運職官民賦學校選舉軍政人物列女藝文古蹟雜記總爲十四類，而以子目四十餘種散附其中，刪去表傳標目以一體例。其說殊與章實齋分道背馳，故其目次但依疆域建置水利漕運職官民賦學校選舉軍政

人物列女藝文古蹟雜記而編，不復區記表考傳之名，共爲二十卷。

山陽實古淮陰射陽縣境，晉義熙中於射陽縣境立山陽縣與郡俱立。隋開皇十二年置楚州，至元而升爲淮安府路，明以來遂爲淮安府附郭縣。雍正十年以東北境割入新置之阜甯，乾隆二十七年以西境割入新置之清河，轄境始定。本書疆域志謂，「舊時漕舟抵境率陸運過壩踰淮達清，勞費甚巨。永樂中陳瑄自城西管家湖鑿渠二十里導湖入淮，由是漕舟直達於河，南北經行遂爲孔道。綱鹽集頓，商販闐咽，關吏頤指，喧呼叱咤，春夏之交，糧艘牽挽，回空載重，百貨山列，市宅競雕畫，被服窮織綺，歌伶嬉優，靡宵沸旦。然風俗與世移易，自票運經西壩而綱鹽廢，河決銅瓦廂而漕運停，居民專一弦誦佃作，無他冀倖，閒藝園圃課紡績，貧者或肩傭自給，曾不數十年，堅貞守

約耳目易觀。咸豐庚申豫逆東竄，北郊外燬於火，高粱大棟鬱爲戰場，乃益編芻菅立圍砦，刀弓結束布衣帛冠，一洗綺靡之舊。一於一邑形勢風氣之變遷，叙之至精核。其詳則更見於漕運篇及所附鹽課關權二門中。漕運沿革雖非山陽志所宜獨具，然自明以來爲督漕官吏駐所，則詳漕運即所以詳山陽也。有清一代儒學之士出於是邑者輩接，如閩若璩阮葵生魯一同，本書雖各爲立傳，而並無一語及其著作。又古蹟篇所列古蹟未盡著明存廢，至楚州大事零星錄入雜記，皆未免草率。文詞雖雅史裁則未盡善矣。

光緒阜甯縣志二十四卷

光緒十二年知縣阮本燾繼前任修成。

阜甯爲明代之廟灣鹽場，分隸山陽鹽城二縣。萬歷二十一年，

以備倭始設海防同知。康熙時同知侯惲延陳一舜著廟灣鎮志十二卷，雍正九年始設縣，乾隆時知縣馮觀民著草檢八卷未刊。凡二十四卷，一疆域，二建寅，三四川濱，五民賦，六場竈，七職宦，八仕蹟，九學校，十選舉，十一武備，十二至十九人物，二十列女，二十一災稔，二十二藝文，二十三四叢志。其疆域篇以都邑沿革并歷代大事爲一篇，綜合諸書，貫串而成，不復更分子目，略如汪氏廣陵通典體裁。使讀者乘高瞰下盡於一覽。亦志中之上乘文字也。然人物有臧洪而無王敬則，其去取之間亦仍有俗見巨胸中耳。縣濱海，淮水射陽湖復爲巨浸，場竈堤防爲縣要政，故志於此加詳焉。

光緒鹽城縣志十七卷

光緒二十一年知縣劉崇熙修。

據舊序，萬歷十一年知縣楊瑞雲始修，順治丁酉知縣賈國泰康

熙癸丑知縣陳繼美乾隆辛酉知縣程國棟丁卯縣人沈儼各一修。凡例云，一楊氏開闢鴻濛，程志於楊志多糾正，沈志於程志力爲詆諆。一劉氏序云，一披閱舊志見忠烈一門無司石磐而有司邦基，云與孫光烈北向慟哭慷慨殉節死，僅附錄於李幹才樂大章二人之後而無專傳。且又不載其起兵被執事。幾疑石磐與邦基非一人矣。及閱射州文存及新修郡志而知磐石爲邦基字而歎舊志之多陋略。一是本志更於前志有訂正之功也。

晉太康始立鹽漬縣，安帝更曰鹽城，明以來爲淮安府屬縣。

凡十七卷，一工輿地志，三河渠志，四食貨志，五學校志，六武備志，七八職官志，九選舉志，十至十四人物志，十五十六藝文志，十七雜類志。

咸豐江蘇清河縣志二十四卷

附同治附志二卷

咸豐四年知縣吳榮修，山陽魯一同纂。

按其序略知縣志創始嘉靖中知縣吳宗吉，其書久缺佚。及康熙壬子因修一統志之令而知縣鄒興相爲之重修，凡四卷，亦佚。康熙乙亥知縣管鉅再修，亦不存。及乾隆戊辰衛哲治府志成而知縣朱元豐據府志見舊志而釐定之，凡十四卷，始漸美備。乾隆二十七年縣治遷清江浦，三十九年以後河變益多，道光末有修志之議而棠實繼成之。

凡二十四卷，一圖說，二疆域，三建置，四至六川瀆，七八民賦，九學校，十貢舉，十一軍政，十二至十五官師，十六至十九人物，二十至二十二列女，二十三古蹟，二十三藝文，二十四雜記。

清河爲黃淮運交匯之區，本書列萬歷來河口變遷諸圖亦地理沿革之要。縣之始立在宋咸淳九年，卽淮陰故地也。自徙清江浦以來始非舊境。疆域篇云，一自縣治左移，官省吏舍，冠蓋相

望，市廛雜選，浩穰百端，春夏有糧艘之載挽，秋冬有鹽引之經通，河防草土之事，四時之中無日休息，貧民失業，力食致飽，或白手空游而得厚實，民乍富乍貧日月異趣，於是四方游士文人墨客鄭商秦賈奇工異匠總集。一清河盛時，宜有此狀。末附同治四年附志二卷，亦吳棠任漕督時所修也。

光緒江蘇清河縣志二十六卷

光緒丁丑知縣胡裕燕等修，縣人吳崑田山陽魯蕢纂。距咸豐志僅二十餘年也。自云，一河道之更徙兵燹之擾害其爲變故亦云實繁。至於民賦豁減尤爲邑之大政。雖有附篇及再續篇兩次紀載，而首尾不具，使閱者茫無歸宿。今故總督爲一，名曰創始，實皆仍舊，惟於前志空文一皆裁節也。一然吳氏跋盛稱妖人翦辮大王顯靈之事，何識度之卑哉。

凡二十六卷，一圖說，二疆域，三建置，四至六川瀆，七至九民賦，十學校，十一貢舉，十二軍政，十三至十六秩官，十七仕蹟，十八至二十二人物，二十三二十四列女，二十五古蹟，二十六雜記。

光緒安東縣志十五卷

光緒元年知縣金元煊修。前志修于雍正五年知縣余光祖。康熙三十四年雍正五年兩次所修姓氏佚矣。

安東者漢之東海襄賁縣，隋開皇初改名漣水，宋景定中升安東州，洪武以來降爲淮安府屬縣。其地近海多礮鹵，自李全亂後直至咸豐十年捻匪竄境，始有兵革之患。

凡十五卷，一疆域，二建置，三水利，四五民賦，六學校，七貢舉，八九秩官，十至十三人物，十四列女，十五古蹟雜記。

其人物傳必以陳球列首而不以舊志采張雄馮宏鐸爲然。蓋鄉人諱惡之見，橫亘胸中。其實無論雄宏鐸固非必惡人，卽令其惡，豈遂容削而不書哉。

乾隆江蘇桃源縣志十卷

民國六年知事汪保誠重印

乾隆三年知縣睦文煥修，繼康熙二十六年知縣蕭文魯本作也。縣本宿遷之桃園鎮地，金興定二年立淮濱縣，至正十三年改今名，明以來隸淮安府。

凡十卷，一輿地志，二營建志，三四田賦志，五河漕志，六典禮志，七秩官志，八人物志，九十藝文志。

其藝文志錄已作之詩，已屬不讓。乃并其子姪所作而亦列入，直成笑柄。其他更不待言。

嘉慶揚州府志七十二卷

嘉慶十五年知府張世浣等修，奉兩淮鹽政阿克當阿之命也。

按所錄舊序，嘉靖壬寅太僕寺卿致仕郡人盛儀萬歷辛丑知府楊洵康熙甲辰知府雷應元乙卯知府金鎮乙丑知府張萬壽雍正癸丑知府尹會一各一修。

金志有汪懋麟序。其言曰，「執筆其間者不過取舊集而繕錄之，妄有所增益，數月而集成，署其端曰某年某官修，要名而已。以是爲修，何可以爲志。」可謂切中歷來修志者之隱衷，府志修纂之煩，恐亦坐此耳。

凡例云，「舊志采錄正雜各史雖注明出某書，及覆校原文，則臆改甚多。茲所修輯，但有刪節而無妄添。」能道及此，其識趣已自不凡，故本書雖采擷未甚宏博，而語語必有來歷，足爲

傳信之作。

全書七十二卷，一至四巡幸，五建置沿革，六星野，七疆域，八山川，九至十四河渠，十五城池，十六都里，十七津梁，十八公署，十九學校，二十賦役，二十一鹽法，二十二至二十四兵志，二十五六祠祀，二十七冢墓，二十八九寺觀，三十至三十四古蹟，三十五至三十八秩官，三十九至四十二選舉，四十三至四十五宦蹟，四十六至五十九人物，六十風俗，六十一物產，六十二三藝文，六十四金石，六十五至七十事略，七十一二雜志。

廣陵自永嘉南渡以還爲控御三齊之地，嘗使青兗二州刺史鎮此。元嘉中始定爲南兗州治所。隋初置揚州大總管府於此，煬帝制江都太守秩與京尹同，已駸駸有置爲陪都之意矣。自此廣陵專有揚州之名。唐代江南財賦以此爲轉輸樞紐，士女鏃貨之盛

甲於宇內。容齋隨筆論之詳矣。宋元以來迭遭兵革稍復蕭條，然猶爲淮左名都也。清定制領州二縣六，曰江都甘泉儀徵高郵州興化寶應泰州東臺。

同治揚州府續志二十四卷

同治十三年兩淮鹽運使方濬頤修，前浙江巡撫儀徵晏端書前福建巡撫儀徵卞寶第前國子監司業歸安錢振倫同纂。

續嘉慶志而作。原書爲門二十八，今續纂者十九門，僅編纂公牘而已。

凡二十四卷，一二河渠，三城池公署學校，四賦役鹽法兵志，五祠祀冢墓寺觀古蹟，六秩官，七選舉，八宦舉，九至二十一人物，二十二三藝文金石，二十四事略雜志。

乾隆江都縣志三十二卷

乾隆六年知縣五格修，八年知縣黃湘刊成。

據舊序，江都縣志始于嘉慶壬戌知縣趙訥，萬歷丁酉知縣張甯繼修，雍正己酉知縣陸朝璣再修，其後二年而析縣之西北境立甘泉縣故必別修也。

是志仍從陸氏體例而稍加變通，其隸江都者詳著於前析甘泉者附目於後，其有不容割裂者仍備載之。

凡三十二卷，一建置，二星野，三疆域，四山川，五學校，六賦役，七秩官，八祠祀，九軍政，十風俗，十一物產，十二選舉，十三仕籍，十四名宦，十五鄉賢，十六古蹟，十七寺觀，十八冢墓，十九至二十八人物，二十九列女，三十經籍，三十一藝文，三十二雜記。

其卷首繪圖有宋二城圖及宋大城圖，考訂至爲精審，宋敏求呂大防之次也。全書類皆摘比故書中關於廣陵事而成，頗似朱彝尊日下舊聞體裁，然風俗篇云，一舊志有冠服讌會二條皆瑣屑無關典要，故略之。一不知民間習尚最宜詳紀。又雜紀篇采宋明人小說多有關揚州故實而晦其出處。抑其失計處也。要之其考古之功有餘而史識未足也歟。

嘉慶江都縣續志十二卷

嘉慶十六年知縣范溱盛刊，（光緒續志表作臻盛蓋光緒志偶誤也，）前任王逢源屬前揚州府教授李保泰撰也。

是編以續爲名，蓋悉依前志編纂。若建置星野山川風俗物產等門皆未綴入。保泰以儒官久寓其地，所聞閭巷故事自多。參以所見詩文雜記諸書，頗能浚洽。雖不以史裁見長，故識小之錄

也。錄其論揚志二則於左。

揚志書以寶祐志爲最，舊間見于各家所引，今已不可得矣。文淵閣書目內舊志有維揚志十五冊廣陵志五冊，新志有揚州府并屬縣志，則皆元時及明初所輯。已一概無存。世共推盛太常儀嘉靖維揚志，尙有流傳，而盛志前三十餘年有郡人趙副使鶴所著郡乘正要，盛志大略本之。曾見趙志于秦敦夫太史處，殆僅有存者。前志以盛志爲二十卷實三十八卷，趙志爲八十卷實祇三十六卷，俱係傳襲之訛。當由未經目見故也。江都有陸貢士弼所輯志，最簡核不苟，若康熙中李志則陸志固已議其多濫矣。

編輯既畢，視續甘志之成已越一年餘矣。亦已力祛重複，仍不免間有互出者，則勢相聯也。觀江左分邑之志，其近出同

城如常之宜與荆溪蘇之常熟昭文與崑山新陽皆係合志體裁較得。乾隆壬寅癸卯間甘泉曾擬修志，延餘姚邵太史晉涵主筆，邵議始自分邑之日，其前統屬江都者悉刪不載。裁斷殊有見。而因襲既久，事尋中輟。今二邑但並續前，各仍其類，亦體例當然也，後有君子重加訂定，庶合志爲得其衷爾。

光緒江都縣續志三十卷

光緒九年知縣謝延庚修。

延庚會稽人，其序詞甚嫻雅。體例亦正。凡三十卷，記之屬曰聖澤記大事記，表之屬曰官師年表選舉年表女行旌門表咸豐三年以來兵事月日表職官殉城表軍營鄉團死事表士民殉城表婦女殉城表，考之屬曰建置考河渠考民賦考鹽法考學校考兵防考祠祀考名迹考藝文考，傳之屬曰列傳寓賢列傳列女列傳，曰拾

補。

其特創之式若女行旌門表，第一格爲受旌年月，第二格爲節孝而孝婦孝女附，第三格爲節婦而貞女附，第四格爲烈婦而烈女附，其明季及瓜洲海氛各次殉烈婦女則別爲表。其善有三，年月可稽一也，事蹟可詳二也，地位可省三也。

又若兵事月日表以年月爲經，以將帥爲緯，而分城守東路南路西北路，與大事記相輔而行，可得詳略互見之效。皆創例之善者。

其補前志之未及者，則鹽法考也。其言曰，一前志僅書食岸引課之數，蓋以事不領於縣官，又鹽法已有官書耳。縣之當志鹽法，義與旁郡縣異，今雜采官書及接於聞見者書之。一按其所述，於咸豐同治間淮岸鹽法之更張，積牘數千而不能舉其委曲者，僅費數紙而如指諸掌。非工於文而長於史者不能爲也。

至於祠祀考之統諸神以天神地示人鬼之義，藝文考甄錄前志所遺書目三百餘種，皆卓然有異於凡手所爲焉。

光緒甘泉縣志十卷

光緒六年知縣徐成敷修。

甘泉自雍正十年析江都縣置，取境內甘泉山爲名。乾隆七年知縣吳鄂時始縣修志，及嘉慶十五年知縣陳觀國續修，蓋其時方修府志徵志於屬縣也。陳志有李保泰序，卽續修江都縣志者。縣爲新析，往事無從強割，故與江都分限爲難。大抵未析縣以前事實統收，旣析縣以後則專取屬於甘泉者，此乾隆志之主旨也。嘉慶續修時僅爲續志別行，而原志不之變易，蓋其謙慎。本書之修也，志已亡失。百計搜求，僅得一部，故不得不先列原志，次列續志，更次列新增，其新增諸款則大抵取諸同治府

志而益以采訪所得也。

凡十卷，一考正，二葺補，三祥異城池橋渡水利河防賦役軍政鹽法，四學校職官廨宇選舉，五名宦祠祀寺觀古蹟塚墓，六人物忠節孝友篤行文苑寓賢方技方外，七列女碑碣經籍，八九藝文，十叢綴。

原志仿日下舊聞體至爲精審。蓋據志云乾隆壬寅癸卯間初延童鈺至揚，將開局而童卒，復延邵晉涵主之，又得縣人黃文暘助理。其時物力富盛，文學昌明，固自不苟。然今志所糾尙有引用錯謬處，以此知著書之不易也。

揚州自唐中葉爲商胡麇集之處，杜詩「商胡何日下揚州，憶上西陵舊驛樓，爲問淮南米貴賤，老夫乘興欲東游」，一可見當時僑商操縱之勢力。田神功之變，慘殺至數千人，其人數之多又可驚也。本書引庶齋老學叢談，一揚州之西有園，西域人種植

，每歲以無花果醞醋供御案，內則注無花而實者名楠。江東人以楊梅煎汁飲之，內則名醞，桃諸梅諸，諸即苴也。又曰濫，即乾櫟也。一又稱一按本草果部無花果引酉陽雜俎云，阿翹出波斯拂林，人呼爲底珍，方輿志云，廣西優鉢不花而果，狀如枇杷，皆卽此物也。今摺紳錄載以爲揚州土產，究之不專產揚。觀叢談此條，其來有自，然不聞有醞醋者。一此則西方植物移植揚州，足爲僑民影響之證。又引焦氏叢書，一元末經張士誠之亂，洪武定戶江都止存十八家，其最著者火郝二姓，北湖火家洪郝家樓其聚族處也，今二姓他徙無一存者。一火姓亦疑西方人姓氏也。

甘棠小志四卷

咸豐五年甘泉董恂撰。

甘棠者甘泉縣所轄，邵伯鎮之別名。董氏生於其地，故取而志之，仿焦循北湖小志例也。故其序卽引阮元序北湖小志之語曰，一使各郡縣數十里中皆有一人載筆以志其事，則郡縣之志可不勞而成。一偉哉是言，其所成就雖未副斯旨，固倬然異乎尋常之作矣。

凡四卷，一記建置，二記運道，三記湖瀦，四記河渠，五記修防，六記坊鋪，七記里巷，八記村鎮，九記祠廟，其建置記首駭焦循今召伯鎮非古召伯埭之說。於疆界四至之外，歷述鎮之今狀，而以昔時沿革證之。其運道記述運河水道之移徙，湖瀦記述邵伯黃子赤岸新城白茆朱家六湖上承高寶諸湖旁受西山之水以入運濟漕者。河渠記述運河以外之溝渠，修防記述隄工制度，坊鋪記述保甲制度，里巷記述街市之今狀，兼詳其歷史，略如京師坊巷志體例而加詳。村鎮記祠廟記纖悉必綜篇簡尤繁

焉。露筋祠爲唐宋以來其地名蹟。其本事足爲近古社會對於禮教觀念最強之表現也。

綜其全書，獨於人物風俗未及一字。其跋云，昔宋樂子正史撰太平寰宇記，譏賈航漏落李吉甫缺遺，蓋病十道述元和郡國志未叙人物，於是所撰記於地里外編入姓氏人物風俗數門，因人物又詳及官爵並詩詞雜事。陽湖洪亮吉序此記，以爲樂所撰若此，遂致祝穆等撰方輿勝覽，寧略建置沿革而人物瑣事必登載無遺，實皆濫觴於此，意多不滿。於是洪所自撰乾隆府廳州縣圖志槩不旁及人物，醇維山川道里實天地之自然，要必有人焉以經緯之而後卽其習尚以成爲風俗人物，亦烏可不記。天下方有事，不獲久居鄉里，爰屬吾二三知舊凡有忠孝節廉文武英特以及隱逸方外一材一藝代疏狀略彙存，采訪略備當踵成之。一則董氏亦有志焉而未逮也。

康熙儀真縣志二十二卷

康熙五十七年知縣陸師撰。

其序曰，一始到官即取縣志閱之，舊者體例善而事不續，新者件目具而義未精。一今按所錄有嘉定真州志序，嘉定間楊子令丁宗魏等奉府命卽舊志增修者。所謂舊志則紹熙間韓志也。有嘉靖儀真志序，則嘉靖戊戌知縣孫仲所修也。有隆慶儀真志序，則隆慶元年知縣申嘉瑞所修也。有崇禎新志序，則崇禎十二年知縣姜燦所修也。有重修儀真縣志序，則康熙七年知縣胡崇倫所修也。有增修儀真縣志序，則康熙三十二年知縣馬章玉所修也。

按其體例頗爲殊特。卷一舊序及圖說，二三沿革及秩官表，四選舉表，五六建置志，七八九山川志，十十一民賦志，十二學

校志，十三軍政志，十四五祠祀及藝文志，十六至十八名蹟及祥祲志，十九至二十二列傳。

綜其大體典贍而具史裁，一洗明季濫習。方其時乾嘉史學家未出，而陸氏得風氣之先，可謂豪傑之士矣。陸氏歸安人，康熙十四年進士。據王芑孫媿雅堂集稱其令儀真時，故事上官往來驛夫臨時取給鋪戶，倉卒滋擾，師一切革去，但令鋪戶日賦一錢歸驛，不勞而事辦，與本志所載其自撰清單記相合。單者額設夫馬，官不能應，遂取辦於民，視其貨物多寡行戶肥瘠給單認差輸錢應役之謂也。又稱其以行取遷京秩擢御史授堯沂曹道未幾卒，在京師與方苞儲在人何焯友善，尤善張伯行。宜乎政事文學卓犖不凡，能出賢有司之緒餘爲此佳志也。

縣地爲唐揚子縣之白河鎮，五代爲迎鑾鎮，宋初升爲建安軍。大中祥符中再升真州，其鑄聖像之地建爲儀真觀。由是政和中

賜名儀真郡，明改爲縣，清屬揚州府，雍正以後避嫌名改真爲徵。此其沿革大略也。

儀真爲五代以來重鎮，漕鹽之利所萃。迄於近代不衰。故史料甚豐。尤以建置志中所述古建築始于唐揚子巡院，詳稽博攷纖悉無遺，唐兩京城坊考日下舊聞而外殊所罕見。惟圖說與此互相發明，而析置數卷之外稍未愜耳。

其崇尚禮儀二篇亦頗存史料。如云。

「邑在明初風尚誠樸，非世家不架高堂，衣飾器皿不敢奢侈。若小民咸以茅爲屋，裙布釵荆而已。即中產之家前房必土墻茅蓋，後房始用磚瓦，恐官府見之以爲殷富也。其嫁娶止以銀爲飾，外衣亦止用絹。至嘉靖中，庶人之妻多用命服，富民之室亦綴獸頭，循分者歎其不能頓革。萬歷以後，迄於天崇，民貧世降，其奢侈乃日甚一日焉。」

名蹟考搜采唐宋人詩文，至富。每條注明今無考或今廢之語。實歷來諸志所不及，而亟宜取法者。

民賦考中述明代戶籍之制，引舊志云有民戶軍戶匠戶寄籍官戶校尉戶力士戶漁戶船戶紅船戶僧道戶醫戶。清制有民戶匠戶屬縣，有軍戶屬衛。其客戶外戶有田地墳墓者二十年准其入籍，俱爲民戶。無田地者曰白水人丁。亦可存也。

據阮元道光儀徵縣志序云，嘉慶修顏志時余屬江君鄭堂別爲校補陸志一卷，今載道光志卷尾，其所掇拾多有可觀。然不能舉其甚大之疵也。

道光儀徵縣志五卷

光緒十六年邑人張丙炎重刊

道光三十年知縣王檢心修。

前有阮元序曰，一史家之志地理昉於漢書，其志首列禹貢全篇

次列周禮職方氏，然後述漢時疆域。蓋舊典與新編前後相聯而彼此各不相混，乃古人修志之良法。是故益部耆舊傳及豫章舊志俱有續撰之作。此分爲二部而顯示區別者也。襄沔記及劍南須知均係哀集以成。此合爲一書而明注出處者也。上溯漢晉，下迄宋元，舊式具存，昭然可考。明代事不師古，修志者多炫異居功，或蹈襲前人而攘善掠美，或弁髦載藉而輕改妄刪，由是新志甫成舊志遂廢而古法不復講矣。四庫全書地理類都會郡縣之屬首載吳郡圖經續記，又載寶慶會稽續志至正金陵新志，皆取其分析詳審斷限謹嚴，故特爲錄存俾修志者知所取法也。嘉慶丁卯余讀禮家居，邑侯顏公議修儀徵縣志，余舉昔賢修志之例以告，勸其但續新志而舊志不必更張。道光戊子告返里，同邑諸君復議重修縣志，商之於余。余告以欲得新志之善必須存留舊志。當於各門之中皆列申志於前，（原注隆慶元

年知縣申嘉瑞所修，凡十四卷，邑志之現存者以此爲最古。）次列胡志，（原注康熙七年知縣胡崇倫所修，凡十二卷，先是崇禎十二年知縣姜琛修志十卷，書成而未刻，胡公得其遺稿爲之增修。）次列馬志，（原注康熙三十二年知縣馬章玉所修，其書全以胡志爲本。）次列陸志，（原注康熙五十七年知縣陸師所修。）次列李志，（原注雍正元年知縣李昭治所修，凡三卷，項綱序云，續成得三十，方擬開雕，不意遽歸道山，嗣君擇其切要者錄爲一編，據此則李志本不止三卷，今所刻者摘錄陸志未載之事耳。）次列顏志，（原注顏志凡例云，邑人程檢討元基暨諸生陶鑑草志二十三卷，迄乾隆三十八年而止，今采擇成書，是顏志所補者乃乾隆三十九年以後之事也。）然後再列新增。凡舊志有異同則詳注以推其得失，新增之事蹟則據實以著其本原。其舊志缺漏舛譌有他書可以訂正者，別立校補一類：

昔陸澄集地理志一百六十家，任昉又增廣八十四家，至唐初修經籍志，存者僅四分之一，餘皆賴陸氏任氏之書以傳。是書之單行者雖亡而彙纂者仍在，則其文猶可考也。儀徵志乘修於宋南渡以後者有紹熙嘉定兩志，（原注紹熙志七卷，知真州韓槌州學博士蔣佑編，嘉定志二十二卷，知真州吳機揚子縣令丁宗魏修，真定錄事參軍張端義補修。）今皆散失不存。（原注嘉慶己巳冬余在翰林院檢永樂大典，見其中有紹熙儀徵志嘉定真州志，命小史抄一副本，藏諸篋笥。道光癸卯春里第爲鄰火所焚，此書遂遺失。）修於明中葉以前者有永樂正德嘉靖三志，（原注永樂志七卷，縣學教諭胡彥成修，正德志二十四卷，知縣李文瀚修，嘉靖志六十四卷，知縣楊孫仲修，據嘉靖志序則正德志未及刊行嘉靖志即因此增輯。）今亦尋訪不獲。良以未經舊萃，遂致湮沒無傳耳。若夫舊志之存於今，申志胡志馬志

李志久已無版，卽陸志顏志之版亦漸覺殘損不完，更歷數十年，恐亦如紹熙諸志之佚矣。所幸新修之志包括舊志於其間，學者讀此一編卽可見諸志之崖略。其有裨於掌故，豈不偉哉。一明人好毀前志以爲新製，往往捫拾一二細故，顛倒變易以自矜張，必使前志泯然無存而後快。陋習相沿，莫之或悟。故志彌多而彌不能傳。阮氏此論足爲俗流棒喝。其所述前志源流遠勝陸志，故全錄於右備參稽焉。

又據同治府志稱尙有嘉慶十三年知府伊秉綬修廣陵圖經未見。書凡五十卷，一二建置志，三至九輿地志，十一河渠志，十二至十五食貨志，十六至十八學校志，十九二十祠祀志，二十一至二十三武備志，二十四至二十六職官志，二十七至二十九選舉志，三十至四十三人物志，四十四四十五藝文志，四十六四十七雜類志，四十八舊志序文，四十九舊志論贊，五十校補

陸志。

嘉慶高郵州志十一卷

道光二十五年知州范鳳諧重刊

嘉慶十八年知州馮馨據乾隆楊志增修。

據舊序高郵志在明初遠莫可稽，厥後一修於隆慶六年，一修於康熙二十二年，一修於雍正二年知州張德盛，一修於乾隆四十八年知州楊宜崙，本書即楊氏修本。其凡例云，「州志自宋魯穎秀以後明成化以前各志版冊無存，今只就隆慶志及康熙二志增定，其中間有移易，止期便於覽觀，非求新於耳目。」至新增各條，則但視舊版之分合，或分入各門，或統入卷末，以增修二字別之。故覈其實仍宜題乾隆志也。

高郵漢縣，宋爲承州，元爲高郵路，尋改府，明爲州屬揚州府。

書凡十二卷，一輿地志，二河渠志，三民賦志，四食貨志，五學校志，六典禮志，七軍政志，八秩官志，九選舉志，十人物志，十一藝文志，十二雜類志。

其中風俗屬於典禮志漕運屬於軍政志頗未盡當。

道光續增高郵州志

附再續志八卷

道光二十三年知州左輝春修。其凡例云，「乾隆四十八年修志，後嘉慶十八年增修，今又三十年。」故謂之續增州志也。又云，「此次續增州志，前志未及詳者補之，昔無而今有者續之，昔是而今非者易之，其原目所列，至今無可增損，如星野疆域之類，概不重載。」

凡爲六冊，一天章等，二輿圖等，三秩官等，四人物等，五六藝文等。

後附再續州志八卷，光緒九年知州龔定瀛修，編修州人夏子鏞纂。其書雖別起義例，而前志所已載者亦不再錄。一輿地志，二河渠民賦典禮軍政學校志，三秩官選舉志，四五人物志，六藝文志，七善舉災祥軼事志，八禁革志。

其善舉志所載實與建置中之育嬰堂養濟院無殊，而禁革志專紀禁火葬溺女諸公牘尤爲無謂。諸如此類，皆應專立社會風俗一篇，而以舊志中之風俗入之，斯一邑之民風如指諸掌矣。今求其義而不得，則漫增名目，適以亂例而已。

咸豐興化縣志十卷

咸豐元年知縣梁園棣修，編修劉熙載等纂。

據舊序，萬歷十九年知縣歐陽東鳳始修，康熙二十三年知縣張可立重修，歐志以前尙有胡志則已佚也。

興化本海陵縣地，楊吳始立縣，屬江都府，明以來爲揚州府屬縣。

凡十卷，一輿地志，二河渠志，三食貨志，四學校志，五武備志，六秩官志，七選舉志，八人物志，九藝文志，十雜類志。用江南通志體也。然藝文分古文詩賦等目已屬舛陋，乃復以明代誥敕列於古文，彌爲可怪。

道光寶應縣志二十八卷

道光辛丑知縣孟毓蘭修。

其凡例曰，一縣志始於嘉靖時縣令聞人公詮，著志略六卷，范氏天一閣有藏本。萬歷間吳南華敏道等撰志十二卷，康熙間喬石林萊等撰志二十四卷，兩書並存。一題曰重修，蓋續喬志而作。故多錄原文也。

寶應在南朝爲陽平郡之安宜縣。唐上元三年獲定國寶於縣，遂更爲寶應。宋寶慶中升州，元仍爲縣，明屬高郵州。清降高郵爲散州，遂爲揚州府屬縣。定國寶者，見於酉陽雜俎。刺史鄭輅有寶應錄記其事。

凡二十八卷，一建置沿革等，二山川等，三公署等，四園圃，五祀典等，六水利等，七舖莊等，八田賦等，九災祥等，十十一秩官表，十二十三選舉表，十四武選，十五名宦，十六十七列傳，十八循良等，十九文苑等，二十二十一列女，二十二金石，二十三至二十七藝文，二十八摭記異聞。

縣有射陽湖，又運河經其境八十里，舟楫鱗萃，渠牕縱橫。志於水利頗致意焉。但其列傳組織史傳以成文而不著取裁所自，轉不如前志悉用原傳者猶爲妥慎。自其大體言之，蒐羅翔博而妙空言濫載，終爲近志中之佼佼者。

道光秦州志三十六卷

道光間知府王有慶等修。

志既刊成，州紳於明倫堂聚議，謂州學正梁桂等吞漁志局公款，人物一門不協輿論，並指出高鸞嫡支十三人並無科名事蹟實據，濫登十二，又以鑾母入孝婦祖母入賢婦，竟成高氏家乘，稟官揭發。嗣經多年，仍未改定。於是仿毛西河蕭山縣志刊誤之例訂爲秦州新志刊謬兩卷，並刊登同學公啓於卷首。

按舊序州志始于天啓甲子知州翁延壽，然據藝文篇則正德志八卷知州金廷瑞修，嘉靖志州人全英修，萬歷志十二卷州人章舉修，蓋皆佚也。崇禎癸酉州人右參政劉萬春又修，雍正戊申知州諸世暄又修，本志卽繼諸志而作也。

其邑人公揭之語詳檢實無佐證，而所云刊謬兩卷亦無其書，不

知何緣書此空名。鄉里人物易啓爭端。首由秉筆者不能豁大公之心，而鄉人亦不盡解志乘之真意。故爲避口實計，莫如公延卓具史識而與本邑無關之人主持志事爲善也。

晉安帝時始置海陵郡海陵縣，南唐升爲泰州，清爲散州隸揚州府。乾隆三十三年分州東北境置東臺縣。

凡三十六卷，一建置沿革，二疆域，三山川，四河渠，五風俗物產，六城池，七公署，八學校，九人丁田地雜辦解支屯田賦役，十軍政，十一鹽法，十二祠祀，十三四秩官，十五選舉，十六封蔭，十七事略，十八寺觀，十九古蹟冢墓，二十名宦，二十一至二十七人物，二十八二十九列女，三十至三十三藝文，三十四金石，三十五雜志，三十六舊序。


嘉慶東臺縣志四十卷

嘉慶二十一年知縣周右修。

東臺本泰州境，自乾隆三十三年始分壤爲縣，其所轄卽舊隸秦州分司之中十場也。

凡四十卷，一縣境諸圖，二建置沿革表，三四職官表，五選舉表，六建置沿革，七星野，八疆域，九城池，十一水利，十二學校，十三祠祀，十四官署，十五風俗，十六賦役，十七軍政，十八鹽法，十九物產，二十名宦，二十一忠節，二十二孝友，二十三仕績，二十四儒林，二十五文苑，二十六篤行，二十七尙義，二十八壽考，二十九隱逸，三十流寓，三十一方技，三十二三列女，三十四古蹟，三十五寺觀，三十六至三十八藝文，三十九撰述，四十雜記。

縣之建置旣晚，撰志者無所依據，不得不取材於府志州志場志，兼錄案牘而成。卷帙雖多，立目殊爲叢碎也。



同治徐州府志二十五卷

同治甲戌徐海道吳世熊知府朱沂修，內閣中書南豐劉庠候補直隸州知州陽湖方駿謨纂。

其叙稱徐志不知所自始，明時宏治嘉靖萬歷間皆掇輯之，書已散佚，至順治十年淮徐兵備胡廷佐知州余志明重修，康熙六十年知州姜焯復輯之，乾隆七年改州爲府，知府石杰虞山王峻同纂府志。本志繼石志而修也。

凡二十五卷，一宸翰，二爲圖之屬，曰徐州府全境圖銅山等縣境圖徐州府城等圖，三至九爲表之屬，曰晷度表沿革表紀事表職官表爵封表選舉表人物搜古表，十至二十爲考之屬，曰輿地考山川考田賦考河防考祠祀考學校考建置考兵防考古蹟考經籍考碑碣考，二十一至二十三爲傳之屬，曰宦績傳人物傳列女傳

，二十四志餘，二十五叙錄。

其人物搜古表爲特創之格，蓋以故書中徐州人物有姓名而無事蹟者難於立傳，則別爲此篇，用此法以馭史傳之繁，可以省文而博載也。然所采路史所記漢高祖父祖之名實鄰誣濫。

至其排列之大綱，先表而後考，而後傳，則輿地與沿革不能相應，人物與選舉不能相應，此種牽制實足爲全體之累，則泥於表列考傳之前之誤也。

萬歷徐州志六卷

萬歷中蕭縣教諭姚應龍等修而不箸刊行年月。

觀選舉表人名止於萬歷四年，知其編於是年以後也。

徐州在明爲直隸州，轄蕭沛碭豐四縣，其時未立彭城縣。學部志目有正統彭城志寫本一冊，蓋取古地名而名之耳。

其目曰第一卷州總圖一，州境圖一，州治圖一，縣境圖四，縣治圖四，沿革星野疆域形勝風俗山川城池，第二卷古蹟土產職官公署學校，第三卷兵防漕政河防賦役，第四卷祀典選舉宦蹟，第五卷人物，第六卷封建災祥方外雜記。

自云纂修規式具遵大明一統志，間有不合者，亦以郡縣之編書不嫌加詳也。

其人物不載漢高祖梁太祖而載其昆季。卷六雜記中略載高祖佚事。關於燕子樓之詩篇分載古蹟雜記兩卷中。皆翦裁未純者。

道光銅山縣志二十四卷

道光十年知縣崔志元修。

雍正十一年升徐州爲府，置銅山縣，又十餘年知縣張宏運成縣志。據本志凡例云，舊邑志仍府州志爲之，其間多有抄襲舛誤

者。則創始之難也。

凡二十四卷，一分野等，二山川等，三河防，四賦役物產，五學校，六兵制，七壇廟官署，八古蹟，九十職官，十一十二名宦，十三選舉，十四十五人物，十六十七列女，十八至二十二藝文，二十三祥異，二十四雜紀。

嘉慶蕭縣志十八卷

嘉慶十九年知縣潘鎔修。

據舊序，萬歷中有知縣康煒輯志二卷，康熙二十七年知縣閻允吉就前任祖永勳稿續修成十二卷。

蕭爲春秋時國，秦漢以來爲縣，未之或改也。北宋河決滑州，東南流至彭城，直至咸豐間北徙之日，縣當河流之衝，故宣防之政爲此縣當務之急。

凡十八卷，一星野等，二形勢等，三河防，四賦役，五物產，六學校，七公著等，八職官，九選舉，十封爵，十一名宦，十二十三人物，十四列女，十五至十七藝文，十八祥異等，就中沿革紀事諸篇皆精心蒐采而成者，然其引水經注蕭縣南對山已爲同治志所糾矣。

同治續蕭縣志十八卷

同治十三年知縣顧景濂修，縣人河南河陝汝道河南糧儲鹽法道段廣瀛同纂。以續爲名，故前嘉慶志所已載者不再列。

凡十八卷，一縣境圖，二職官年表，三選舉年表，四疆域志，五河渠志，六田賦志，七營建志，八學校志，九十兵防志，十一循政志，十二十三人物志，十四十五列女志，十六十七藝文志，十八雜錄。

中如疆域志所補山水古蹟考足爲前志爭臣。兵防志之采錄咸豐中團練始末，殊有關係。

光緒續蕭縣志十八卷

光緒元年知縣顧景濂修，河南河陝汝道縣人尹耕雲同纂。

據序前志修于嘉慶甲戌知縣潘鎔，茲編一依其例。故曰續志。凡十八卷，一縣境圖，二職官年表，三選舉年表，四疆域志，五河渠志，六田賦志，七營建志，八學校志，九十兵防志，十一循政志，十二十三人物志，十四十五列女志，十六十七藝文，十八雜錄。

其已詳於潘志者概未重列，例如山水一門僅將名稱錯互疎於討論者爲考辯之，附疆域志。其他多以公牘原文錄入，雖乏鎔鑄之工亦善存故實之一法也。

光緒豐縣志十六卷

光緒甲午知縣姚鴻杰修。

據舊序稱正德中知縣裴爵草創志稿，乾隆二年知縣尹梓編成之。順治初年知縣閻昭重輯。至乾隆二十四年知縣盧世昌道光三年知縣德豐各修一次。

凡十六卷，一封域類，二營建類，三四職官類，五賦役類，六學校類，七選舉類，八至十一人物類，十二十三藝文類，十四祠祀類，十五古蹟類，十六紀事類。觀其體例蓋等於類書之纂組，惟末卷附咸豐戊午兵事始末一篇差可傳也。

豐在秦屬沛縣，漢高祖以邑人起爲帝王，遂置縣至今。隋唐以來屬徐州，元屬濟寧路，明初復隸徐州。

咸豐邳州志二十卷

光緒十年知州楊激雲重校本

咸豐元年魯一同撰。

據其後序，邳州志創自明嘉靖中者曰陳志。修於康熙十二年者曰蔣志。今並無傳。今所傳者一成於康熙三十二年，再成於乾隆十五年，三成於嘉慶十五年。此編肇始於道光三十年，成書於咸豐元年，相傳推爲良志。然考其編目第一卷疆域寥寥五紙，舉建置沿革天文分野民風禮俗物產之宜無不包焉。其於行文誠便矣，奈非史體何。第二卷沿革，按其實際正當名曰編年事紀，乃稍相符。號曰沿革，則殊與前卷之首葉蹈疊牀之誚。此姑無論矣。卽就所謂沿革而言，其末段唐末屬朱梁宋南渡屬金屬宋屬元明初屬張吳數語，直令人如墮五里霧中莫名其妙。一同號工古文詞者，乃爾爾邪。然第三卷建寅，分叙舊城新城，

蓋舊城毀於康熙七年之大水，新城則成於康熙二十八年。此編據淮安志等書存舊城之可考者，不沒故蹟。其善一。舊志有祭祀，或云壇廟，或云祠祀，今悉附入建寅以省繁文。其善二。第四卷山川，以運道河防附。第五六卷民賦。第七卷學校，以貢舉藝文附。州不以文著，故藝文不能成篇，因事制宜，固其所也。第八卷軍政。自第九至十二卷皆官師。累牘連篇，幾占全書之半，或約取舊文，或僅存名姓。又或繫以褒貶，軼出範圍，無畫一之方乖謹嚴之意，非所語於史例矣。第十三至十五皆人物，凡史傳所已有者則全錄舊文，史傳所未載者則僅繫短語。詳於古而略於今，正與章實齋氏之宗旨相反，不足爲訓，奚復可疑。自第十六至十八皆列女，與人物一篇等量齊觀，知其剪裁實爲非當也。卷十九古蹟而以金石附，卷二十雜記以納無所繫屬之各條。然按其義類，宜入編年事紀也。